



元

憲

集

一






成集書叢


編初

者編主
五雲王

行發館書印務商



元 憲 集
(一)



宋 庠 撰

本館據聚珍版叢
書本排印初編各
叢書僅有此本

御製題元憲景文集並各書其卷首

宋庠宋祁兄弟同負盛名且同舉進士時以大小宋並稱乃其官位一至宰輔一為尚書事業所就既殊情性亦奢儉各異故其詩文沈博新警因名隨其性之所近而為世所傳誦則同及戒其子不令刊類文集行世亦同迨其後雖經合刊繼而仍歸散佚又同茲復哀輯成集並以聚珍版印而流傳之又無弗同其同不同之故庠與祁固無能知之余亦烏從而知之然其散也由于自欲韜晦而其聚也幸有永樂大典之僅存佚之于七百餘年前宋天聖至今七而完之於三百餘年以後明永樂至今三則又復歸于同余因合題一詩並冠于兩集簡首更使之不同而同則向之所謂同不同者皆可勿深論是之謂大同

二宋合刊會紀王宋嘉定間郡守王允初倡議欲合刊二宋集以屬郡文學惜哉分集失傳詳學如有本終難晦行不負言久益彰伯也孤風標雅操仲兮強識富文章雖稱儉過及奢過弗愧元方與季方收拾碎珍得全册吟題七字冠前行休嗤大典紛割裂愛禮幸茲存籙羊

083
114
2:1868

原序

荆湖之間。國朝以來。安州爲望郡。名公鉅卿。相繼而出。元憲景文。宋公伯仲。則其傑也。昔太守今右司李公。揆繪其像而立之祠。逮之強之來。請于郡而春秋致祭。亦可以夸示後學矣。然宋公之典型雖在。而文集不傳于鄉郡。謂之闕典可也。寓公李令尹之家。舊有繕本。太守今都運王公允初。昔爲通守。每與之強言。欲借而刊之。未能逮。持節京西。于其行以帑藏之餘。幾千緡。屬之強與之錢本。以廣其傳。又分數冊。以往。將以速其就也。然考之二集。旣富且贍。其言八十餘萬。工以字計。爲錢幾四百萬。米以石計。百有二十。他費不預焉。之強懼其難成。而白之。今太守陳公芾。公一聞之。欣然謂之強曰。是亦予志也。郡當瘡痍之際。而爲後。雖賑恤施予。日不暇給。然亦當輟他費以成之。二公政事文章。兩極其至。故能于倥傯艱難之際。而爲粉飾治具之舉。其與蓄財而不知予。妄費而不知用者。豈不大有逕庭耶。之強深有感焉。因其成也。書之篇首。以告來者。若夫贊元憲景文之鉅篇大作。則有國史在。于前輩之鋪張揚厲。而爲之序。則之強晚生。不敢措辭。觀是集者。自當知所敬歎。今之序。姑記其文集之傳云爾。嘉定二禩三月上澣。郡文學陳之強序。

083
112
1868

元憲集目錄

卷一

賦八首

卷二

五言古詩四十六首
七言古詩五首

卷三

五言律詩七十四首

卷四

五言律詩六十九首

卷五

五言律詩七十二首

卷六

五言律詩六十二首

卷七

元憲集 目錄

五言長律二十九首

卷八

五言長律二十九首

卷九

五言長律三十四首

卷十

七言律詩四十八首

卷十一

七言律詩五十九首

卷十二

七言律詩五十五首

卷十三

七言律詩五十六首 七言長律一首

卷十四

五言絕句六首 六言絕句一首 七言絕句七十五首

卷十五

七言絕句八十四首 帖子詞十五首附

卷十六

頌四首

卷十七

頌十五首

卷十八

表四十四首

卷十九

表二十四首

卷二十

外制三十二首

卷二十一

外制三十四首

卷二十二

外制二十六首

卷二十三

外制三十四首

卷二十四

外制三十七首

卷二十五

外制四十三首

卷二十六

外制五十四首

卷二十七

內制四十八首

卷二十八

內制三十首

卷二十九

內制三十首

卷三十

內制七十七首

卷三十一

劄子七首

卷三十二

答內降手詔八首

卷三十三

行狀二首

卷三十四

墓誌銘四首 墓記三首 祭文一首

卷三十五

祝文十四首 狀一首 序五首

卷三十六

記二首 碑銘一首 連珠一首 論一首 說一首

臣等謹案元憲集宋庠撰。庠字公序。開封雍丘人。天聖二年進士第一。歷官檢校太尉平章事樞

密使封莒國公。以司空致仕。元憲其諡也。事蹟具宋史本傳。史稱庠所著有國語補音三卷。紀年通譜十二卷。別集四十卷。掖垣叢志三卷。尊號錄一卷。今惟國語補音有傳本。已別著錄。餘書與文集並佚。永樂大典修于明初。距宋末僅百餘年。舊刻猶存。故得以采錄。而庠文章淹雅。可取者多。故所載特爲繁富。今以類排比。仍可得四十卷。因內有青詞樂語。不合文章正體。謹遵旨于刊本中刪削不錄。共存三十六卷。方回瀛奎律髓載夏竦守安州日。庠兄弟以布衣遊學。席上各賦落花詩。竦以爲有台輔器。趙令疇侯鯖錄亦云。二宋落花詩。爲時膾炙。今考庠詩所謂漢臬佩冷臨江失。金谷樓危到地香。祁詩所謂將飛更作回風舞。已落猶成半面妝者。特晚唐濃艷之格。實不盡其所長。祁集有和庠赴鎮圃田遊西池作。極稱其長楊獵近寒鵲吼。太液歌殘瑞鶴飛句。嘆其驚邁。蔡絛西清詩話亦稱之。又載其許昌西湖詩。鑿開魚鳥忘情地。展盡江湖極目天。曠古未有。然集中名章雋句。絡繹紛披。固不止是數聯也。文章多館閣之作。皆溫雅瑰麗。颯颯乎治世之音。蓋文章至五季而極弊。北宋諸家。各奮起振作。以追復唐賢之舊。穆修柳開以至尹洙。歐陽脩。則沿洄韓柳之波。庠兄弟則方駕燕許之軌。譬諸賈董枚馬。體製各殊。而同爲漢京之極盛。固不必論甘而忌辛。是丹而非素矣。陳振孫稱景文清約莊重。不迨其兄。以此不至公輔。今觀其集。庠有沈博之氣。而祁多新警之思。其氣象亦復小殊。所謂文章關乎器識者歟。書錄解題及文獻通考。俱載是集。通考于是集之下。又附註曰。一作混中集。其名又異。然永樂大典實祇標元憲集。則非混中集甚明。故今仍舊曰。不取通考。

之名焉。乾隆四十六年七月恭校上。

總纂官內閣學士臣紀昀

光祿寺卿臣陸錫熊

纂修官司經局洗馬臣劉權之

元憲集卷一

賦

乾元節賦

炎歷四世天子坐法宮。憲宗軌深根寧極。遠聽高視。其仁如天。其道如砥。麀麀穆穆。爲綱爲紀。方且秋駕軫慮。宵衣致治。標甲臥鼓。張旃厚篚。至和薰而桀鶩革。鴻澤淪而黜蠹暨。龜龍宅沼。牛羊避葦。民遠于罪。畫衣冠而知禁。吏久其職。保子孫而爲氏。禮無未補之闕。樂有旣盡之美。日月之所燭。霜露之所墜。舉鍾延頸。莫不率俾。而乃辰居乎螻。獲宇泰乎醴。粹起真想于黃庭。迺慶源于赤水。陶鈞之所獨運。聲教之所橫被。遐哉邈乎。越不可載而已。先是有司。據舊典。輯元命。因誕彌之吉序。稽長發之休詠。考乾健不息之象。合元長體仁之性。作爲佳節。冠于甲令。將以合萬國之歡。啓千齡之聖。掩周漢而遐蹈。齒堯項而高映。寢明寢昌。惟天下正。則是禮也。宜我朝而爲盛。若乃仲呂鳴律。恢台御時。斗建于巳。舒將望義。授赤光照室之瑞。叶寶軫歌薰之期。內外欣踴。官師肅祇。於穆先靈。辰備宿設。善氣前應。游氛外徹。開閭闔之洪洞。廓紫宮之寥泬。飛龍抗殿。神鼉負闕。若夫宣室先帝之正寢。大火天王之明堂。啓稷嗣以辨等。率鴻臚而詔方。采物紛樹。衣纓焜煌。金匏畜響。而待叩。籥翟旌勳。而啓行。庭實萬品。天幕九張。噉鑿卓馬之覲。載斗

宋宋



占雲之鄉。啓丹文。越効其質。毛車象載。輸其祥。或布濩于外庭。或就望于西廂。其內則上宮頌老。袞衣繡裳。元侯顯父。珍圭判璋。麟定之親。信厚而在列。鷺雁之客。潔白而來翔。莫不委佩垂紳。肅穆端莊。以俟乎當陽。始乃警大庭。導初旭。織羅靡動。羣陰盡伏。輦出于房。帝暉有穆。正法座于皇極。凝邃旒于元服。燦乎若瑤極之御。羣宿澹焉若天池之朝。百谷塗山會。兮後萬玉華。封來兮善三祝。豈徒揚甚盛之節。蓋將儲難老之福。況乎鸞謀虹渚。天啓也。雖曠代而罕至。重瞳采眉。君表也。惟元聖而後備。畫堂甲觀。昭漢嫡之祚。金鑑露囊。盛唐宮之制。蓋所以謹帝胄之正統。鍾天元之粹氣。謹聲身而爲律度。聰神明而資孝悌。作我司牧。光有神器。若夫定默之至數。重熙之高致。蘊上業而未發。候昌朝而來萃。則不若是也。于是丞相奉觴而進曰。臣聞德之所積者厚。則天之所報者隆。道之所召者遠。則神之所贊者聰。今陛下尊祖襲宗。寢威盛容。退奸士以進道。斥彫纂而敦風。嚮學乎金華之殿。因心乎長樂之宮。程百斤以忘倦。慎萬幾而執中。而猶翼翼以惠迪。謙謙而養蒙。宜乎繼萬世之典業。藹千祥于聖躬。煥至德而有融。等仙劫而無窮者也。臣不勝大願。昧死上後天之壽。制曰。都。此高厚之降康。宗祏之流光。俾爾熾而昌。俾爾壽而臧。朕其志哉。所不敢忘。恭舉公之觴。時左右皆稱萬歲。

幽廳賦

暝室迷陽。開疏就方。匪結錢而效飾。將修隙以闕光。森豎櫺之寸漏。限橫杙而尋長。逼南榮之愛日。蔽高廡之飛霜。隱几于下。陳篇在旁。含階筠之媚色。洩盤蕙之幽香。況復霽景初和。游氛外滅。輕吹襲牖。頽陽

盜穴映故網而輕明。渺方紗而洞徹。但見野馬羣飛。織蟲族悅。或蟻螻之上擊。或醯雞而下頡。輕若毛舉。來踰電掣。隱見互舉。如翳如空。渺倦目以旁睇。監衆態之無窮。其來也就。照以交舞。其處也假。照而相攻。譬若浮埃之聚。恍如纖靄之蒙。馳鴛乎蠅頭之域。游揚乎蚊虻之宮。形不在乎手搏。聲難爲乎耳聰。嗟大鈞之賦象。何至細而兼容。忽輕飄之一至今。遂消散而無蹤。

登應州古城賦

何茲城之嶮岼兮。據東北之山巔。扼三關之走集兮。眺七澤之敞閒。喬木豳其雄立兮。森葦葦而刺天。翔風薄而長吟兮。雜下瀨之潺潺。南陵漸其峽岨兮。盡渺渺之雲烟。于是太陽啓暉。六幕澄霽。春塍如繡。春樹如薺。啼鳥壞堞。蒼烟故壘。登高遠望。使人心瘁。在昔峻宇層構。雕粉繡楣。車爭水度。蓋逐鴻飛。鼓鐘沸涌。冠劍陸離。抗障日之長袂。監從風之羅衣。至矣哉。合從締交。結儔附黨。兵略地而鼓行。師椎牛而人饗。梟鳴牙中。梯舞樓上。出萬死而徇國。俟千級而邀賞。莫不光沈景滅。魂斷心折。千蒿斂魂。野薤凝血。同枯骨之死。安知譽堯而非桀哉。但見灌叢宿楚。奧草多露。城狐不薰。臺鹿時聚。虎肉委蹊。豺牙當路。狄失木而號煙。颺投林而嘯雨。遇發冢之詩書。對憂心之禾黍。曲池旣已平。高臺又以傾。古虜時見。荒榛自生。叢祠陰塢。虛聞松聲。凝睇弭節。悵然內驚。嘆人事之遞遷。孰長年之能執。壯率歡以俱往。耄引悲而前集。昔牛山之妄歎。顧二臣而飲泣。使爽鳩之無死。非吾君之所及。諒迭處而迭去。同寒暑之相襲。况乃僕本恨人。觸感增慕。歲月逝矣。江山非故。古旣古而嘗今。今雖今而將古。天愁人兮安寄。日難揮而催暮。命僕失

以効駕。吾將遵乎歸路。

夫人城賦并序

昔晉將朱序守襄陽。爲苻丕所圍。序母韓氏。自登城按履。謂西北角當先受弊。遂領百婢。及城外中女丁。于其角斜築二十餘丈。賊攻西北果潰。衆固新城。丕遂引退。謂此爲夫人城。至今叢祠遺基。巋然尙在。荆楚歲時。鄉人祀焉。仰其高風。慨然爲賦。其詞曰。循漢臯而西望兮。何層城之孤峙。披南烈之遺堞兮。號夫人之故壘。譙門堙而中塞兮。灌木森其相倚。勢鬱律以上出兮。下坡阨而榛圯。渺遺烈而未泯。眷高芬而可紀。昔典午之鼠首。尉苻丕之虎視。區區保乎江漢。峴一障乎北鄙。寇方甚于餓喙。地幾同于黑子。惟韓媼之慈訓。勵朱公之朴忠。仗天節以扞敵。據江城而臨戎。于時大羽若日。高旌如虹。桀黠同侮。跳梁四攻。防地中之甕缶。舞樓上之梯衝。伊君母之慷慨兮。誓喪元而靡悔。臨大難而克壯兮。懼危闔之先潰。率民婦而操築。培戰陣而相對。備之于條侯之西北兮。豈神機之我昧。果前蹈于厥角。率圖全于覆篲。嗟女子之綿薄兮。蓋中壺而是修。奉蘋蘩之常祀。承巾櫛之餘休。矧仗節而死難。非君子而可求。偉此母之挺操。亘終古而弗媮。趙括括以全宗。王勉陵而事劉。孟三徙以漸訓。介俱隱以無尤。雖先建于高躅兮。我無忝于前猷。若乃寶壙百尋。犀兵萬旅。推轂受命。建牙作輔。氣可蓋世。威能拉虎。或陷利而忘義。或飽飛而背主。輸天險于敵國。屈王國于亡虜。悲丈夫之竊號。曾緯髮而無取。儻死者之可作兮。非夫人而誰與。詠明德而不已。聊盤桓以延佇。

嘯臺賦

梁城南下。陳留右鄙。環道卻走。繩阡直指。控鄭邑之遺墟。得阮公之故里。抗孤臺兮數仞。撫頽垣兮百雉。木蒼葦兮冠巔。棘棧棧而蔽趾。息予駕于層阿。披微徑而周視。坡陁隱軫。沿緣徙倚。徙倚兮奈何。懷人兮孔多。昔當塗之失馭。感羣俊之同波。予生不辰。道方薦蹙。呂鴻軒而被戈。嵇鳳舉而嬰羅。惟正德之思免。潛葆光以內照。狹世路之多辟。兆天衢而觀妙。悟跨俗以遺累。喜憑高而臨峭。于是戾止斯臺。恂悅徘徊。叩神谷以抽緒。憑鸞嘯而舒哀。其始也。創韻乎一氣。其徐也。淪響于九垓。吟將斷兮復尋。意彌往而逾來。志念君而宮轉。心感物而羽摧。激清飆于萬竅。納素氣于元胎。精感飛潛。氣周動植。天籟停響。龍吟輟息。獸將聘而拄喙。禽當飛而墜翼。寧蓄久而必愬。將愬之而未極。悲乎萬化弗停。遺基欲傾。桑冒田而非海。蕪隱壁而疑城。轍雖窮兮罷哭。酒徒美兮非醒。邑何知乎南巷。土奚樂于東平。但見豺獮狐語。梟翔虺驚。雉鸞鳴而輩作。鴈雛離而孤鳴。覽陳迹以遐悼。莫髣髴乎遺聲。已矣哉。儻九原之不作。信豎子之成名。

瑞麥圖賦

天聖之六載也。陪京近地。宛丘與封。厥有瑞麥。飛驛聞上。是時邦英臺彥。鴻儒碩生。被歡誦以沓臻。樂千齡之希遇。餼臣不敏。敢揚言而賦之。曰。何聖辰之有感兮。見造物之流形。伊嘉生之育粹兮。亦稱珍而效靈。蓋茂昭于豐兆。故絕出于祥經。是月也。候司燠怒。節紀朱明。司徒謹土宜之法。遂人勤時政之程。畎畝鱗接。田疇砥平。非滅裂之攸縱。竟疏濬兮資生。青青交秀。芃芃向榮。或散穎兮共幹。或連歧而並莖。願我

疆兮我理。悉如坻兮如京。民相勸而動色。士覩奇而震驚。俄具載于繪事兮。亟傳聞于禁庭。寔惟天之輔德。彰有言而順成。若夫冀草標祥。朱英薦異。茅三脊以儲祉。芝九莖而表瑞。信徒假于書稱。亦烏足以擬議。請言瑞麥之可嘉也。協氣交生。大鈞封植。表天祐之孔昭。顯坤珍之有艷。宛彼神區。契茲景則。嘉種肇靈。秀穠敷色。浸潤兮芳澤之和。鼓動兮薰風之力。餘糧雲委。滯穗山積。故陳陳而相因。亦穰穰而叵測。宜乎允膺帝賚。紹隆皇極。豐功大業。日躋兮著明。溢美連休。月書兮不息。願叢陋之微才。曷揄揚于盛德。

感雞賦有序

予寓居畿邑。有里中男子蔣福者。多畜羣雞。內一雞三足。其一足拳而弗用。一雞獨足。能飲啄嬉戲。與羣雞上下。噫祥眚之事。予不得而推。但感其物理之異。而爲賦云。伊元化之無私兮。播羣形以平施。紛肖象而寓質。若巧鈞之制器。鱗者俾夫沉泳兮。角弗施于猛鷲。引羽族而普觀兮。足惟兩而已備。苟損益于天分兮。匪生生之本意。何此匹鷄。埋絕常區。或蹠蹠而獨止。或疣贅而聯跣。並鳴翔于堞次。亦飲啄乎庭隅。徒觀其一。則綴不用之爪。賸無名之膚。象非同于海鯨。名有忝于陽鳥。其一則踐孤立之危。靡全形之德。追山夔以同號。希商羊而並翼。寧真宰之好異兮。伊微禽之我惑。感天分之有常。循生涯而各得。不決拇而齧枝。詎日黔而浴白。蚊百足而蛇憐。蚓無心而土食。將滅此而益彼。懼速尤而長罔。姑美惡之兩忘兮。庶元和之來宅。

德車載旌賦

〔案〕此爲永樂大典所佚。今據宋文鑑及文翰類選增入。

君有至德。時乘大車。當偃革以無外。乃結旌而有初。奉駕陳儀。采物雖資于備設。鳴鸞示禮。旂旒匪俟于垂舒。順考前經。鋪聞往說。謂戎事以既息。貴君車之有結。雍容撫軾。蓋藏飾以尙純。肅穆展鈴。詎垂旛而就列。蓋由抑乃盛飾。昭夫令名。雖冠品于輿服。蔑揚威于旆旌。肅軫無譁。方斂藏于旂厲。馳輪有度。靡赫奕于綏纓。且夫禮有質文。器隨用捨。車號乎德。則崇化于邦本。旌結其表。則示人于天下。意自象見。名非人假。君軒弭節。孰訝乎卷而懷之。國乘制容。益顯乎素爲貴者。是知車之用兮。充德以成大。旌之飾兮。輔威而孔昭。旣武怒之不作。信軍容而外銷。組轡啓行。陋郊施之子子。鉛衡遵路。殊風旆之搖搖。若然則動有彝儀。文無異色。雖嚴駕以備物。終去華而表德。故使禮典攸重。民瞻不忒。皇皇整御。始中括于采章。檻檻肅容。豈外揚于藻飾。用能上載明德。旁昭緝儀。自駕言而戾止。殊幅裂以藏之。升降惟寅。僅比非心之屋。章明盡屏。寧同止獵之綏。大矣哉邦禮是崇。帝儀資始。實務德以垂教。必收旌而昭理。宜乎國容備而兵器銷。率由茲而盡美。

元憲集卷二

五言古詩

正月望夕供養大阿羅漢畫像作

端月戒熙陽。望舒秀圓極。洗心乘佳節。瞻像洗慈德。穆穆屋漏尊。虛堂與神寂。繪境紛自奇。法性非所得。人貌含天虛。髣髴若真覲。示現隨三界。精感超六識。華燈列清場。寶炷熏梵席。妙意隨春融。疑懷逐冰釋。欲讚已忘言。拳拳自終夕。

嘯臺

孤壁橫天畿。巋然表尋丈。恭承晉高士。嘗此據遐想。臨風挹勝軌。意若無今曩。當塗昔戰龍。典午方構象。忠賢履危運。鱗羽嬰密網。烈烈熾邦刑。耽耽翦人望。嵇呂膏磻斧。濤舒受羈鞅。先生機且神。妙用包羣枉。兀爾謝將迎。隕然寄昏放。禮法雖我讐。智恬非外獎。惻愴廣武游。留連步兵釀。竭來桑梓國。憑高念長往。舒嘯萬籟先。浮精九皇上。歸禽宛頸還。秣駟臨芻仰。當日天地心。寥寥其悲壯。咄嗟涉千祀。隱軫存遺壤。臨岸知是非。俎豆猶彷彿。邑東故祠在焉我來一傾耳。城隅斷餘響。梟鷄愁空林。狐狸語平莽。高韻邈已徂。清銘復誰賞。唐人獨孤及爲嘯臺碑。近年邑人浚池得之。嘗聞史氏傳。塗窮輒招恨。正人與直轡。何代非流蕩。淳風日已微。投辭謝精爽。

入謁馬上作

殘月琴鼓喧。中衢憶輪駘。九關忽洞闕。萬蓋默雲布。燭亂建章星。塵迷華陰霧。車幅避鳴騶。鑾音聽朝御。嗟予亦何爲。簞此珍羣羽。野鶴載軒愁。狂狙裹衣怒。肅穆未央朝。蹒跚壽陵步。人生固有志。躁靜各成趣。生當伏農畎。乃爾汗賢路。峨弁束蓬顛。吞腥滿飢嗔。樂育過阿陵。增裨乏塵露。徒懷一割志。但恐流芳暮。且復竢逡巡。南山有場圃。

習彥威

四海習彥威。英英出江漢。高韻凌風翔。雕文奪星爛。感激陽秋辭。姦雄非所憚。蜀弱自爲正。曹強乃名亂。陰忤柄臣意。飄然去恩館。驅車自北門。四顧興長歎。終焉謝病免。猶得爲人半。緬矣身後名。臨風寄悽惋。

邑子夜宿話余先疇燕廢

臨邛久倦客。彭澤賦歸來。念我何爲者。趣時良殆哉。一身仕東觀。三載寄靈臺。望見故鄉樹。頻更緹筦灰。曉車愁蹇蹇。春耜負莓莓。虛名自輻鎖。豐壤成汗萊。日想社粉老。心知門柳摧。神阡迷馬鬣。栢表被狸災。一聞里人語。夜靜成多懷。他日還燕泣。前憂成誤哀。

留別知郡職方楊員外

予本草茅士。世無鐘鼎榮。在昔未勝冠。先疇弓冶傾。茹荼濱十死。屬纊存微生。分途甯牛飯。誰希莊鴈鳴。龍具泣妻子。練裙悲弟兄。慈誨斷軻織。遺書開晏楹。感激侏儒飽。呻吟裘氏聲。下武纂丕構。協風翔四瀛。

紛馳賁丘帛。高豎當衢旌。鸞翻不暇戢。驥材方自呈。車徒首燕路。冠蓋溢秦京。文章趙元叔。唇舌婁君卿。列邸曳裙入。羣公交幣迎。僕嘗不自料。奮迹希時英。弟子許都養。詞人嗤老僧。一旦褐衣召。千慙昆玉名。安知軾蛙賤。但覺軒鴻輕。初命六百石。漢廷尉平關掌列侯城。居然惜操決。無術裨澄清。天炎屢來集。冤獄紛以盈。僕在局以來水旱爲沴誚讓使臺檄。流離民屋征。結課諒無最。黜幽茲有萌。晚造金閨彥。傳瑞提千兵。爲僚篤古義。賞善多新評。坐則席函丈。出則車連衡。高論天人際。細略米鹽爭。愚慮或窺管。嘉言茲報瓊。賞音非易遇。曠古難爲并。嚴惠不世出。蕭朱猶害成。何言末路日。獨契後周情。累洽帝圖盛。思皇賢路平。願言寄君子。始終同所營。

獻臣學士與余通書因成感詠

夫君班揚儔。抱軋翠玉府。久讀未見書。躬抽繫年譜。墜緒獲先秦。亡篇出東魯。上泝三皇墳。旁採百家語。怪牒汲郡來。幽經茂陵聚。英哲資繕藏。緹油盡刊補。蒸青勁竹殘。削誤規刀苦。種別踰九流。星羅軼千部。願我寡見聞。蒙薰異倫伍。祕帙樂共披。譌文許交舉。家摠互紛綸。郵笳劇旁午。初無班嗣嗤。更免許慈拒。矧余羈官久。寂寞緊茅宇。禮乏贈酒瓚。疑增照觴怒。尙賴啓新編。時時發聾瞽。

予自到嶺外居嵐瘴中未嘗不以先死對治人人見其浩然若有所得者今歲在海外遇寒食因發家書想望松楸不能自理偶成此詩示兒子

春日自明霽我心何鬱傷。草木競芬菲。飛鳴自頡頏。悄悄坐書幌。幽幽宴空牀。既無功名念。反音思白晝。

長愁來不自持。零落鴻鴈行。三過解澤流。六見槐柳黃。最憐小兒女。路遠不得將。生還一笑喜。死去埋他鄉。生死如循環。我師佛老莊。感此寒食節。新烟過鄰牆。松楸渺雲海。目極摧肝腸。書成附鱗翼。不如永相忘。何以慰目前。作詩示阿張。阿張孟堅小字

左散騎常侍東海徐公

徐公真丈夫。不獨文章伯。江南兵未解。主憂臣慘戚。公願紓其難。苦求使上國。庶獲一言伸。少息苞茅責。其君驚且歎。執手涕沾臆。謂言知爾晚。何此忠義激。天子叱在殿。請讓雷霆赫。公亦從容對。曾不渝神色。仁者必有勇。斯亦古遺直。書大略其小。我有春秋癖。所以此詩中。不言公翰墨。庶警事君心。勉旃希令德。

夏日晚出芙蓉堂

哲匠昔締構。故相文惠陳公所建。文榭面清池。回環水光合。左右雲容披。蒼烟限壘斷。空碧盈軒垂。薰綠不待染。荷圓皆中規。戲魚觸新藻。幽鷺翹空坻。初筍半遺籜。殘跗猶抱枝。我來冰未泮。條此亘炎曦。節物一以換。余懷焉獨怡。內漸固陋質。本乏廊廟姿。印綬紛璀璨。旌旄森陸離。林狙裹華黻。野鹿駭金羈。負山力已竭。傾日心空疲。知此危殆辱。斯言非我欺。橫琴不成調。慷慨念歸期。

秋晚禁廬獨坐

霜日薄西牖。境寂趣自閒。風篁宿天籟。海碧沈雲山。宮樹未全落。棲鳥相與還。心疑蹈虛宇。跡乃塵清班。自顧丘壑志。何施軒冕顏。終當謝緋服。戢翼榆枋間。

孔明

漢家亂無象。賢才戢鱗翼。武侯羈王器。隆中事耕殖。堂堂劉豫州。介紹徐元直。一聞臥龍譽。三駕荒廬側。士爲知己用。陳辭薄霄極。說吳若轉丸。抗魏猶卷席。談笑馭關張。從容羈梁益。持邦二紀餘。君臣絕纖隙。浮埃蔽穹壤。大節淪金石。梁甫不復聞。懷賢涕霑臆。

筠亭

歲晚檀欒姿。山中映孤宇。聲繁天籟吟。影動仙幢舞。卽境是真如。黃花間幽圃。

嘗假馬于親舊不獲因感而成詠

東方昔借車。尼父嘗假蓋。一馬茲不全。夷涂出如閔。人無托乘寵。朝罕均茵載。策足本乏謀。臨風嗟有待。京洛富華廐。權奇出青海。翩翩陌上郎。滅沒爭星邁。珂音雜鸞響。韉勢動霞綵。東郭獨何爲。徒行履將敗。穀城主簿王崇者。少得養生禪寂之道。中年棄官入漢陰武當之間。逸與世絕。又有吳人山者。自遠攜母與王同隱。時余方貧病。慨然慕之。因爲詩代書以寄二子。且托王尋耕釣之地。相與邇者竝以

敘懷云

余本丘壑人。失計蹈塵網。軒冕忽輟鎖。風波若流蕩。高羽顛宏羅。奔駘債歸鞅。衆僞緣境滋。千憂共身長。進乏汗馬勞。居畏濡鶻賞。力命頻遘逆。幽憂思獨往。聞君集漢陰。遁世久忘象。因溜爲鳴琴。憑巖作煙幌。復有延陵季。亦善南越養。築宇近親仁。耕田或歌壤。且言掛瓢處。一徑捫蘿上。杳若御風遊。蕭蕭骨毛爽。

芝朮紛異苗。麝鼯結幽響。老木森千尋。丹藤垂百丈。洞谷答嘯歌。雲霞代隣黨。咨予倦遊者。緬邈期眞賞。之子幸我憐。試煩翦幽莽。僮獲蝸牛居。卽謝海禽饗。時從漁父魚。聊植仙人杖。漸脫區中緣。永託無生獎。

和答李學士見寄長韻

璇源多清派。蘭谷無絕芳。之子相門裔。高才映周行。妙年弄文史。雅志含圭璋。中歲困官簿。銖兩爭低昂。一通金閨籍。荏苒潘鬢霜。剖符屢麾阮。執戟更疲揚。聞君近多暇。歸偃三經堂。左右褫紳組。縱橫羅巾箱。安驅仁義塗。引節名聲場。戰酣道始勝。心泰無羸尪。壯思挾飛藻。詔我臨霞章。我時坐鈴閣。寂寞如禪房。開緘一快讀。雋味腴且長。高義溢句流。清風隨篇翔。感人不無意。在水河湯湯。吾匪辯音者。空冀懷仁藏。矧屬歲躔暮。百卉皆芸黃。何以謝君子。松柏同蒼蒼。

和答吳充學士見寄長韻

多士秀王國。珍羣驚天衢。其間延陵季。煜煜承華跗。盛藻班蔡流。芳年終賈徒。籤芸擁石室。札綈紛鴻都。刊僞富清暇。壯思彌天隅。投我塵外什。粲然風義俱。幽襟恣申詠。不覺頽陽烏。渴吻漱仙液。饑腸涵道腴。衰翁牽夙尙。騷雅嘗馳驅。疲足道雖頓。流波心未渝。過門輒大嚼。臨博猶狂呼。詎云獲眞賞。聊復愜所娛。矧繁絕唱贈。無脛來明珠。報之乏瓊玖。寶玩徒區區。

歲晚許昌城隅登樓作

孤城何嶺峽。西北有層構。我來一長眺。正迫歲陰候。嚴風挫萬物。霜雪復交寇。冬日苦易頽。義車劇馳驟。

宵月不相讓。空弦映矢殼。潦收陂面闊。水落山骨瘦。生平丘壑心。願慕獨延脰。箕峰紫氛結。潁瀨瓊波漱。想像逃名夫。幽居翳仙竇。願言追遐蹤。人間謝譏詬。

天禧初僑寓安陸有宅一區嘗于齋前手植橘樹纔尺餘許未幾擢第隨牒遊方天聖庚午冬屏居畿邑守舍兒自安陸饋余丹橘一篋因曰此卽齋前所植撫物懷舊悽然不平者久之因成感詠昔年封藥栽生意頗柔脆今茲見丹實落落如星麗斯果號難成常踰豫章歲此木不十年不實孤根何爲者尙記吾廬地蔽芾詎因棠連蜷乃同桂厥包千里遙守舍重緹惠金顙照病眸霜津益瘠肺卻算去里年十聽秋鴻唳無復陸續懷寧圖李衡計他時攀樹悲詎減金城涕。

歲晏出沐感事內訟一首

山海有完士希世無良籌偶穿東郭履遂別野人舟不恥篆刻賦來肩英俊游私智甚曷短塵容若鷓愁備員太史氏補屬富民侯〔案〕漢書田千秋封富民侯唐人避太宗諱改民爲人此詩原本作富人今改正姑學了官事何嘗分主憂日貪斗食利歲感星墮周中都富才彥方駕若龍蚪茂先喜史漢平津治春秋高文用司馬格五寵虞丘問闕路逢葛繽紛人召鄒桑羊興賈豎安國出縲囚汲鄭貴交盛徐陳英藻逾況乃天下樞雄雌來九州衣冠徑複道鼓吹出長楸席上萬錢箸橋邊八列騶雍容緩魯袂意氣拂吳鉤咨予良不臆瓠篋圓珠璆吹竽昔已濫在梁今可尤臺閣魏舒被風霜蘇季裘有志謝軒鶴無機防海鷗擬竣杜陵課誅茅歸故疇

送上元勾簿吳昌卿

長安琴鼓喧。里舍隙塵曉。有客駐歌驪。歸途指江徼。晨庖饜蘇冷。窮巷鄉輿少。乃肯顧我廬。歡言復悲嘯。悲嘯誠易知。夫君韻經奇。才高洛陽賈。賦動楚湘纍。平昔應賢詔。覽德揚英蕤。孚尹傾寶肆。沛艾絡仙羈。獻書北闕下。對策東堂垂。逢吉且兼暮。諧音墳且篋。天官選初筮。黃綬聊藏器。三釜樂及親。尺檄甘爲吏。邇來預冬集。再調鬱奇意。羣公亟爲言。力命乃相戾。奏牘輒報聞。官書責勤蒞。簿領百里佐。風煙六朝地。銷魂南浦行。拄頰西山氣。君子永來譽。勝襟無累歎。行矣勿載譁。鄉枌方省家。春橈碎溪月。曉馭弄江霞。長洲紛藉草。故樹雜生花。予心若爲處。歲晏竚疏麻。

京師故僚以余退居近畿數賜存問因敘懷自感

病餘頗厭肉。欣得僧廬蔬。僧牕亦明潔。可以觀我書。弟兄冷相對。因著柏酒醉。酌餘欲拈筆。狀乃爾狼狽。我老固有素。未至形茶具。其事故可知。寧復論年數。阿連吾語汝。我計常何取。學道旣無成。何如事農圃。

冬至攝事南郊齋宮感懷作

履至謹冬祀。攝職叨上公。洗心奉明誠。祇宿城南宮。芳歲正逾莫。熙陽殊未融。西郊淡頽景。北牖來朔風。鶩野騁歸獸。綠雲號征鴻。夕坐無晤言。情條結深衷。自撫韋布陋。奚堪廊廟崇。觀瞻動衆目。踟躕愁我躬。自古經緯才。因勢猶汗隆。夔高值虞奮。孔墨遭周窮。如何一介士。蔑著橫草功。仰被天宇施。遂濟人爵豐。較能劣涓壻。荷寵踰華嵩。物理自非是。神鑒安可蒙。區區謝病志。終冀回天聰。時已三上表乞退。

念衰二首

勁風吹北林。落葉舞南牖。歲序忽已高。崢嶸薄星斗。大化驅羣物。始終迭相授。羲和亦何爲。挾日但西走。少壯馳目前。衰頹躡人後。星星兩霜鬢。伴我老成醜。學道苦嗟晚。捫心更餘咎。茲意將奈何。投身就杯酒。衰容覽青銅。寒光了無隱。照我顛上毛。星星罕餘鬢。持此將奈何。歲月屢逾盡。少壯罕聞道。下士乃爲哂。操縵遽汲深。持矛復夸楯。任重力疾顛。塗窮計方窘。上孤明主恩。下遠昔賢準。憂悔從中來。老至非無睚。尙忝麾守尊。屏慚政條敏。孤心企寒柏。萬境付朝菌。往失奚足追。來戒或堪引。明發丘壑情。予將治歸軫。

湖山

空水渺澄鮮。蒼山復盤踞。沙草媚苔磯。雲柯抱巖樹。畸人茲與留。脫世如遺屨。

登大明寺塔

故歲搖落時。憑高望揚越。流光不我與。復此值凋節。孤塔踞層岡。仙盤湧滲沲。病足攀危梯。寸晷或三歇。浩蕩佛界寬。凌兢客心折。遠岫幾培塿。空江一明滅。海日棲簷題。霜風語鈴舌。荒墟自今古。大塊靡封埒。豁若醴覆開。醒如豆聰撤。哀哉人間世。小智互紛結。豕彘論是非。蠻蝸定雄傑。俛俛百代俗。唧唧九流說。推致無窮中。秋毫共飄瞥。聖人小天下。樂意遺來哲。矧余蒙鄙姿。輕蹈榮利轍。溷濁六塵并。譴叟太和泄。薄言真境游。追悟生理缺。洗心刻來誓。回步懲屢跌。甘露多餘滋。聖關有幽鑄。咄嗟朝市人。此路非爾躡。

哭公實學士

高子北方士。才爲國之華。靈襟絕塵藻。麗藻紛春葩。雖云服韞鎖。高意籠青霞。子昔久蒙潤。逢辰亨乃嘉。

聯飛奉臺閣。相顧引龜縞。飽叔不予怯。楚臣寧汝瑕。詔書頻出沐。歸轡屢回車。時過蔣生徑。或詣子雲家。柏將松竝悅。人與室非遐。自謂百年分。風期何所嗟。君命良不淑。浮生茲有涯。沈疴犯霜露。幽讖發龍蛇。美志一朝盡。餘哀千古賒。招魂知是否。生肘詎真耶。塗斤失郢匠。膝席天長沙。青黃飾溝木。藩籬墜風花。世事一以謬。何言定隆窳。都門執謳紼。原路引哀笳。夕雲旌外慘。春日塚頭斜。自此掩瑤軫。其誰知伯牙。

壬子歲四月甲申夜紀夢

積雨暗長夜。山行經險巖。悲風撼林木。崖谷蔽參差。遠聞豺虎號。鬼燐弄光輝。十步九失足。中心祇自持。所適既迢遞。黽勉焉可爲。道旁見明燭。抵宿依茅茨。開戶念生客。喜逢主翁慈。煖湯趣妻子。然薪爲更衣。艱難又奚怨。少息非所期。雞鳴夜將旦。熟寐百無知。欣戚一以忘。何有安與危。生死宇宙內。曠懷亦如斯。聊紀夢中事。誰當庶我詩。

過曹氏墳庵在潯院間蜀僧修靜自天柱退居于此

出郭屏僕從。取徑問樵牧。短松新被岡。青嶂遠遮屋。雞犬無四鄰。日月自兩殼。阿師厭機緣。脫迹謝塵俗。是心大圓明。一室了具足。汲泉烹細芽。支鐺炊脫粟。默坐契從三。諸方付藏六。我來同友生。得飽徑眠熟。稍爲微風醒。已歎畏景促。買山知幾時。所惜負松菊。

水月

湖上纖羅收。天邊夕蟾映。皎潔銀界寬。虛明佛心定。可愛不可持。乾坤共孤影。

余臥病畿邑御史王君假守潭楚道出于舍下特見存訪且尋先子之舊欽承風儀因爲詩抒感云
病客臥窮里。衡扉掩殘春。墮官道家藏。竄跡農廛民。朝羅噪饑雀。暮席流芳塵。尸居悅踰歲。踵息動彌旬。
忽訝絳鞵隸。傳呼越郊畛。蹀躞千餘騎。雍容兩朱轡。言是楚邦守。來過安邑貧。固宜辨貴棄。乃爾存艱辛。
此道古爲重。餘風今已淪。物色認平素。載言接慇懃。始悟先子舊。早篤嘗僚親。孤心極摧擗。感涕浩盈巾。
追念舞勺歲。已識棲鸞人。景德中余侍先子爲弋陽督郵君時勾稽屬邑始授余以學術師筵奉函席。學舍操書筠。童牙自忘醜。詩鉢或
娛賓。公時擲句賞。謂是天麒麟。親璧彩牋贈。勉我期日新。君嘗作詩賦汝南巧題品。有道定人倫。自爾一
啜刺。中年嬰世紛。天聖紹休緒。頓網橫無垠。鸞鵠不藏翼。蚪蝸無遁鱗。余時濫隗始。驤首摩蒼旻。司徒揖
元叔。天子第平津。甲科廷尉屬。再命宮坊臣。黃香入東觀。賈誼過西秦。紬繹金匱室。珥彤瑤水濱。登瀛識
褚馬。頌漢希淵雲。一朝泣風樹。九死存餘焄。中都索米後。老圃種瓜辰。惠然下車揖。高義傾前聞。卻計髡
髦日。二紀如逡巡。今形雖隱几。昔訓尙銘紳。丈人篤求舊。媮俗將還淳。湘水澹蒼野。衡峯凌紫氛。澤節首
南夏。瑤魁瞻邃宸。戀闕魏公子。弔賢楚靈均。公懷佐時略。宜樹光朝勛。奚爲遠問俗。惜此徒傷神。宣室懋
清問。華光欽寶鄰。行行愛玉體。趨節竚來臻。

去年三月楔飲池上歲月易得忽復暮春因再宴僚屬作

前茲屬元巳。置酒蒼烟臺。芳序忽復周。春正風徘徊。懽言速僚友。亟使具觥盃。長渠溢芳溜。列坐浮香來。
靈囂合衆樂。隱若南山雷。舞袂紛雜襲。賓冠儼崔嵬。美人前爲壽。顏色如瓊瑰。況我千萬日。行樂無疑猜。

新歌裊天衢。興視行雲回。我時語四座。茲賞誠難哉。妙顏無再朱。白髮惟相催。跼蹐盈聖智。孔顏罹憂摧。區區百世後。美惡同塵灰。吾欲挈瑤斗。踞海爲金罍。挹茲忘憂物。與爾同嘲諧。天地爲一朝。長短何足哀。魯陽久不作。白日任西頽。

奉詔止雨宿齋建隆觀

漢家候神館。奉詔禳沈災。解纓就齋幕。恍若躋蓬萊。雲羅絳朝鳥。露掌承仙杯。衆真拱象帝。寶宇正崔嵬。爐烟薰太虛。重陰爲之開。單枕不成寐。俗魂自驚猜。心迷坐忘術。萬慮無根來。天雞殊未鳴。霜鴈有餘哀。借問麋鹿姿。云胡塵國台。構極謝隆棟。裨山劣纖埃。上漸稷契名。下愧丙魏才。惟餘止足戒。臨路空徘徊。

念古

賢哉邴曼容。出處知所據。官餘六百石。輒自移疾去。富貴非不懷。殆辱亦先慮。嗟我材下中。叨恩最蕃庶。堯庭納言職。軒野方明御。服袞作槐班。曳履南宮署。雖經斥免誚。尙玷高華處。昌據反徒有守直弦。何能借前箸。愚甘六馬對。讒恨三物訊。年來感衰疾。倦鳥思返羣。抗心望先哲。俯首慚昔譽。西景尙可收。歸轅未云遠。儻以人望人。期君或吾恕。

己巳歲除夜有感

明晦互推斥。中都芳歲闌。星迴迫舊次。籥暖送餘寒。來辰繭有緒。去境環無端。天運故相易。人心那獨安。懷此不能寐。攬衣強盤桓。疎恐緩餘帶。危惕整塵冠。耿耿燭焰直。淒淒霜氣酸。城頭殞高木。庭下敗叢蘭。

撫臆累新欵。掩觴沈故懽。況乃蹈世網。虛名爭控搏。挾冊濫書府。振纓玷王官。東序羅圭瑞。西雍集鶴鸞。昏瞳眩寶肆。短翼廁仙翰。縱爾值藏疾。何容久素餐。泛泛騷客鳥。坎坎詩人檀。寧無要路津。所畏在蹒跚。枳棘附驪尾。緯蕭戲龍蟠。寄語拙艱者。無埃學邯鄲。

王粲

秦川貴公子。避地來荊州。流離世道喪。簡脫天姿遒。歲時不我與。假日賦銷憂。妍辭縟非霧。逸韻鏘鳴球。曹師下南服。置酒臨滄洲。慷慨前爲壽。高譚王霸籌。歸來奉丞相。攝組登華翰。獨步今已矣。空餘清漢流。

漢將三首

漢家開絕域。日夕羽書聞。朝那殺都尉。北地敗將軍。沙明疑晝雪。氣黑似秋雲。片月就城偃。長蛇隨陣分。冰藏馬窟路。血沫劍星文。直置鴻毛命。聊圖鱗閣勳。

頻年隨校尉。晚節事輕車。瞻烽數奔命。辭第詎爲家。輕齋絕瀚海。問道襲昆邪。雙鞬朝負羽。三鼙夜鳴笳。金縢先雨覺。蓬鬢後霜華。如何差六級。遽使抱長嗟。

薄伐乃中謀。和親非上策。匈奴負漢恩。男兒喜邊檄。故歲出定襄。今年救張掖。沙平落日黃。月迥遙峯白。急擊右地兵。連俘月支馘。幕府省文書。家人非尺籍。夜拔五嶺旗。晨追六驛迹。陛下焚謗書。孤臣勒燕石。

雨夜秋興示仲氏子京

秋律盪華序。濃雲生夕陰。羣芳伴雨泣。百竅隨風吟。衰螢滅遙徑。倦翼翔故林。暗隙濕已逗。孤燈青欲沈。

愁人此遙夜。萬慮集幽衿。歡緒未盈尺。憂端已越尋。借問所以然。出處謬素心。家世本丘壑。才具非璆琳。靈根夙已殞。野服良所欽。攀芝幽澗畔。擲紫故溪潯。歛爾濫官牒。今焉旅華簪。兄弟見羈鞅。交朋賴幽箴。爾講壤壁簡。我攀翠玉岑。嚴枚交逸藻。潘陸嗣清音。羣才方構厦。短綆徒汲深。狂迷頓纓鹿。踉蹌乘軒禽。歸來翳編翟。況乃貫愁霖。求薪動踰桂。鬻賦靡酬金。原病固為累。朔飢非所任。猶欣共姜被。歲宴樂惜惜。

寄題職方周員外廬山笑臺

員外九江人。嘗游憩于廬山之陽。自謂太平之民。樂道逢聖。造適輒笑。因以名臺。後為二千石。過故里。鄉人葺其臺。且旌賢者之致。

周郎有舊隱。遠在南山陲。一笑偶為樂。九層遂成基。旁連醉令石。卻眺社僧碑。謝康樂所撰。遺公碑。今在廬阜。地遠雲物秀。巖深松桂滋。當時驚高興。益友相攀追。樂聖自鼓腹。談經亦軒眉。風猿助清嘯。谷鳥參朋嬉。忽引朝闈籍。久乖林下期。頭白二千石。高蓋復來思。活活弄新溜。蒼蒼援救枝。雖云未投紱。良足紓煩疲。余懷本丘壑。世路方罽羈。願言獨往客。緬邈心空馳。稅駕或未晚。從君歌紫芝。

歲暮北亭懷子京宛丘二首

歲晏坐孤壁。心馳千里餘。何言共被樂。方歎專城居。野闊江海漫。風高天地虛。願言逐歸鳥。無翼將焉如。搖落江都城。風塵宛丘道。天涯遙相望。離思何草草。迴澤騰麇臨。滄洲叫鳧鶩。星歲日云徂。在原歎方浩。

游山簡習池

昔日白接離。時時詣諸習。累榭今已頽。清池尙堪挹。遙源乳竇響。其源出風山白馬寺泉。聲咽絕可愛。敗防流沙急。况復蘭蕙時。幽香遠相襲。

魚梁

亦曰槎頭。在硯津上。水落時洲人搆竹木爲梁。絕流以捕魚。

八月霜潦收。江槎絕烟渚。竹落如網裁。淵鱗劇雲聚。鷺鳥爭食飛。兒童荷叉語。去乙鰓項肥。吳羹免轆釜。

七言古詩

正月望夜聞影燈之盛齋中孤坐因寫所懷

漢家太一昏祠日。寶炬神燈徧京室。仁壽先從殿裏開。織阿正傍樓前出。傳聞陌上樂康年。寶騎如龍人若仙。驂驪始見斗城曲。爛熳還逢星漢邊。妍歌巧笑競賡續。萬狀晶熒奪人目。洛橋羅轡自生塵。楚國香纓不藏燭。五侯四姓共豪華。況乃經過趙李家。迷路非關武陵水。添妝祗爲壽陽花。九門啓鑰光如晝。若箇游人不回首。春宵病客獨無悵。挾册焚香坐虛牖。坐久更闌可奈何。著書自古窮愁多。鐘磬笙竽盡鄰里。誰能載酒來相過。

吳侍郎生朝

朝端舊記生賢日。使節臨門恩有秩。詔書感會形溫辭。宴品豐華動私室。降崧孕昂誠不誣。史簡詩絃互襄述。賢人挹道隨汗隆。忽向西臺就安逸。門弧紀旦還復周。瑞霰連天芳歲逾。塤音篪曲會中坐。蘭叢玉樹來西州。稱觴獻壽私庭裏。別得人生行樂意。貳官禮樂春闈卿。托蹟逍遙漆園吏。病尹論交情最深。因聲附祝成孤吟。願將明哲保身智。遣我摧頽知止心。

玉宸殿竝三枝牡丹歌

中天帝圃蒔英蕤。氤氳嘉祥凝朝曦。竹間芳種易封殖。疊萼三葩同茂枝。慶雲景宿共靈意。鴻英託寓茲爲美。華夷面內始竝柯。慈孝歡心遂聯蔭。雲旂羽葆駐天臨。玩此能無悅聖心。幽香自逐德馨遠。麗色更緣眉彩深。因生軼草兼平露。薦祉神庭幸同侶。盛開已被帝琴風。縱落猶成佛天雨。

安福殿千葉雙頭竝枝白牡丹歌

三月春風滿瑤水。珍叢瑞薄紛難紀。矚若茲花四照中。揚蕤獨茂千齡祉。千齡丕應在重葩。雙吐瓊房彰協華。秀跗卽鏤平臺雪。寶豔寧爭台嶺霞。球欄黼幄遙相映。姑射仙姿玉虛境。結根已近堯莫階。借媚非關漢蓮井。天襟多豫玩羣芳。彼美幽姿首效祥。都緣剩沐太和潤。況自頻分私照光。憑休託粹成奇質。一卉時來遂逢吉。願將藥品誌佳名。永續芝房騰茂實。

感花

前日來攀小園樹。枝頭蓓蕾無萬數。今朝置酒來賞花。已有殘英伴飛絮。春花如此將奈何。白日雖遲終不住。鸞歌蝶舞兩矜春。見我長嗟亦飛去。

元憲集卷三

五言律詩

南禪院

王舍多幽刹。林居訪淨人。旁行經葉古。寶色梵天春。風閣鈴如語。烟溪樹勝輪。道場聊抖擻。認得客衣塵。

和楊學士和答中丞晏尙書西園玩菊

僚慄衆芳歇。金英無與儔。香疑飲潭日。歡似漉巾秋。潤蘆霜華入。薰叢野色留。郢蘭休自咤。冰玉此庶酬。

晏乃楊之子壻。

春夕聞鴈

春夕坐神臯。天長北鴈號。來思繫書足。去羨順風毛。瑞鶴天淵暖。啼烏禁樹高。夫君自江海。避弋莫爲勞。

馬上見梅花初發

瞥見江南樹。繁英照苑堦。無雙春外色。第一臘前香。雲葉遙驚目。瓊枝昔斷腸。莫吹羌塢笛。容易損孤芳。

西陂

歲晏西陂好。澄波共夕陽。戲魚來有暈。驚鷺去無行。荇葉疎猶碧。蘭苕老更香。裴回歸鞅晚。併爲似滄浪。

新月

稍傍夕樓明。娟娟底有情。眉纖鬪蛾出。鉤曲誤魚驚。欲暗猶銜岫。將斜更上楹。刀頭君自晚。莫枉桂初生。

過璨師房

病客塵纓外。幽齋法境中。庭喧施鳥食。坐拂去花風。茗溜沈甌綠。檀烟入篆紅。忘言一相對。何處妄求空。

送外門朱秀才見訪都下卻歸安陸舊隱

白髮游梁晚。青山念楚歸。魂銷雖得別。戰勝卻成肥。秀才忘懷進取年高道勝有康寧之福障日都門蓋。迎烟礪路衣。試尋

南圃樹。今長幾多圍。予昔僑居安陸小園正在翁宅之南

次韻和吳侍郎謝王陝州寄酒

遙聞齋酎絜。來佐客觴酣。棠野歌新績。兵廚興舊諳。竹供醅上色。蘭獻液中甘。欲識西臺勝。厭厭夜雪庵。

建隆寺北池亭

寶剎開初地。滄浪繞故城。芰蓮俱野色。鳧鶉各秋聲。岸闊烟無著。牕虛日易明。歸驂誰訝久。正爲濯塵纓。

前歲春僕與獻臣同餞常山公于苑西曾未再葦已均師門之痛兼承即日親奉撥塗追往悼今哽涕無已因成短詩抒感諒心契之同戚也

昔歲西郊餞。曾瞻出守麾。今年東第哭。便嘆哲人萎。辰巳空成讖。膏肓不遇醫。詰朝聞袞斂。心折寢門悲。

贈兵部尙書魯肅簡公挽詞三首

應運推邦直。乘時講化源。不冠嘗可奏。問樹本無言。亮節裨初載。清風裕後昆。忽嗟梁木壞。袞冊賁忠魂。

昔事重明郎。俄陶萬物鈞。專懷長孺直。終損武侯神。舟壑先成夜。桃蹊遂不春。惟餘麗牲刻。終古誌名臣。偉望巖巖峻。忠言諤諤昌。門無謝恩客。惟有獻書囊。王駿封侯晚。臧孫樹德長。都門簫鼓發。行路泣云亡。

送黃昱赴太平州理掾

閩錄家聲茂。唐銓吏格平。新資掾三語。舊榜佛千名。月苦鄉魂極。春寒酒意輕。高材難偶俗。慎勿對參卿。

送比部馬員外二潮提點刑獄

西漢爲郎選。南方奉使才。書隨星火落。帆拂斗牛開。束筭聞民悅。丹毫絕吏猜。奈矜持節重。無客對銜杯。

秋日小雨後作

晚陌收殘雨。高軒冒夕霏。風乾移舊轡。月破隱空圍。敗葉相將舞。寒雲不肯飛。興無潘掾筆。潘岳以太尉掾寓直散騎與一作秋賦。何術寫心微。

送英州理掾朱舅

遠補參卿掾。來過乞墅甥。秋悲先鴈引。曉涕伴參橫。蕙于期蠲疾。梅花幸寄聲。片言無異俗。陰德在鄉閭。

送從兄祕校咸赴衢州都掾

倦客睢園遠。迎家越絕長。聊甘督罰掾。羞比入貲郎。汗竹書滕密。炊菰宴具香。蘭臺英藻盛。方信乃宗彊。

送宗弟祕校壬赴建州理掾

補吏唐資淺。遊方漢牒遙。貪榮親及祿。詎悔俊沈僚。葛詠同根庇。松期晚歲凋。曾孫柔俗美。前識鮪筭銷。

相州春日

北土無繁卉。空亭有暝陰。狂飛憎野絮。多舌恨春禽。地燥山如朽。池寒水不深。生平箕穎志。軒冕獨何心。

送太常王素博士許昌通理

連佐陪京郡。愁銜出祖杯。新曹拋野蕪。舊第老公槐。君大父太師常爲先太尉文正公手植三槐于庭以期遠至事具家傳府檄迎車遠。戎牙宴豆開。遙知傾坐日。方歎阿鄜才。許昌府公太師未識君今寔爲之佐

秋夜禁直聞雨

微道千廬地。宵霖八月天。牀棲吳篔簹。牕濕漢宮錢。幕影翻層浪。簷聲響細泉。空階何所得。併是廢愁眠。

臨春水

盡日臨春水。非關問要津。舟行魚避楫。岸坐草留人。杏萼千紅糝。苔花小翠鱗。已堪遺俗慮。何必擲江濱。擲然于江見莊子

東方欲曉

烏渴催宵漏。雞鳴引曙光。山西河關淡。天北斗低昂。銀燭香猶燼。瑤琴冷未張。何須開寶鑑。容鬢定蒼蒼。

掖門待漏

曉陌千槐落。嚴扉萬蓋留。浮雲低觀闕。殘漏急章溝。斗柄遙臨殿。參旗側映樓。如何軒上鶴。獨憶海天秋。

和吳侍郎題寶應僧房白雞冠花

野卉秀禪庭。瑤華發素英。託根真不染。肖質似先鳴。露葉疑藏羽。烟蕤更作纓。何妨依忍草。休辯好丹名。
秋蝶

百卉芳心罷。空園蝶影微。雖逢已涼節。尙作有情飛。露菊聊堪採。風蘭或可依。履霜從此懼。君意定何歸。
登大明寺塔

寂寞南朝寺。徘徊北顧人。鐘聲含曉籟。塔相湧仙輪。弔古千齡恨。觀空萬法塵。三車何處在。歸鞅欲迷津。
燈夕齋中香火獨坐招希元不至

掩室維摩病。從昏太一祠。誰言鼓吹夕。獨禮天人師。燭燼委寒檠。茗華浮縹瓷。同袍不我顧。宴坐復何思。
送刁繹從事自龍舒西赴青城宰

東別羣舒國。西踰二劍天。才高鄴都檄。政竚武城絃。秣馬征蹄苦。巖雞瑞羽鮮。離愁知遠近。萬里到橋邊。
疾風

天陸箕躔動。林簫萬籟空。扶搖莊海北。悲眩魯門東。貪誠詩人隱。清思賦客雄。何因知勁草。霜陌盡飛蓬。
胡調建隆寺

郡國高皇廟。天龍釋帝居。兵銷擒布後。臺聳畏軒餘。寶榻成蓮坐。其寺中有戎韜入貝書。守臣榮就望。屏息拜前除。

遲明出都謝雪龍門佛祠途中復遇雪

路闕三條陌。雲低九鼎門。鏡風催騎響。裘毳減貂溫。谷曉天花亂。林空苑絮繁。周甿農意切。一一願流根。
晚歸馳道遇雨馬上作

朝雨雜輕霾。濃陰暮未開。天低五里霧。日晦九成臺。宮溜輕淙玉。坊車小隱雷。不愁馳道遠。寶色夾千槐。
河陽寒食

關輔陪京外。年華禁火中。柳矜河上綠。花獻酒邊紅。野市鞦韆月。春樓鶯築風。三州六鑽燧。安得不衰翁。
晚晴

斜日紅初斂。晴山翠欲流。休歌陌婦怨。寧作賈胡留。物意如相樂。吾生有底愁。早分好風月。更上庾公樓。
贈中書令沂國王文正公挽詞二首

揆路同寅業。師垣出守麾。終無三令喜。便集兩楹悲。衰職嗟何補。天心感愍遺。幽泉空漏澤。非復作霖時。
自昔榮歸袞。今茲駭閱川。天愁摧柱日。星痛殞箕年。素履遺儒範。忠謀溢吏篇。空餘涖鄉陌。長似隄碑前。
錢候東齋

北里開公第。東齋集俊游。祕書家有副。甲令世傳侯。鳳竹供聯冊。鯖盤入宴羞。門前多鶴蓋。不爲騁長楸。
贈駙馬都尉李和文公挽詞二首

曲里猶龍族。西京尙主侯。勳華傳舊鉢。名理寄虛舟。得疾真無妄。觀生遂若休。偏嗟荀令沼。回作逝川流。
北第琴樽歇。東原旌旆飛。清風逸無所。此路是長違。野闊車吞響。天愁日抱輝。空餘門下客。魚鳥歎何依。

獨坐郡圃北齋

宿雨催秋物。清風卷歲華。殘蠅初去柳。寒蝶尙尋花。密篠留蒼霧。紅梨染落霞。城頭八九子。日昃亂啼鴉。

贈太子太保晁文公挽詞二首

帝禁留辭範。儒林老棟材。方期割牲禮。遽近奠楹灾。歲晏集鷲逝。天秋弔鶴來。宗工銘盛德。千古照泉臺。几杖辭榮久。龍蛇感歲遷。留春太史記。成佛謝公緣。素蓋寒雲外。哀簫落月前。無煩樵牧禁。行路拜新阡。

贈司徒兼侍中宋宣獻挽詞四首

〔案〕宣獻宋綬諡庠與綬同姓不宗見于景文筆記故稱不去姓

一世文爲伯。三階象有光。何言隆棟吉。忽歎夜舟藏。櫜禮朝頒冊。哀音路過喪。善人今不與。神理太茫茫。梁木萎邦哲。乘輿哭第家。斂恩周袞里。追品漢貂華。素禮初無悔。浮生遂有涯。斯文從此喪。誰與辨咬哇。舛運明生疾。忠懷語絕偷。空榮人曳履。終隔相封侯。太史藏書法。門生助紼謳。惟餘文獻諡。不復嘆平頭。宗工天下寶。歸葬國西原。野闊簫聲苦。雲愁旆影昏。如存三事禮。不返九京魂。河海空成淚。難酬國士恩。

別墅冬霽

宅隱羊曇墅。門連仲蔚蒿。銜盃思左蟹。舒嘯憶東臯。楚桂風生穴。莊魚浪溢濠。平生丘壑志。終願寄民曹。

冬霽

夜枕鴻違漢。霜天雀噪園。回車長者轍。曝背野人暄。墨溜沈寒沼。松醪湛凍樽。誰能穿雪履。待詔魯班門。

贈太傅中書令張文節公挽詞三首

素範流邦冊。昌言溢帝聰。三台應天老。萬事問胡公。道有如絃直。生嗟委蛻窮。令君兼上傅。衰斂賞遺忠。昔命光三事。今嗟贖百身。堂無織蒲妾。車有吐茵人。台坼層氛夜。槐凋故府春。空餘相國第。不與勢家鄰。平日開黃閣。茲辰奠素旗。留侯嘗辟穀。巖說遂騎箕。天迴哀笳咽。林長導鬢遲。行人此墮淚。何必覘亭碑。

次韻和吳侍郎再葺東亭兼懷晁公舊隱

地占心齋舊。天扶藥喜身。高懷聊避寵。幽境更隨人。樹密添新籟。叢香續故春。婆娑榮路友。偏倚此相親。

夏夕雨霽

積晦連空卷。繁蒸此夜收。峯催雲去夏。珪伴月迎秋。樹老殘煙入。庭虛爽氣留。長康惟半點。孤詠費冥搜。

北亭

舊壁橫空苑。危亭納夕霏。野蟲多各韻。倦鳥忽同歸。木落驚秋晏。人愁念昨非。生平嵩穎志。尙或拂塵衣。

早春北亭見城隅荒寂

荒城樓堞少。野色徧高低。蔓草無名綠。幽禽取意啼。天形岡樹北。日腳嶺雲西。不覺凝笳動。春風引夕鼙。

寓居寰內宰邑者數見存訪因成謝

謝病非三最。爲氓乏一塵。何言羅爵尉。時駐鳥鳧仙。華轍交深巷。餘香襲故氈。豬肝難設具。應作閔生憐。

得充國書報都中葺所居初成輒以自慰作一首寄于京

昔貴三公第。今營一畝居。聊堪避燥濕。兼欲貯琴書。獸窟猶思聘。鷦巢不願餘。長安窮僻地。吾亦愛吾廬。

送晏延平宰邑分寧兼過鄉墅

銅紐腰新綬。烏衣省故廬。鄉無夜行諺。楹有世藏書。楚澗蘭浮楫。潘園板御輿。蚩蚩吳俗美。庖刃一投虛。

送靜海高簿

城闕曙烏啼。行人歎解攜。舊歡苹鹿散。新意棘鸞棲。淮月涵孤蚌。江雲雜斷霓。漉沙應搆賦。春澗正平隄。

魏花千葉

露曉移珍樹。丹房一紺幃。綃輕無奈疊。霞碎卻相依。倏日香難斂。擎風力自微。他時零落恨。千片爲誰飛。

晏歲

晏歲無情晚。陰飈昨夜聞。芳條臨檻勁。短日轉樓曛。苔石收蒼暈。冰溪疊素紋。蒿蘭雖異種。霜至若爲分。

早春雪後見辛夷初發

冒霰初分葉。驚春已作花。鮮于紫艾綬。殷過赤城霞。花色淺于茜破蓓香囊小。銜趺彩筆斜。俗號木筆皆其形似騷人雖麗思。忍作桂旗車。楚詞有辛夷車結桂旗之語

秋夕池上

月御橫霄陸。溪樓敞夕霏。神龜荷裏宿。仙驥露中飛。屏箠風摧暑。琴條客念歸。治城空極望。憂樂意多違。

和友人晚出池上

節物更徂候。幽衿屬釣臺。關荈兼佩長。桂葉學旗開。鵲避驚弦去。魚隨晚餌來。謝塘多藻思。引蓋一相陪。

次韻和王密學冬暮書事

歲晏陪京守。心閒俗自安。斗城供近望。天幕借餘歡。秀句然其待。幽經濯手看。不因郵問數。誰識政條寬。

小橋

野水危梁渡。凌虛一徑橫。鄭車求代涉。漢櫂且專行。濠詠觀魚樂。圮書跪履情。斜陽葭葦岸。鷗鳥爲誰驚。

姚黃

世外無雙種。人間絕品黃。已能金作粉。更自麝供香。脈脈翻霓袖。差差剪鵝裳。靈華餘幾許。遙遺菊叢芳。

歲晚餞客南亭二首

偶作津亭餞。還驚歲物非。蒼葭無際合。黃葉有聲飛。別恨隨人遠。鄉心著酒微。猶欣見山色。紆轡暫忘歸。

亭上遙見江南山色。

淮壤窮南界。亭臯坐渺然。平窺京口樹。斜落海門天。重霧多藏日。寒潮不送船。江岸極高。行船必以湖爲

湖。江山寧有助。私作楚騷憐。

遙夜

夜夕更籌永。霜飛歲籥空。斗杓常記候。蟾暈豫知風。過鴈驚流弋。衰螢戀故叢。可堪鄉思發。夢繞兔園東。

竹雞

羽族何微眇。交交作好音。遠聞真似語。寂聽本無心。倦舌沈荒塢。嬉羣聒翠林。鷓鴣王佐筆。從此異凡禽。

元憲集卷四

五言律詩

鬪雞

對壘毳毳地。雙鷲滅玉塵。長鳴非後郭。利嘴欲專秦。鷓鴣領聊延敵。鷹揚願殺身。君恩定多少。引距卽隨人。

春渚

溪上照瀟淪。吾纓此濯塵。風清琴籟細。波浸沼毛春。處裔蛟何待。鳴雛鷺自馴。直鉤聊適興。底處餌文鱗。

晚霽

斷續簷聲歇。徘徊隙影賒。歸雲衝樹破。殘雨入樓斜。徑綠都成草。叢薰尙隱花。便同江海思。春水照軍牙。

負暄

旭日東南霽。霜天病骨寒。心同陽藿展。志鄙夏畦難。東洛貂裘壞。西華葛被單。嵇慵聊自樂。愛景始三竿。

惠泉

濟物功偏厚。朝宗勢不迷。一航容宋葦。六斗異涇泥。潤溢呼魚輟。光分抱甕畦。寧同南國詠。酌飲變夷齊。

有釋子以禪會圖。既余者此圖。卽今駙馬都尉李公所製。繪故楊大年劉子儀及都尉環禪師等信。一時之盛。集瞻歎不足。因成紀詠。

法集超初地。工毫構妙緣。星占世外聚。月寫相中圓。指指誰標諭。心心自默傳。惟應阿堵處。俱是到忘筌。

對月

蕭寂東軒坐。徘徊月馭來。風休涼暈缺。句破晚弦開。紫漢沈星樹。仙莖逼露杯。誰憐故林鶴。終夕自鷺猜。

得告上冢

拜墓標唐令。襲親滯漢恩。永懷淒欲寄。忠訓藹如存。宰樹錦城陌。農疇潁曲村。異時裁彼傳。容或記臯門。

立秋後一日涼風蕭瑟便若感人

倏忽徂炎罷。驚秋自此辰。殘蜩空愛露。孤扇欲辭人。嵩少千尋嶺。滄浪萬里津。如何一乘輿。烟策弄鸞輪。

河陽秋思六首

潘岳有秋賦謝惠連有秋懷詩今作秋思

關外山河關。城邊井木腓。露濃蟬始罷。風急燕猶飛。不雨雲中薄。澄沙水自微。善哉吾祖歎。能此送將歸。

自古悲秋物。多傷黯黯魂。鱸魚輕客宦。紈扇感君恩。潁瀨寒明野。嵩雲側露村。此中知止地。歸去掩柴門。

芳序雖云晚。華顛亦已新。蛩鳴偏傍耳。燕去不辭人。山隱棲巖路。朝嬰佩玉身。故溪應更好。前夜夢垂綸。

出處因年警。多慙與願違。於陵終不仕。疏傅幾時歸。江柳寒陰瘦。畦菘晚葉肥。寄聲溪上鳥。且莫背人飛。

久雨收寒潦。層颺蕩薄埃。鳴蛙鼓吹歇。高鴈弟兄來。食肉嗟謀短。關弓任世猜。故園三徑在。新菊幾叢開。

秋物自能晚。秋聲何足悲。歡應隨壯去。病已與衰期。斗遠終難挹。天高不易欺。此心丘壑戀。匪石恐難移。

雨霽

曉雨纔收潤。高軒一爽神。雪峯將變夏。桃蠶漸辭春。霽隙微陽淡。陰墻積蘚勻。空餘稚圭宅。蛙響徧諸隣。

小圃雨霽

風雨殘秋罷。年芳遂悄然。黃花沉暮蝶。蒼柳噓孤蟬。霽日高彌淡。曛霞冷不鮮。忽聞雙鶴唳。心斷故谿田。
家養雙鶴。乘秋多唳。

霽後

小雨春膏潤。微波晚照壺。空光遙送電。梁影半傾虹。珍樹疎煙合。坳塘暗溜通。羲皇誰可上。靖節有臆風。
凌景陽寺丞與韓綜監簿蔡襄秀才雪夕會飲聯詩數十韻以相示因或詩句

歲籥愁雲暮。朋簪夕宴開。賢如潁州聚。興是剡溪來。瀉洒蟾波溜。雕章燭刻催。三英知絕擬。況復是平臺。

漢濱北樓

一水東流闊。諸峯右轉深。蟾規欲破暈。天杵不盈尋。浦逗分風席。洲喧避繳禽。憑高機事息。併爲漢川陰。

晨謁宮門小雨初過

宮漏籤聲急。天街雨腳微。曉寒凌禁樹。春氣裊朝衣。瑞霧輕猶濕。香塵重不飛。雞人傳鑰出。華旭滿彤闈。

淮上

晚歲清淮路。淹留數問津。風平天合水。舟進樹迎人。饑鷺貪魚沒。高鴻望渚遵。楚鄉梅柳意。相慰似先春。

北樓三首

地迥樓堪倚。天長日更勞。何須雲渺渺。況自葉騷騷。脫兔橫岡遠。冥鴻避弋高。四愁休徧詠。俱是一霧袍。孤堞神垵畔。平原歲琯陰。驚鷹時易藪。倦鳥卽投林。日舍翻車恨。天旄伏櫪心。蓬池八十首。半足爲登臨。危檻倚孤城。風襟俗慮醒。天高鴻類臯。雲散日如萍。疊巘斜銜岫。回川曲抱汀。騷愁千古地。椒醕弔遺靈。

送兩浙轉運道卿學士二首

彼美閨臺彥。胡爲江海行。眞貪子舍養。不厭使軺輕。茂草姑蘇苑。蒼山越絕城。莫因羊酪味。終擬笑諸槍。新歲郵中問。殘冬湖外書。歡同烹鯉日。情是斷金餘。澤節行臺峻。天垣右席虛。不應周吏課。朝紱企歸歟。

晚登東樓懷子京鎮陽二首

洛表樓堪倚。燕陲望不窮。秋聲南送鴈。寒意北隨風。斂暝關雲黑。銜規苑日紅。凋年霜霰惡。慎勿損荆叢。周界西窮陝。常山北盡邊。關河相望日。容鬢各衰年。蓬亂將風野。禽稀欲雪天。治戎如有暇。莫惜賦歸田。

秋圃感物

秋葉霜前綠。秋池雨後清。殘蟬多默默。寒蝶強輕輕。丹果林梢熟。黃花草際明。心慙逃相客。世外掩柴荆。

羣玉殿十二月二十三日錫宴

歲晏彤帷敞。天深紫宇寬。氣和先合樂。仗密不知寒。斟酌中衢飲。伊亞平聲別殿歡。先春皇意悅。花滿從臣冠。

寶翰揮文罷。瑤觴續宴初。帝韶重舞鳳。玉藻更歌魚。景駐三休閣。歡留六尺輿。賜金將厚意。併入史臣書。

杜門

苦宇切郊寰。荆扉度歲關。賓蒸秋薜合。童唱暮薪還。石上春梁苦。牆東避世難。屢屢猶可藝。誰訪陋居顏。
謀退四首

勤勤念耦耕。不是釣虛名。皓魄圓猶缺。芳卮滿故傾。佩章防事急。分肉倚心平。此意將誰語。臨深坐治成。
常聞疏少傅。知足遽辭官。祖道賓儀盛。揮金里宴歡。畏途非螻屈。高志自鵬搏。行路賢哉歎。吾心良所安。
昔日於陵子。遺榮自灌園。三分輕國爵。一世謝人誼。野笠鋤春隴。橫棹汲曉源。區區冒榮者。天壤亦何言。
濟世才無取。登朝運所遭。濡鵜真竊祿。汗馬本非勞。漢重商賢隱。堯嗟穎客高。古今閒自況。何翅九牛毛。

秋日漫興

天淡雲摧險。風清水始波。暗蟲催紡緯。驚鵲報填河。時七夕宮扇紈規掩。仙盤露彩多。空餘歸客恨。芝朮老巖阿。

晚庭

蒼靄秋霖歇。高軒夕景遲。桐凋金井恨。蘭老玉琴悲。巢燕寒初失。風蟬晚屢移。黃昏禽語鬧。相喚宿何枝。
送王秀才下第隨侍東去

春色鄉粉老。波聲客櫂催。林烏貪夕哺。都鷓怨風摧。處晦囊中穎。加餐案上杯。重來期歲晏。飛藻右鄒枚。
送明州章從事

東國有嘉招。歸心越絕遙。幾程淮蚌月。一信海鱸潮。蓮渚熏談席。霞天認賦標。時平軍版息。麗藻入雲謠。
郡圃洗心亭。宴坐對春物。因書所見

盡畫山楹坐。居然外物身。野葵能向日。怖鴿解投人。萬萼融朱蠟。平蕪識紺茵。須知無事處。堪養不才臣。
宿齋太一宮寄天休

入暮鳧鐘警。乘涼鵠帳寒。霧來燈欲濕。螢過草疑燃。野氣樽浮桂。幽香席藉荃。無因招傲吏。同宿一壺天。
殘春夜雨

春色無情老。宵雲有恨低。輕寒借鴻駛。早暝入烏啼。晦燭風生幔。漂花溜漲溪。滴階兼被草。聊此況淒迷。
寒野

芳歲行逾盡。高堂興耿然。林號欲風野。雲綻已霜天。烏彩疑留日。鴻聲似惡弦。幽衿忽忘返。更爲月娟娟。
正月三日作

迎春纔十日。是年立春在故歲應月已三莫。池面開新素。山光復舊青。灰飛空玉瑄。醅動漲金瓶。剩作尋
芳具。常筵忌獨醒。

奉送滁州趙學士

灼灼書林彥。胡爲江海濱。希遷杜陵客。出守始平人。夕夢螭階遠。君早聲記前驅隼旆新。離觴君莫勗。去
去易沾巾。

代書寄奉寧樞密直諫議學士

故秋嘗假道。倏忽改芳年。三疊黃河上。千花白髮邊。冰消牛口渡。山綠虎牢天。東望無人會。滎陽太守賢。

憂閔詣臺先寄獻臣天休二學士

去國三年恨。還臺九死餘。淒涼曾釜粟。感咽晏楹書。鮒勺懷窮轍。鷄棲整故車。惟當親益友。敍闊費漣如。

春野五首

衡萼負城開。春兼野色來。煙扶霽日柳。雪惱故年梅。波影魚先動。林聲鳥並催。欣欣羣意悅。病骨獨迴回。陂色入柴關。陽和遠近還。平蕪隨蹇步。新水照衰顏。廢堞鳥聲樂。晴臯雉羽斑。一逢樵客語。無俟辦連環。近出東郊道。時巾下澤車。田溝蛙拖紫。沙徑鳥留書。木引藤絲遠。墻蒸菌蒂虛。幽懷聊俯仰。無意事施隨。沃野周原接。遙陂鄭洧連。鬱葱中縣氣。南北富人阡。鳥騁因風野。虹生欲霽天。斜陽墟落外。牂豕食春田。夕藹收芳甸。春高徧宿莖。朝虹先雨出。寒鴈後陽來。遠木芊芊茂。幽花脉脉開。欣逢老農語。爭席坐林隈。

林下

偶作中林適。聊觀萬花春。蜂巢喧似市。禽舌巧于人。陂溜鳴田尾。藤梢衣樹身。鄉農時晤語。野意合天真。

郡圃海棠初開追憶學士院玉堂後西軒此花最盛置酒有感

昔作瀛州賞。今逢汝水春。可憐無並色。來對始衰人。溫樹遙知漢。仙桃尙記秦。臨樽如舊識。爭忍判芳辰。

寄題奉寧樞密直諫議新葺漱玉齋

聞說西齋水。潺湲逼畫楹。雖添新寶響。不改故源清。花落波浮亂。杯遲屈曲行。無因陪夜宿。同賞瀑巖聲。

次鞏縣

昔走成周道。春風尙落花。頃歲春末赴洛陽今馳河內傳。秋日正臨霞。山色依前綠。顛毛只是華。見迎多故吏。衰

壯兩驚嗟。洛陽故吏皆迎余于道

病臂痛踰月不能御刀筆

百疾乘衰運。雙肱怯痺搖。身知九折痛。肉訝半分銷。掉市將誰羨。拘原莫我邀。惟堪楚林下。如槁學承蜩。

傷死馬

辨道曾資智。嘶風忽絕音。故蹄休踐雪。朽骨詎酬金。附尾讒蠅散。投鞍嚙鼠侵。棄帷宜一報。盡力有前箴。

涉淮泝清迫于冰涸舟次下邳先寄彭門趙侍御二首

病骨憂南土。孤懷念北遷。欣承紫泥詔。且向汝陽田。夜雪淮冰合。朝曦海氣鮮。風波雖繚繞。自有故交憐。此地淮壩極。連壩北轉初。風煙寒背楚。陂澤遠通徐。葆髮驚秋外。葵心戀闕餘。不憂芳歲晚。松柏自扶疎。

次韻和北京太師丞相潞國公創作茅齋

地僻誅茅後。堂幽搆廈餘。誰知冶城望。更作傅巖居。淨供香廚飯。真籤藥笈書。因公高世想。轉憶舊田廬。

廢書

斷簡孔堂壞。遺經汲塚虛。謾求芸辟蠹。先歎魯成魚。舊帛愁連蓋。亡篇恨蠟車。吾家先訓在。楹鑿晏生廬。

初春置酒河上得前忠武記室饒廷評書因成感詠以寄

故歡清溪上。今醉濁河邊。素領添新髮。春風似去年。暖雲邨北樹。芳草翠陰田。感舊情何極。重看記室牋。
得天經書問

久臥堪憂巷。驚聞不滅書。高風五柳外。深意八行餘。努力邀加飯。相逢約下車。殷勤長跪讀。雙睫費漣如。
禁中寒蟬

何處幽林蛻。來依禁樹鳴。風綏非冒寵。露腹祇知清。曉韻飄觚闕。殘嘶逗綵甍。秋螿多怒臂。寂寞好全生。
楚辭云寒蟬寂寞而無聲。

感秋二首

夕軒疎雨罷。物物爲秋驚。病葉先風落。寒蟬趁候鳴。西飛愁燕急。左界恨河傾。借問三江客。鱸魚底有情。
歲事催人事。榮心伴客心。鸞驂收畫扇。螿臂感瑤琴。夕露繁將滴。朝雲薄亦陰。金貂寓直省。潘興轉難任。

元憲集卷五

五言律詩

甲戌冬屬疾賜告二首

行年三十九，病腦劇中乾。目界空花眩，脾倉宿滓寒。未燈欹夕枕，欲食進朝丸。惟有披書樂，依稀及士安。
 恩告偃衡華，年華飛瑄灰。右眠安佛脅，深息養仙胎。數犯稽違禁，誰憐濩落材。使軺均病粟，臥病適值長至官給節物
 梁更自驟然哈。

小疾

舊疹感春陽，岑岑體正疴。雙瞶便貉睡，一息寄龜腸。味減輟羹釜，心疑照弩觴。藥苗行可采，更驗太清方。

晚望京邑

暮壘初休角，孤譙半掩門。鴻聲騁寥泬，鷗意戀黃昏。遠岫排頭碧，春河徹底渾。關東三百里，依約是天關。

候月臺

平昔詞林伯，嘗爲右輔來。庾公偏愛月，薛縣未傾臺。錢石雲根斷，臨波水腹開。良宵時弭蓋，方信謝莊才。

過列子觀

兩作朱轡守，赴洛孟二守皆經此祠重登羽客宮。故壘墻舍壞，塵案耐杯空。款戶殊無屨，乘衣尙有風。軒游曾駐蹕，

高意掩崆峒。真廟四巡狩親謁祠下有詔褒加冲虛至德真人之號刻石存焉。

北臺

遠日春風外。韶光晚思前。短青平野樹。斜碧半樓天。芝朮參雲嶺。桑麻冒歲田。詩成無所況。題作詠懷篇。
城堞俯漳湍。關河遠近看。曉山天外紫。秋日霧中寒。短鬢卻成葆。孤心轉似丹。蕭家窮僻地。歸去養衰殘。

善惠師禪齋

象馬王城地。禪局此獨開。漏聲隨葉換。風意繞幡來。馴鴿依齋樹。飛花戀講臺。朝珂時一集。併為碧雲才。

臨秋三首

兀坐臨秋水。悠然到夕霏。蓮叢經雨折。菰米待霜肥。有餌潛鱗出。無軒野鶴飛。鷗呼且勿遽。更待月華歸。
素潦沙成岸。蒼條柳映津。蟬休疑惜已。漢杜密曰。隱情惜已。自同寒蟬。蜻去似猜人。南子。事具淮。紺幕隨天遠。瓊鈎伴月新。清

風時一至。吹盡故纓塵。

脫葉金霜罷。滄洲滿目前。林風寒結纜。溪日晚留煙。獨木橫宮徇。方苞入稻田。持麾更吏隱。殊覺主恩偏。

次韻和西堂風靈

霧氣疑成雨。終風亟挫春。祗驚天灑礫。寧是暮吹塵。大旆亡空澤。奔車僨要津。高樓非可望。偏汗扇中人。

謁龍門無畏師塔祈雨作

梵聖遺靈骨。洪緣福故都。慈深雲不斷。法徧雨常俱。使節開真櫛。朝廷近遣中貴人開棺祈雨。天香奉供爐。又賜御封。

養
拳拳依帝力。餘潤冀昭蘇。

過普明禪院二首唐太子少傅白公舊宅

自昔仁爲里。于今福作田。清風殘竹地。寶色故池天。繪象成真侶。樂天舊影與蒲禪師偶立家聲入梵緣。又常自稱一披龍藏集。無復歎亡篇。後唐明宗子秦王尹京曰。特寫公文集。一本置經中。至今集本最善。

軒冕唐年客。溪林洛社坊。雖開居士室。未壞魯恭堂。佛樹高彌綠。天花落更香。惟餘名不滅。來伴法燈長。

浮橋

東渾雙津隘。浮梁古制存。灘移淤岸勢。標譴漲波痕。逆浪船排首。周阿纜植根。祀勞如舉典。元凱有英魂。

讀書多所廢忘

舊學紛無幾。幽懷斷復尋。蒼茫萬機論。零落九州箴。枉嗜韋編讀。猶依稿簡吟。時無袁伯業。孤陋任年侵。

晨興讀書

老病何爲者。陵晨縹帙開。終無經世略。似有著書才。余家子京受詔作唐書百餘篇。余亦斐然有著。遂意。史記金藏匱。春秋玉作杯。

吾心聊自適。萬事已焉哉。

守洛

久玷疇咨地。新蒙策免恩。往非堪咋舌。來寵夢驚魂。余罷相蒙恩。改官加職。非待罪之本望。病與疑弓釋。身隨散櫟存。惟餘

太陽照。終不礙孤盆。至洛。隨月。凡兩蒙遣使傳宣復問。

次韻和吳侍郎睡足成詠

何處西臺樂。高眠萬慮沈。盃盤春席罷。風雨畫堂深。氣勝龜調息。魂交蝶伴心。有人驚曉漏。顛倒整衣簪。

晚歲感舊寄永興相國晏公

誤知三十載。頑魯寄洪鈞。物比青氈舊。年驚白髮新。河冰斜界陝。關樹曲遮秦。何日陪師席。孤懷跪白陳。

聞安道舍爲鄰火所焚

里旅聞遺燎。連臺委夕煨。初無徙薪智。枉被及魚災。勺水寧堪救。三車諒未摧。天知君自足。聊復寄靈臺。

南軒望雨

層靄冒遙城。風長雨足輕。暗雲依電簇。微日記虹明。樹洗連帷出。荷翻百琲傾。幸無漂麥慮。舒嘯倚前楹。

夕雨

春溜簷聲細。層波幕影斜。雷車陳后館。雲枕楚王家。桂凝霞杯蟻。蓮空蜜炬花。莫漂枝上蝶。幽夢在天涯。

雨歇

急澍乘雲度。涼煙落晚留。山顏紅露日。田尾濁鳴溝。知倦翩翩鳥。來思濕濕牛。東菑聊騁望。偏識種瓜疇。

池上觀雨

急雨橫塘晚。蕭蕭逼坐隅。斜津添竹淚。繁點溢荷珠。泥重聊休燕。波翻尙浴鳧。風霆河外惡。橋卒弗傳呼。

送太常魚博士通守漢州

春霰霽征塗。離人向蜀初。還拋博士藜。貪佐使君旗。藻思夸名閣。忠懷慕叱車。布刀多計吏。行矣數通書。

冬行西園溪上

故柳樊官圃。新禾上野場。部有稻畦晚煙林外紫。昏日水中光。菊晚香猶在。橙寒味不長。蕭然成隱趣。況

復近山陽。竹林近
在河內

四月十五日晚出溪上留連不能去

偶來尋晚景。便覺滌囂煩。岸柳相攙綠。風荷各自翻。歸雲何處宿。驚鷺或時喧。不奈滄波闊。鳩山有故源。

山海經河南發鳩山溪
水出焉卽此波之源也

譏俗

白雪庶歌苦。華顛答難頻。寒鷺穿履客。餓恥祭墦人。泔泔金終賤。胡盧瑣未真。原生寧是病。結駟往相親。

送譚祕校赴江陵理曹掾先過衡陽別墅

吾穀飛名早。卿軍補掾新。還家鴈峯地。趨府鶴袍人。樹色圍荆壘。江聲瀉蜀津。無輕束矢訟。陰德及斯民。

貧病

貧病兩何緣。相將百慮煎。儲空擔石粟。書貸倍稱錢。客訝甘蠶李。儉驚昔故氈。因聲謝才鬼。擬作送窮船。

秋湖上晚景四首

小小江山國。輕輕縞紵衣。波光清作面。天勢碧成圍。岸蝶隨人舞。沙鷗掠坐飛。此心兼此境。安得不忘機。

曲檻堪何倚。幽芳幾獨尋。頽雲山露頂。孤月水呈心。翹鷺多依淺。驚魚更就深。歸懷無晤語。身世兩浮沈。
 春溜來無限。新蒲綠未齊。蒼煙山帶北。紅浪日平西。野鷺時孤往。林鷄忽並啼。一篇行一曲。依約似青溪。
 浦溆春初滿。風煙晚不銷。泛杯橫截竇。作小堰截水為流杯通舫小開橋。新作釣橋以通舟蓮葉抽萍面。藤梢落樹腰。此中無駭浪。容易打雙橈。

北樓晚景

脩曲少城偏。臨秋坐眇然。殘陽鷗翅外。新月鳥行邊。隱軫齋侵地。蒼茫魯狩田。登高何必賦。歸意自悁悁。

寄李端明獻臣

學道年嗟晚。知非骨已驚。世紛誇要路。天意罪浮名。汶上朱轡寵。淮南白髮生。惟餘方寸地。留貯歲寒情。

次韻和吳侍郎寄致政張郎中以令子倅府迎侍河陽

序齒頗毛貴。傳家子綬青。蘭芳應作膳。椿老別添齡。逸豫鴻排陸。歡心鯉過庭。幾時陪雅集。醉弁一俄星。

奉和御製龍圖等閣觀三聖御書

羣玉中天府。珍圖綠錯文。叢楹開禹穴。寶畫爛堯雲。萬牒真行辨。千題甲乙分。聖心尊世烈。披玩不知勤。

曉入諺門趨殿中馬上作

鎗出馳宮路。更餘送曉籌。露盤先得日。溫樹未知秋。煙幕昏朱裏。風旂颺繆旒。鳴鞘歷宣室。應為闕神休。

是日有司大變明堂禮畢移御便殿

豹隱堂

昔日蒸青地。今茲坐嘯居。人瞻分虎出。庭記墮鱣餘。蕭墨齋猶寶。莊環室舊虛。嘉名傳郡志。寧減武侯廬。

題李洗馬歸歛堂

君有誅茅地。重歸一畝宮。身同巖桂老。心似草堂空。昔歎魚隨餌。今歡鶴出籠。吾廬嵩穎畔。亦欲狎樵翁。

春晦寓月

春序倏云晚。高臺芳意多。花成風地纈。鳥作暝林歌。樹氣薰繁幄。池紋疊細波。夾城歸騎散。煙絮徧銅駝。

池鰲

野水初盈沼。舒鳧亦伴游。雙膺時沒藻。斜陣或迎舟。敢厭吞腥累。真忘續脛憂。杜家鄰舍遠。刷羽恣淹留。

赴洛經鄭馬上偶成

去國雖傷別。乘軺尙及春。榮風清翼蓋。鞏樹綠迎人。後隊金鑣響。前驅隼旆新。衰懷無麗賦。何以詫西賓。

晨興春冷

玉骨臨風怯。華釘恨帶寬。凍醪催卯醉。小雪造春寒。錦瑟弦聲潤。山鱸蕙炷乾。良辰他口意。慎勿怨花殘。

時賢多以不才謂我因自詠

我本無心士。終非濟世才。虛舟人莫怒。疑虎石曾開。蚊負愁山重。葵傾喜日來。欲將嘲強解。真意轉悠哉。

題廣愛寺楞伽山亭

世傳唐初有異僧。呪土爲此山。形制奇詭。且云鳥雀不敢棲宿其上。今逮猶然。

誰復爲山簣。工倅架海形。神鞭陰助險。佛髻巧分青。棟老棲煙濕。禽翻避呪靈。會須依定觀。一一訪巖扃。

和中丞晏尙書西園晚秋懷寄

節物名園晚。風煙亦媚秋。鈿稍低露竹。珠罅老霜榴。塢籟晴先響。牕霞暝自收。山楹誰侍坐。正似傅巖幽。衆籟日蕭蕭。閒園氣寂寥。風萍難覆水。霜葉易辭條。噪鵲繁聲合。寒蟬舊吹飄。試尋籬下菊。鄰酒濁盈瓢。

城外秋晚

澤莽鬱蕭條。憑高不自聊。水寒陂鴈集。城廢冢狐妖。野色空秋穫。林聲急暮樵。先疇東北路。鄉思託回飈。

過行慶關

洛鄭東西接。河山表裏雄。嶺回千樹出。天轉兩崖通。虎圈周原綠。敖倉漢粟紅。今無楊僕恥。四海是關中。

再經行慶

行李纔踰鄭。關門已及周。山支抱鞏合。洛尾貫河流。驛騎迎朱轂。封人訝白頭。余頃守洛未有白髮今則衰矣迎者憫焉往來何太數。慙恨見嵩丘。

添色紅

景淑能藏媚。情多不頓開。初疑香色老。終伴綵煙來。夕露滯仙纈。晴陽染醉腮。施朱應有意。併爲楚人材。

郡圃觀稻

誰取霜禾種。來依郡圃栽。芒隨虎掌熟。畦作佛袍開。自應蟬鳴候。應無蟹嚼災。河洛無蟹公庖豐餽飯。知免拾

顏煤。

歲晏城上北眺

萬彙競搖落。臨高傷旅魂。驚鷗無定響。寒日有餘昏。路轉平臺苑。天低覆盜門。倦倦心未已。曷月報君恩。

和中丞晏尙書西園石楠紅葉可愛

幾歲江南樹。高秋洛浹園。碧姿先雨潤。紅意後霜繁。影疊光風動。梢迷夕照翻。一陪幽興賞。容易到黃昏。

鶴樹

曲浦江湖漾。文禽伊洛飛。愛尋芳蓼去。更伴晚霞歸。露溽金翹潤。菰香錦臆肥。主人真賞厚。慎勿去郊扉。

老屋

老屋共棲遲。窮年弔影悲。宵牀牛誤鬪。晝壁鼠無儀。牕北那成隱。家東益自嗤。因聲謝巢燕。京洛足華棊。

曉謁城東嶽祠回馬上作

州經至和三年水災城池荒圯蕭然殊可歎憫

洛水成災後。霜原落木秋。濁河雖自復。寒潦不知收。路壞停輶館。城摧卻敵樓。民饑無黍稷。何術望神休。

小隱春日

小隱非吾土。幽懷屬暮春。人憂原憲病。鬼笑子龍貧。草合看迷路。簞抽欲過鄰。俗嘲慵自解。駮駮惜千鈞。

齋中焚香宴坐

耳界千聲外。爐薰一室中。妙心那有住。真意本無空。香飯凝盂白。天花蔽席紅。閒觀色身相。方信幻人工。

送蘇寺丞宰廣德

早捧諸侯檄。新登九列丞。庇身聊製錦。受命更懷冰。浦葍薰行櫂。江禾壓翠塍。高樓如可望。西北一長凭。

和吳侍郎微雨中與一二親友同登香山石樓

伊瀨鳴秋麓。香樓隔雨溪。天形林罅出。山脊霧中迷。岸峻靈龕密。沙平野路低。只應觀佛土。物物便堪齊。

歲宴感懷寄吳侍郎

百慮靜相尋。蕭蕭芳歲陰。感君辭劇日。休我冒榮心。歷塊疲東道。才者有時而倦巢枝憶故林。拙者志在霜毛秋更短。持底受華簪。

同年龐汝弼赴宰臨賀見過敍別因成感詠

朋好日寥落。征驂那忍聞。先成數日惡。更負十年薰。客棹秋瀟水。宮郵暮嶺雲。圖南尙良食。少作弔湘文。

齋居有感

氣逐薰絃動。春隨畢雨殘。蠶桃欹廢井。新李礙游冠。處晦垂轅驥。干時上坂丸。無人憐仲叔。平日憶豬肝。

立春

底處春來早。依依傍日華。年光隨寶勝。陽律犯鳴笳。冰沼應潛坼。風枝已自斜。江南無驛騎。何計賞梅花。

李公佐歸漢東予之妹壻

門有聯瓜懿。人傷摻袂分。新篇稽奏牘。故社戀鄉枌。桂魄離懷苦。蘭苕夕膳薰。芳音毋自寶。西北足歸雲。

送王祕校嶺南都講學

高才嘗負俗公薦此開榮。卻領淹中學。還爲稷下卿。槐依鄉市綠。風入舞壇清。稽古方知力。騰飛自有程。

元憲集卷六

歲晏思歸五首

歲晏坐伊川。孤襟日惘然。無功堪載策。有路即妨賢。寵辱丹心寸。年光素髮邊。含毫雖躑躅。自欲賦歸田。
碌碌真邀寵。容容謝致君。短晷生愧脛。狂鹿老思羣。急節驚流水。浮名伴薄雲。歸歟堪擊壤。況復值唐勳。
昔寵塵三事。今懷念一丘。稻粱爭鶩飽。章服裹狙愁。心與蘧非化。年驚趙語偷。欲將知止意。歸謝漢恩侯。
班固序丞相平津侯以下皆入恩澤侯表。

穎山多成瀨。茨山亦有村。不知榮革履。便欲返衡門。邵圃瓜疇熟。陶廬菊徑存。敢言較寵祿。知退是酬恩。
世有功名羨。人將躁靜殊。冥鴻專避弋。鬪鷁喜捐軀。駕敗誰矜巧。山移卻信愚。白雲無謂我。歸意本區區。
主薦後喧訟不已。

昔資丘園聘。今嗟勢利趨。何嘗輕九九。自欲較銖銖。鉤百勞筋敗。朝三怒氣麤。因聲謝鄉校。真賞媿非夫。

自寶應踰嶺至潛溪臨水煎茶

關塞雲西路。僧廬左右開。過巖逢石坐。尋水到源回。源溪禪寺四南二百里。天籟吟松塢。雲腴溢茗杯。宮城纔十里。

導騎莫相催。

致仕得請泛舟歸第

輔郡初辭節。孤舟始去官。橋頭帆影急。枕底浪聲寒。好爵云誰寵。危心且自安。賜車誠可愛。閒共子孫看。

哭子正直講

頰弁王門客。橫經胃席師。頻揚四巡頌。屢析六身疑。寂寞終嘲白。侏儒詎信飢。一朝嗟溘盡。福善亦予欺。

柳嘲竹

好在碧檀欒。叢低度歲寒。何堪裁鳳律。只好製魚竿。拂水煙梢潤。含風鈿葉攢。芳陰聊奉庇。君試仰天看。

送上元張尉

馳譽光英域。糊名限選條。州臨建業水。路出廣陵潮。歸思刀頭苦。離心旆影搖。行聞有薦牘。南闕鬱嵒嶢。

送餘姚顧尉

昔意青霞遠。新恩黃綬榮。官同吳市隱。賦歷楚鄉平。天霽晨帆駛。潮回夜舫輕。千巖勝遊近。且莫棄塵纓。

送烏程吳尉

千人嘗得僑。再命尙沈僚。左右爲容晚。東南作尉遙。鄉心烏鵲樹。春醉蘂駘橋。今夕羈魂枕。前知爲別銷。

送常熟錢尉

秦王族孫

吏最三年集。僚英一尉沈。清壺人映玉。勳券廟藏金。夕館淮蟾度。春筇楚汰深。王孫情幾許。芳草徧天潯。

送舒州懷寧尉孫景先省嚴親後赴職

鄉書曾擅秀。父任此爲郎。卻捧三銓檄。歸稱百歲觴。淮山瞻曉堠。皖浦轉春檣。無累徒勞歎。廉車好薦章。

送高郵葉尉

佛塔千名勝。銓臺再調符。空登拔萃目。未免沒塔趨。爨桂方辭洛。羹藜尙及吳。振淹知孔邇。華萼映鴻都。
君卽道鄉集
仙之令昆也

官況

久曠三山直。時領他局
錢書多廢空陪五日趨。文無飾羽巧。心有刻舟愚。陸戟愁飢死。關門駭寵呼。缺然偏自愧。乘馬與雙鳧。

故歲東園植竹喜今春方芳

幾日霜根地。新年綠玉陰。春來雖換葉。寒去轉虛心。乳節烟膏膩。空梢夕籟沈。何時殊實老。留遺九苞禽。
蔬食

何筍空圖貴。潘園且薦羞。肥非糠粃飽。炙恥彈鴉求。餘薤行堪種。芳葵莫預憂。伯陽真意在。鼠壤乘誰收。

浩歎

鼻濁哀吟倦。空懷浩歎盈。心同注鉤怯。功比畫墁輕。俗態驚狙怒。剛腸謝鴛爭。淹回江外客。日夕望堯旂。

昔歎

昔歎桴乘海。今悲澗隱松。連城輕僞壁。畫室畏真龍。靜勝將生白。機亡恥合蹤。誰談龜手術。泝泝換吳封。

侍宴集英殿因過學士院舊廬有感

昔日金門署。重來素髮臣。故詞多削藁。前誠尙銘紳。寶翰餘龜鎖。仙山晦壁塵。更憐溫室樹。顏色老于人。
北軒院中海棠最爲舊物。

送殿丞楊備通理睦州

引籍淹閨序。監州得海隅。貪隨濤鷺驛。倦趁火城天。織紵吳儂富。今士貢自紵。垂綸漢客賢。遙知懷我處。霜月暝樓邊。

讀賈誼新書

誰謂賈生學。兼之文帝朝。死憂王墜馬。生賦鵬如鴉。被召宣溫密。矜功絳灌驕。勤勤論五餌。史筆未相饒。
班固蠶五餌以爲疎。蓋不見賈生之功成耳。

行舟漢口

澤國風波恨。孤帆日夕征。山連吳樹綠。江入漢源清。鬢亂將成葆。心搖不後旌。銷魂千里外。寧是憶尊羹。
聞胡明遠記室將至

昔歎都門別。今聞隴坂還。風烟背秦塞。陵邑過周關。松老忘年契。朱衰玩日顏。須君述征賦。方驗此塗艱。
送謝煜赴無爲主簿

懷微倦遊都。勞勞艤客艫。秋渠沿葭蕩。春塢見濡須。林齊添賓酌。蘭若入養廚。明年獻文地。南闕倚星榆。
攝祀出城過西苑馬上作

斗柄仙城曉。龍鱗下隰通。三竿眺義馭。十里過商中。水藉天容碧。塵依驛轍紅。喜聞何力語。應爲樂秋豐。

關外

關外崢嶸歲。河邊寂寞洲。寒雲能不雨。高柳強先秋。野靜狐狸出。沙長鴈鴛留。登臨雖信美。無賦可銷憂。

和吳侍郎寓趙中令韓王宅

平昔元勳第。多年洛水頭。荒池威鳳去。高棟野鷗愁。木老爭侵日。花寒各媚秋。猶欣賓館在。臨賞寄名流。

至日園丘攝事禮畢早歸馬上口占

祠館宵燈罷。歸驂曉轡輕。天規斜抱苑。斗柄曲臨城。路記仙輿轍。林空寶雉聲。上元新甲子。休氣接平明。

郡圃秋日二首

聞去秋歸早。開軒洒病襟。曉風凌羽扇。商氣襲瑤琴。竹雨無情碧。荷煙底事深。蕭蕭差可賞。只是恨年深。

次韻和吳侍郎偶至城西一二名園

幾曲西園路。幽深隱歲華。偶乘安道輿。直過辟疆家。畦脈爭分溜。叢名各記花。身閒飛蓋遠。容易到曛霞。

佛嶺

鳳谷掩西嶺。鷲宮聯四陲。山晴巖獨霧。林暑澗常秋。風御疏清磬。雲柯抱晚樓。瓊芝徧諸崦。歲暮儻來游。

送慶州安化元處宗主簿

黃綬榮新牒。華顛惜美材。越心枝上遠。羌思笛中來。烽燼和星落。刀環伴月開。寄言棲棘地。鷲鬪少徘徊。

送穎陰張主簿

早服英雄殼。胡爲州縣勞。荆璆不自鬻。郢雪向誰高。月鼓千聲疊。霜風萬竅號。行行星聚國。芳尺慰同袍。

送巢縣梅主簿

吳邑神仙系。梁臺英俊游。官從鸞棘試。材俟蟻封求。堂桂叨聯籍。陔蘭慶奉羞。行行離恨苦。淮月一弦秋。

孟津歲晚十首

我懟流年晚。年將我志違。終風來北怒。寒日趁西歸。野獸求羣騁。離鴻望影飛。君恩殊未報。愁憶故山微。
地闊山川險。風高萬卉乾。山煙晨作暝。河氣晚催寒。革眼移前帶。梁金晦舊冠。胡然坐衰靡。無客餉千丸。
隱軫分河壤。崢嶸念歲華。關雲沈翠樹。樓月嘯羌笳。要路誰云騁。浮生會有涯。高哉羨門子。橫海挹朝霞。
歲籥行周矣。官齋坐悄然。脩篁全露節。衰柳不停煙。霜苦雲收陣。天斜月控弦。寸心如斗柄。常在帝車前。
曲岸羣芳歇。高臺倦目留。晉山青不斷。河潦濁難收。世路功名急。天衢歲月遒。吾生猶可養。嵩麓是耕疇。
戍苦河兼重。星回歲聿悲。頽雲埋雪樹。暗水入冰池。山壘看疑近。樓高倚更危。吞腥何日了。歸去茹華芝。
大室東南望。分明鸞鶴飛。何嘗無路往。自是有心違。隱谷松聲淡。仙區藥甲肥。行年六十一。非外更知非。
芳序雖搖落。吾生任屈伸。日催輕壁士。天赦戴盆人。宵鴈多號月。冰魚暗待春。自憐麋鹿性。晚節頓纓頻。
昔日山林願。今茲軒冕遊。祇驚年苒苒。安議政優優。小雪煙橫野。殘笳月背樓。河邊楊樹老。不是桂淹留。

渥赭隨顏罷。飛霜入鬢新。夜壺寒展刻。冬晷急馳輪。名美誠堪徇。身閒我獨親。聊持一樽酒。不爲畫蛇人。
歲晚感事

息偃君恩厚。崢嶸歲律遷。若驚曾爲寵。見嫉不因賢。白日孤盆外。蒼蠅尺璧前。東隅雖已失。忠意尙惓惓。
榮路冥煩客。單車寂寞州。前朝有單車刺史野氛連市漲。寒水夾城流。塞上眞亡馬。江邊獨信鷗。不知芳歲晚。霜雪上人頭。

積水千陂會。孤城一角存。烏烏喧晝霽。蛇虺喜冬溫。地負荒民屋。天高思國門。楚優歌舞拙。何處強持樽。
初憩河陽郡齋三首

河洛周郊會。風烟晉部鄰。人傳種花縣。地記躍魚津。梨棗知秋晚。桑麻驗俗淳。惟憂三載課。無術効臣恂。
積晦雲初罷。餘光火尙流。疎桐凋晚日。孤扇避高秋。令尹何妨仕。將軍不必侯。此心機息轉。只好弄羣鷗。
郊圃連官圃。秋陰半歲陰。亂流橫掠野。殘日倒穿林。雪擁承簪髮。丹藏戀闕心。思歸誰作引。從古怨瑤琴。

曉汲

曉汲過春畦。高梧待鳳欹。甕思閒鑿掾。瓶險畏居湄。照影香釵墜。獨煩素綆垂。寂寥無醉轄。瓢飲共棲遲。

遲明出都

曉出西郊道。回瞻北闕天。城頭雲斂蓋。關外月低弦。委佩辭朝紱。鳴笳逐使旂。老臣三去國。憑軾淚潺湲。
余昔守揚。次守洛。今守孟。三出都門。凡十六年。

次韻和吳侍郎以余偶名新花爲壓叢春見賦

異草來何許。低昂曲沼濱。不勝叢上意。翻作葉中春。返葉清香遠。銜跗絳彩勻。芳心如有屬。宜在賦詩人。
余雖作名。唱之者詩也。

淮南早春風雨連日俗以爲宜

淮海歲方新。曆陰便浹辰。山山能作雨。物物解呈春。野鳥千聲異。江蕪一色勻。農區田溜滿。偏慰守藩臣。
和柴天休鄧舍人奉祠太一見懷之作

初啓冬冥琯。知祠毫忌壇。雲璈庶夜曲。瓊葉供朝餐。眞御扶鸞遠。僊威抱斗寒。勞君懷晤語。此夕宿坡巒。
是夜余亦內當直。

春晦小雨

節晦春燕歇。天高暮雨空。輕雷遙應電。斜日倒成虹。陰綠苔浮水。幽光蕙轉風。何須俗士駕。三徑有蒿蓬。

春夕

暝色蔽孤齋。空軒向夕開。花低應露下。月暗覺雲來。燭牖輕蛾聚。風枝倦鳥猜。無言聊隱几。萬境一靈臺。
有將獨鶴行都市道上者左右奔迫野態憔悴因成短韻

明心本霄漢。此路極喧埃。何意鳴臯罷。翻同舞市來。波魚憂輟涸。海鳥避風災。寄語昂昂質。非君羽獨摧。

元憲集卷七

五言長律

郡齋多疾

歌召非周陝。襃黃謝漢台。名將恩共忝。衰與疾俱來。素髮慙犀導。朱顏藉玉杯。勳勞真索莫。出處尚徘徊。且脫平津粟。誰憂長孺灰。淮陽安敢薄。臥治恐非才。

和通判刁博士屬疾次韻

退食仍移疾。消煩尚偃牀。玉姿經燬潤。松色貫寒芳。漱液仙池滿。觀心慧炬光。君素妙禪。靈動臻慧解。清魂同鶴警。妙數喜龜長。且答毗城問。休回楚客腸。定知靈氣復。新句有風霜。

進讀唐書終帙

隋室重氛極。唐家景命新。地歸裂殘壤。天洗戰餘塵。自隋煬帝末。天下兵興。割裂土壤。至貞觀後始一統矣。遂納諸戎貢。爭陪二月巡。高宗明皇帝。舉行封禪。瀛洲登俊老。天册府廷十八學士。時人謂之登瀛洲。煙閣盡名臣。功臣並甚。煙閣輕重非關鼎。與亡要在人。明皇帝。以舉後。驕縱失道。遂致安史之亂。肅代復。舊都紛秀麥。前事徧書筠。朱梁移都于汴。長安皆丘墟矣。哲后疑圖暇。西廡訪興。至信昭陵。夷不振。然其治亂皆本于人。古類頊年多御。颯英閣中。終篇見成敗。摘句屢諮詢。青史嘉遺直。元龜遺去聖辰。願將稽古意。萬一助堯仁。

楊寺丞掌務西洛訪別

長安久羈宦。門巷絕卿輿。朝綬徒云忝。賓綦日已疎。何爲趨玉趾。乃肯眷蓬廬。九棘歷華選。四環承慶餘。頻叨范叔贈。時取長卿書。清晤輒窮景。高談寧爨蘇。夫何苦吏役。忽爾愴離居。交臂願從子。盍簪嗟棄予。梁郊春草後。鞏樹夏雲初。安石訪吟社。少游乘澤車。一官方効智。萬里乍紆途。雅節鄙時尙。高才凌太虛。奏篇希乙覽。刷羽遲南圖。君嘗奏文數十篇未報行矣姑自愛。漢家方向儒。

中秋禁林對月

素籥中分夜。祥莫對滿辰。千門迎皓彩。一氣洗空輪。淨失金缸影。寒生露掌津。仙京全是玉。佛界卽成銀。宮瓦收蒼霧。天淵滅翠淪。網珠聊借媚。紈扇枉迷真。爽籟通鵲鵲。斜光淡結鄰。孤懷無晤賞。長嘯待清晨。

寓宿南宮言懷

始寓南臺直。偏驚素籥霜。悲秋真騎省。出沐愧山郎。自許鷗機息。誰矜鶴脰長。塵緇洛客袂。粉老漢人鄉。篝燭沈幽幔。緋經襲隱囊。杯醪冰去聲餘淥。硯滴瀉寒光。歲晚凋蘭佩。風乾裂芟裳。星烏繞枝倦。瑤草蔽庭荒。道爲虛心勝。情緣感物傷。勞歌少悽惻。夷路卽騰驤。

樞密東院秋日

試問山林客。胡然廊廟中。借籌終不效。數馬亦何功。竊篠荀池北。院在中回環漢壘東。西樓禁城衛高幕潤瑤草。半庭空乍失蒼門燕。初聞上苑鴻。涼催珍篋卷。氣襲碧簾通。虬箭天邊漏。烏竿物外風。心傾徒類葢。髮短更驚蓬。自諗非真相。其誰恨禿翁。婆娑君勿誚。併爲主恩隆。

贈傅法光梵二大卿兼述譯場之盛

梵劫扶皇歷。高才會聖門。五天真釋種。傳法北邙三國舊王孫。光梵故吳王譯詁生知慧。光梵自童子俱

卿聯萬戶恩。二公自先朝並加齋熏光漢邸。結集盛秦園。交照無殊俗。多聞屬上根。二公雖夷夏有學徒

紛霧委。經錄燦星繁。光梵奉詔重撰景祐妙義觀心德。華音置使翻。自天傳後譯經潤文祝場千偈出。每

天子誕辰皆大開。譯場進新經祝壽空境一燈存。列聖文垂象。太宗真宗並賜聖教序旁行筆記源。二公作天竺字

拈鳥。院碑即今英國夏公撰演御榜鴛巢軒。上既序天竺字源又御書地倚區中勝。人緣物外尊。十年參

淨職于此愧忘言。余兩參大政改使樞

寄長安端明王左丞

網轄尊華省。旌麾鎮舊秦。州榮朱轂守。公待黑頭人。從橐荷中密。仁風扉外春。才包揚馬思。政績趙張神。

鼎餽終調鶴。天文尚剪鶉。山光函谷曉。柳色渭橋新。勒隊良家子。邀歡代舍賓。聲華今絕擬。事業古難倫。

願我非賢宰。惟朝念老臣。官銜温室殿。城壘富平津。有秩皆踰分。無功可活民。餐霞聊卻疾。面壁更求真。

野屐茨峯路。僕耕疇正近漁竿潁水濱。拳拳知止誠。行及謝交親。

講詩徹章置酒崇政殿講官兩府宗室近臣皆預會奏御

經藝尊詩學。書林眷講臣。禮將恩並渥。道與日俱新。聖問臨篇裕。王風卽席淳。妙談開寶帙。高宴寵華紳。

朝笏儀庭鷺。宗藩瑞世麟。天漿聊挹斗。帝曲豫回春。惠洽霑占象。歡留景駐輪。諸儒稽古力。千載願逢晨。

次韻和觀文王尚書謝余寄示新詩

久免台階重。頻遷郡守優。朱輪真冒寵。白髮自驚秋。事往情多感。年衰氣失遒。徘徊河裏望。四北俱凋落。
漢庭游。俚曲聊成唱。真筌不暇搜。空思益者友。安議賦家流。六義二賦。心町都遺跡。辭林幸見庠。豐謠連井
甸。華札滿輕郵。已許瓊爲報。何妨漆更投。濟川毋諠我。歸夢在漁舟。

都下燈夕

火樹鬱嵒嶢。山車切絳霄。層樓移且闕。複道借星橋。花散非因雨。霞多不爲朝。聲來知佩近。香去惜車遙。
遇扇還聞曲。逢臺卽聽簫。更籌且莫盡。綵月正飄颻。

元會觀禮呈僕射相國呂公

乾歷端辰啓。王庭慶禮昭。虞篇五瑞輯。漢句九賓朝。物象開蒼陸。聲明薄絳霄。寒依朱燎盡。春入綵旗遙。
舞翟凌千密。蟠螭壓陸駟。晨光生劍珮。和氣引咸韶。寶極瞻垂袞。星階集珥貂。班時先正夏。拜祝故尊堯。
山獻稱觴壽。雷傳浹宇謠。燕需雲布象。恩瀝斗回杓。任士虔方聘。居鄉列瑞條。須知容典盛。盡一賴曹蕭。

冬至觀兩宮盛禮奏御

帝運姚華協。天元漢歷長。三正來復旦。萬壽此稱觴。洛宅均中景。塗山采舊章。禮文窮竹素。歡意動梯航。
稷野茅聯位。軒筠穀向陽。中天倚華闕。大火敞明堂。交鍛鑿髣隊。填街隱鱗裝。九關凝協氣。複道竚清光。
子事蒸蒸極。宸儀穆穆揚。母慈尊莫二。君拜社無疆。飾喜仙園奏。薰空佛土香。含飴先侑宴。襲袞始賓王。

竊窳宮門狄。誰何陛楯郎。長紳紛拱著。珍珮藹森璋。樹次天開霽。儲恩斗具漿。風鳥迎細轉。霞燦儼相望。辨御辰承蓋。呼鞭輦出房。雲咸薄金石。星日上旂常。逸綴朱千動。多儀的馬驤。麟題公有姓。鷺羽客分行。上宰陳瑤爵。黎賢抃繡裳。祈齡後天老。介福委山穰。翼翼心同竭。渠渠澤載霽。詩絃滿坑谷。庖味益圓方。盛掩鈞臺舊。儀高魯觀祥。深仁跂喙逮。嘉唱股肱良。炎夏隨天步。魚龍屏戲場。晏溫澄象緯。滂漉暨要荒。瑞典精銷禊。塗歌聖擇狂。樵蘇無發哂。崖路蹈皇綱。

出都赴鄭作

辛丑歲

初免鴻樞任。無庸白髮身。衰年雖去國。策路尙妨人。官借荀池舊。恩加漢節新。鳴鏡先繡幟。設騎挾朱輪。梁雪初收臘。滎波漸溢春。且持寬大詔。行及勸耕民。

明堂大饗慶成奏御

盛節嚴周配。宏模軼漢儀。還因大庭敞。就展合宮祠。揆序乘霜籥。涓辰襲寶龜。重檐開竊窳。綴牖列參差。蒼邸尊圓覆。嘉牲接厚祇。五精均帝饗。三聖侑靈嬉。備物先昭德。長言各奏詩。美光浮羽戚。休氣冒尊彝。虛次大彌健。還衡斗輒隨。禮成無墜典。神醉答繁釐。解作初占雨。恩濃遂浹肌。歡心偕岳抃。赦驛與星馳。載瑞催麟筆。包鋒促虎皮。具臣何以報。拜首百工熙。

次韻和州府吳大資病愈後見寄之作

冠蓋山川舊。星灰五載餘。辭榮唐院使。

公以病讓還宣徽使銜。

麾守舊尙書。

余三改藩並敘還省坐。

弓影臨觴悟。舟心觸物虛。

塵埃題宇壁。汗潦汎杯渠。公洛中小園聞爲水所敗皆昔年勝跡。世事多榮悴。天均任慘舒。交情非苟合。筆力自雄摠。蒲坂軍旄重。河橋驛轍疎。三成路僻。歸耕年漸逼。鄉思滿柴車。

訪李生郊居

林下一逢迎。幽人此養生。歌嬉入堯壤。種樹漏秦坑。歲晏農困實。賓歡野饌盈。松黃浮晚酒。微葉莖晨羹。霜樹榴房綻。陽畦藥甲榮。歸軒且莫駕。孤月在山楹。

皇子慶誕奏御

積德皇階厚。詒孫寶訓長。祺宮前祝祉。猗殿此開祥。卽夕銅吹律。先時日抱光。由來七鬯主。更重室家王。瑞莢隨辰滿。仙蘭備浴芳。已知周卜永。方驗宋宗彊。京甸歡餘霈。宸帷溢慶觴。史臣雖弱翰。行及紀元良。

初春宿雨

泱泱朝雲簇。淒淒暮澍繁。光生斷冰水。色暗夕陽原。牧犉隨歸笠。棲雞占鑿垣。雲輜寒未發。鴻弋暝逾喧。庭狹坳堂隘。簷高綆溜翻。泥塗采薪徑。煙火緯蕭門。桂偃幽巖蓋。蘭滋舊畹根。撫柯兼擷秀。併是憶王孫。

洛城秋雨

霜月兼寒雨。高齋伴寂寥。已能陰漠漠。更自韻蕭蕭。宮迴天低闕。津長霧失橋。蘆灰迷桂暈。梁扇掩霞朝。煙重蘭摧葉。風淒柳勁條。遠沉緱鶴唳。輕送洛鴻飄。甕圃應餘汲。芝巖定長苗。有人思舊隱。歸駕不須招。

從幸化誠殿觀芝草奏御

協氣流羣卉。華芝茂禁庭。蠶娟蔽珍構。困蠶合祥經。露彩滋瓊理。雲葩盪蓋形。周仁慙道葦。堯德讓階冥。被曲宸章爛。傳芳信策青。從臣叨寓目。歡意浹三靈。

崇政殿試御試貢士中昃不暇食因私賦

曩聖勤周日。虛懷軫睿思。方圖天輯命。詎恤食踰時。坐誠繁機壅。居忘側景疲。眷賢資德飽。詢善慰調飢。事帝心還小。康功服更卑。巍巍七百祚。歸報諒由斯。

寄題滑臺龍圖梅君新作西溪

遙羨西溪境。鳴笳從賞頻。蒲蓮應得地。魚鳥更留人。樹密藏川雨。隄長截路塵。清移嚴瀨月。歡陋習家春。按曲吳歛伎。酬篇禊帖賓。太平三輔樂。須信屬才臣。

奉詔賦後苑諸殿牡丹

靈囿先春啓。聯跗應候開。根隨一元毓。瑞協兩宮來。吐豔迎丹旭。揚芬散薄埃。斂煙交鈿合。側露並霞杯。耀彩珠釵樹。薰空蕙借煤。化工殫巧意。不爲剪刀催。

遊大明寺

總轡出西垞。寥寥旭宇明。叢岡森地秀。飛塔恍神行。惠味霑仙露。疲心識化城。遠香來不斷。空梵過猶清。坐惜忘機晚。居慙縹緲榮。撫懷今古恨。高世友僚情。顧慕羣芳歇。徘徊極野平。低雲參駐蓋。寒木隱前旌。風轉松添韻。霜餘菊挫英。碧垂天勢匝。紅上日華輕。壘廢麕麕樂。池荒鴈鶩鳴。宮垣除滌國。偽吳故宮在此臺址

畏軒兵建隆行闕勝踐欣同適。沈憂悔自嬰。理融無物我。神照能將迎。絢藻春供麗。投珍珮合聲。莫嗤三嘆拙。聊謝兩心傾。

正月四日侍宴紫宸殿契丹使預會

舖座披天幄。朝簪集玉除。人來重塞表。年是上皇初。時新改元仙劫萬岫移神島。千門敞微廡。春雲低借幕。瑤斗近臨車。露渥仙杯溢。風和法曲徐。劍丸爭獻巧。幢索競凌虛。老柘優詞麗。交竿舞態舒。盤豐行炙數。冠重賜花餘。瑞境儀韶鳳。歡心在鎬魚。太平同樂意。應有史臣書。

季冬立春日侍宴垂拱殿契丹使預會

臘破寒猶在。春融氣已回。千祥隨寶勝。是日內出金銀幡勝賜近官萬壽入天杯。燕駿戎輸贛。虞韶律應灰。樓前風著柳。殿裏雪裝梅。妙戲魚龍出。歡心鳧藻催。欲知邦好永。弈世會鈞臺。自先朝以來通好今再世矣

郡棲望嵩少作

曠蕩三河闊。東西二室連。埋雲峯樹短。抱日嶺霞鮮。黛壓周南野。嵐薰鞏右天。崢嶸元氣外。磅礴太虛前。斜麓橫包壑。傾崖碧逗煙。巢荒堯客隱。笙斷洛儲仙。夙尚臨風結。幽懷徠里緜。功名青史後。才器散樽邊。整頓登山屐。簽題煉藥篇。采芝應有路。種玉得無田。喻指存真契。如灰息世緣。寄聲鸞鶴侶。千載共來旋。

和參政丁侍郎從駕出獵

詔蹕承冬令。郊畿闢狩場。鈞陳來作衛。豹服正騰裝。表野千旌合。舒園萬騎張。清塵風效職。捧轡日呈祥。

寶時遙驚翟。天弧卽射狼。林空平陸險。雲斷見鷹揚。猛圈聊夸漢。恩羅遂祝湯。數功浮白飲。均惠割鮮嘗。別苑黃山外。仙城北斗傍。輔臣忠力盛。餘思滿雕章。

見白髮有感

昔人三十二。已賦二毛悲。況乃踰強仕。何能怨始衰。星星簪外出。冉冉鑑中垂。顏負前丹渥。心驚故石移。袁公憂漢室。蜀客問湘纍。此際重搔首。孤懷君詎知。

元憲集卷八

五言長律

賦風得仙字

噫氣含朝籟。離星動夕躔。威靈隨漢筑。煦嫗上虞絃。清拂蘭臺客。徐飄鄭圃仙。來應憑虎嘯。去不待蛇憐。塞外淒天馬。林端飽露蟬。入松和韻古。轉蕙逐光妍。黃落汾睢地。悲歌易水天。如何箕穎上。獨取一飄捐。

新晴

夕霧休殘雨。霏霞側半輪。溪河雖早夏。隴麥尙餘春。灰月收全暈。泥龍落故鱗。高花樹端溼。芳篠籊梢新。雷去壺猶電。風來扇未塵。橫琴聊坐嘯。何必墊游巾。

大寒夜坐有感

河洛成冰候。關山欲雪天。寒燈隨遠夢。殘歷卷流年。杯共芳醪凍。簪依短髮偏。毫釐九牛畔。頭角兩螭前。冶外金休躍。山阿溜或穿。飄入誰怨瓦。使鬼尙須錢。招隱芝巖路。盟真玉笈篇。何當坐清潁。閒洗世中緣。

留臺吳侍郎時泛小舟臨玩清洛輒成拙詩奉寄

聞有滄洲尙。時時清洛濱。烟波能弄楫。沙鳥不驚人。佛髻寒排岫。東瞻星橋晚跨津。西沂湍鳴知亂石。滌碎覺跳鱗。玉七停餘劑。華纓濯故塵。今無李元禮。李嘗爲河南尹仙袂許誰親。

禁下寒食

舊節雖龍忌。中都富物華。有行官戶柳。無數苑墻花。飲市喧銀管。優場隘幟車。街塵盤馬燥。樹日鬪雞斜。蹋鞠將軍第。吹簫貴主家。金丸隨落宿。絲障亂朝霞。水暖船爭旆。風長鼓應笳。池邊人酩酊。殿裏客伊亞。烏加反。畫卯賓盤盛。香糜賜品嘉。只應王澤厚。行樂徧天涯。

過留臺吳侍郎新葺菜市小園

解選幽棲地。園居壓野開。清風無近至。東望風煙。特爲虛曠。雙派卽同來。二水夾流。合于墻外。度約幽人屐。臨渠醉客杯。倒根檉擁岸。初籜筍穿苔。溪石行堪釣。沙鷗已罷猜。宵游應更好。長負月徘徊。

小園

節物過芳苞。幽奇勝近郊。先秋蟬棄甲。背歲鵲營巢。池小萍周岸。筠低露滋梢。標梅資宴豆。賜臚佐晨庖。夕塢禽聲亂。芳蹊屐齒交。茂叢羅宅菊。長柄庾園匏。尸竊虞官謗。嘉肥媿遞爻。披襟時一至。未塞學心茅。次韻和吳侍郎佳雪應祈豐年有望

使節馳羣望。神休答帝祈。同雲先北合。餘霰遂西飛。近野銀開界。遙山玉吐輝。梅飄知臘破。絮舞誤春歸。謝市人驚麴。曹風客比衣。稍添波面白。併作土膏肥。苑闊沈蒼霧。川明失素磯。獵場漫獸迹。農畝罷民歎。興覺龍沙接。寒將裸壤違。光迷梁日曉。潤息甕畦機。仙鬢誰連袂。幽蘭更撫徽。恐應緣麗唱。歡意徹天扉。次韻和張丞相攝南郊喜王畿大稔

上袞躬祠節。鳴騶出禁城。傳霖前灑潤。堯壤徧深耕。野色華兼實。歡謠斷復賡。民依大鈞播。政絕侈心萌。秋斂蠲徭版。鄉醕貯醉罌。露黃開徑菊。霜紫落園荆。蹲芋連區熟。飴茶蔽溼榮。日圍銜漢苑。天極抱秦京。聖旦千齡會。時功萬寶成。福釐前席問。元首載歌明。亮采神龜合。摛文瑞鵲驚。徒慙下里曲。仰頌泰階平。

從幸翠芳亭觀橙

祕苑羣芳歇。仙橙瑞實黃。根非淮枳變。味冠禹苻嘗。宮掌遙分露。卿雲別護霜。金垂枝杪重。星隱葉中光。土效無偏色。天吹不斷香。臨觀回羽葆。交薦佇瑤觴。給客誰矜蜀。郭璞蜀記有客橙以爲珍異論都謾記穰。南都賦有穰橙鄧橘堯仁均異賜。休氣滿簪裳。是日折橙于樹徧賜從官

從幸飛山教場閱武奏御

武節遵時訓。神鑣御素秋。天風掃閭闔。星氣射旄頭。士肅先庚令。民謹載路謳。雷車繖蘭石。蚩矢裂熊侯。旂首疏千隊。金聲勒萬騶。較能觀樹槩。超力賞亭樓。爽氣生威武。皇歡入宴羞。垂紳參注鞅。凱樂間鳴球。雲夢誰夸獵。岐陽枉議蒐。欲知神武世。七德共凝猷。

集賢張相國誕辰頌德十韻

顥印傳侯刻。圮編翊帝圖。還生王國佐。來煥泰階符。瑞紱雙嬰舸。祥蓬四射弧。從龍參震邸。附鳳入星樞。嗣正調元席。宏開造物爐。儀刑瞻魏采。勵翼矢臯謨。穆穆資同體。拳拳避碩膚。誠雖貫霜雪。誠甚勒盤盂。師石岡爲壽。仙春道有腴。欲知難老意。八柱與天俱。

參政東平侍郎誕辰紀德仲冬三日

帝業資寅亮。鴻鈞翊太寧。天開鈞璜胃。家襲降崧靈。復九萌陽筭。生三瑞砌奠。毓賢茲表日。衛世遂傳經。覽德重光旦。參機茂宰庭。羣生倚舟楫。萬化入丹青。坐納藏山史。追論象服刑。真廟史法天聖格令公皆總之前籌罄中。悃吉陳石基。扃國竚汾陽。考人祈衛武。齡孤心知所嚮。帝座六符星。

故相國沂公建設學官實寵茲土。近聞生徒寢盛。姑復慰懷。因成拙詩一章奉呈州學官。因以勉導來者。

舊學開宏構。斯文聳奧區。由來漢丞相。善教魯諸儒。自昔升堂訓。于今避席趨。照函經滿帙。繪壁禮成圖。集講占庭鱣。懷賢詠谷駒。道存終拾芥。聲濫或逃竽。一蕢宜無止。連城莫自沽。育材真孟樂。希聖乃顏徒。寸晷堪輕璧。繁英慎奪朱。霧蒸還作市。風至即名雩。曉圃林如泮。春郊水是洙。從茲弦誦地。不復歎榛蕪。

講讀春秋徹篇侍宴崇政殿奏御

睿覽凝星壁。才儒集露門。披經窮魯記。摘句辯堯言。曩例褻成袞。先猷化啓源。香雲收寶袞。甘醕滌慈樽。飾喜韶音縱。均和玉色溫。史臣叨偉觀。炙行願殫論。

正月望夜侍宴宣德門呈昭文富丞相

帝闕開金狄。仙輿下玉京。建春天上斗。不夜海邊城。佛火依山出。星榆夾道明。清塵隨漢蹕。紫氣護軒營。皓月樓前近。鮮風仗裏經。煙雲供瑞色。簫鼓獻謹聲。梵宇千花落。祠光衆雉驚。宸儀收寶扇。台座冠朝纓。

客守宮門燎。雞傳微署更。皇杯頻賜勸。應爲泰階平。

下元日扈蹕朝拜景靈宮

令月開真館。宸游薄太霄。躬行原廟禮。更作葉宮朝。寶扇森排羽。仙輪恍御飈。霞觴浮桂液。瓊饌薦芝苗。日霽樓先曉。天深樹不凋。繁禧將浩劫。世世會楊寥。〔案〕此要仙經仙宮中寥陽之殿。此云楊寥未詳其義。

苦熱

溽暑南方候。貞光大火天。流金空畏日。墮水忽驚鳶。掌露涼難挹。心瓜疾未蠲。鵬妖卑溼地。魍虐蘊隆年。虛谷全收籟。焦原欲出烟。洪爐方扇物。何處預陶甄。

庚午春觀新進士錫宴瓊林苑因書所見

祕苑儀星地。羣英得雋年。飛綏鯨浦右。供帳斗城偏。表道槐陰直。凌氛柞影圓。叢楹開玉宇。華組會瓊筵。湛湛融君渥。渠渠獎士賢。銀璫尊右席。中貴人主晏綠幘佐雙邊。太官先置飾喜優坊伎。均恩醲禮錢。諸君子合錢以勞供帳優召浮澗酒淥。坻聚舜庖羶。場迴歌聲合。風迴舞節妍。柳疑添紺幄。鸚解啄鳴絃。臣菴心傾日。需雲象在天。綈囊齋睿什。中席使者以御詩馳賜鈿軸照儒篇。復錄印大學儒行二篇以賜寶思垂霓爛。歡聲抃岳傳。珍臺紛塞產。翠氣浩宛延。此以下並述苑中池上景物之盛池訝陽烏浴。橋疑漢鵲填。千夫拔河索。三令奪標船。帳殿滄波匝。鈎梯複道連。瑤臺軒鳳羽。雲鳥壓鼈顛。犧觥馴靈囿。天薜蔽大田。江頭拔蘭紫。林下摘櫻鮮。玉藻初盈沼。神芝欲冒塵。陽構連禹洫。陰石駭秦鞭。冰靜恩魚出。園空瑞鵠旋。繚垣包井落。別渚上風烟。金埒爭鑣地。珠翳射雉阡。

去輜雷遠陌。歸袂藻平川。乍集儲胥外。還經駸娑前。子雲嗟寂寞。無思狀甘泉。

初夏三司直宿

薰序更朱籥。宵弦落翠裳。四月下人同散騎直。天與大夫醒。予性不飲鞅掌曹留事。羈孤坐刻銘。整冠誰辨謗。隱几獨忘形。夜色先歸樹。涼飈欲破檣。銷扉來疊鼓。卷幔入疎星。綵羽依枝倦。飛花墜席馨。憂沈雙蝶夢。病學一熊經。道有支離粟。心無屈曲屏。汰沙如未及。擬殺著書青。

漢上春雪

繁霧乘陰結。寒英匝宇飄。風催洛妃舞。春伴郢人謠。逗浦添珠媚。繁叢掩柳嬌。樓空先月白。野闊助天遙。稍傍魚冰合。還依雉隴銷。一樽無與晤。幽思滿蘭苕。

從幸儀鳳閣觀雙竹奏御

曲密叢楹地。檀欒瑞植場。靈姿紛並秀。圓節儼相當。聯景知宗茂。同根識幹彊。翠浮睢苑日。寒待帝園霜。合響天供籟。分枝玉薦蒼。卽看蕃寶實。儀鳳就徊翔。

送司馬待制守河中

久貳甘泉計。新陪丹府游。天深巢鷗閣。地重鑿龍州。驅弩軍裝盛。依蓮客藻遒。別魂驚黯黯。循政佇優優。舊時連睢遠。長汾抱晉流。劭農知俗美。虞畔記耕疇。

夙退禁廬

查訪殊無補。晨趨敢憚勞。官班唐內使。文牘漢諸曹。公吏何嘗案。邊兵久罷塵。驛沈晝插羽。朝絕法吹毛。殿樹秋陰薄。仙盤旭景高。君恩如許重。聊比戴山鼇。

度支蘇員外耆以再續翰林志見遺輒成酬贈

先烈光朝右。英才出慶餘。公卿太丘世。父子馬談書。首牘標宸藻。聯篇敍禁廬。摛華毛得鳳。刊畫魯無魚。當備芸籤日。俄光甕牖居。漢家求異說。高致掩虞初。

宿鹿門寺

寶剎翔鴛地。靈祠刻鹿門。天風奏林籟。海日破巖昏。轉眩三休閣。莊嚴兩足尊。峯回徒覺秀。瀑遠不知源。花拂談經席。蓮沈記漏盆。道場欣象伏。心境息猿奔。逗理機如電。觀空性復根。三車俱有路。何處駐歸轅。

自訟一首并序

余自洛移許公餘有宴坐之勝偶感曩事多所悔尤類非他人所知因題曰自訟

右輔朱轡守。南宮革履臣。孤螢難助日。病木獨依春。暗懦疑蛇客。愚忠數馬人。誰知溫省樹。自誠魯堂紳。監令車中席。江山扇外塵。何當能浼我。初不彊均茵。事往方成悔。猜除且瑩神。山來矜百鍊。從此惜千鈞。素髮慚華冕。虛舟謝要津。洗心良有謂。佞佛不無因。案上仕書局。真諦謂書一齋中梵毘巾。更須窮僻地。香火報昌辰。

郊報紀事奏御

陽燎修鴻報齋居被至誠還登八觚時親用一元牲瑞月隨黃屋車駕始至六次而雲鮮雲抱紫營天香
 浮玉帛霄籟避咸英車駕入帷宮風已前息至陟配文交舉景祐二年三聖並侑來同福備成均休敷愷
 澤冠朔讓尊名遇者許以寶元改冠徽號及喜動吹葶氣歡流浹字聲空參堯壤未試頌泰階平

大禮慶成

帝揆三微歷郊嚴七里壇對修清廟饗來接上神歡閭闔開金狄鉤陳扈玉鑾軒游葩蓋密漢兆紫營寬
 電策千騶躍雲柯萬戟攢清塵風命伯占表日名官瑞羽叢齋邸仙瓊飲露盤啓毛牲辨粟啐爵醕浮蘭
 合樂迎天籟高煙破夕寒六飛回左御雙闕敞南端雍鷺翔賓絨星雞集赦竿即時恩作解先此化勝殘
 善頌康衢溢鴻名寶牒刊貢圖包禹計王業詠函難戶有更錢復朝無賞印刊史臣叨從祀宣美愧濡翰

元憲集卷九

五言長律

後園秋物

秋水清能淺。秋聲斷復尋。衰荷欹似扇。新菊碎于金。匏熟猶垂格。籐乾倒附林。日光寒轉淡。山色遠彌深。索索羣芳歇。幽幽妙慮沈。薄言謝病晚。悵望丘中琴。

寶鑑

寶鑑鸞沉影。仙駟鳳翼朝。腰輕時待舞。眉細不藏愁。洛館迷羅襪。秦桑露桂鉤。電微開笑靨。珠滑入歌喉。百子宮池暮。千絲越網稠。生香徒辟惡。織草未蠲憂。燭短鴛鴦被。更闌翡翠幃。月寒喧藥杵。海闊漾霞舟。公子常逢燕。星姬鎮問牛。彫胡容一薦。溝水自分流。

河上歲晏

久覺宦情薄。何堪星歲徂。冰魚寒不動。沙鶴晚相呼。日短揮戈舍。天閒造物爐。河澄諸浦涸。山禿萬林枯。感爲中來遠。心因不倚孤。虛名三品祿。儒政五州符。稷契熙媯祚。蕭張翼漢圖。曩賢真命世。今忝劇非夫。狐偃腥臊肉。隨何腐爛儒。是非均一馬。多少任雙鳧。念老歸歎嘆。銘恩叢爾軀。風聲猶栗烈。酒意近屠蘇。薛縣能琴客。桓家善笛奴。歌吟聊自適。何必矢嘉謨。

詔下有感

簞席思賢久。公車下詔新。金酬燕市骨。蒲裹漢家輪。署行鄉論秀。觀光國有賓。臺招能賦客。關識賣符人。三府催借計。諸儒待聘珍。挾天持筆距。連袂照袍銀。丹穴皆來鳳。靈淵並躍鱗。請行多下客。答策有平津。榮路爭高足。孤生最濫巾。一鳴方及旦。六律肯遺春。類鵠猶煩刻。成龍不懼真。縱無清夜誦。猶繼壤歌民。

次韻和吳侍郎自號樂城居士

世有生賢運。人歸得性場。沈約閑居賦有得惟性為場之語朝端慕安石。民里祝庚桑。蛇影逢真悟。龜靈取數長。仙畦種芝圃。佛室雨花牀。寄傲多行樂。觀心或坐忘。柳溪能作暝。竹塢別供涼。慧露霑僧飯。幽霞照客觴。臯夔真有自。箕穎更相望。留務尊臺簡。私游費棗裝。側聆圖任功。安得久彷徨。

禘饗禮成

孝饗邦儀重。親祠祐室開。推尊二祧合。獻力九賓來。寶蔡前涓日。祥雲近弭災。宿齋之夕。小雪應時。行事太宮。景氣澄霽。鈞陳嚴法仗。縣蕝謹容臺。祓坐皇為邸。登車斗轉魁。三辰隨藻袞。百末湛雲鬣。徧裸靈心像。終歌帝社墮。華紳紛緝抃。端闕儼天回。蠅筆言絲慎。雞場赦鼓催。好生先祝網。作解遂成雷。賁有棧丘帛。刑無棄道灰。須知蒙福意。萬事入康哉。

西都官屬咸備尹政得以仰成暇日池圃便同塵外因書所見以志一時之幸仍以東園吏隱命篇云

誰謂留都劇。翻同小隱年。沐頭休吏日。閉閣讀書天。竹町能依沼。山樓解納煙。瘳牀閒擁腫。瘳尤奇。瘳荈棟
自連蜺。草堂在東南隅。岸闊沙留鳥。波平樹繫船。雨荷朝葉重。霜果佛脣鮮。玉甃浮杯地。流杯二亭。冰涵給釀泉。醴泉
甘涼府中號。處陰靈蔡老。舊養龜于園。錢文僖愛之。給背塢晚廡眠。二鹿甚馴。弈思纔知路。琴歡肯要絃。葛洪
冷泉法酒陶。但著素琴。扇聲方樾外。屐齒野橋邊。宮錦雖尸寵。巖廊合避賢。有恩淪骨髓。無術効埃涓。
全于二物皆前賢之比也。扇聲方樾外。屐齒野橋邊。宮錦雖尸寵。巖廊合避賢。有恩淪骨髓。無術効埃涓。

正月望日車駕謁會靈觀置酒祝禱殿

上月神燈節。年康警蹕游。蒲池渭陽廟。銀闕海中洲。羽扇排雲出。鸞輪抱日流。徧升均瑞祝。合宴寵靈休。
畫展霞明坐。春山彩作樓。鸞歌參帝樂。麟脯助皇羞。斟酌堯衢飲。驚呼漢殿優。天襟知衆樂。處處駐宸旒。
是日復幸祥源上清景靈等宮。相國慈孝佛寺。

求遺書

崇政殿御試貢士求遺書于天下因私賦

政革秦餘暴。文興漢德優。中經雖並集。逸典更旁求。使節褒遺訓。儒林補大猷。家無藏壁恨。人引挾書憂。
探穴資遐覽。燃藜對讎。因斯流略盛。終古冠緹油。

醜石

磊落離幽壤。沈潛莫記年。支機形迥出。蘊玉勢相連。空穴雲猶抱。坳紋溜欲穿。虎蹲休怯射。羊叱待逢仙。
鮑拔希千仞。參差異一拳。詎聞輕宋璞。可要逐秦鞭。翠峙晴軒影。寒生曉檻烟。到公基未勝。張顛印虛傳。

齊碣思閒館。圮橋意舊編。何當成五色。鍊質補媧天。

登龜山上方寺

雙樹遺真宇。青鴛切紫氛。路盤千嶺出。鐘逼九天聞。林影隨崖斷。泉聲遇石分。曉風先得日。春掩易藏雲。佛果常軒落。仙苗護砌薰。客塵聊自拂。稽首貝多文。

官況

發策非鄉秀。瘵官玷郡聯。恩深育莪止。技薄戴盆天。病骨三鍾粟。銛鋒一割鉛。懷能真貶鼠。惜己甚寒蟬。吏笑移書臥。人譏面壁禪。曹符憂倥偬。邑教昧平鵠。席上巾醜酒。齋中易絕編。隙塵吹曉日。甕隧引春泉。戒養聊馨膳。將蕪敢命篇。區區犬馬志。何術謝陶甄。

次韻和侍讀梅學士秋雪

秋宇霜華極。翻成暮雪飄。影迷霄桂滿。氣助海鐘調。梅蘂裝宮樹。蘆花著浦苕。喜延梁客酒。愁敞洛人貂。碧瓦千溝麗。銀塘一色消。雅篇工狀物。精思入參寥。

對雪有寄

芳歷崢嶸歲。平臺沆漭天。初驚飛礫集。坐覺雨花妍。未夜珠還乘。非春玉作田。何嘗甘絮後。正是占梅前。亂影都難擬。幽光只自鮮。辟寒金貯屋。障淖錦裁韉。回旋凌波舞。輕明飲露仙。去應迷粉水。來欲助瓊筵。有浦皆捐珮。何臆不列錢。幽蘭君自許。儂意怯么絃。

郡齋對雪

節晚雲雖暗。年豐氣自嘉。乘寒初集霰。向夕遂韜霞。緩舞先縈洛。妍歌不待巴。無聲來物表。一色共天涯。露失仙人掌。春驚驛使花。拂簾珠浙瀝。裝樹玉查牙。護石雲慙素。開樓月讓華。海邊鷗誤客。遼左鶴迷家。粉液塘冰厚。瓊苗隴麥斜。中邦盈尺喜。何必問龍沙。

夏日出池上

節候春雖往。年華暑未殘。蓮香開佛座。竹老退劉冠。戲渚藏蘋尾。鳴臯溜素翰。堇葵紅不一。蒲稗綠多端。宜物心無對。深根氣自完。功名俱畫餅。虛玷擁旄官。

清輝殿雙頭牡丹

禁籞含暉地。春英浥露天。萬柯蒸協氣。雙蔕應祥篇。倏日香彌酷。乘風豔欲然。聯葩宸屋外。交影帝觴前。詠掩華跗秀。名均紫脫妍。朝綏歌茂貺。聲冠億斯年。

瑤津亭同窠雙頭牡丹

太宇星津曲。靈葩帝囿中。丹房忽三出。寶豔更雙融。采絢仙囊露。香翻沛筑風。柔祇寧愛寶。元化自爲工。草讓中唐瑞。蘭嗤下畹叢。甘泉宸象洽。無獨賦青葱。

送荆南李學士

逢日光華盛。登賢命數優。郎星太微後。史局道山頭。違咫堯心屋。疏藩禹貢州。使旗飛隼出。臺劄偃波留。

舊賜薰蘭被。新裝驥駟。陝分歌召伯。屠餞寵韓侯。澤國龍爲節。桑郊鹿並輜。齋中無煨酒。鈴下識輕裘。
鹵簿分賓帟。江山入宴樓。蜀波餘杙盡。楚野惡氛收。後乘追文學。先春召督郵。漢何敞爲政尙寬每立春日。召督郵回府。暫稽
華黼賜。聊聽昔襜謳。父子雲屏隔。鹽梅寶鉉求。歸來循吏政。終古冠緹油。

夏日對雨

岑寂省廬幽。諸曹吏始休。空煙催樹晚。急雨借庭秋。暮影層波動。簷聲萬綆流。縹牆明疊蘚。劫徑聚浮漚。
飢溼綠虛隙。微涼襲翠幃。拙艱兼寓直。潘鬢怯搔頭。

從幸親稼殿觀新秧稻奏御

宸扈尊農扈。滌池入禁塵。耨區周耜熟。分墾禹溝連。苒苒香塍色。油油瑞畝煙。弭災消暴蠱。迎稔擘鳴蟬。
國佇曾孫稼。天臨近署田。叨陪凝蹕賞。慙乏夢魚篇。

送刑部葉郎中出牧姑蘇

星紀吳開國。雲司漢望郎。新陪豹尾乘。詔恩同陪大禮後遣便襲虎頭囊。竹箭分兵契。鍾官辦使裝。賜裝錢二十萬始爲恩例苑
鶯留祖席。江鶴避歸檣。世往高臺露。春餘野徑香。欲知民樂意。訟樹接維桑。公先墅在晉溪與蘇臺接壤

訪宋氏溪園

偶作城隅逝。園在郡城之左居然物外期。林風瓢易覺。山雨石先知。藤老猶依格。溝斜更會池。看蟬琴誤曲。過樹
路成岐。節近吹花酒。歡留敗襖基。主人名族後。嘯竹客忘疲。君故僕射文安公之子

仲微殿丞以余多難退居游貽誨問復緘新什以勉病軀抉力牽課聊抒謝懇

樸邀參邦彥。幽憂負主恩。投身采樵路。脫籍上車門。病肘垂楊老。塵眸覆鑑昏。於陵三咽味。楚澤九升魂。喘甚吳牛憊。名非衛鶴尊。簞瓢舍桑客。井臼寄孳村。引重繫心照。銜哀託涕痕。餘生何足問。姑學牧雞豚。

秋日出沐感懷

落落窮閭靜。蕭蕭晚歲昏。臣飢徒索米。童小未應門。清世爲塵誚。私家出沐恩。斗回非挹酒。天遠詎兼盆。腐爛翔鶴鼠。青黃斷木楹。容容誰覩福。栩栩自交魂。衰柳空烟穗。寒苔疊雨痕。鳴蛙沈故沼。噪雀戀空園。有客嘲黔突。無人賞負暄。終期六百石。初服臥丘樊。

夜出芙蓉堂

北沼涼歸早。西軒火正流。螢光偏愛夜。蛩語最知秋。好月因雲暗。清風爲樹留。烟來昏翠幙。霧下失滄洲。河轉疑天側。星回恨歲遒。惟餘雙鶴唳。不減到林丘。

夏日久雨

澤國梅蒸早。郊雲泄雨多。陰泉湧階穴。重霧宿庭柯。月魄藏仙馭。山頭洗佛螺。朝虹飲江曲。夜電發崑阿。纖簑清初暑。香竊辟舊疴。官閒門自靜。不爲覆公羅。

參政李侍郎宿齋中書累口不陪歸馭因成拙句奉獻

攝龔獨祠令。精心屬輔臣。齋房貪結佩。歸軾阻均茵。鶴鼎庖羞潔。雞枝殿樹春。坐凝虛室白。行被大宮神。

政竚疇咨若。朝瞻已事竣。三秋懷盛德。方信採蕭人。

和運使王密學見賞公醞

公穠豐秋釀。兵廚絜燕犒。如何勤使傳。不許醞離杯。使旌薄暮出。城飲餞皆略。蟻甕方涵液。鷓臍幸載醅。歡游雖暫隔。飛藻已先回。左手整初美。東籬菊尙開。故人寬禮分。一笑竚行臺。

陳州獻瑞麥圖奉詔作

堯壤環中甸。周甦冠百昌。時均十雨潤。天報兩歧祥。善氣滋繁粒。薰風擁翠芒。初疑禾異畝。更覺黍非香。獻狀宸襟悅。披圖國頌颺。史臣誰汗簡。休應譜斯箱。

太一奉祠夜卽事

天極三元會。星精五福游。神光來集夜。邦祝此迎秋。導獻森威節。嚴真默翠幃。醴觴瓊借液。牲俎麴爲羞。藻簡空歌續。金支寶焰流。宰衣紛曳繡。僊謁儼居樓。降格雲頽席。歸歡電翼輈。種祠知漢德。時介萬靈休。

送給事俞學士知宣州

駁議東曹重。修書祕府榮。緣何厭廬久。便作偃藩行。戒道熊文戟。騰裝鶴膝兵。堯雲迷闕曙。淮雨破舟程。竹契將恩遠。江波共政清。向愁臆岫好。誰賞謝宣城。

舍人院觀御篆紫微閣榜賜宴奏御

近署新層構。仙跼錫寶題。凝章下天漢。布畫儼星奎。榜勢虬檐負。繪華鳳押棲。崇儒推宴豆。觀象聳朝闈。

九張霈雲洽。三休賀雀迷。從茲河洛奧。併在紫垣西。

重陽節玉津園錫宴


紀節符陽序。承恩出上闌。廚均堯脯膳。優集漢觴歡。紫菊吹花耐。丹萸辟惡丸。秋光浮翠帟。雜蔞珥華冠。宮樹遙分柞。林荇且辨蘭。神池飜瑞鷁。帝竹隱歌鸞。煙闕雲中見。巖城斗外看。欲知人意悅。霏霧滿歸鞍。





3
4
1868

元憲集二




成集書叢

編初

者編主
五雲王

行發館書印務商



元 憲 集
(二)



宋 庠 撰

元憲集卷十

七言律詩

池上春物已爛漫寄東甫

春物昌昌曲沼門。已宜留客置芳樽。柳絲到地烟無力。花臉迎陽露有痕。歌待瑤箱鶯幕燕。舞留紈袖付庭鵲。清明元已俱堪會。莫遣香槽玉液渾。齊中酒名玉液者爲上

漢上春雪呈郡太守

春草江南瑞霰霏。溪山千疊共清輝。林繁不辨妝梅落。川秀空疑月蚌歸。夕苑縈叢聊自舞。橫塘拂水更低飛。民疇脈債農祥近。壤有堯歌絕晉饑。

贈職方齊員外

霄極郎星護帝垣。出分魚竹袴歌喧。郵通五尺秦人道。吏擁雙朱漢守轡。粉闥荀香虛舊帳。鈴齋渝舞鬪清樽。歸來何處應嚴召。振鷺神庭鑄馬門。

春季開無畏靈塔祈雨至夏初霧洽

春晦西峯鴈塔開。香雲清梵徹昭回。初疑咒鉢降龍出。終似軍持注水來。師嘗請雨見觀音大聖在日中手執軍持注水于地軍持華音淨瓶也事具李遐叔碑百穀根莖流慧潤。四郊氛祲卷陽災。守臣無狀均靈貺。如驗元非贊變才。

083
112
2:1869



37098

五鼓度洛水謁九龍祠禱兩馬上作

跨陌津橋十里亭。前騶橫絕犯嚴更。銀河蕩漾斜垂地。瑤斗闌干倒倚城。苑閣樹頭迷闕影。川長烟外認灘聲。農疇閔雨心祈切。上盡叢祠日未明。龍祠在洛北絕高處。

未曉出城陪州長考功李員外禱雨大悲禪刹

城上繁星五鼓初。江臯申禱訪精廬。林回半隱翔鴛刹。野闊平飛畫隼旟。十地真容陪合掌。記傳此像乃唐時神人所畫。經今二百歲如新。俗疑菩薩之真相。百城甘澍待隨車。先秋閔雨農心樂。宜在麟編直筆書。

次韻和龍圖何學士以榮憩鄉州有感舊見存之作

昔歲西都餞使旗。今茲何幸復相依。潁川士族占星聚。君諸昆駟從許昌僞望。遼海鄉人看鶴歸。乘塞惠風消戰路。論文精辯破談圍。衰翁不敢言恩舊。但惜忽忽別袂揮。

題鄴城張氏林亭今樞府舊隱

里占西豪族望雄。一隅幽槩揜隆中。彩鴛戢翼高梧在。蔚豹成章舊霧空。冷接安齋投轄井。細生吟榭快襟風。謝庭羅宅資真賞。蘭有清芬菊有叢。

夏日北溪亭上

羲翰亭午燦炎威。溪上軒牕匝翠微。野澤蒲深初類堞。壞垣苔老半成衣。爭花晚蝶繁叢住。避弋驚禽截浦飛。一袵雄風消內熱。高門無意事輕肥。

次韻和吳侍郎游貺雅篇

傷輔西還玉體痊。銀臺歸興且陶然。談經寶序常迎日。講筵在迎陽門西之西序。膝席清司最近天。資政殿在龍圖天章二閣之間。深殿第一君拂翠綵朝右貴。我驚華髮鑑中鮮。洛都巴徂雖求舊。莫累陽春一種傳。僕嘗因寄詩觀高二公為匪唱人多傳誦無乃更累清唱耶。

次韻和資政吳育侍郎見贈

台階抽得冒榮身。且喜西都見故人。儀世瑞鷄曾接翼。君兩使內樞。一參大政。僕並叨陪接論交。寒柏不知春。樽前高意青雲舊。鑑裏流年白髮新。爭奈詔書催上道。談犀從此日生塵。

次韻和新命留臺吳侍郎自適之作

謝病彌年歎偃牀。知君靈氣本無傷。論筌自識忘筌意。失馬終為得馬祥。心到不貪方是寶。物歸何有卽名鄉。西都老尹歡迎近。預喜遙臨照席光。

送寶員外失職掌廩于沙苑牧監寶君工左人。有別墅在關中。

平臺飛雪欲成花。有客西征感鬢華。內史江蓀空入夢。下邳羅雀此還家。鴻聲不斷關雲黑。角弄初休隴月斜。駟牧未妨稱吏隱。田園自有故侯瓜。

送謝屯田徙治富順監

綠髮仙郎冠譽髦。懇田分土漢家曹。詔頒紫檢瓊芝熟。歌闋青天劍棧高。巴蒟溢盤馨晷饌。郛筒環席薦

春醪西征自叱忠臣馭。千古王尊直筆褒。

坐舊州驛亭上作

亭下是梁山泊水數百里

廢壘孤亭四面風。塵疑身世五湖東。長天野浪相依碧。落日殘雲共作紅。漁缶回環千艇合。泊中漁舟數百艘各擊五缶以驚魚然後衆舟若合圍狀巷蒲明滅百帆通。泊水無岸行舟多穿微蒲爲道舟人謂之蒲巷恍然歸興無人會。閒向青冥數塞鴻。

送石舍人賜告還鄉

內史清班近侍臣。過家恩告日俞新。郵中別夜星催曉。殿裏歸年樹約春。還朝必在來春矣幾日詞垣棲健筆。九秋朝橐冒征塵。西州歸馬歡迎處。定有臨邛負弩人。

和吳侍郎自陝歸闕

幾日星催召節飛。迎車千蓋溢郊畿。秦城壁返蠅休汗。軒閣巢高鳳始歸。兩憩甘棠歌美化。重攀溫樹恨流暉。因君更感忠虔意。夕夢翩翩遶帝闈。

送伯中尙書學士歸闕

故人同省復同班。且喜先歸奉帝鑾。居守乍拋留宅鑰。造朝重拂寶梁冠。仙楹夕鶴通鸞馭。祕廡晨暉轉露盤。我有寸心空戀主。捫膺難把向君看。

酬王拱辰侍郎歸闕見贈

雋譽由來服搢紳。更煩餘略霽邊塵。威留玉帳時無戰。班入金華地最親。昔看草辭知大筆。今榮除館識

嘉賓一章求舊人知否。媮俗都融郢曲春。

送虞部元員外赴闕

泥檢封香霏露濃。漢庭新冊潁川功。朱轡按俗麟符郡。青被爲郎斗籍宮。儉幕卷雲賓履隔。郢樓翻雪餞壺空。明光伏奏前期近。備對芳蘭溢握紅。

送苗郎中出漕江西

幾夕燒熏歇被綾。東南使部望前旌。武泥給板言如綽。漢庾臨波粟似京。露橋千頭豐歲籍。江鱸百尾飮盤鯖。計籌暫爾煩經畫。囊橐行看用老成。

和致政王子融侍郎喜昭文龐相公登庸

感會由來屬儁賢。誰知出處更相先。蒲且卷弋冥鴻日。荀令開池浴鳳年。佚老疏金催具酒。濟時商楫正橫川。高風盛德俱難狀。留與名山信史傳。

送職方張員外領荆湖北漕

粉闥仙郎鬢未秋。懿文精力允僉求。新榮毫忌祠神館。君頃受詔廷太一宮于國左宮成而拜是命更按喬卿露冕州。楚國貢茅紛騎置。蜀艘移粟蔽江流。富人緩役承平士。肯學研桑苦運籌。

送孫刑部領漕并部

百舍星文動使軒。漢家初賜辦裝錢。犀株衛帳并兒勇。鵝髮迎塗絳老賢。歲稔萬箱資轉粟。時平三策罷

開邊中宸圖舊恩方渥。幾日從容武帳前。

九日南陽與諸公會

僚慄霜華六幕空。丹萸成佩菊芬叢。香浮彭澤仙巾酒。影落龍山宴帽風。詩筆娛情真泣豆。舞腰回節更驚鴻。夕陽曉樹愁重顧。不見春陵舊鬱葱。

無題

西時東流意欲分。紫簫呼鳳隔煙聞。書因屢答機無素。夢為頻驚峽費雲。羽帳枕寒晨未轉。玉樓衣冷夜還薰。琴鳥一曲何曾聽。七十鴛鴦失舊羣。

詩寄河陽夏侍中

勤勤書札問青氈。鄖水逢知似曩緣。方外之談。愚不敢執。輒寄疑似以銘幸會也。海燕不忘棲廈日。霜松寧有改柯年。陪京玉節諸侯上。坐省華貂百辟先。朝夕公歸領冠劍。定應偏作故簪憐。

和答并州經略大尉相公元日見寄

邊亭春色感離居。猶記衰齡本命餘。公自記年踰本命。引劉厚樽味阻陪曹相國。帶圍空老沈尚書。僕每俱即進秩。六曹尚書。今忝五矣。軍中鼓吹千蹄馬。將府勇重。物外風煙一壑魚。衰園所鑿。幹棟不材須適分。願公容我作莊樗。

贈潯州朱祠部

紛署郎潛已十年。囊毫奏議委千篇。恥論頗牧雲中級。去詠齊夷海國泉。路控驛疆逢瑞翟。氣收炎浦見

飛鳶鈴齋宴坐眞腴盛。幾種天花落帳前。公妙達空諦而蕭習持誦高于當時矣。

次韻和判曹韓學士見賞湖山

西溪本慰寂寥人。何幸開樽枉勝賓。一岸仙山平壓野。岸四遠見嵩少。近見具茨大隗。兩陂官柳綠圍春。我雖酩酊能騎馬。君自風流偶墊巾。更愧和篇尋故筆。試開荷橐久生塵。

小園秋思

年華搖落自騷騷。衰境牽人更畔牢。月裏驚烏愁夜永。篋中團扇恨風高。煙霏曲霤蜘蛛織。氣襲空階蟋蟀號。恩重才疎歸計晚。可憐身世一鴻毛。

三月晦日夜坐有感

城頭吹角亂昏鴉。坐敞空樓感歲花。遙電不知何處雨。狂風還送一年花。洛橋禊席隨流水。箕嶺仙巢倚暮霞。出處半生雖未決。歸心常傍故侯瓜。

送廣州劉掾

督府迢迢瘴海城。掾曹三語藹蘭馨。歸郵託信梅華暖。仙劑蠲疴薏子靈。蚌月射樓吟思苦。雞潮驚枕醉魂醒。外臺誰舉沈僚俊。編著黃堂有政經。

溪齋春日

問君何事拙謀身。竹塢溪齋養鈍人。白鷺儀形閒照水。野鷺言語亂嘲春。半生已悔嬰朝紱。萬境方將付

客塵自笑經旬無宴具。對花孤坐嚙瓊津。近有客教予餌氣之術。暇則爲之。

奉和御製賞花釣魚次韻私賦時在榮陽

祕苑神池帳殿開。鈞陳遙衛斗車來。柳舒瑞霧迎僊蹕。花獻天香八壽杯。戀藻文鱗爭聚散。聽韶丹翼剩徘徊。朝簪盡慶千齡會。薰曲汾歌卽席陪。

送齊進士奉章闕下

傾坐仙姿拚石麟。奉章車府應觀賓。謝庭早占芝蘭族。禹會初陪玉帛臣。削牘西清催筆距。賜衣中禁換袍銀。東歸待看榮鄉品。年似終童祿及親。

送將作監丞張唐卿通理陝州

春風祕殿翳華芝。親見枚臯作賦時。秀色並開棠樹尊。雋科先賞桂林枝。漢郵給傳蕃恩告。蜀醋浮觴薦壽祺。幾日陝郊迎郡副。車前懸弩雜軍麾。

郡齋感懷寄呈參政給事同年

老持藩印守河衝。苟祿惟知戀軾熊。游舊最叨青眼客。挺陶今仰黑頭公。巢由逸躅心空斷。儒墨常談耳欲聾。自笑晚年經濟業。焚香靜坐習元功。

郡齋無訟春物寂然書所見

開鈴無響晝輝遲。短髮山巾盡日欹。戰蟻羣行開蟄後。暝禽相語欲棲時。遙通寶水添新溜。密數庭花記

落枝。訟息寬條恩莫報。晚年餘有白雲期。

自洛移許初至郡齋作

忝司宮鑰忽三年。恩借閒州得潁川。楚北蒼茫軒后野。國南膏沃許人田。漢臺褻鳳今難繼。荀里占星俗尚傳。更賴鳴陂能慰我。鈴齋西畔似江天。

待罪書館無所自效客有以尸素爲諛者因成答詠

本媿虛名類斗箕。更堪華閣玷纓綏。海邊不覺飛鳧少。天外寧知嚇鼠飢。倦客風霜嗟右席。故巢煙雨老南枝。新年定有澄清劾。歸守東岡固未遲。

喜晴晚歸

八月高空卷斷霓。落霞殘照掖門西。仙城氣暖猶藏霧。輦路塵清不雜泥。殿裏風回聞禁漏。闕邊雲斂見丹梯。迎寒便立甘泉仗。扈從應無七聖迷。時大禮將近

醉枕

楚辭虛美獨醒賢。左手香螯伴醉眠。國器載歸壺似腹。江萍興罷幕爲天。雪樓珠麗巴人曲。芝館塵生洛浦田。晝枕蝶魂方適興。莫教瘖意傍鷗絃。

贈石龍趙山人

衰鬢星星倦折腰。十年歸就故山樵。臨江徑壞茅圍屋。潁水風清樹厭瓢。防蠶舊編栽竹牒。獨疴珍劑訪

芝苗鬻文謀食機心盡。試爲勞生諭炙鴉。

晚坐高明臺

悔倚危欄望夕霏。臨高無事亦依依。天長去鳥幾時返。風罷孤雲何處歸。一世功名慚擊節。百年耕鑿願忘機。銜恩感舊誰能免。猶喜荒洲在日圍。

明堂宿齋賜貢茶珍果上樽御膳

太寢陪祠宿斗城。龍顏通夕助齋明。吳包瑞果金衣潤。閩焙春團寶月盈。滿腹鷓鴣催御酒。溢杯羊酪識君羹。甘滋飽德殊無寐。坐數章溝肅唱聲。

季秋侍宴中闕與諸公憩學士院作

冠劍中休會禁扃。暫欹孤枕拂雲屏。漢臣責重非真醉。楚客秋高恨獨醒。寶墨喜窺前賜榜。太宗飛白玉堂之詔在焉華條猶記舊呼鈴。詔催終宴簫韶動。更學鷄鷄子細聽。

屏居春日

初服仍從洛涘居。鳴蛙鏡吹滿前除。露園柘彈愁逢雀。磻渚璜鈎枉餌魚。蠟屐幽懷高下齒。斲輪真想古今書。漢人尙自嘲頻解。猶得凝神守泊如。

元憲集卷十一

七言律詩

休日

彌旬出沐道山頭。傲庶蕭蕭避俊游。枉是胸中無塊壘。可能皮裏有陽秋。駕車款段慙鄉品。託乘鷗夷笑客愁。曲突無烟賓坐冷。時聞庭雀一啁啾。

晚坐觀風亭三首

戍樓西北最凌空。倦客憑闌八月風。一曲黃河連野濁。半規殘日背人紅。山林枉負沉冥志。刀筆終無尺寸功。猶喜不迷存闕地。絳英瑤斗虎牢東。百尺空臺河上城。遠波虛籟助秋聲。過窮旅鴈書難得。啼殺飢烏曲未成。急節何當容白髮。流塵只欲傍華纓。臨高莫訝頻東顧。憂國思君不爲名。我來秋色逼霞曛。更作憑闌遠望人。山口遠銜遙白渡。水頭斜路小平津。年華有恨驚心去。世事無端刺眼新。深愧具茨芝朮在。掛冠終擬狎堯民。

謝齊屯田見惠詩什

東家華袞屢垂褰。傾耳幽蘭郢唱高。雪苑曳裾慙賦客。春塘飛筆見詩豪。千金秦市文終貴。九奏鈞天夢

自勞他日海槎如犯斗。願將孤跡託星曹。

和答越州呂鄉見贈之作兼以爲別

綠髮仙郎得郡新。潁川重喜拂征塵。樽前道舊情無改。馬上裁篇筆有春。萬里江山迎使旆。九門冠劍別朝紳。請君更讀韋平傳。莫把家聲苦讓人。

次韻和宮保龐丞相見貺之作

歲陰誰不感摧頽。更值亨衢出處催。根柢只堪陪櫟社。功名何足玷雲臺。覽窮文史篇章劾。過盡榮華老病來。宮袞裁詩褒意厚。昏瞳刮膜喜重開。

次韻和太常韓博士寄獻留臺吳侍郎之作

藥七獨疴去近班。主臺西邑借餘閒。梢雲翠色凌霜罷。巢閣仙姿瑞世還。秋沼縈心林下水。曉樓供日雨餘山。公里第有西沼北樓之勝更逢酬唱俱清潤。冰玉相輝戚苑間。

和吳侍郎答汝州諸官唱酬之作

青管裁篇屬舊僚。庶歌奇意亦飄飄。橫徽曲妙誰逃賞。過物風清盡應簫。此路煙霞催入洛。他年簪笏慶歸朝。乘秋不奈多高興。重取蘭薰答楚謠。

府齋秋日

卷帷收扇暮涼初。秋意盈襟小疾除。池面宿煙荷蓋老。階唇漏日竹陰疎。虛舟觸物真無意。高枕論才似

有餘學道知非堪自哂。眼昏方讀貝多書。

梅

花落亭亭素臉開。忍寒剛欲背春來。已迷江令瓊花樹。更傍周王璧水臺。楚館嬌雲愁夢斷。洛塵香雪待風回。一枝寄遠真何益。費盡南朝陸凱才。

趙奉禮見過

經年掩臥席凝塵。載喜西都接賦賓。照坐仙姿縉玉冷。醉心英氣瑾醪醇。斑衣就養垂華組。葆髮傷秋岸幅巾。更謝妍談殊未已。肯將車駟誚原貧。

歲暮答趙奉禮

蜀瘠平日掩芳樽。星箭年凋景易奔。天遠斷蘆催序鴈。庭空飛雪妬離鷗。顏瓢枉樂堪憂巷。漢履猶思待詔門。月署仙郎多麗唱。苦嗟池草久迷魂。

送趙奉禮

日出東郊郢路分。斑騅嘶斷恨離羣。漢庭習蒔仙曹遠。楚驛攀梅使綬薰。蟻酎百壺凝桂溢。鵝歌三闋轉珠聞。登臨如賦蘭臺事。十二峯前盡有雲。

朝謁應天神御瞻仰壯麗退憩齋房作

時朝廷重葺三殿畢功

雲構崔嵬敞梵筵。皇家基運此興先。如存不改當陽坐。善護常開種福田。四徹金繩規寶所。九衢瓊樹宿

非煙須知補舊延洪意。重數仙人拂石年。

晨謁感懷

早拂華簪謁冕旒。五更殘點便鳴騶。星沈長樂鐘聲外。月掛觚稜闕影頭。弱翮詎堪儀振鷲。孤懷終欲信羣鷗。更慚晨坐鴻樞府。容鬢先于省樹秋。

晨謁書所見

紺憲鳴珂萬蓋翔。九門冠劍擁晨光。城連南北長安斗。殿倚東西太極堂。雲裏銅烏風作籟。天邊金掌露成霜。微生備位如葵藿。只有傾心奉聖王。

受詔同編修敕令終篇例賜勳一轉謝參預東平會稽二公

法家高議集朝綏。成績連茅被帝暉。均賞已知羊胃爛。銘恩偏覺鼠肝微。泥塗枉入鴻鈞用。腹背還憑逸翮飛。天祿半生瘖眩病。猶堪持帚掃朱扉。

送巢邑孫簿兼過江南家墅

楚客才多不奈秋。長安赴集苦淹留。半綸綬采緇塵化。十幅帆陰素潦收。離恨枉能寬帶眼。歸期猶喜詠刀頭。督租勾簿真沈俊。終冀梁臺一召鄒。

流杯小宴偶成拙詩奉呈運使王密學紫微韓舍人

溪齋元已得嘉賓。曲曲煙渠逗翠淪。潑火乍經三月雨。泛觴重記九年春。山陰之序在永和九年。風前小舞驚餘雪。

梁外清歌落暗塵。此會貴交應絕擬。斗樞星掖兩賢臣。

春晚獨遊沂公園

幾曲鳴溪抱嘯臺。陰陰野氣壓浮埃。林間幽鳥自相語。水上落花何處來。逃相故畦無廢汲。封侯修竹是元栽。三川病尹妨賢久。終卜鄰扉養不才。

送李祕校赴太平法掾

沈臂驚秋肉減分。曉波衰柳對離羣。臣飢枉索中都米。卿事猶參下國軍。三襲賦臺拋苑雪。一塵鄉樹辨江雲。坐曹少茹徒勞歎。南闕千霄遲獻文。

送黃秀才歸淮西

驪駒黃鵠兩成歌。卽席愁顏慘未酤。舊客仙壇紅遶杏。怨魂春水綠生波。締交英域銀袍麗。宴族詩庭玉樹多。簡牘三千行自鬻。漢家隘闕鬱嵯峨。

歎張絳

嶠外歸來白髮新。胷中無物有經綸。局當轅下驂騶足。倚著門邊駉髀人。風雪又殘梁苑歲。煙蘿誰管楚山春。由來榮悴多如此。莫爲前薪怨後薪。

洛京王尚書學士寄惠牡丹十品五十枝因成四韻代書答

十種仙葩各有名。相逢暫似到周京。簪端珥萼頭雖白。酒面含華眼更明。風暖天香吹不斷。露深宮綵洗

初成。慙慙數盡千重葉。未抵銜恩感舊情。

和運使王密學西亭未開牡丹

新年西圃帶輕寒。芳意含華洽客歡。瑞露只知催溜錦。朝霞猶欲隱乘鸞。暗期玉蕊蜂窠潤。偷裊天香蝶粉乾。應爲主人恩不淺。併留顏色占春闌。

小園春晝

日永春殘陋巷深。四隣蕭寂小山林。張羅門外人驚爵。仰秣槽中馬聽琴。燕坐角巾移竹影。野談爭席占牆陰。灌園本是三公事。侶侶閒舒傲世心。

和中丞晏尚書圓丘觀禮

三襲觚壇夜未火。金支蟾彩共熒煌。鳳輿遙憩壇門次。翟尾交分褥路香。星魄媪神聯紺席。文宗武祖侑瑤觴。萬靈醉止純休集。方信周家駿命長。

陰晦殘春可惜二首

園林春去自無歡。宴幕經旬掩客盤。霧野關河非意失。曉樓風雨不時寒。空梁燕濕休矜舞。曲沼蛙鳴且爲官。嵩少歸心堪悵望。紫芝頰桂老瓊巒。

柳長花歇夏雲初。幽圃尋芳但綠蕪。不分伯勞隨阿母。生憎蛺蝶効當塗。昏沈嶺霧吞斜日。寂寞溪煙壓翠蒲。欲拂琴徽銷客恨。啞啞_平城曲已啼烏。

同萬秀才燕楊侯別墅

苑路輕騶拂曉霞。斗城南畔列侯家。臨邛貴客傾中坐。時一二貴遊借集漳水詞人記後車。一石蒲桃先載酒。萬株金谷正交花。風光不減蘭亭會。醉墨憑君紀歲華。

過漢洛陽故城在今城東十八里

漢家遺塔滿山川。六里東西遂渺然。洛陽記漢都城東西八里南北九里今舊趾猶然寒日似愁圭影地。秋風真作黍離天。五株杏發陵無邑。一頂茅荒井失田。更歎道邊多棄骨。可能猶爲直如弦。

送紫微夏舍人徙治洪州

方底丁寧細扎書。豫章都會冠全吳。垂腰三品龜銜綬。衛帳千兵虎刻符。藥省樹翻拋賜筆。練江波靜見還珠。西山五色多仙餌。鈴閣無聲道有腴。

立春前二日嘉雪應祈呈昭文相公

皇心精禱動昭回。嘉雪乘時引歲災。先作飛霰隨臘舞。便含膏澤趁春來。天淵百頃移星漢。禁籞千枝傲嶺梅。一曲巴人雖下里。願持歡意助康哉。

北臺

古丘危磴接雲梯。遠目臨高意自迷。千里綠蕪平野北。半邊紅日亂峯西。臺傾鄴苑多殘瓦。鳳沒漳河失故隄。近塞春郊無勝事。跋韉風馬滿山溪。

曉出城祀風師壇馬上作

風穴靈壇背漢臯。肅將祀典會諸曹。城頭五鼓催關鑰。席上雙蓬薦沼毛。冠嶺昕霞迎霽旭。冒疇農斲漬春膏。箕揚畢好宜流惠。江外刀耕楚俗勞。

漕渠春臺

縹陂春色極晴虛。新水遙連六輔渠。沙上釣歸人獲鵝。梁邊觀罷客知魚。蒼浮樹影煙生後。紅斂溪紋日側初。刮目暫成江海趣。狂奴終憶越灘居。

和朱舅暮春積雨

沮洳江雲寂寞春。一軒風雨歎彌旬。灰殘淮館蟾韜暈。石去湘陵燕濕身。委路落花紅罷舞。傍樓低柳綠爭颺。蕭蕭枉結年華恨。愁煞西州掩鼻人。

得許六書

車笠論交夙契深。文麒江海獲歸音。流光過隙偏驚駟。危睫沾衣不爲琴。甯扣幾勞歌白石。莊昏猶欲注黃金。無因一答瑤華問。南國洪喬牘易沈。

馳賀監稅齊都

溫詔封芝出帝居。祕曹星秩示優除。舜庭已茂三年績。魏謗初銷一篋書。丹地拾遺思汲黯。中宸批草待相如。前期雀屐無因戀。歸從清塵六尺輿。

次韻和吳侍郎任宗伯貳卿沖卿領天官南局皆世職有感〔案〕貳卿沖卿文不甚明疑有訛脫
斗宮分局斂星闈。伯仲登賢士論歸。奕世弓裘方善續。先春跗萼更相依。孤鴻暫作雲衢騁。三鳳行看帝閣飛。戚苑好書餘慶事。一門仙棗映朝衣。

西齋見雪寄呈靖彥惠

歲陰休沐坐空齋。集霰飄霏次第來。仙粉有痕緣幌入。亂花無數覓叢開。故裘禦濕便羔袖。凍醴扶衰藉藥杯。向暮紛紛何所擬。謝家兒姪有清才。

和中丞晏尙書和答十二兄夜歸遇雪之作

有客天街夜轡還。霰花無數拂雕鞍。路疑西極瑤池近。人似南朝鶴鬢寒。漏鼓傳聲催暝色。麴車迷轍寄餘權。頃篋雅韻皆多感。偏覺陽春再和難。

和中丞晏尙書乘輿宿殿致齋日巡仗遇雪

〔案〕宿存下未著殿名原本脫誤

十里甘泉鹵簿新。卽時天借雪清塵。光含九陌疑無暝。花拂千旗旋作春。夾路綵樓偏著粉。中天曉闕更成銀。絳鸞案仗傳呼盛。寧似梁王不悅辰。

初春夙興

戍城官柝應營笳。愁枕無眠感曙鷗。料峭風頭猶助凍。蒼涼天角欲成霞。離離奕局殘星墜。脈脈刀環片月斜。尙喜初年輕病骨。半簪蓬影況蒼華。

送令狐揆南游

楚澤離愁不避春。柳梢梅萼送行人。綠波易蕩銷魂水。紫陌難遮拂面塵。道困秦儀猶掉舌。岐多楊阮始沾巾。劍絳髀肉無窮恨。羞向耕疇獨問津。

己巳孟春二十六日作

糾纏空驚禍福頻。沈舟未拯更摧輪。山頭枉是輕廷尉。天上何容著塞人。南國祭犧堪畏楚。東門獵犬尙尤秦。當塗莫竦支離誚。坐受朝家十束薪。

致政張郎中惠親畫墨竹二幀以詩爲報

南宮仙老本多才。素幅珍紈繪境開。高節自緣心匠出。野叢還擁筆端來。挂餘粉籜疑飄席。玩久風枝欲掃苔。俗眼莫驚無藻麗。歲寒顏色抵瓊瑰。

送孫記堂出宰歸安

當年璧馬上荆臺。曾識長離婉婉來。巧智忍隨司馬宦。沈酣終屈廣都才。尊鱸薦俎朝豐饌。稻蟹藏波歲絕災。鄉梓汀蘋鷄犬地。孫郎藻思若爲裁。

榴花

孤根西土幾時傳。絳葉細跣早夏天。豔發雖慙李桃後。子成猶占雪霜前。醞餘霞醕香應在。染殺綃裙色未鮮。一種芳心耐風雨。敢辭重疊奏君筵。

晚臺

霽色秋空送目勞。小毫搖落更平臯。紅垂海樹烏棲日。清溢江沱鷺浴濤。天勢暮圍鱗隰闊。鴈行斜轉翼雲高。楚風撼撼迷魂地。可在揚雄獨廣騷。

提刑張司封同年垂訪別郡以詩為謝

天聖光華第二春。與君同日脫凡鱗。何知素領分符地。卻見青雲共榜人。千重使移行府重。一觴歡伯故傳親。言詩擊節兼風義。且欲因聲附翠珉。君與今永興丞相及諸名公等多所酬唱。並刻于石。兼遺副本。因以敘成。

送延評沈先輩宰江山兼過吉席

東陽世系出翹英。刮目神膺兩共清。洛紙文雄錢萬選。邢堂科美佛千名。春風適館仙駟密。海曲夸鄉縣綬輕。上最三年歸路穩。中阿芳意滿菁菁。

淳之太尉相公寄示赴鎮小編三復成誦研味之餘理當酬繼但難于徧和輒取首題賦成拙句一

首既仰高山仰止之願并以為謝

西北遮胡晉部駟。更煩儒將下文昌。久調玉鉉三司貴。出倚金城萬里長。唐畝歲豐禾自合。汾波秋景草應黃。公赴鎮在去秋末。須知外警從茲罷。閒殺邊郵赤白囊。

新春雪霽坐郡圃池上二首

鈴齋西北小池臺。漠漠年光病眼開。水面綠深知凍解。柳梢黃淺覺春來。啁啾野雀遺寒毳。撥刺潛黃露

戲鰓物物惱人俱入詠。使君爭奈乏天才。
溪上危堂堂下橋。臘餘春意卷寒飈。煙催樹色全疑染。暖逼禽聲自學調。封徑老苔翻收錦。抱城空水皺輕綃。茨山小隱歸心動。坐想瓊芝幾隴苗。

淮南自訟

偶然人乏武中樞。賜罷猶專督府居。髮白自傷聞道晚。心丹誰識報恩餘。淮天目極風飄駛。韓野魂銷宰樹疎。卻願病身何所用。只堪歸釣潁灘魚。

春社日置酒示客

欣欣春色上高臺。一雨關河宿霧開。洛浦宓妃鴻已去。漢家皇后燕初來。山爐馥郁熏歌扇。錦瑟丁寧侑客杯。秉燭尋芳君莫倦。歡游纔散便徘徊。

暮春感興

九十芳期去不留。解脩何計貫珍裘。爐殘晉俗清明火。水冷山陰祓禊洲。風徑舞花催暮色。雨梁歸燕說春愁。離歸莫問年華事。賦筆悲于宋玉秋。

元憲集卷十二

七言律詩

去秋九日置酒。今秋復喜茲會。詩呈通判比部。並諸幕府。

城上凌氛百尺臺。晚秋重喜宴樓開。汎樽露菊疑相識。吹帽霜風是再來。寶瑟丁寧催客飲。丹萸爛漫辟誰災。莫驚銀燭先爲具。天際殘陽喚不回。

孤坐北齋。因懷出處之難。偶成感詠。

白頭榮路念何之。出處空驚未得宜。劉放老于宮裏樹。莊生愁煞廟中犧。嵩巖桂塢堪休影。潁曲芝廡好療饑。但願天心從爾欲。敢言歸赴赤松期。

謀退

家家臯稷會亨辰。老醜無謀念孰親。自樂一麾稱外守。恥將三物詛讒人。灌園路僻蒼烟曉。洗耳灘長碧溜春。此地敢言逃楚相。他年終擬作堯民。

赴鄭出國門。經西苑池上。

十里商中抱帝畿。苑煙宮霧共霏微。長楊獵近寒熊吼。太液歌餘瑞鷓飛。碧護斗城天倚蓋。光銜蓬島日舒圍。樓船法從年年盛。借問孤臣何歲歸。

府齋歲晏節物感人輒成拙詩二篇上寄昭文相公樞密太尉雖俚調無取亦盍各斐然之義也
曉拂青銅感歲闌。蕭蕭華髮強扶冠。病憎蛇影能爲怪。老愛松心不受寒。世務焦頭機已息。主恩淪髓報
應難。鑿鑿自躍非吾意。且作洪鑪舊物看。
處世何嘗盡值才。虛名高位自驚猜。千重浪裏隨流出。百尺竿頭試險回。衰鬢不徒欺曉雪。孤心兼欲伴
寒灰。嵩陽穎曲風煙接。已仗歸雲作隱媒。

後池春水初滿

水從雲表濟祠來。春凍初消舊堰開。岸側淺黃先映柳。石邊新綠便成苔。就深整頓吳歛槩。因曲安排洛
禊杯。莫道使君無野興。把竿常到月中回。

池上雨過

蕭蕭殘雨過橫塘。翠幕生波入坐涼。淡日映雲微透腳。暖風翻葉更成光。牆頭早杏青丸小。水面新蒲紺
尾長。魚鳥沈浮齋吏散。恍驚身世在濠梁。

因覽鏡照見衰年狀貌有感

拂檻清晨念老餘。只堪丘壑便懸車。暗圍廓落頻移眼。坐況蒼華不滿梳。綬綬轉慙龜鈕印。土音空負鶴
頭鋤。人生出處真難決。羨殺賢哉漢二疏。

郎中胡君出守三衢特枉長韻一篇曲敘故人之契且有嘉命別督餞章牽課所成老拙多愧聊以

奉揚高節爾

南宮仙客欲歸休。更領銅符越絕州。君久欲歸休。故不辭小郡。郎位雖嗟三不遇。友聲偏喜兩相求。僕與君最爲故舊。朝端引籍辭羣鷺。天外忘機信白鷗。行矣松喬君自愛。虛名官職壓人頭。

落花

一夜春風拂苑牆。歸來何處剩淒涼。漢臯佩冷臨江失。金谷樓危到地香。淚臉補痕勞獺髓。舞臺收影費鸞腸。南朝樂府休賡曲。桃葉桃根盡可傷。

春晦

曉雨廉纖僅壓塵。落花長草小平津。十千酒美空留客。九十春歸不戀人。有恨剛腸隨指繞。無情華髮撲頭新。憑誰與射跋烏翼。免向西磁送日輪。

恩忝西掖垣

賢路塵消篋謗殘。蕭蕭衰鬢得生還。久叨鷓尾三重閣。予在天章三周歲。卻趁蛾眉五日班。傷翼再來仍繞樹。行雲何處不思山。坐揮拙筆無文甚。正被中郎笑拙艱。

新晴

清明初過雨初收。春意重因霽景留。風定草烟還壓野。雲開山色始歸樓。邛陰高樹藏低嶺。河曲新波沒故洲。點檢叢花猶半在。應須秉燭爲君游。

清明日東歸舟次滯雨

月弦雖畢破芳辰。舟子招招數問津。壓岸晚陰雲著野。蘸渠春色柳隨人。煙疇雉雉逢誰歎。風磧鷺鷗莫我親。賜告有程歸棹急。赧然歸水愧游鱗。

都官謝員外今年春榜舟奉使予餞別于東亭孟夏之初不幸卒于中道其孤迎喪還都予又出弔于餞所俯仰陳迹因爲詩以寄哀

溝水新傷慘缺人。何言便作死生分。地中玉樹無期見。琴上牙絃忍再聞。幾日離觴成漬酒。平時芳札代遺文。東亭哭罷愁回首。落照銘旌隔野氛。

四月昌州奏聖祖殿下生芝草一本四莖及面有紅光如悅懌之狀

昌元遠地凝和氣。聖祖仙宮發帝祺。穆穆眸容分喜色。煌煌寶座秀華芝。已彰日監靈心顯。更表晨敷協氣滋。元后欽崇膺瑞命。殊庭薦號答繁禱。

寄延州經略龐龍圖

驛騎傳書拂塞塵。開緘長跪墨猶新。霜餘且喜青松在。火盡誰矜白壁真。嵇阮交遊思舊隱。臯夔功業記名臣。年來更嗜無生學。笑殺關西仗鉞人。

清明

前旬風雨逼清明。柳色天高雪絮輕。冷落介推藏火月。寂寥潘令種花城。軍中蹋鞠人穿域。門外吹簫客

詫錫。今日太官還直具。多年私邸隔朝纓。故事每歲寒食皆錫宴于宰臣私第。

和吳侍郎謝余泊諸朝客見過亭沼

碧瓦新堂壓素波。主人歡意駐鳴珂。風清共覺煩襟快。觴急都忘醉弁俄。江葦有情侵岸出。野鷗無事掠船過。西牆墨妙須珍護。皇祐高秋勝永和。是日太常吳丞題諸公名于西壁。

胥集賢復舊官

鸞鵲驚飛詔檢開。唐家僊殿育英才。毫端誤墨讒蠅盡。塞上求羣故馬來。咄咄書空徒有意。冥冥避弋本無猜。孤生舊辱知人舉。一夕聞風釋九回。

從獵晚歸馬上默成奉呈承旨端明王學士

天子乘冬校獵回。鉤陳平野轉瑤魁。萬蹄未暮先追日。疊鼓非春已作雷。得雋風毛隨禁仗。犒勤霞液出仙杯。詞臣定有長楊賦。翰墨能銷幾許才。長楊有翰林墨癩之問。

次韻和度支蘇員外覆考進士文卷鎖宿景福殿

秘邃嚴廬斗極傍。此殿最知君此夕較連章。天移宿幕鄰堯屋。霞灑仙杯雜穠霜。供帳賜樽之坐處銅籤隨漏箭。臥驚銀漢入宮牆。精心百汰知無倦。千牘皆供夜石量。

屯田任君數以歌詩授余感嘆不足因成答贈

綠髮仙郎藻思新。就中詩語更通神。清襟逗興初無滓。綵筆呈華別有春。願我風期情背俗。感君官職命

欺人湯湯聽盡流波曲。終愧衰聾賞未真。

永興端明王左丞寄示見訓長句因爲後答

西風書驛到河津。且喜開筩麗句新。安石風流高映世。君房言語妙驚人。公懷遠略須經國。我愧華顛未乞身。惟有論交方寸地。歲寒留得比松筠。

答子京

一辭雲陛五周年。瑣門銷符寵再遷。時譽敢希吳陸俊。歸心偏識漢疏賢。蝸頭狼籍籍錄地。鴻影徘徊避弋天。命駕不須頻見約。頽濱嵩麓有私田。

閏十二月望日立春禁中作

閏歷先春破臘寒。綵花金勝寵千官。水從太液池邊動。柳向靈和殿裏看。瑞氣因風生禁仗。暖暉依日上仙盤。須知聖運隨生殖。萬國年年共此歡。

立春日置酒郡齋因追感三爲郡六迎春矣呈坐客

閏章餘歷氣先回。臘尾新陽已暗催。三改使符驚歲往。六傾賓酒駕春來。枝頭剪綵仙葩折。勝裏宜年寶字開。更聽美人金縷曲。從茲爭合捨尊罍。

晚春出郭遊北山佛寺

幽刹尋春傍翠微。遊人誰解惜芳菲。陰晴野日不常見。紅白路花相雜飛。一世功名催俊傑。千金歌舞屬

輕肥。左遷病守真無用。試學山公倒載歸。

淳之九兄以僕承乏制曹幸聯局事。回當成績猥辱裁篇。謹扞拙詩以謝來貺。
漢家挈令賴諸公。末至緣何玷選中。馬尾不知書畫誤。鳥聲偏樂友心同。忘憂日接三杯善。軋思時分一
漑功。敢向明廷邀異賞。從來儒術比司空。

新年謝故人惠建茗

春宮收英得幾叢。小團珍串刻閩工。甘踰寶屑非關露。快入煩襟不爲風。左鑪沸香殊有韻。越瓷涵綠更
疑空。從來酪茗嘲僮鬼。莫枉奴名立異同。

陳勤之兄弟同登秀科俱宰江東大邑

上林春色老朱櫻。誰見聯科紀佛名。睢苑妍辭俱右席。太丘遺業肯慙卿。離歌坐寫墳篋恨。邑政行聞魯
衛聲。使橐盡堪傳尺素。雙函同慰一搖旌。

宗人絨見過與予同年擢第時絨坐法失官

慈恩題墨七彫年。霰雪相逢倦客天。男子詣曹羞會課。禿翁無版欲歸田。爰占後笑餘艱象。書入窮愁有
剝篇。聞道漢家求失職。時郊祀大恩昭洗痕玷可能梁甲信灰然。

閏三月再到西湖花卉已過春餘夏早景物亦佳因復留連日夕忘返

再來湖上已春殘。物物隨時亦強歡。紫葉抽荷疑弄麝。翠皮包竹好裁冠。驚橈野鷺移沙渚。食餌鮮鱗薦

客盤盡日臨流忘吏事。須知名世六條寬。

重展西湖二首

綠鴨東陂已可憐。更因雲竇注西田。鑿開魚鳥忘情地。展盡江河極目天。向夕舊灘都浸月。過寒新樹便留煙。使君直欲稱漁叟。願賜閒州不計年。

西北雲波逗異津。兩陂相合到城闔。橋橫斷岸纔通舫。路轉新洲不踏塵。倒影剩容霞底日。暖光平展鑑中春。摧頹病守時無用。堪與鷗鷺作主人。

次韻和次道學士獻贈留臺吳侍郎洛水泛舟之作

歲晚風清洛霧開。有人沿泝避囂埃。莊談解辯觀濠樂。潘興能添作賦才。公子舟中作泛洛賦一篇實當世名筆 蘭菊分洲爭向背。鳧鷖隨棹罷驚猜。留都吏沒雖驕鞅。亦欲抽身更一陪。

夜爐

風牕夜永燭飄煤。坐擁空爐煖凍杯。束緼未求曹相火。冥心將冷子綦灰。禪牀隱竈徒驚俗。曲突徒薪枉備災。餘燼欲銷微叢集。燎薰援錦憶平臺。

後園新水初滿坐高明臺遠眺

濟渠冰解逗齋淪。花柳兼催近郭春。城外天形低合野。水邊樓影倒傾人。趁晴魚意雙游樂。助鬧禽聲百種新。老倚芳樽從外誚。且將吟嘯代經綸。

送貴溪尉周懿文

津亭理櫂拂朝霞。試補東溪縣道賒。旅突倦供樵客桂。官符貪及戍時瓜。蟾生海岸空弦濕。天倚山城一蓋斜。歲晚私書無憚數。輕郵不禁嶺頭花。

送虞部楊員外出牧池州

郎署新聞一進階。漢家臨遣重州臺。人持澤節龍形出。路建風旗隼翼開。千頃江禾年有瑞。萬盆吳繭俗豐財。吟牕剩賞雪峯翠。卽有踰荊報政回。

送集賢盛諫議出牧維揚

江海多年滯軾熊。書林諫露得儒宗。寬條一劄仙泥熟。慈宴千觴湛露濃。公拜職賜宴于本院儒林學會迎舸蔽川交畫鷁。隊笳橫浦細吟龍。輕揚俗改方圖舊。兩馬行催詔傳封。

晚泊白村登舟回望因成拙句寄淮陽龍圖王給事

臨艫西泝近神垵。六輔聯疆見驛亭。漢郡水督六輔渠。實近畿河漕也。千里暮霞烘日腳。一篙春水皺天形。野橋煙火微分市。曲岸漁樵別有汀。忽憶主人恩意厚。倚檣回首涕空零。

和龍圖王學士經涂洛邑見寄

謝病台階別遽旒。更榮符鑰守司州。篋書已辯恩難報。臺禮雖頒政未修。漱石洛波鳴佩曉。插雲嵩色紺屏秋。煩君麗句催登覽。欲便長隨麋鹿游。

楊寺丞以新集見授君與僕皆于

荆臺杯酒接慙慙。已是緹灰十五春。學舍早欣游霧露。辭條今服際天人。沈居雌蜺那知賞。葉牖神龍更駭真。侍上可能無狗監。子虛賦就長卿貧。

天禧詔罷寄王貫之

裂繻無路學西游。衡木爲扉戀一丘。阮籍自多回轍淚。虞卿長有著書愁。江邊客素沈驚鯉。海上機心失故鷗。借問騷人才幾許。莫因題鴉枉悲秋。

乾興詔罷自詠

忍當昭世臥隆中。西笑無謀始諱窮。鷗散海邊漁事廢。炙殘京口客盤空。鄉魂怨曉虛爲蝶。頭葆悲秋不後蓬。欲把遺編論興廢。諸儒爭奈喜嘲雄。

奉詔過都代書寄昭文相公

六年衰鬢兩爲州。何意瓜時謁冕旒。去位本無三巳色。過城應有復來謳。吹蠶膽怯空思勉。淪骨恩深未易酬。卽日詣門重謝罪。豫慙危涕滿中籌。

送安陸朱通判赴召兼過許田別墅

綠綈珍檢九天來。綬笥騰裝沸簿埃。鈴閣餞歌鷗瑟怨。璧田仙里駟門開。廚書久汗南山竹。征袂濃薰北使梅。歲晚林光催奉計。五雲城闕倚瑤魁。

和吳侍郎龍門寶應寺設齋

闕塞千巖入畫圖。八關修供梶征車。半千運泰賢將用。不二門深疾始除。香鉢淨羞熏寶席。法螺仙曲逗晴虛。從茲定許陪登覺。肯效區區粟里輿。

和吳侍郎相從經歲忽有陝許之別見贖長句

接武西臺屬鉅賢。琴樽歡意滿山川。論交共到忘言地。感別空驚易守年。陝界霜氛迎喜氣。君再臨穎郊秋色犯華顛。全委拙許昌卜隣自有歸休約。終就溪林占一廛。

送資政侍讀侍郎西赴陝郊〔案〕侍郎上應有姓氏原本脫誤

君欲歸休未得休。再持符節定西侯。深嚴殿籍恩圖舊。蔽芾棠歌野績謳。洛浦神仙觀送客。嶧陵風雨避傳騶。高懷莫作衰年調。公府重來尙黑頭。

和河間通博王太博見贖春雨應時雅什

東來春色變層陰。甘露前符望歲心。雲葉乍驚重礎潤。土膏先過一犁深。農人記皇慈已浹流根澤。近詔天_下芳節殊非貫序霖。忽枉新篇真寡和。鼻聲衰濁費長吟。

題高明堂後池雜景二首

荒城岑寂冒春霏。竹落江村具體微。蛙怒愛為先雨叫。燕輕多作逆風飛。印波鸞鑑新荷小。礙路犀簪早筍肥。極目纖塵都不動。元規安得汗人衣。

一。寶。春。景。貫。曉。溪。水。光。涵。物。見。纖。微。波。鳧。泛。泛。騷。人。卜。風。蝶。翩。翩。佛。助。飛。雨。足。舊。蘭。穿。畹。出。餌。香。鮮。鮪。壓。鉤。肥。昔。聞。緩。帶。猶。堪。羨。退。食。何。妨。野。客。衣。

元憲集卷十三

七言律詩

憂闕還臺次韻和道卿學士終喪歸集賢舊職見寄二首

半生多難竄民廛。北闕重來雪履穿。木在溝中寧有聞。人從河上更相憐。塵棲綬笥昏餘采。蟲食書牋脫故篇。不敢對君重撫臆。孤懷同是一潸然。

解籍書林同遇春。笑筭孤影弔窮塵。茂陵久臥添遲思。東觀重歸有戲賓。爭食已慙池鵞飽。忘機更待海鷗親。潏然末曲何能續。聊誌當年並賦人。

默誦

虛名三紀玷王朝。晚歲剛腸萬慮銷。篤學自依袁伯業。醒狂誰比蓋寬饒。將施燭日逢兵偃。隱谷連雲負客招。白首報恩雖竭節。擬留餘力事耕樵。

贈令狐進士

闕里高談擅席珍。多年穉痺嘆沈淪。封軺續食論鄉士。綵服承顏斷織親。風直鷁郊傷六翮。機藏駭弩惜千鈞。載餽誰就揚雄宅。覆瓿書成擔石貧。

感懷寄進士胡肅

離懷何事共淒然。雲路無因著祖鞭。賦苑竹荒沈舊賞。書郵梅老怨殘年。莊魂斷處星垂地。楚思搖時水接天。趙壹窮愁堪自笑。擬將文腹敵囊錢。

送謝沂進士

坦牀仙格照瓊筵。歸待蘭陔補逸篇。別路雲霞交友闊。慶門酥酪弟兄賢。春郊送目車流水。夕館迷魂月上弦。續食定知西笑近。馬生詞賦賈生年。

送總閣會士守秦亭二首

（案）總閣學士應有姓名原本脫誤。

幾日章街認錦韉。平明頒節撫秦汧。嚴廡侍從宣勞久。郟府詩書得帥賢。穀騎千蹄嘶隴月。城笳三疊破羌烟。賓簪自古從軍樂。別夢空隨使幕蓮。綠園屏閣倚昭回。瑞鷄驚飛詔抑開。關內趙張人續譽。禁中頗牧帝憐才。垂螯虎綬朝裝出。夾轂蛇矛使仗來。坐鎮平時文檄簡。赤囊邊瑣有輕埃。

清明出沐

曉樹陰岑客舍春。卿輿不訪著書人。長楸有地金成埒。曲突無烟桂徙薪。自欠解蘭拋北阜。更堪鳴磬是南鄰。錫香醞冷沈歡緒。枉負山郎出沐辰。

朝謁待漏偶成詠懷

天街殘月斗城西。五里葱葱瑞霧迷。仙翰入陪靡澤鷺。曉籌初聽汝南鷄。星翻微道千廬密。雲斂觚稜兩

觀齊自願山林疎賤質。誰將車馬載驚駭。

孟津跨大河寒氣特盛歲暮作

河裏孤城歲倍寒。冰霜千里正漫漫。爐熏寶焰翻沈煖。酒入衰容不借丹。翠幕障風襄影數。玉琴抽雪按徽難。天高木落千花盡。閒撫青松仔細看。

世事

世事悠悠未遽央。虛名真意兩相忘。休誇失馬曾歸塞。未省牽牛解服箱。四客高風輕楚漢。五君新詠棄山王。秋來數有漁樵夢。多在箕峯潁水旁。

和吳侍郎留題北樓

疾間勤勤解郡章。北樓舒嘯寄徜徉。山圍軒后乘車野。水接堯民洗耳鄉。拂衽風頭迎爽籟。壓林霞尾送殘陽。冶城極望雖高世。爭奈臨秋鬢未霜。

寄許師孟

鷓鴣三鷺楚澤秋。回腸更用斛添愁。燕臺市駿千金骨。漢客逃名九罭鱒。木斷華樽俱失性。瓢空陋巷獨堪憂。夏畦蟠食非吾事。終訪班生問一丘。

同年胡宿自江外寄遺詩筆雜文

萬仞青雲接翼翔。江南離思滿雕章。輕投暗路珠無脛。驟濯迷魂玉有漿。奏記諸公多感慨。擬騷前哲剩

淒涼寄懷何止三年字。留祕傳家古錦囊。

寄子京

爲郡八年榮願已息朝恩念舊復假相印筦內樞然思歸之心日以切怛矣

八年三郡駕朱輪。更忝鴻樞對國均。老去師丹多忘事。少來之武不如人。車中顧馬空能數。海上逢鷗想見親。惟有弟兄歸隱志。共將耕鑿報堯仁。

晚春小園觀物

小園乘暖敞孤齋。畦埒經春盡綠苔。新筍偶隨枯篠出。野花閒抱故藤開。雙桐夾路元標井。酸棗依牆本乏臺。北戶清風時一至。此身疑到上皇來。

郡圃觀春物有感

河橋煙北寂寥城。山圃雖春氣尙清。戲蝶有時飛自遠。野禽終日語無情。露痕浥浥添花重。風意沾沾助絮輕。看徧物華還自看。乾坤同是一浮生。

晚出池上觀秋物

臨溪長是見歸鳥。搖落初驚歲物徂。虎掌煙芒金穗密。西池稻畦彌望鴈頭霜葉紺輪枯。差差去幕東西燕。兩兩隨波上下鳧。更向岸邊橫飲舫。使疑狂醉宿江湖。

秋霽觀野物

雨畢天高卷斷虹。郊原無物不秋豐。禾麻自稱霜前熟。梨棗徧依日處紅。煙外短帘閒映柳。水邊輕翼暗

隨風田廬我亦牽魂夢。歸去嵩陽一老翁。

孟津晚景

二月春風引夕陰。鞏煙邨樹悵登臨。醯鷄甕外天方闊。偃鼠河濱水正深。萬疊紺螺山北聳。半邊紅壁日西沈。憑高薄暮人誰見。一寸如丹魏闕心。

晚出池上

僚慄梧楸似楚騷。霜餘寒水失溪毛。游鱗潑潑心應樂。亂雀飛飛意不高。平世功名難強立。昔賢卿相是真逃。人間萬事無涯際。爭得先生一藉糟。余性不知酒味。

次韻和吳侍郎答汝州劉從事

賢路綢繆早奮庸。搢紳元許黑頭公。巖霖暫卷浮雲外。國棟來參散櫟中。仙禁巢阿思瑞鷗。野場收戈看冥鴻。恐難便遂東山臥。憂樂須將一世同。

寄武昌胡從事

君家酥酪弟兄賢。督府從軍滯幕蓮。江上歸音魚失素。天邊離思月成弦。阮毫答記無遺草。楚賦悲秋有剩篇。玉骨道風沈俊久。漢條新記會甘泉。

春陰復霽

時方思春澤

河外輕寒氣未佳。春襟愁目徧天涯。濃雲破綻翻無雨。落日因循便作霞。麥隴寸苗思雉柳。灘新葉欲

藏鷄。如膏且冀均農惠。莫枉層陰挫物華。

永陽登樓懷闕下知己

西北樓邊路欲分。神臯不見見浮雲。晉郵尺牘波中斷。洛客歸心笛裏聞。麗賦有情傷桂魄。勞歌無節怨蘭薰。漢家續食催西上。忍逐江鷗狎舊羣。

春霽漢南登樓望懷仲氏子京

三楚風煙會漢津。憑高倦目此城闔。山前霧密疑藏市。樓上塵輕不污人。鳴瑟久拋雩舞地。稱觴更負永和春。私書一紙離懷苦。望斷波中六六鱗。

春日樓上有寄

雲葉西來拂畫樓。江南何處不汀洲。三春草綠王孫路。萬海梅殘隴使郵。落照牕扉塵作馬。黃昏簾幕月成鉤。張衡藻思能多少。玉案貂襜各自愁。

淮南汶上三見春物有感

一麾南北數移官。三見鶯花送鴈寒。雙鬢欺人還似雪。寸心憂國本如丹。雕蟲曲藝論文淺。乘障迂儒破敵難。惟有歸耕初志在。故田西接飲牛灘。

暑雨初霽

日轉西軒小霧開。羲皇高興伴風來。層雲氣潤猶蒸礎。殘電光微不應雷。曲沼清潭魚對躍。暮簾明滅燕

雙回憑高更結京華恨。魂遶梁園舊吹臺。

暑雨夕霽

天角殘虹截暮暉。南樓風快暑煙微。月波半露金樞穴。雲葉全收玉女衣。氣爽戍樓孤鵲去。霧沈荒苑數螢歸。涼軒更作東山詠。何處莊環有世機。

秋出近郊

修邛纒轉便維嵩。都占黃河小山中。秋助峯巒相倚碧。日催梨棗一番紅。煙蕪雖歇猶藏野。霜葉能飛不待風。關輔俗淳無巧弋。河洛間俗無弋繳之技。天邊何意有驚鴻。

初至洛陽府廨有東樓曲沼之勝時春色已過園林寂寞晚坐樓上作

登臨何處恨春殘。樓上池邊夕照間。非意野雲遮倦目。無情空水鑑衰顏。青谿久負幽人約。白髮初辭宰相班。才與不才何足辨。此心都擬付莊環。

宮保龐丞相以詩二首見寄次韻和答

西畿三輔切天關。何意頒來細扎文。學謬詩書慙作帥。身非明畝更思君。劉向謂忠臣雖明畝不忘君。惓惓之義也。況予非明畝者耶。使輶結轍橫周道。鄉木交陰憶漢枌。保傅上才敦雅眷。滿章褒意藹蘭薰。

出入台階謝喬庸。白頭持節更爲公。臨民不稱瞻巖尹。慰俗猶依贈扇風。天許雲鴻增繳外。奉紀高節。世憐池鰲稻糧中。自訟叨塵。一聞麗唱情何極。心結平津舊閣東。

次韻和吳侍郎喜令弟學士請告歸省

秋來遙說瀟煩襟。季虎昆龍伴嘯吟。弓影舊疑臨酒釋。荆枝歡意戀叢深。仙山校籍催歸傳。宿館銷魂警曙砧。我亦白頭思共被。非君誰照急難心。時子京方北守常山。不得枉道見省。

寄致政杜相國

多年零雨詠公歸。得謝高懷與世違。池鳳何嘗嗟見奪。冥鴻終不更低飛。壽觴應舉三朋酒。師袞閒拋一品衣。我亦摧頽踰耳順。異時惇史託餘輝。

酬仲微以舍弟忝直螭階余近塵鳳署見慶之作

世隱東畿賦遂初。荆枝相樂本田廬。偶隨幽鳥同還俗。何意驚駭並載車。浴殿封芝慙視草。史階簪筆玷成書。猶欣夙契寒松在。持謝雕章悅柏餘。

京師故僚以余退居近畿數賜存問因敘懷自感

多年京洛寓靈臺。貪見三山縹帙開。野鶴據軒真冒祿。跛牂生奧苦爲災。茂陵養疾惜惜骨。莊室劊心寂寂灰。南鄙孤城非瀟岸。欲乘春氣望瑤魁。

次韻和運使王密學見貽之作

天畿巡部聽車音。更值秋空卷夕霖。擊壤但聞堯俗樂。寬條方識漢恩深。醜渠引漕民兼富。使塞進通渠。公利私蒙。飛檄宣風令莫侵。餘藻相存知厚意。孤松凌雪鶴鳴陰。

送蔣御史領江東運使

幾日都亭避憲驄，使臺分節按江東。朝端舊簡飛霜白，關外連艘餉粟紅。晨鼓疊喧雞埭月，暝帆遙卸雀桁風。先秋若有離懷詠，剩取芳筠作信筒。

寓直晚歸見天街早春景物

霽雲銜苑雪，雲開春色先。從禁籞回，馬上嫵眉偏。認柳樓前妝額固，知梅吹殘風箭。驚寒律，忙殺鷓鴣取凍醅。莫問康年行樂意，壽觴初罷佛燈來。時長寧節接影燈之夕

次韻和安陸王工部郡圃早春

鄖波翻縠抱城流，夢比春風第一州。安陸郡實楚之北境槁質枉陪溫樹密，勝襟還負峴亭游。風英百種紛如繡，溪羽千聲巧命儔。遙識使臣興感地，浮雲長映最高樓。

和經略宣徽吳太尉以將經洛陽舊隱之作

公有長才動縉紳，朝廷不肯棄名臣。高懷空結山中社，公在西都自號樂城居士遠略今清塞外塵。竹塢未荒溪葉密，菊叢雖舊徑花新。南臺素壁題名處，莫惜磨鏡一駐輪。

入朝感舊井序

余自寶元己卯始聞政事，逮至和丙申歲，幾二十年。其間凡再塵參貳，陞使樞筦，蚤緣乏人，遂登宰席。洎蒙罷免，守郡六年。過都造朝，追念兩府僚舊，自大丞相文懿鄧國張公文靖許國呂公文

簡郇國章公。元獻晏公。文莊鄭國夏公。其次則宣獻宋公。康靖李公。忠穆王公。文孝張公。文莊鼂公。文肅鄭公。文簡丁公。文莊高公。皆邁世傑才。左右王室。余猥以庸末。預巖廊之游。今茲來歸。則嚮之諸公。無一存者。退朝感念。悲不自勝。因成短章。以志存歿云爾。

二紀便蕃冒主恩。歸來榮感兩驚魂。昌辰盡見羣龍出。漢郎顯云羣龍在位以喻衆賢急景俱隨駭駟奔。史冊褒賢空汗竹。山丘餘泣已陳根。此身不減靈光殿。遺老班中歸獨存。

久客懷故里

漢枌遺產接東陂。舒嘯行吟失舊期。嶺上孤猿驚別久。山中芳草怨歸遲。鮒波希潤寧堪待。龍斷求豐忍自欺。負郭已荒金未佩。天涯浩歎滿隆墀。

和吳侍郎惠詩

最樂乘秋浩氣全。洛臺歸興滿新篇。霞漿不雜甘辛味。廟瑟都遺掩抑絃。峴嶺希珍驚倦鵲。蘭臺清吹飲吟蟬。欲知傳誦人多少。正似三都紙貴年。

求志

壯心銷盡見天機。敢惜功名與世違。拙似潘生難濟用。老于蘧瑗轉知非。多年鷄口慙爭食。自古鰲筋愛舉肥。常恐冒榮孤晚節。春來魂夢到柴扉。

和子京旅況

春城岑寂早花開。久脫冠梁有薄埃。安邑本緣飢腹累。茂陵非爲富貴來。漢以高貴者皆徒從諸陵。驚羅晚雀同茅宇。爭席春農伴茗杯。自有忘言記真意。不煩騷客賦銜枚。楚辭云願銜枚而無言。

和吳侍郎謝予送酒

歲稔兵廚富酒材。幾槽新溜滴芳醅。秋香自與蘭英合。春色潛依竹葉回。蟹甲佐歡賓罍溢。鷓鴣參貢縣郵催。歲時舊例有百壺之貢。雖非平樂十千斗。願奉康成三百杯。袁紹辟鄭康成。及去錢之。自旦及暮。康成飲三百餘杯。溫克之容。終日忘怠。

秋夕感懷

風蟾成暈露成霜。玉箭添籌怨漏長。四載歸心同騎省。案潘岳詩自我遠京。四載迄于斯。原本作四。咸今據改。半分仙骨過東陽。驚猿久負排巢客。乘駟誰輕喻蜀郎。掩鼻裁詩多感慨。吟餘星斗轉秋潢。

題江南程氏家清風閣建江

臨波飛閣迓層飈。溽暑狂醒此併銷。客至自同仙寇御。舟歸不減鄭公樵。雲明別島朝虹飲。月碎前溪夜鯉跳。借問北牕餘興否。羲皇高世一相招。

和吳侍郎游普明禪院

履道遺坊敞淨廬。昔人曾此賦閒居。園經漢傳揮金罷。原詩有石存裴令老。臣心之句。綠玉千竿多映水。蒼帷雙樹競凌虛。神交不必論年輩。一夕清吟萬境如。

次韻范純仁和郭昌朝寺丞見寄二首

岷峨秀氣入京華。鵬翼搏風勢莫涯。岷玉照人呈美璞。楚蘭芬畹擢新芽。君子同榜閩
里光榮在一家。不鄙蒙陽疲病守。肯來同醉岸烏紗。先改京秩

言路再居無少補。護邊三歲乏微勛。非才自合投閒地。竭節終期報聖君。老去風光流似水。病來世味薄
如雲。讀書記一將忘十。少壯誰教不自勤。

送龍圖燕待制出守梓潼

寶構沈沈夕霧迷。儒林俊老出分麾。中天祕牒河龍負。上路鳴鐃雀馬馳。香襲寵盤驚放獸。野連豐芋蔽
蹲鷗。潼江肯學淮陽臥。仙液真腴壯壽祺。

七言長律

次韻答襄陽龍圖燕給事慶僕序直禁林

右銀仙闕倚雲開。孤客緣何待詔來。一節新恩迂使驛。五花前署隔公台。英游但喜儒紳集。涸使偏驚吏
腕催。晝檻寶鷄翔帝竹。夕軒瑤斗掛宮槐。朝無濫吹終逃郭。性有真愚敢望回。雋老裁篇褻意重。遠分江
漢濯餘埃。

元憲集卷十四

五言絕句

坐池上看水偶成五絕句

冰解初分寶，波平便泛舟。岸花紅弔影，沙鴨綠昂頭。

漾漾通仙穴，源出清濟游游入故城。晚來丘壑思，併爲一渠聲。

短綠抽心草，深紅半面花。游魚知底事，跳碎水中霞。

已開臨水徑，自作探花人。岸柳何爲者，都盧欲占春。河橋不甚宜花，惟多美柳。

橋腳時依樹，多作釣橋階層便作河。初無心可洗，誰作洗心歌。聽事爲水所環，最爲佳處。

次韻和吳侍郎錄夢英書

何年留妙蹟，眞賞日云疎。不遇臨池鑒，誰收壞壁書。

六言絕句

撚鼻

一飢慣食腥腐，三嗅不分臭香。殘質心灰已久，末年鼻壅何傷。

七言絕句

和吳侍郎歛號樂城居士今復職守陝臨岐自哂二絕

竹圃雲齋謝病還。更將禪號擬香山。詔恩敍舊君何讓。從古英賢不得閒。
催拜連翩鳳詔飛。樂城幽槩願相違。高雲出岫雖無意。且待商巖作雨歸。

擢第南歸道中早發

紫漢回天斗柄橫。蕭蕭羸馬困遄征。南歸晝繡恩偏厚。應有鄉人笑夜行。

夜坐二首

紫垣疏舍拂霄霓。官燭臺衾夜境凄。況是顏生無飲分。小齋應免醉如泥。
省戶沈沈奉祕齋。通宵簫唱九天來。如愚默坐將何比。維斗虛名本不材。

道次春陵懷古二首

鬱鬱春陵舊帝家。黍離千古此興嗟。蕭王何事爲天子。本愛金君與麗華。
麗康遺壤亘荒途。白水烟消拱木枯。陌上停驂聊借問。帝鄉今有舊親無。

被詔假輅傳詣闕

輕郵千里給臺符。曉月征驂上道初。自比漢儒恩太渥。一生龔勝恨私車。

初歸咸寧宅坐北齋作二首

柳市西頭最遠坊。歸來先掃讀書堂。閒園別有風流意。無限苔花上石牀。

宴坐聊爲適性場。徧開塵篋治縑緗。偷閒須撰齋中錄。道帙儒經各有房。

因游東園奉寄交代張龍圖

修篁綠水已成陰。秀柏凌霜盡直尋。今日思人還愛樹。竹木盡是張公所植歲寒顏色歲寒心。

蔬食

退食西軒玩竺墳。鵲爐烟細篆難分。勞生未識心齋理。枉學顏徒不茹葷。

榴花

誰取孤根植檻旁。絳跗丹蘂鬪年芳。驚飈莫損亭亭豔。百子先秋未有房。

晚坐北臺見新月

落霞殘日罷空樓。月桂黃昏破客愁。天上幸無封拜事。誰教蟾影曲如鉤。

初止穀下車馬羸憊

九衢橫鶩徧驂駢。曉日浮雲萬蓋迷。借問東京朱伯厚。一車何苦日奔馳。

初倅襄陽郡事感而自詠三首

平日少游思郡掾。當年鄧禹志功曹。如何一命聯州刺。更冠靈峯最鳳翟。

詔版熏芝番露澗。千齡華旦此親逢。平刑六百叨優秩。漢廷尉平六百石秩已媿琅邪鄙曼容。

處世儒宮非曰貧。偶懷銅刻逐觀賓。漢家銜鬻盈千數。卻用淄川牧豕人。

春晚坐建隆寺北池亭上

城外東風卷落花。更臨春水惜年華。單車刺史無饒吹。叫殺荒池兩部蛙。南方氣早春未已蛙鳴

梁冀二首

狐尾單衣漢綬長。歸來珍館看啼妝。將軍幸有封侯力。忍使秦宮令太倉。外戚豪華善意錢。折巾平幘映鳶肩。支期一世惟偷寵。虛乘東京跋扈權。

題巢父井亭

箕嶺逃堯去不回。沈沈遺甃碧烟開。廉泉讓水猶堪貴。何況曾經天下來。

默記淮南王事

室餌初嘗謁帝晨。宮中雞犬亦登真。可憐南面稱孤貴。纔作仙家守廁人。伍被即八班葛才華盡冠時如何褒貶兩參差八公並號狎霄客誰作當年詣吏辭公之一
二山仙藻鬱紛綸。鴻寶于中祕術新。他日鑄金多不效。餘災翻及獻方人。

欲訪景升先寄

隱廬早學蝸牛樣。講肆仍將馬隊鄰。陶潛有馬隊非講肆之句余居東偏皆騎營所在北望烏衣纔一曲。擬搦聯簡就書筠。

歲暮北樓晚景

樓上人驚歲律殘。魯郊齊壘有無間。夕陽高鳥知何意。飛盡青冥不肯還。

和吳侍郎見贖白蓮

田田香葉滿橋陰。鑲玉仙葩照玉潯。應恐天姿太明潔。淺紅微綠護芳心。

招希元對弈余藥品甚卑。故有未句。

兕木成盧非我事。賭牛探炙亦何緣。乘閒欲數紋楸路。借問何如葛稚川。

適聞留臺侍郎獨游龍門屬府事牽鞅輒成短詩奉寄

飛蓋遙聞上鑿龍。白雲蒼靄曉樓鐘。匏瓜訟閣空南望。知到諸天第幾重。

再葺流杯亭兼得今翰林胡學士舊記石刻移置坐隅郡人以爲寵

重鑿瓊波弄酒船。翠珉英藻更相鮮。從茲春意無銷歇。長似山陰癸丑年。

流杯亭則天所臨幸李嬌撰碑。

昔記神皇駐六龍。橫波簫鼓沸天中。誰知一代繁華意。吹作菰蒲落日風。

齋中讀書

藤篋紛披擁蠶筠。日開黃巷代談賓。一經皓首心非悔。枉是無言對斲輪。

入謁馬羸不進

上路傳呼萬轂流。羸驂踏月五更愁。城門爭道無因入。始恨車前欠人騶。

惜白髮

曉鑑霜毛亂欲飄。感衰懷壯兩無聊。淵明雅思真高世。也解嘲人插素標。

再到小園見落花有感

雨餘春色太忽忽。已有殘英滿地紅。先落後開應定分。一般遲日一般風。急雨前旬滯客筵。羣葩何事亦翩翩。風長日暖東君醉。無限宮娃失翠鈿。

次韻和丁右丞因贈致政張少卿二首

幾年辭寵解華紳。佛忍莊恬共嗇神。歲晏始知松柏茂。凌雲高節不關春。芝朮新國御陌東。飄然雲鶴此相從。貴交亦有功成約。二卿皆與余有功成身退之約。林下他年或見容。

和中丞晏尚書觀上御青城案警場

崔嵬繪闕倚雲梯。三疊鳴笳引夕韉。使範雄嚴天意悅。瑞氛斜日紫垣西。是日登樓案警場即

偶觀竹林七賢畫像

七子高風拂混茫。丹青遺影尚琳琅。山王偶爾兼榮遇。不得延年贈短章。

次韻和石學士見寄十首

瀝懇囊封避政均。天恩從欲寵孤臣。回瞻始媿功名地。池有祥鷓關有麟。明堂盛禮。僕以禮儀使贊引乘輿。漢家山委無窮瑞。盡屬淵雲奏賦年。已上二篇來詩。紀明堂之盛。因見虛飾。輒緣雅意為答。

分符懷錦兩叨榮。公退賓尊恨獨醒。余性不飲酒。禊洛賞花都未識。歲寒空愛竹青青。禊飲賞花。洛人所重。余今夏赴任。未經此會。惟

上宜美竹。偏于池檻。此君之好。契余夙尚云。

隱几鈴齋咀道腴。洛烟嵩靄徧神都。時時更作書生詠。方信隨何一腐儒。

掉臂論交俗久訛。夫君高意遏頽波。薜華暮落松凌雪。借問凋芳校幾何。

榮路徘徊力已疲。保全恩惠劇春熙。須知散櫟無庸日。方到羣材構廈時。

久廁鸞鴻刷羽翰。大都飛意倦須還。周南日夕歸心勸。笙月飄風盡有山。

親見仙科唱第時。君擢第之日。余以學士為殿試考官。寵均宣室對神釐。韻強輒借。漢臺詔令方深厚。好取名郎作訓辭。詩來

有敲扑簿領之歎。輒以奉揚宜美。

老去勤勤念一丘。已將身世上虛舟。濟川善謔情雖厚。似倚清才惱白頭。

碧蘆堂

寂寂虛堂一自幽。紺梢蒼葉更臨流。不須重畫滄浪境。一片江天小樣秋。

故池

幾曲春淵逗碧塘。鞦韆沙版照波光。多年不浴荀池鳳。戲鶯時時下夕陽。

丁晉公故第東池上作

薛縣高臺已半傾。碧波遺甃自盈盈。池蛙不辨興亡意。猶學當年鼓吹聲。

東園池上書所見五首

茅棟山楹抱曲池。池上有堂。說白。蓮棟字朴野。孤懷終日此忘歸。生平方寸無機械。庭下羣鷗且莫飛。

春餘池圃似郊村。余夏初領府事時。花卉已過。池上寂然。有野思。吏散斜暉半府門。燕雀不知爭底事。啁啾言語到黃昏。

堂下濺濺水欲周。水清烟底見游鯈。主人不是無芳餌。此意從來信直鉤。

靜岸無風斂夕霏。田田香葉滿空池。戲魚未必能知我。我自知魚最樂時。

雨洗神嵩紺黛凝。中天鸞鶴恣飛騰。更憐晚翠知人意。併入東樓第一層。東樓正望。嵩少諸峯。

漫成

二典勳華冠號榮。燦然三代繼英聲。如何孟子尊儒術。不肯臨篇信武成。

漫成二絕

口日開門避寵呼。舞駮飛蓋共虛徐。昔人枉解痊秦痔。只得君王五乘車。

代故由來足糾紛。高才憂世強云云。太宗不用長沙傅。虛使羣臣諡孝文。

絕句

波環潁曲持竿石。雲擁嵩巖鍊藥爐。盡是他年歸隱計。更憑猿鶴作前驅。有薄田數頃。在嵩潁之間。自鄭畋之跋予耳。

次韻和吳侍郎和沖卿寄來詩二首

解郡西歸疾有痊。洛臺分籍養高賢。逍遙莫道無推重。雲外傳呼拜表天。

暫息塵機不爲年。高風聊借九區傳。周鼎漢朔誰能測。且作清時吏隱仙。

時余不得預會戲成二韻〔案〕此題上有脫文。

筆陣談鋒醉暮天。遙知三俊共周旋。據鞍舊將曾銷鞞。不得行間左執鞭。

和中丞晏尙書憶譙渦二首

穀浪如烟曲里深。使旗齋舫此幽尋。不知魚鳥思人否。曾費東山擁鼻吟。
沿緣綠篠無窮岸。縈帶香荷幾曲溪。可惜高秋眞賞地。夕陽殘月枉平西。

冬至夜齋中不寐遙想郊丘盛禮二首

陽郊陪禮忽三年。日想壇觚切絳烟。今夕纖蘿還不動。百神應到紫宮前。寶元郊祀之夕。風月澄霽。今歲復爾。
兩扶天御陟圓丘。景祐寶元二郊。余並攝公卿奉引乘輿升壇贊禮。璧月珠星拂綵旒。誰識從官興感夜。臥聽寒柝宿揚州。

人日

陽律初回七日春。誰將靈品占佳辰。鏤金翦綵空迎福。無奈牛羊已勝人。

游廣愛寺

鷲宇岩曉軼翠霏。清秋香火絕塵機。心明更接真空辯。應有天花滿席飛。

和伯中尙書聞琵琶詩一絕

香撥檀槽奉客杯。細音餘響碎瓊瑰。只應強作弦中誤。且欲周郎一顧回。

正月十日作

萬里春暉蕩曉空。芳芳心處不融融。惟餘兩鬢無情雪。最耐人間解凍風。
偶隨和氣上層臺。河裏風烟已暗開。空時虎牢天地險。不知春色過關來。

元憲集卷十五

七言絕句

和晏尚書宣德門侍宴觀燈

梵樓佛火千輪出。漢時神光百道來。爲報金吾休禁夜。太平簫鼓宴鈞臺。

讀史二首

孝武威靈動百蠻。將軍辛苦到闐顏。儒生未必無長策。枉使匈奴害狄山。
賈傅感傷論表餌。董生推本對春秋。馥張抵凡能爲相。誰序儒家冠九流。

觀文丁右丞求賜茶因奉短詩二章

金門高隱宰官身。盡把功名付客塵。慧露眞腴內消熱。可煩霞腳一瓶春。
龍銜縹質尊王貢。月滿春規記焙名。此味賞音知有意。不將甘醴作交情。

和寄花詩

省訪春叢豔最殊。寄來猶識錦霞舒。名園自寶仙葩種。可是全因勿剪餘。

謝答吳侍郎惠茶二絕句

貢焙僧巖各有名。手封奇品更丁寧。衰翁劇飲雖無分。且喜雲腴伴獨醒。

一匿眞茗慰鈴齋。更伴仙卿逸藻來。夜啜曉吟俱絕品。心源何處著塵埃。
次韻和運使王密學新葺西亭移花之作

高齋新境斷纖塵。曲圃芳畦豫記春。今日且資移樹法。明年應作看花人。
和中丞晏尚書木芙蓉金菊追憶譙郡舊花

絳豔由來拒早霜。金英自欲應重陽。主人昔意兼新意。併爲寒葩兩種香。
今日棊軒風爽天。休可紆步無以簿。領爲解兼戲成短章

不肯歸休木俗才。癡兒了事太悠哉。勸君抽取文符手。且就涼軒鬪茗來。

詠史

袁褚才名自古稀。可嗟高節晚相違。遲行便足爲丞相。枉受黃羅乳母衣。

道出襄城遇大風于野

此路前聞七聖迷。風霾終日暗天涯。心如搖旆頭如葆。卻羨枯桑了不知。

春晚殘花滿地

腕晚千花已自稀。狂風猶欲挫芳菲。王昌近在牆東住。可惜殘紅取次飛。

因覽子京西州詩藁感知音之難遇偶成短章

小集曾因善敘傳。子京出處小集甚爲元獻晏公所重敘以冠篇行于世西州餘藻復盈編。中郎久已成枯骨。爭奈柯亭十六椽。

天街馬上遇雪

章街十里瑞霏飛。有客蓬山寓直歸。雙履未穿乘款段。比量東郭是輕肥。

七夕三首

一夕歡娛鳳帳秋。曉天歸駕待瓊輈。銀潢便是東西水。不獨人間有御溝。
紫宙風輕斂夕霏。露華應濕六銖衣。鵲橋貪問經年恨。不覺蛛絲減舊機。
漢家猗殿敞雲屏。青雀西來底有情。席上殘桃猶可種。劉郎爭奈不長生。

夜聞牛歌

蕭蕭墟落暮雲寒。壞曲新歌浹野歡。何處飲牛歸路遠。一聲辛苦愬漫漫。

和梵才寄林逋處士

白首江湖傳散人。天驕解盡有天真。漢家不惜青蒲費。終爲枚生一裹輪。

龍興題額傳云唐明皇御書八分

八法神毫煥寶題。至今鸞鵲欲驚飛。臨空莫遣流塵晦。幸有仙人拂石衣。

聞子京拜掃後周視田廬因問有可爲歸計者二首

韓邑西南上故原。春林幾處駐行軒。何妨豫卜歸休地。從古三公亦灌園。
耕疇喬木許西偏。嵩穎相望似有緣。更問具茨南復北。那邊堪作種芝田。

西齋雜詠

粉蕚烟膏秀可餐。森森庭際鬪檀欒。誰教節目生皮外。卻解虛心保歲寒。

早謁

匹馬中衢類斷蓬。疎星殘月共寒空。漢家未給千門鑰。弛鐙牆陰避憲聰。

詠槐

萬物迎春兔目開。亭亭圖影覆莓苔。孤根信得全身地。可待山中養不材。

噪雀

楚雀乘春狹狹飛。蒜頭椒目稟生微。風前莫學驚鷗散。堂上人無海客機。

晚庭噪雀

空庭殘雨伴風休。芳樹陰陰晚雀留。無限好枝堪斂翼。不知何事更啁啾。

登汝州等慈閣二絕句

像閣岩嶠出翠陰。有人憑檻看嵩岑。方袍更語閩天舊。且取歸心付佛心。
檻外風烟洛汝通。寶簪禪纒此相從。主人解選登臨地。數片秋天六六峯。

泛舟新湖晚歸呈坐客

繚繞西隄接暮雲。半天殘日尙留賓。歸橈直渡無多怖。縱有風波不陷人。

受詔論次令文踰月網條未舉

漢家甲令議獨煩。曹札沈迷擁畫軒。城旦千條紛未舉。始知黃老得名言。

書樓

轍轡雕甍傍九衢。藻扃無復藁留書。徘徊尙有飛軒月。不把孤光照碧疏。

次韻和吳侍郎東城泛舟

放溜輕舸掠晚沙。時時波底碎秋霞。清陰十里堪乘興。疑到江東安道家。

新歲雪霽到西湖作三首

新年城曲坐溪臺。密霰初收晚凍開。無限禽聲兼柳意。欲催春色過湖來。
水華烟態壓回汀。客至無情亦有情。芳草不須緣短夢。一番新綠滿塘生。
閒拂苔磯弄釣輪。幽懷先賞渙灘春。沙鷗似未知余意。驚舞時時錯避人。

暮歸舟中

一水縈紆蕩夕霏。樵風上下燕參差。斜陽無限滄洲景。可惜山陰興盡歸。

早渡洛水見流澌盡解春意感人馬上偶成戲詠二首

春色東來不待招。烟光已過洛陽橋。如何解盡人間凍。鬢畔霜華轉不消。
洛浦冰消潤轂塵。野禽何處不呼春。柳梢弄色花條軟。已似遙嗤白首人。

次韻和張太傅寄集賢相公

一世夔龍集盛期。公槐邦棟聳喬枝。更將出處均天分。荀鳳莊鷗各有池。

立春

曾見青旂上苑回。瑞幡仙萼剪刀催。立春日朝簪皆賜幡勝于上闕朝來獨曝茅檐日。且暖蓬心一寸灰。

庭樹

巖曲孤根爲底來。婆婆生意畫雲開。霜繁露重膠枝落。借問于今材不材。

潛溪晚歸二首

詰曲山阿冒石梯。聽泉尋竹到招提。憑闌未徧催歸馭。可惜溪西更有溪。西溪廬溪二僧舍相去數里日晚遂不及往

剌剌尋僧駐蓋頻。已聞歸騎趣城闈。巖雲不散溪泉咽。野色幽聲共怨人。

和晏尙書宴歸馬上醉題

寶闕凌雲晏罷初。紛紛歸騎徧春衢。燈光月彩留清玩。不覺車前甚寵呼。

聞蛙有感

燕池昔有金丸戲。蠲氏今無牡菊烟。暗水羣鳴聊借問。爲官何似爲私年。

雨夜達旦爲蛙所聒

萬數鳴蛙暑雨天。此聲何必問憎憐。周公忍事腸三斗。寄怒猶燒牡菊烟。

傲廬僻遠因畜鳴雞爲入謁之候歲久馴狎其信如一因成短詠

唳鶴啼烏隔斗城。啾啾辛苦報朝纓。傲廬不識端門漏。長媿東牕第一聲。

小園四首

小園煙草接鄰家。桑柘陰陰一徑斜。臥讀陶詩未終卷。又乘微雨去鋤瓜。
歷盡危機歇盡狂。殘年惟有付耕桑。麥秋天氣朝朝變。蠶月人家處處忙。
村南村北鶉鳩聲。刺水新秧漫漫平。行徧天涯千萬里。卻從鄰父學春耕。
少年壯氣吞強敵。晚覺丘樊樂事多。駿馬寶刀俱一夢。夕陽閒和飯牛歌。

夙興

夢驚單枕拂霜毛。月影初低燭影高。枝上萬禽猶寂寂。寒雞何事獨三號。

和參政丁侍郎洛下新置小園寄留臺張郎中詩三首

勤勤高意念林丘。新買溪園洛水頭。千載聖賢方契會。恐君難作赤松游。
芝廡松塢富煙霞。更接西臺御史家。借問賢人何日聚。定知郎宿映台華。
十畝名園隔世塵。山嵇風義暗相親。只應歲晚凌霜操。併託松篁待主人。

睡足

河陽事簡。卯後方離枕。

府廡寥寥似野廬。晏眠猶厭關鈴呼。不知雲夢澤南日。杜牧爲黃州日有詩云。平生睡足處。雲夢澤南州。得似富平津北無。

晚登信美亭

磴道盤紆薄晚雲。天邊疑見斗方春。此亭正望京闕清風萬里知何意。吹盡華纓漠漠塵。

照虛亭

洛渠西北暮煙來。碧瓦朱軒壓水開。岸曲便容剡木艇。階層仍作釣魚臺。

廢園

金谷蒼茫舊里存。年年芳草怨王孫。游人慎莫尋荒徑。霜露霑衣似淚痕。

過紫嵩菴

新結禪菴當小齋。見山何必上高臺。嵩巖更似知真賞。雨罷先供翠色來。

和謝酒

曠脚春槽細溜香。一杯何幸得君嘗。十年離恨無銷處。且付山公酩酊鄉。

汴渠春望漕舟數十里

虎眼春波溢岩溝。萬艘銜尾餉中州。控淮引海無窮利。枉是滔滔本濁流。

屈原

蜜勺瓊漿薦羽卮。脩門工祝儼相依。蛾眉雜選無窮樂。澤上迷魂底不歸。司命湘君各有情。九歌愁苦薦新聲。如何不救沈江禍。枉解堂中許目成。

雜感

從古忠賢困佞邪。區區塵冊費長嗟。讒人肉味知何似。豺虎剛嫌汗齒牙。
枉尺由來賤直尋。巧機愁殺漢川陰。莫將三四爲朝暮。虛攪羣狙喜怒心。

詠竹

嵇阮生平憶共游。此君高節最凌秋。兒童少作并門騎。千畝留封渭水侯。

冒雨出省示同舍

簇雲絲雨共淒迷。紅日應銜苑樹西。陌上絳塗深幾許。羸驂無錦可障泥。

黃孝恭失官多作歌詩極于哀麗

禿翁無版出無軒。清藻千章翹舊冤。可惜騷人能設問。皇天終不答根源。

宿齋太一宮卽事五首

仙樓觚闕槩雲霓。弈弈威靈擁太禘。海內兵銷無伐國。牡荆閒偃漢宮旗。
蹇產通天百尺臺。歲祠三一羽旗開。臥聞野雉宮前雊。應有神光壇上來。
宮垣寶勢壓靈鼈。窳窳齋房宿幕高。倦枕不知秋已至。商音半夜入雲璈。
琅蔬瓊屑奉齋場。薛席時飄鵲炷香。永晝不聞賓榻語。併儲真氣助龜腸。
碧篠珍叢北戶陰。時時天籟著風琴。體中癡黠何須判。一夜甘爲洛客吟。

遇雨放朝余至掖門方審戲呈同舍

詔恩蠲謁靜朝扉。掀淖都街獨未知。同舍恣成莊蝶夢。可憐臣朔忍朝飢。

過都造朝入見之日蒙恩延登賜坐感天荷德退而成篇

出守西周又許田。白頭何幸再朝天。升階子細瞻堯日。不似侏儒夢竈年。

周道士本簪裳世家齠年便慕真教今為廬江黃冠與余有中表之好千里見訪惻其孤立因告別

也為小詩以勞其志

親見烏衣竹馬年。如何便學草樓仙。長安名利非真趣。好趁春膏種玉田。

小疾請告

晝枕高春體不勤。客來猶復著綸巾。冒榮初牒無三最。寧是朝家予告人。

祭春偶作呈通判職方

關外春來亦可憐。平明簫鼓濁河邊。殿門恩澤催幡勝。朝廷故事。立春日。賜近臣銀錢塗幡。勝于上閣。各有差珥冠謝恩。上殿奏事。不預朝簪。不預朝簪

整八年。

晏公喪過州北哭罷成篇二首

昔迎留守蕭丞相。癸巳秋。公自長安。成余守洛。今哭談經戴侍中。公久留經筵。以備顧問。一代高情無覓處。落花殘日九原風。

故郡迎喪匝野悲。許昌。公嘗鎮柳車丹旆共透迤。泉塗自古無春色。可惜森森瓊樹枝。

帖子詞附

皇帝閣端午帖子詞

吹律蕤賓動。乘離玉燭明。薦盤荆俗黍。頒餌漢祠羹。
寶軫流薰唱。仙壺永瑞曦。欲知人厲息。天報艾生遲。
寶典靈辰舊。皇居瑞應偏。冰紈能辟暑。絲縷解延年。
宮中命縷千絲合。階下祥蓂五莢芳。漢殿桃枝先作印。楚人蘭葉續爲湯。
天關卻暑金爲狄。帝坐禳氛斗轉樞。不似人間傳節物。歲時長作辟兵符。
藥宮瓊構切昭回。五月嘉辰萬壽杯。舜殿薰風琴裏散。漢閨明月扇中來。

皇后閣端午帖子詞

魏井開冰潔。齊宮獻服新。宮門無暑氣。猶許艾爲人。
朱索連葦種。仙繒篆祕符。誰知萬靈祝。先日擁椒塗。
鮮雲瑞旭樓前曉。寶艾芳椒殿裏香。五數已知隨地永。九重更自配天長。
楚筒結糗金盤麗。班箠裁紈玉字輕。琥枕透蚊光不滅。瑤箱乳燕羽初成。
篆桃刻印神圖術。采藥和丹寶笈功。欲驗嘉辰蠲毒處。輕炎不入廣寒宮。

天人閣端午帖子詞

令月辰標午。皇居物效祥。仙蒲九節長。宮樹萬年芳。
越箬輕裁玉。齊紈巧縷冰。宮中雖命節。何處有炎蒸。
漢家宮掖與天連。桃印金刀瑞氣鮮。朱夏雖稱五之日。皇圖自樂萬斯年。
金徒滯永烏猶渴。寶扇風徐雉欲飛。借問人間傳綵縷。何如石上拂仙衣。

元憲集卷十六

頌

乾元節祝聖壽頌

臣聞元聖誕生。萬代猶乎旦暮。大年垂祉。千齡永乎春秋。故滎河一清。而躋此盛期。樞電四照。而肇此靈契。必淑若而能濟。疇虔鞏而不興。惟皇上帝。監觀于下土。鋪昭乎俶譎之祥。以佑民而樹后。於鑠令王。願誕于葆命。翕受乎龐鴻之祐。以承旅而制世。覆眡典式。湊聽風聲。自青素更期。質文參變。帝皇之符。紛綸而膺。期紹至天人之際。精禋而屬象。相因莫不肇之以積累之源。濟之以丕嘉之績。用能統一期運。保乂函夏。福浸羣元者。其邦昌。德羨列辟者。其齡永。岐周之隆也。肇后稷而創業。迄武王而革命。然而典刑丕式。十八王而崇冠。至治者。成康之功也。炎漢之興也。自唐堯之垂裔。及高皇而啓圖。然而文教寢盛。四百祀之保寧丕業者。文景之化也。惟積基之憑厚。能垂統而緜盛。故累德逾遠。而致治逾逸。受命甚易。而格來甚勤。洪惟本朝。遠誕于真系。皇矣藝祖。出應于嘉運。一戎而基業大定。再造而寰瀛底寧。憲度著明。規模洪遠。太宗秉籙承樞。拓迹開統。撫乾維而張化。肇天歷以在躬。東南一乎尉候。小大懷其威德。真宗紹庭闈。握河紀瑞。重規沓矩。鼓熙寧之風。勤崇垂鴻。講曠絕之禮。一德胥暨。羣方率同。緝王綱而載張。垂帝典而明備。精兆畢應。遐源益昌。誕毓英主。嗣有令緒。恭惟皇帝陛下。躬天挺之姿。盛燧涌之德。重華叶

于帝則下武配乎王京。據五精之題。開階有立。御二氣之辨。乘策無繁。高拱而視乎治平。垂精而宅乎丕顯。豐矩彌茂。庶績越熙。若夫沕瀦流祉。神靈告期。里社載鳴。渚虹有煥。鍾堯門之異稟。軼稷巷之前徽。岐嶷而德受于天。覃訏而聲載于路。銅律御戶。導揚于叶氣。銀題署宮。付畀于景數。降育之祥也。生而靖淵。長而敦敏。舜瞳鑒物。是謂文明。漢準膺符。多乎奇異。儼珠庭而凝粹。懷玉斗以效靈。足履己而手握。聲爲律而身爲度。體貌之殊也。茅社始建。雍睦必聞。桂坊亟升。溫文允著。俎絕登飽。肆開滂雷。一有元良。正邦之望洽。能鎮大事。形國之功著。納麓歸運。承宗主鬯。繼聖之業也。虔顧天歷。入登帝宸。間往長信之朝。思齋太任之德。尊爲天子。有懷于孝恭。禮同家人。無懈于省視。瞻三后之暉烈。懷四時之永思。凱風寒泉。增孺慕之延感。履霜濡露。念先靈而載惕。至德有立。羣倫斯厚。高世之行也。淵默臨朝。靖恭守位。旣疏明而暨遠。靡矜奮以自賢。豁然度量。而除其侮慢。慎乃號令。而盡乎溫雅。忠潔咸懷。豪英畢力。絕去小察。時罕書馬之憂。容受直辭。人無批鱗之懼。君人之量也。寵接師傅。講求盛典。申命儒臣。遞侍清燕。以天縱聖能之識。勵日就緝熙之學。古今之才。一石總製。清衷衡石之書。百斤率歸。宏覽粉澤。六藝鼓吹。羣經若稽。古以聰明。茂對時而化育。柏梁之遊。間流藻詠。太液之唱。庸作永歌。雲漢之章。昭回河洛。之書。開奧至若。取傲奎之像。連錯寶之跗。鎴烟裊清。商滴貯潔。默運宸思。喬爲奇蹤。金錯煥成于秀範。珪稜曲盡于寶勢。極盛王之能事。示黎獻之茂矩。睿哲之才也。緝布朝經。敷求民隱。具明徹寢。晨晷忘膳。敦遣八使。廉察謠俗之弊。申敕列牧。沛發劭農之詔。核名實以無濫。擘權綱而盡在。懋建中和。旣陶甄而獨化。兼總條貫。若

金玉之相振。國容眈令而動。朝章設象而備。政理之舉也。小愆兢懷。慮乎辛螫。無逸存誠。執爲元龜。居循與几之銘。動亡弋獵之喜。六飛奉駕。靡數蹕以煩民。十產罷臺。惜暫勞而役物。躬行素尚。循致太寧。卻纂組之害工。破雕觚之返朴。頭會之賦無斂。根著之萌悉裁。訓雅俗以歸厚。扇廉風而激薄。黎蒸罕乎淫泆。飛潛遂其翔泳。風化之洽也。慎執邦憲。昭示明黷。理或註誤。雖重必貸。情或千犯。雖細不宥。防吏議之寢蔽。設使匭以延納。左嘉之枉必達。北軍之章靡亂。酌呂侯之制。審簡孚于三千條。用漢皇之心。除慘酷之五十事。刑典之平也。諦酌三策。輯修善經。武節鷗逝。威聲霆振。執柔轡以善御。驅戎駕以遠撫。旌旗千里。弭朔塞之遄征。干羽兩階。服苗民而狎至。燕弧委勁而不用。敵火投烽而徹警。總萬域以連帶。納羣戎之削衽。治軍保大。示天子之守在四夷。侯海來臣。知聖人之生于中國。武功之戢也。崇尚儒術。宣臻國猷。登闕三代之英。罷黜百家之學。揭仁誼以浸太和之俗。縟文物以暢無垠之聲。紀律煥巍。容典緝備。學庠講道而申悌。樂府登歌而協律。乃復張英殼而在御。掩俊藪而擢茂。設旌賁以來巖穴之士。物色相望。復制策以登褒博之流。方聞並進。文教之盛也。若乃基緒會昌。民俗寶富。必有精稜威容之典。以奉先報本。故修祠吉土。比歲登平。緝儀昭孝。闔宮以時修乎潔祀。肆類禋宗之禮著。思文陟配之詩作。誠動穹壤。義孚人祇。德澤隆洽。功業震耀。必有衆變諸福之物。以儲祥而傲祉。故瑞日流景。喬雲駐靄。星暉露潤。乾之符浸潭而享其應。嘉生挺姿。珍羣育質。月至日集。坤之珍絡繹以效其報。丕律旣顯。蕃休滋至。方將巡岱嶽而展采。陟仙閭而封檢。嗣烈考之茂實。昭聖帝之盛節。粵若歲在作噩。月維仲呂。紹隆綿瓞之緒。誕育猗

蘭之所。若夫乘離正位。所以肇繼明之業也。執衡在序。所以示丕平之運也。德盛于火。所以隆炎赫之期也。性屬于禮。所以昭揖讓之治也。惟聖間出。與時相符。于是七相五公。鼎席之輔。羣司百執。朝紳之伴。相與仰逢吉之辰。贊重雍之旦。酌鴻典而具舉。罄亮誠而善頌。以謂行健不息。美利天下。乾之道也。于以叶宸算之常久。體仁以長。資生萬物。元之義也。于以配鴻名之首出。參考馨烈。稽合棊（案）原本作棊頭。今字。願以徽稱。紀于嘉節。臣志虔達。帝俞俯遂。若乃緹帷宿設。藻衛環列。銅鳥遞風而細轉。玉虬注漏以遲度。銀題朱網。斂夕靄以蕭寥。采旄英矛。晃晨暉而容與。金璆在肆。應節而徐。韻伊銜組。樹羽之器。率陳于陞次。珪帛充庭。移珍而來享。雖異域殊方之費。亦備于壤奠。奉常整儀而辨等。臚句唱警而傳導。朝弁就陳。陸戟嚴列。皇帝鳴采茨以榮步。凝邃藻以臨幄。張麟文之席。搖雉翟之扇。帝暉煌煌。燭于周行。若北辰拱衆星于中央。朝容祇祇。伏于宸威。若湛露匪太陽而不晞。森然拱著之位。穆若陟降之度。傾心胥向。動色相趨。于是上公進而言曰。陛下席曼衍之圖。隆駿適之德。道參侔于往初。澤羨溢于潛邸。宰臨方夏。兼並神明。勤于邦而勿休。介爾壽而彌億。臣等樂景化之寢被。省親逢之重幸。惟門弧之在旦。罄野芹而申祝。謹奉觴而載拜。上千萬壽。制曰。俞。舉公之觴。風行之令一降。嵩呼之聲四達。下陳齊肅之志。上諧純嘏之祐。緝憲交舉。華紳夙退。穆若歡頌。由神臯而及四方。薰然太和。自編氓而及羣類。宜乎後天難老。與日並明。撫五辰而凝績。迄至登平。據三靈而獵福。保隆久視。夫祝堯爲願。著厥華封之言。誕聖流歌。載乎唐室之典。盡善之美乎虞帝。長發之頌乎商王。矩矱具存。魑流不泯。下臣寢陶醲化。被服素芬。輒陳擊壤。

之歌。仰祝如山之算。稽首濡翰。謹獻頌云。天有成命。基宋之盛。德垂後兮。於穆聖皇。臨朝有光。道冠初兮。里社之鳴。喧然有聲。顯受命兮。帝生于室。神光四溢。觀者悸兮。帝御于宇。懿和宣布。蕩難名兮。執衡在序。達樞流祏。昭有異兮。北斗迴杓。舉觴于朝。達臣誠兮。南山之壽。極天且久。垂無窮兮。

國陽大報頌

臣聞職乎覆載。天地之化均。推乎功德。祖宗之誼一。化之均者。其報等。故明察之祀。曾是而並升。誼之一者。其孝同。故妥侑之主。無嫌于交饗。此設教所以本神道。議禮所以沿人情者矣。矧夫兆福時于陽位。差穀旦于天正。陟降惟寅。采物具舉。三靈逆釐。四海來助。對緝禮于盛際。進明德于升聞。遙駿有聲。上帝穆其臨汝。敷聞于下。三后赫其在天。巍巍煌煌。禮之大者。是則耿命之所集。至聖乃興。精意之所禋。嘉生攸降。著在耳目。合若符節。天人之際。不其顯哉。國家蓄五勝炎靈之精。聖上席四葉重雍之烈。丕冒綿寓。休有神器。若其沖用居質。淵泉而博厚。妙年纂服。神靈而敦敏。天光內發。乾亨首出。金玉其度。神明其位。三年之諒闇。旣言乃驢。復旦之光華。重合于帝。建號之始。聖乎殄行。而朕師不震。有洸洸之武。持盈之際。秉其文德。而多士對越。有安安之思。奉養長樂。躬高世之三行。有匹夫之孝。內睦公姓。親在庭之五大。有家人之禮。一夫未獲。則矜而弗喜。一政未乂。必退而更化。和氣溢于萬物。厚福浸于羣氓。羣焉若泰山之加四維。昶焉如宏綱之經萬目。天下之大本舉矣。帝者之不功集矣。方且軫無災之懼。愀若以薦辭。歌小惑之篇。周爰而求助。武銘徧于戶席。漢諫緝乎帷囊。謙尊而光。業久而大。天啓淵慮。魄兆嘉貺。若曰三服容

于自損而玉帛得以加。六膳可以自嗇而牲怪不敢愛。況三年之祀。疎則怠焉。七里之兆。往不勞止。幸天之相而歲之易也。朕將再執籩豆。以郊見于神祇。令下于源。絲出而紵。于是當國之輔。刺經之倫。我我以相趨。翼翼而旅議。莫不稽仙源之自酌。聖考之規。謂夫皇基所開。系自真祖。故先祠有景靈之謁。元命申錫。主乎魄寶。故已事有玉清之拜。尊親兼極。變于禮而得宜。先後不違。過乎恭而何害。定命茲允。前聞負絕。既而寶穀登實。良農告休。日舍于箕。卦御乎坎。懈竅律裁。同一氣而未融。〔案〕漢書叔孫通傳與原本作漢第無攷今據改棲野繕多儀而豫定。于時百工庀具。千官聯職。上公端委。誓于文昌之坐。天子淳濯齋于端闈之寢。屏舜羶而易饋。掩漢筥而停讞。澡雪天慮。秋游氣辯。俄而紛藻仗出。皇居頽真場。躋太室。祝嘏並詔。臣工胥集。貴聲之樂。登歌于堂上。合食之主。流出于戶外。俯伏奠獻。悽愴齋明。迪神貺而溥將。勵孝思而極摯。始復御威輅。翳華芝。織阿扶輪。大丙前馬。抑繁吹而不作。遡陽郊而徐鶩。軍輜雷動。神旂電舒。八鑾異響而均和。六龍駢首而如舞。豪英之士。玉色而同輿。葩華之雲。金柯而擁蓋。豹尾樹後。皆爲省中鈞陳。旁翊是嚴帝座。背天闕。轅都門。三條荷衢而平趨。帷宮百靈護野而遂至。祠所皇羽設邸。煥幄綴珠。門竚窳而表旌。天穹崇而垂幕。若夫圓壇中立。神垓遞降。綴食惟旅。陪祀相望。夷會司燎。田首施燭。且其鞞雲房俎。羽林秀華之品。宿設而芬樹。鳧鍾鳳箭。琴絙瑟越之器。凝鏘而聲展。龍常瓊鋸。飛輪疏穀之乘。夾右乎道周。星槍蠲弩。戴鷓被繡之師。髮鬢于壇次。日在癸丑。夜半冬至。百執就列。九賓相儀。不敖不吳。有殿有翼。皇帝被天袞。執鎮圭。儼邃旒。卻黃屋。槃匱奉濯。親就于東壘。茨夏撻音。徐陞于午陛。上帝富媪。南

嚮異席尊之至也。烈祖神宗左方並侑情之盡也。天子一獻以致虔。藩戚參奠而成禮。紛庶豆以孔碩。揚信辭而無媿。歌鍾詠德。藹坑谷而皆盈。羽籥振容。率鳥獸而咸舞。連珠合璧。屬于象者無不歆。喬岳翁河。統乎神者無不秩。羣官分命以惟恪。衆神受職而交驩。酌福飲以浮椒。峙榘薪而熾燎。皇猷允塞。熙事備成。回瑀與御帳殿。冠劍旅賀。兵師齊躍。逮長日之升晷。麾洪頤而復路。峇嶠南闕。國貯天臨之儀。膚寸東雲。民希雨施之澤。旣而端鳳屐。揭雞竿。大令辰告。而在邦必聞。衆眚並肆。而與民更始。是日也。塗歌邑頌。仁翔德洽。逮繇已責。優絲緩調。在疵者濯。居幽者炤。盡解犯命之網。措刑于三千。無出今年之租。興頌于什一。亦旣讓德不處。歸勳有恪。練吉日。朝密都。敍拜祝之儀。罄謝成之悃。再荷百祿。以綏兆人。盛節能事。斯爲至矣。臣嘗學舊史。竊訂大猷。以爲宋雖舊邦。而其德維新。郊雖典祀。而厥應尤顯。當盛禮之草具也。兩宮叶議。周旋抑畏。固避號榮之舉。上儀之將展也。九河順道。切和疏寫。亟紓昏割之患。吉土之親饗也。隆冬變候。密清和照。訖無陰霾之祲。是三烈者。不待瞽史而識天意之悅。無煩巧歷而知帝運之隆。碎隱乎殊休。覺悟乎黎獻。跨風邃古。垂照來今。將使允燦者咀其餘甘。猗那者照其絕焰。斟酌飽滿。飭厥性而用和。滋液滲漉。冰滋恩而無際。非我休運。其疇宜之。而臣汗執朝倫。濫巾冊府。陪委粟之愆祀。叨甘泉之牽引。目飽懿鑠。心萌詠歌。罷黼黻之張。獲聞于夜誦。均蟋蟀之候。難默于秋唵。願紓感發之誠。少抃鴻鈞之世。拜手流汗。謹次頌云。上帝屹壇兮崇造天。二聖侑享兮嚴吉蠲。神光焜上兮風肅然。欽柴皇燎兮升高煙。蕭斯露澤兮浸羣元。叶風順氣兮翺天淵。垠開闔決兮曼壽延。表世題期兮彌億年。

孝治頌

臣聞人肖天地。故聰明之性以發。君爲元首。故教化之端是屬。因性以飭順。則貫三才而靈萬物所由貴也。因端以闡序。則加百姓而刑四海所由廣也。聖人尊其祖。然後嚴其配。故曰能享帝于郊。王者奉其先。然後思其孝。故曰善述人之事。若乃挺至聖以獨運。警含生而知勸。纂戎紹服。兢業一二日而惟幾。推誠顯。猷尊親。千萬人之所悅。不家至而日見。大訓以成。因天明而地察。至誠交感。禮樂不變而盛。夷夏不威而服。嘉生紹瑞。非號召而自至。烈風迷雨。不禳禱而時若。輝光篤實以臨下。滋液滲漉而懷柔。綏之斯和。變至于道。畢天下之能事者。其惟大孝矣乎。我國家基命太初。凝圖無外。紹五精之正統。而炎靈獨舊。陟百王之叔世。而敦風載始。寶胄系于霄極。至德結乎人心。巍巍兮皇階。灑灑乎帝錄。太祖包戡武之度。盡牡荆以麾天下。則僭僞之風革。太宗隆右文之治。擁蘿圖而稽古道。則聲明之禮輯。真宗席御辨之正。刻喬峯而施顯號。則天人之際交。三聖蔚其嗣興。萬物以之衆服。宜乎流錫羨之慶。暢猗那之業。皇乾開與子之命。清廟歌承祧之制。重熙累洽。寢講乎大猷。開物成務。允鍾于亨會。故聖上之統嗣也。龍見淵默。星輝海潤。操斗極以布席。協帝華而居質。壘壘穆穆。神禹之紀綱。夔夔蒸蒸。帝虞之齋慄。以謂可久可大。聖業也。故明德而日躋。不愆不忘。舊章也。故先謨而時憲。若夫守文繼體之盛準。自家型國之徵烈。后辟行而未盡。典禮放而難循。以萬乘之尊。躬匹夫之操。由不匱之志。奮無窮之烈者。又可得而言矣。當其正位。朱邸飛名蒼震。主宗器以受純嘏。宅前星而摘景鐸。父子之篤天性也。故日造于寢門。君臣之義至公也。

故不絕于馳道。奉承大統。協田龍之占。務近正人。無鮑魚之嗜。不因乎喬梓之戒。而至性內融。不因乎羽翼之成。而羣心自定。先帝功極道備。深居高拱。方將玩赤水之祕寶。蹈汾陽之清塵。爲于無爲。事于無事。乃咨一二之元老。左右之皇僚。率籲同心。陪輔儲幄。委庶政以裁決。付大命而緝熙。陛下式在妙年。弗獲牢讓。博覽兼聽。迂身抗設。法司過之史。以輔乎闕遺。操監國之勢。以光乎威命。聖人作而萬物覩。大明繼而四方照。此世子之孝。所以教天下之事其親也。迨夫文考馮玉。羣后在庭。設綴衣。洮頰水。舒德音。揚末命。陛下嗚噎流涕。永悼于厥心。尊嚴若神。嗣躋于大寶。居廬啜粥。蹈布衣之難。攀髯號弓。極人子之慕。百官咸聽于冢宰。七月遂至乎同軌。春秋大乎居正。而卽位之後。踰年而改元。昭穆本乎顯親。而因山以還。耕廟而作主。絲綈穀以凝感。過伶簫而銜卹。二年之制。無改于故常。一惠之名。首尊于洪顯。矧以漢家廣祀。作原廟而游衣冠。故我敞景靈之庭。奉安乎法座。皇世訓道。著大墳而冠丘索。故我寶天章之錄。渙揚乎遺懿。奉先之文備矣。追遠之誠至矣。而猶恭默思道。效商宗之不言。敦朴爲先。法孝文之高世。此諒闇之孝。所以訓天下之全其禮也。先是願命之詔。受遺有屬。升文母之丕號。克舉懿綱。開長樂之東朝。共熙大事。陛下祗遙寶訓。欽奉慈顏。調法膳則躬謁乎璇闈。量衡書則先上乎椒極。威顏咫尺。周旋咨度。內法純儉。從大練之風。參講臣鄰。無冒絮之責。固以道高于興夏。功茂乎翊周。均載物之至德。凝倪天之奇表。柔風扇于頽豔。碩惠淪乎骨髓。善教興乎闈闈。至化衍乎垠堦。豈徒罷畫工者三十九鍾。政是用請散脂田者四十餘頃。利均乎下。書曰。惇敘九族。易曰。保合太和。緬遺訓而有屬。此奉養之孝。所以率天下之廣

其愛也。古之哲士，僅行一節，猶或載緹細而騰茂實。今茲陛下克舉三善，固足蔽穹壤而流淑聲。矧復秋駕載懷，明緝慎出，仆威械以除亂本，薦馨德而培福基。時禁備修，山澤免夫童竭，嘉生報降，菽粟均于水火。祥琴式御，而深詔郡國，興廉舉孝。新宮既享，而親執豆籩，類帝禋宗，澤周乎跂喙之微，信及乎豚魚之隱。咨俞故老，日臨軒陛，未嘗忘乎獲友，欽恤明刑，齊居媿獲，念惟輕于疑罪，寶行乎曰慈曰儉，而媮俗以敦。退託于不敏，不明而下情畢達，是故先帝棄羣臣，而海內如一，太后輔丕業，而神功莫儼。陛下當耿命而天心昭合，三辰安于次舍，五氏銷乎祥眚，癘疫不作，人神靡雜，非夫動按成法，見堯德于羹牆，居念遠圖，編武銘于觴几，盛百年之化，善人之殘殺可勝，御七月之篇，王業之艱難，斯在日慎一日，新之又新冠，百行而爲宗，放四海而皆準。經曰：明王以孝治天下，此非其效歟。由斯而談，則泰山四維，不足爲其安也。蕭韶九成，不足爲其和也。如日之升，如月之恒，不足爲其熾而壽也。與天比崇，與地侔資，不足爲其貴而富也。所宜緘鏐檢鏤，玉牒以誌其髣髴，操牛尾，舞鳳箭，以歌其緒餘。下臣資性素冥，才業無狀，陶被至化，鼓舞下風，情發于中，竊擬游童之詠，善無求備，或箴稗官之說，生不敏，敢獻頌云：皇穹佑民，聖心闡序，世詠在三，天常惟五，大孝稱首，爰倫式敘，至德要道，人存政舉，赫赫炎宋，專以孝治，身正家齊，天經地義，四聖迭授，羣元大庇，我后篤行，亶無遺懿，昔在初潛，溫恭白天，寢闈問豎，學肆鳴絃，陪樞輔極，納麓承乾，茲日子道，爲天下先，文考大聖，道揚末命，終陟垂謨，傳歸有慶，創鉅纏痛，諒陰積行，茲曰善繼，爲天下正，洪惟聖后，儀于坤德，參決萬機，寵綏四極，理內正外，和聲怡色，茲曰廣慶，爲天下式，蚩蚩之氓，含滋襲馨，如

網舉目。若景隨形。翔仁率土。浸福重溟。一人有作。萬世攸寧。

天罰有罪頌

或稱皇初之世。不賞而勸。不罰而懼。豈曩策之彌文哉。讓者云否。彼固未識夫震耀之飾天威。剛健之奮乾體也。粵若聖人。制海內之命。據天元之尊。總秉權綱。參敍典憲。不有威辟。不足以震元愆。不有愆咎。不足以章顯戮。用能燁皇聖。憲宗軌。丕天之定律。一民之至權者已。臣人在宥。列聖繼統。際天丕冒。亘地砥屬。仆威械以去殺。襲道樞以訓儉。恩裕洪暢。容典賴盡。萬物取足。合祛于皇極。百靈隕祉。動震于珍物。然猶左賢右戚。均權布寵。百辟箴官。內平而外成。五大在邊。番述而遞上。紬繹羣慮。防檢來患。恭迓永命。觸滌多辟。勤勤懇懇。非消亂之謂歟。然而善制未能無敝。殷憂所以啓聖。迺者巨猾乘間。朋邪締謀。嘯譏祥之妖。席鈞宰之貴。弗戾蜚語。怙有姦計。爲國取怨。在內爲宄。遂欲包禍心以竊發。執左道而干紀。城社無薰燒之畏。宗社有阽危之忌。天命不滔。姦惡具露。輔臣建白。醜黨震壤。赤車具獄而來上。兇豎伏質而前死。皇帝陛下。深拱諒闇。覽照前典。重當國之職。慎退人之禮。詔曰。冢宰之任。天下所繫。今丞相謂自底不令其上。大司徒印綬。而攸司程奏。百執抗言。無將不誅。與衆共棄。願伸大戮。以懲元惡。帝曰。朕不忍致于理。其謫于朱崖。然後起圻弛之臣。明枉結之獄。掎克之貨。簿上于官。附麗之黨。肆赦一解。漏鯨喙于網目。催虎吻于市道。篋有辯論。盆無漏暉。方內謚清。天上澄煥。攘去蒙氣。質延大和。惡草絕而善苗興。清風翔而羣陰伏。人靈紓憤。道路相趨。于是搢紳之徒。喟然稱曰。先帝違豫。柄臣間毀。陰嚙不逞。規投天隙。食椹

弗變指莠待滅。陛下先斷宸慮。探觀時變。仗文母之援。攬列辟之議。殄介不靖。終日未滅。宇內澄洗。蕩無餘災。定茲寶業。極高山之安。殲厥渠魁。易家人之名。智不回慮。惡未旋踵。事已決矣。昔滔天殛而虞功著。流言放而周德奮。觀闕誅而孔制烈。寶瑟僵〔案〕寶瑟漢莽何羅事原本作寶琴今據改而漢基永。皆有常之盛準。撥亂之通術。所由來舊矣。烈祖二宗。墾災除害。肅清衆慝。若彼之深也。太后聖上。建威聿萌。祇遙先訓。如此之至也。宜乎奮景炎。燦淳烈。春秋謹始之制。釋洪範作威之害。聞賜無疆之眉壽。摛不朽之尊名。此其時矣。蓋天子焚焉在疚。貶成抑定。未遑制作事也。下臣鎡跡遐外。遘辰熙盛。吮甘寶酌。徽波者有日矣。以爲罰不失罪者。賊于懼。賞當其功者。勞臣勸。今陛下去一不仁。辨百無罪。而兆民賴萬祥集。非天下之至感。孰能預乎。臣擬下品不足紀。次新頌。輒敢述與人之詠。簡康衢之詩。亦擊轅折楊之比爾。其詞曰。於鑠炎宋。奄受方國。監觀上帝。底止明德。越在四世。惟新百度。往聖上仙。大明績務。蕞爾孽豎。乘間偷權。於命于國。興辭託天。罪惡腥聞。建白攷治。醜黨銜刃。元兇投裔。乃下明詔。誕告多方。橫貸枝附。昭雪忠良。三靈不怒。百寮動色。絕其本根。勿使能植。去危卽安。萬務有益。聖皇敷之。不息暇逸。慶無疆兮惟休。慎無疆兮惟恤。

元憲集卷十七

頌

維摩經諸品頌并序

如來之教。有真語。有實相。語之真者。不以辯妨道。相之實者。不以物障空。何則。道本無言。而應有言。故言之者。非我。法本無相。而資有相。故相之者。自彼。是以聖人鼓羣動。雕萬物。終身搖喙。而默理常存。狀六塵形四大。彌劫利見。而虛宗愈寂。此權實所以共貫。空有所以兼融。破物我之長圍。航死生之巨浸。假道于彼岸。托宿于泥洹。倡狂妄行。而蹈乎大方。茲解脫。所以不思議也。維摩詰者。可謂體其真實矣。若夫毗邪示疾。身同凡品。香積致問。化超神表。歷詰衆聖。則辨均有情。深入法門。則默過無響。精而諸佛不得異。物而他見不得逃。可以名而名。無所得而得。其真大乘之高巒。聖域之幽關者焉。而昧者方競競然。疑淨穢之一區。同異之一轍。且欲遣凡以取聖。封大而擠小。責真空之所在。求希夷之所到。火馳波蕩。若畏岑而就攻。可不哀哉。故斯經之作。所以救斯患也。議者又謂無緣則無法。有教必有心。淨名現方便。以拯羣迷。文殊因酬對而破諸蘊。夫至人者。亦有爲而然耶。余曰。不也。夫震雷出地。昆蛟奮蟄。長飈薄野。山林效響。彼寧繫懷于震發。而措意于怒號哉。物自爾爾。是則慈心所演。大音所唱。羣生鼓舞。三界歸往。不知所以然而然者。亦猶是焉。余稚齒多艱。中歲銜卹。熒熒殘喘。廬于郤外。每閉戶焚香。呻吟梵帙。升濟先福。是焉。

攸託而心之所嗜。復在此書。爰因成誦之隙。竊效重宣之義。且經之所統。品凡十四。始于佛國。終于囑累。其因緣之本行。證詰之細條。秦園大士。注之詳矣。雖欲黽勉。強加論辨。是徒飾筌蹄之具。何益魚兔之實哉。然大悲普熏。軟語傍浹。時有悟者。燿然如高燈之破闇。灑然如仙丸之愈疾。視昭毒已。不能無喟然之歎。故略因諸品。各爲短頌。每緣短頌。先標總意。嗟夫。法藏淵曠。聖心超邈。欲以幻相之文字。強標大道之崖略。知我罪我。將焉避之。含毫洗心。辭不逮意云爾。

佛國品第一

夫大空無倪。而穹隆摩訶之形。生乎障空者也。大塊無眵。而封埒遠近之界。生乎有地者也。然空塊之狀。詎有識其全耶。是以佛國無方。隨感輒報。土之淨穢。由心之迷悟。境之廣狹。視機之大小。萬法取足于我。無爲。故舍利佛。以土石致疑。梵王以天宮自況。或囂或潔。皆出彼心。妙域湛然。未嘗有異。如來之旨。其在是乎。頌曰。大明經天。容光必照。隙取圓輝。戶分方皎。方圓雖殊。照乃一區。佛土之應。其由是乎。噫。嗟羣生。出沒三界。觸妄成迷。逢塵作閔。行業分鑿。報緣異槩。我國無方。隨機小大。心淨則土嚴。智昏則境穢。穢本嚴體。嚴非穢外。譬彼衆生。是卽法城。此如可捨。彼亦可營。故曰。深心直心。隨意隨行。無入非門。何馳失境。法則萬差。此惟同應。應之者誰。初無有定。稽首能仁。超名離真。在天而天。在人而人。梵螺依慧。鷲子求因。復攝神足。方如法輪。

方便品第二

天道非言不曉。非道不遣。聖人必立言以示教。故利能及他。及他則方便之術也。終忘言以除累。故法無所執。無執則真實之體也。今維摩因身以現疾。因疾而談苦痛。自詬病而使求法身。法身本空。吾復何患。非遠覽之士。詎能因末而達本哉。頌曰。非有非無。是惟法妙。不因不緣。法亦無詔。因緣伊何。標宗示兆。標示伊何。方便爲要。皇哉淨名。妙喜之英。來游忍土。將開化城。示身有疾。以質無生。身本無狀。如炎如響。聚沫虛恨。春蕉妄想。電影天外。泡影水上。一念不停。四大誰掌。嗟此妄塵。當求法身。滓窮得淨。幻滅逢真。希微其象。眇莽其神。故吾自故。新吾已新。迎之不見。其首隨之。不見其後。暫住非天。長存非壽。稱謂皆泯。虛空等久。方便之言。當如是受。

弟子品第三

夫萬法以至虛爲宗。至變非一途可應。操此者失彼。專內者忘外。此自然之勢矣。若全人者。烏可以彼此內外而名哉。故聲聞之流。各保偏見。欲無被詰。其可得乎。本經自舍利佛之宴坐。至阿難之總持。凡十弟子。雖所執不同。而受呵一也。今不復徧舉。但會其趣云。頌曰。大道不器。大方無隅。至人乘化。何德之拘。譬夫百體兼愛。冥符既非。獨毀亦莫。偏譽萬法。萬善于何。作見道不可取。塵胡足遣。有合皆如。無行不踐。孰爲晏坐。孰爲總持。我將得是。誰復留非。是非一對。物我交疲。故爲者敗之。執者失之。無爲無執。敗失疇依。嗟嗟衆賢。聲聞第一。或欲實于諸空。或欲空于一實。觸憶成呵。臨緣會詰。自疾未除。安能問疾。

菩薩品第四

夫殆庶之士。去道猶一間耳。而羅縠終隔。不亦病哉。故金粟縱忘言之言。辨無得之得。盡破諸相。直造大方。菩薩所以見善必遷。而聞義彌服矣。然彌勒光嚴持世善德四聖人者。皆親炙妙訓。超證上乘。今乃自詘于一時。迭和于幽唱。亦以同獎大教。非優劣之言也。故歷敍本行。而疑其分身云。頌曰。過去已滅。當來未至。交臂不停。誰爲正位。敢問彌勒。將焉受記。至人投足。莫匪大方。還形法侶。卽物真揚。敢問光嚴。淨上何鄉。至真無真。諸有非有。帝釋施女。天魔稽首。敢問持世。胡爲弗受。有施必盡。有報必疲。一法都泯。羣生自熙。敢問善德。何財施爲。聲須叩鳴。道以人博。不有風斤。奚彰鼻壘。超迹示化。分身解縛。大士相資。孰究孰度。

文殊問疾品第五

夫淨名之談。本託于病。其要以謂菩薩與衆生一體。安穩與病惱同源。悟則疾愈而無衆生。迷則病興而累慈父。累本無物。故聖人受大患而弗辭。慈亦無緣。故悲心貫億劫而彌厲。復尋斯要。其權智而已乎。是則一室之談。乃十方之拯溺。四體之苦。誠萬物之良醫。濟度之功。于此爲大。頌曰。示疾之端。請研妙意。菩薩無疾。衆生有累。累則病始。悲心作矣。譬夫拯溺。先濡厥趾。將度生死。理無獨異。嗟爾有情。相靡相傾。貪愚齊汨。煩惱根莖。虺蛇伏篋。怨賊持兵。毒中慘外。何苦能名。至慈匪緣。至真不有。我病無形。我形非受。卽幻爲藥。因生亦醜。彼如有痊。此亦何咎。一牀之臥。一室之空。衆魔作侍。諸見來同。彷彿象外。溟滓環中。善哉此會。澤浸無窮。

不思議品第六

夫心而思口而議常人之情也。若思之不得其始。議而不測其終。心口之識已殫。變化之功彌大。則向之思議者。得無惑哉。窮神者不思。極變者不議。神變自爾。于我無爲。至若舉世界于鉞鋒。納妙高于芥子。毛孔受四海之水。丈室包須彌之牀。自神而觀。皆應之粗迹。而昧者挈挈然欲求于忖度之內。不亦左乎。惟虛而融之。然後解脫之門可得而闕矣。頌曰。心識所到。是可思議。思議非及。乃爲真諦。真諦本空。真空不二。無空之真。遂超實際。請問此法。將焉寄名。汪汪其大。杳杳其精。不動而無。不動不生。而無不生。至虛可實。至晦可明。芥粒藏山。毛根注海。寶坐由旬。陶輪世界。彼入不知。此容無閔。本相皆如。真樞詎改。大士惟神。用之靡勤。至權反道。至智同塵。二乘迫隘。感想紛綸。三世諸佛。同歸此因。

觀衆生品第七

夫昏寢者非大呼而不覺。狂驚者非至疲而不復。上聖卓然。哀真性之自溺。又知諸相之非實。故巧諭以曉其惑。縱苦以疲其心。埃夫昧者之自昭。勞者之自止。則向之譬諭苦惱。同爲一妄。妄旣去矣。自然實相。衆生正觀。其在是乎。經曰。如幻師觀所幻人。則真意明矣。頌曰。茫茫羣生。本一真性。少念或差。千波莫定。覺外合塵。迷中認影。三界狴牢。四生檻穽。狂走昏衢。羣嬉苦境。卓爾大士。知物本無。幻人教幻。吾體分吾。權空遣實。假妙損竊。千因藥倦。萬譬針愚。諄諄度人。種種非己。洪纖一吹。幽明一視。惱之非怒。愛而執喜。無作而緣。無爲而恃。茲名說法。茲謂行慈。天不擇人而覆。雨不擇物而滋。菩薩之惠。平等之悲。我爲是觀。

何慮何思。

佛道品第八

夫道非遠人。而人自忘道。此品之旨。以謂塵勢。卽清淨之體。生死卽解脫之根。而羣動糾紛。真性流宕。先覺之士。乃強名佛道。以正之。正之方。必久處塵勞。而安住生死。然後能功。被于無外。智周于無內。一念所及。諸相皆如。非天下之至精。其孰能預于此矣。頌曰。法無可名。寄之佛道。道無可異。同之法寶。何大弗圍。胡微弗造。萬表賦陰。千聲應考。以善爲善。善則非真。以垢爲垢。垢則成塵。真善者。因善而離相。無垢者。卽垢而明因。譬欲寶珠。沈淵乃獲。譬欲青蓮。憑泥後植。豨牧雖下。豎之善職。烏喙彌毒。工之惡石。佛道如是。佛種亦然。羣生共體。諸業同緣。何去何就。隨照隨圓。二聖相發。音流大千。

入不二法門品第九

夫道者何也。至真極妙。無爲之稱也。常存于算數之表。獨化于有無之外。不可以一一。不可以言言。一若可言。則一與言爲二。言而可二。則二與一爲三。自此以往。巧歷不能舉其要。而況其流乎。是以聖人知萬法之彌綸。億計之差別。皆出于妙本。而攝以真乘。真乘之門。入則無二。二而不得其偶。一斯盡矣。寧必除一而謂之至乎。毗邪默然。義在于此。頌曰。法有萬門。宗無別諦。妙不可一。真胡取二。衆聖隨方。聊存遠寄。悟入殊因。圓明共味。茫茫巨浸。赴者百川。到無前後。終爲大淵。夫何淨名。乃曰真入。性相皆離。思量靡及。仁者辨法。于法有言。言既有矣。名何一焉。文殊雖言。言于無說。無旣言矣。攀援未絕。超相踰言。是謂默然。

淡弗調而味足。琴無鼓而聲全。茲法門之不二。又何得以稱旃。

香積佛品第十

夫祛近惑者必標至遠之趣。開常見者必舉非凡之境。然後解耳目之縛。平智慮之封。內外曠然。始造真域。此品之旨。以爲香積無上之界。寶飯普重之慈。乃釋累之妙筌。融神之化國爾。使庶幾之士。因茲領解。必能遺其所寄。而涉乎大方。無捨無求。然後爲善矣。頌曰。巍巍上方。粵有真場。不立他法。惟聞妙香。河沙四十道右而長。希微其野。眇莽其疆。淨飯惟馨。寶器惟潔。孰往取之。捐梯泯轍。甘露其味。大悲其熏。孰能銷之。悟法離塵。香界惟何。高遐若彼。返照循元。迷悟而已。香飯惟何。普濟如斯。稱根付飽。粗妙之資。是謂冥權。是稱寶智。幽唱無響。孤風超詣。卻顧下方。居然不二。敢告人天。領其標致。

菩薩行品第十一

夫至精而不能暢。至異而不能同。有累之大者也。故此品覆解香土之高妙。乃鄙穢之筌蹄。懼夫聲聞之流。因而取相。且魚獲則筌棄。鳥盡而弓藏。鄙穢之累。既祛。高妙之名。亦滅。若將舍一而取一。其患寧有既乎。故香國衆賢。悔生劣想。迦文大訓。兼忘有爲。慈音一宣。內外咸濟矣。頌曰。香國衆行。兢兢大千。聿來下土。將契鴻緣。於穆迦文。奄荒法界。值相觀空。逢言作解。惟彼大士。悔生劣想。祇聽我辯。疑情自蕩。想何爲劣。穢淨是分。靈照一區。浩然無垠。疑何爲蕩。斷常皆去。不盡有爲。無爲不住。有爲而無所有。無爲而無不爲。三乘我出。萬行焉依。法門若是。真諦胡疑。

阿閼佛品第十二

夫垂至妙之言者。必存至妙之實。聞言觀實。然後學者信而不解。信而不解。則道將爲一道。爲一則言皆妙。而妙皆實矣。故至人神奇于外。深根于內。若妙喜之寶界。無動之尊顏。于彼之所生。于此之所化。未始非實。而昧者不知。必覩相而後欣。造形而後悟。陶冶巖滯。會歸冥極。則示權顯相。其得已乎。此品之宗。義則然矣。頌曰。洪惟妙果。必有妙因。厥德無上。其功乃神。無動之尊。妙喜之域。萬善所藏。鴻緣所宅。龍象未躋。人天坐隔。無垢是生。維摩詰無垢稱也。馮儀孔碩。善逝稱揚。欲顯其方。冥權普會。至變交相。不興于坐。不習其祥。斷取淨界。聿來茲疆。不念所臻。萬物咸覩。切理循階。婆娑接武。以空入空。無去無取。清淨現前。莊嚴篤祐。大衆已觀。復歸其所。

法供養品第十三

夫陳玉帛。鳴鍾鼓。事神之末也。具衣食。張室廬。懷民之細也。誠苟不至。物將爲累。況希微無上之法。寂滅忘言之精。欲以像刹之巖緣。死生之穢業。求其妙證。不亦難乎。故天帝曉殖福之甚多。月蓋悟深經之最上。賢劫大士。因之受記。則供養之勝。捨法何言哉。頌曰。道有所寄。心必生恭。人天雖異。歸仰攸同。其歸安歸。歸法實相。其仰安仰。仰法無上。相已實而何歸。上旣無而曷仰。其知此者。是名供養。若大千界。若一劫時。稻麻衆聖。香珞多儀。四天樹刹。七寶栽基。施寧有量。福亦無涯。至哉妙音。顯厥真理。謂相終淪。謂塵曷恃。一念回嚮。福多于彼。寶蓋因緣。提柏踐履。寧異人乎。我身如是。

囑累品第十四

夫道無限斷。世有來今。無限斷則歷羣聖而一如。有來今則揭大事以相付。諸篇必以囑累爲末者。亦未濟終焉之義乎。頌曰。教不孤運。心以契傳。源開派萬。照一燈千。丕承慧命。肯構鴻緣。稽首彌勒。茲無讓焉。

表 冊 到 冊 冊





13
4
1869

元憲集三



叢書集成


初編

王 雲 五
主 編 者

商務印書館發行



元 憲 集
(三)



宋 庠 撰

元憲集卷十八

表

十月一日奏告南京鴻慶宮太祖皇帝表

伏以告朔紀常。戒寒協序。瞻言像設。載極時思。恭惟尊諡皇帝。功冠往初。道隆時憲。德在萬世。有截享天。配于無窮。適履孟辰。永懷遺烈。

十月一日奏告永定陵真宗皇帝表

伏以就盈紀月。司閉成冬。惕悽愴于非寒。悼劬勞于罔極。恭惟尊諡皇帝。道勳冠古。德澤涵幽。罄圖牒以輸祥。擁慶靈而祚世。眇沖攸賴。摧感何云。

十月一日奏告永定陵莊獻莊懿莊惠皇太后表

伏以寒律甫升。孟躔適會。方班吉朔。實感先慈。恭惟尊諡皇太后。德茂坤元。化流椒極。溢話言于彤史。闕柔景于仙園。追荷顧存。舉成哀塞。

十月一日奏告西京應天院太祖太宗真宗皇帝表

伏以冬朔肇端。孝心叢感。仰別京之淨刹。肖華表之真游。恭惟尊諡皇帝。神化溥將。睿謀燕翼。早肅在天。之御。參綿卜鼎之期。方荷慶圖。敢忘時惕。



083
1124
21810

十月一日奏告永定陵真宗皇帝表

伏以天運弗停。水行茲始。感霜露非寒之惕。結衣冠游月之悲。恭惟尊諡皇帝。功濟三靈。道包衆甫。軼鴻名于上世。叢寶訓于來昆。皇照靡渝。時思罔極。逝瞻靈寢。無喻哀悵。

十月一日奏告永定陵莊獻莊懿莊惠皇太后表

伏以冬管命時。歲陰布序。俯愴戒寒之候。聿深追遠之思。恭惟尊諡皇太后。坤載輸和。人倫託始。藹母闈之慈範。溢女史之芳猷。茂庇眇冲。永懷顧復。淒凝肇集。感塞何云。

年節賀皇太后表

元朔甫新。羣萌後達。因慶儀之在旦。感慈訓之遠顏。恭惟尊諡皇太后。徽範映辰。柔風冠古。擁慶靈而祚世。育微眇以承祧。追荷恩勤。永焉摧塞。

賀西京應天院太祖太宗真宗表

伏以瑞歷開端。羣萌達氣。當治朝之普會。極仙駕之永懷。恭惟尊諡皇帝。道冠往初。文包載籍。恢世年于鼎卜。盛詒燕于孫謀。仰賴丕休。益深遐感。

中元節奏告南京鴻慶宮太祖太宗真宗皇帝表

伏以商瑄開秋。舒翰既望。感芳時之將謝。逸仙駕以長遠。竊仰神姿。素嚴靖館。本弓劍軒臺之畏。謹衣冠漢廟之游。適履令辰。敢通哀悵。

中元節奏告永定陵眞宗皇帝表

伏以秋序迎郊。望辰旅夕。逸企山園之重。載驚霜露之濡。按歷未遑。因心若隕。惟百靈之護野。協六氣之在天。嘉節甫新。哀悰永歎。

乾元節內中謝眞宗皇帝表二首

臣忝荷先謨。紹膺丕歷。爰屬誕辰之慶。實資聖系之開。雖著節有常。而銜哀罔極。惟期慎守。少答垂鴻。臣猥以眇躬。紹承丕構。因誕辰之攸屆。感先願以如存。恭惟尊諡皇帝。茂烈欽明。深仁溥博。蹈百王之高致。詒億載之宏模。曾是遙追。敢忘善守。幸循寶訓。迄此昌期。惟勤日慎之誠。仰答天靈之貺。

乾元節內中謝莊獻明肅皇太后表二首

伏以載震紀辰。相沿著令。爰覽慶儀之舊。恍驚慈訓之遠。矧熙盛之紹臻。固保安之所及。永懷懿烈。但極哀悰。

伏以司夏凝和。厥生名旦。率朝歡而惟日。緬慈訓以長懷。恭惟尊諡皇太后。德配坤靈。化均天覆。深戒練衣之儉。勗成黃屋之勤。事闋仙游。感叢慶日。庶謹承平之治。永全保祐之仁。

乾元節內中謝莊懿皇太后表

臣孱薄承基。劬勞託慶。方訂露囊之舊。追懷甲觀之祥。恭惟尊諡皇太后。淑聖凝姿。謙勤樹德。飾尊名于嫔廟。留懿範于堯門。慈訓所鍾。眇躬攸賴。永言願復。曷報生成。

乾元節內中謝莊惠皇太后表

伏以訛致御辰。誕彌紀節。因紹修于慶會。聿追慨于慈顏。恭惟尊謚皇太后。寶儉成猷。體仁逮下。參願存于先命。專擁育于沖人。獲齒丕基。率茲柔訓。敢忘勵翼。少報恩勤。

冬節賀南京鴻慶宮太祖皇帝表

伏以周歷紀正。魯儀候物。感迎長之命節。惕追遠以叢思。恭惟尊謚皇帝。握紀先天。開圖罄宇。翼孫謀而可大。謹神教以如存。仰慕睟容。式安真館。未遑恭拜。增極哀悰。

冬節賀南京鴻慶宮太宗皇帝表

伏以天統肇新。朝章有慶。緬動時思之感。式瞻像設之嚴。恭惟尊謚皇帝。至德孚先。洪規裕後。享周廟不祕之配。留軒臺如在之神。仰庇孫謀。誕膺邦祉。敢忘厲惕。永答延洪。

冬節賀南京鴻慶宮眞宗皇帝表

伏以氣運循元。星躔迎至。感霜露非寒之愆。極衣冠游月之懷。恭惟尊謚皇帝。道格無方。威覃有截。迪長源于浩劫。正垂統于來昆。尙託仙祠。仰延威御。式臻嘉節。敢致哀誠。

冬節賀永定陵眞宗皇帝表

伏以歲律就陰。冬元復始。禮緣胡慶。感倍時思。恭惟尊謚皇帝。躬蹈聖猷。誕膺耿命。勒號榮而高世。詒統業以當天。神駕夕躋。仙園在望。永懷丕烈。罔喻哀悰。

冬節賀永定陵莊獻莊懿莊惠皇太后表

伏以流景弗居。微陽載始。爰屬嘉辰之會。永懷慈訓之遐。恭惟尊諡皇太后。淑哲綏猷。儉慈寶德。茂擁存之善教。協詒燕之深仁。運隔仙游。感鍾長日。展巡未卜。哀涕無從。

冬節內中賀露香表

伏以律肇初陽。景回南極。育幽萌而有漸。翕繁祉以惟新。席眷上靈。布和嘉節。敢虔芳著。用達精誠。

降聖節內中謝露香表二首

伏以璿極監觀。雲輶降格。夙昭曠瑞。實紀靈辰。繫冬序之下弦。緬仙游之駐駕。敢忘薰奉。仰答禱祥。伏以仙御降監。靈辰著令。每屬孟冬之屆。緬懷真蔭之隆。爰卽禁庭。奉殿寶炷。冀憑芬潔。永導寅恭。

天貺節內中謝露香表

伏以月集函鍾。適迎于善氣。天垂綠錯。爰紀于休辰。緬懷瑞節之端。實表先真之志。允依層禁。恪奉名薰。寶睭孔昭。繁禱永賴。

先天節內中謝露香表

伏以順啓秋辰。素標瑞節。肇先媒之寅奉。迹寶蔭以惟遐。爰祓名薰。上瞻沖境。精衷有嚮。茂假攸綏。

乾元節內中謝露香表二首

臣某言。伏以序協恢台。辰標震夙。享萬官之稱壽。荷六幕之叢禱。祇燎名薰。通誠寶宙。益祈鑒願。永祐繁

昌。

伏以維夏開端。厥生逢旦。循邦令祝。延之會感。天俾熾昌之祥。虔奉名薰。上通真界。更期勵翼。永輯休嘉。遂州天慶觀開啓爲民祈福道場密告三清表

伏以西土奧區。民生惟錯。上清寶貺。天鑒攸精。緊道樞應物之宗。有法醮祈祥之式。已獨靖館。卽啓靈場。敢密罄于虔誠。冀嚮臻于介福。庶茲黔細。普荷熙康。

爲南郊下元節更不于景靈宮朝拜奏告聖祖內制表

茲者順攷禮文。謹修郊報。預涓辰于齋戒。將致饗于仙宗。惟水官校籍之辰。有霞館奉觴之舊。敢停常謁。專歲盛儀。冲鑿孔昭。篤誠茲諒。

爲南郊冬節不備薦饗奏告眞宗皇帝莊獻莊懿莊惠皇太后表

伏以近卜天正。紹修帝配。聿嚴備物。親款太宮。惟盛禮之方虔。懼別祠之致黷。敢停常薦。庶一齋誠。爲南郊于大內在京外處道場祈恩保安聖躬奏告三清諸聖表

伏以諏日仲冬。致誠吉時。肅陳齋輅。將次陽郊。雖祓濯之載虔。賴聖眞之潛護。庶成嚴配。永迓繁禧。爲南郊于大相國寺道場祈恩保安聖躬奏告諸佛表

伏以廟祿惟嚴。郊薰有典。已涓景至。躬迓神休。將勤陟配之容。願集綏寧之祉。等慈無間。妙蔭焉依。爲南郊于景靈宮道場祈恩保安聖躬奏告眞宗皇帝表

伏以清廟告虔。紫壇陟配。咸先期而歲事。方率力以奉神。惟是眇躬。庇于先蔭。益希保佑。用克欽承。

爲南郊預告天地社稷表

恭以三載克禋。禮遵舊典。百神竝秩。義重親祠。俯沖眇之寡臨。荷清寧之貺施。洽臻嘉運。丕冒羣生。宜躬執于豆籩。克奉承于郊廟。庶勤大事。仰答靈休。涓日有期。薦辭惟恪。

爲南郊預告太廟表

臣紹承謀訓。獲擁基圖。茂臻太和。實庇餘福。祇事陟配。不敢疏忽。三載而舉。抑惟舊章。幸緣歲成。躬展郊報。仍期裸獻。用罄孝思。繕禮有初。薦信無昧。

爲南郊預告后廟奉慈廟表

恭以報本奉先。是均明察。薦馨盡志。以一親尊。緬惟郊配。實稱祭首。必躬而信。敢憚于行。屬茲順成。圖厥祇事。謝告吉土。紓慨闕宮。方謹先期。用虔孝祝。

爲南郊預告在京諸廟表

恭以郊報之虔。厥惟盛典。景長之序。允協靈辰。爰卜親祠。式揚大號。咸秩之禮。來饗有期。眷惟神聰。胥祐邦慶。

太廟雅飾奏告表

恭以郊配有期。裸迎惟重。瞻言清廟。前戒庶工。以時修除。用謹齋謁。歲事伊始。薦信敢稽。

爲南郊預前內中奏告露香表

伏以帝時有嚴。齋饗疇駕。紛盛儀而允集。率精懇以方初。敢奉名薰。上通虛界。冀孚眷佑。永保綏寧。

爲南郊預前奏告內中壽寧堂皇儀殿諸佛表

伏以陽管將新。郊祠有報。冀徼茂嘏。宏庇斯民。方躬展于盛容。更旁休于妙蔭。永康國步。胥契慈緣。

爲南郊預前奏告內中福寧殿玉皇北極諸聖表

伏以天統揆辰。陽郊展報。萬靈胥接。四海駿奔。率禮載虔。惟神所相。式通齋懇。用疇冥休。

爲南郊預前奏告內中東園門聖祖天皇諸聖表

伏以涓序一陽。薦馨有昊。已戒期于廟時。將躬執于牲瑄。力是多儀。理資冥祐。敢緣齋告。用集禱祥。

爲南郊預前奏告內中神御慈德二殿諸帝后表

伏以祇率舊章。恭承嚴配。聿奏齋明之式。將勤信次之行。靈蔭所敷。眇躬是賴。庶成熙事。無累先猷。

爲南郊預前于永定陵奏告眞宗皇帝莊獻莊懿莊惠皇太后表

伏以推策涓辰。燔柴令典。適勤眇質。躬對上靈。惟齋禩之多儀。竝訓謀之成式。更祈慈蔭。助集鴻休。

元憲集卷十九

表

謝郊祀加恩表

禮天拜胙。甫畢于鴻儀。括土均休。汎霑于異數。罔功內省。悸魄無從。中謝竊念。臣本以空疎。誤承簡拔。玷從官而積歲。尸榮祿以浮人。凡最所更。風猷蔑樹。曲荷天私之覆。靡循官式之常。超踐諫垣。預聞宰政。屬兵農之竝講。當朝夕之勤咨。徒竭陋愚。無裨紀律。力窮猶駕。衆知敗馭之傷。物重過權。始驗持衡之殆。遭時寬政。勿汝深疵。假淮國之一麾。貿龍躔之再集。皇心念舊。祕秩升華。移守汶田。坐豐周粟。會于郊而陟配。嗟守土之恪居。微葢翹誠。孤匏擁歎。敢謂伏蒙尊號。皇帝陛下。回輿作解。舍爵推慈。因勞臣工之勒。胥暨州藩之廣。繪書懋賞。星驛馳音。衍多邑于舊封。倍榮租于眞實。命成難拒。恩溢無涯。矧籩豆駿奔。莫視陪祀之盛。而公卿奉引。了無承乏之勞。逮流慶之叢臻。亦覩顏而虛受。忍慙云極。度德奚堪。惟餘頂踵之微。或効涓埃之報。臣無任。

謝南郊加恩表

禮成陟配。賞洽均禧。優命聿頒。兢心靡據。臣誠感誠懼。頓首頓首。竊念臣本惟寒士。獲玷近班。嚮自禁庭。舉參宰府。斗筭受任。尋貽不稱之譏。天地好生。終靡加誅之忍。特由諫署。出布藩條。積媿盈顏。樹聲寡術。

屬陽郊之大報。罄率土以駿奔。而臣越在守封。舉深存闕。無攝事贊儀之幸。有隳官去國之悲。何圖拜胙之辰。亦沛明緡之典。書勳八柱。爰極于上階。進戶列侯。更陪于大邑。寵章叢被。悻魄九升。此蓋伏遇尊號皇帝陛下。誕擁乾休。洽敷人爵。因雷風之大號。席簪履之餘恩。洒濯深疵。振除往咎。謝生無所。固推不報之仁。失旦思鳴。或取自新之效。大猷雖爾。弱植奚堪。徒誓銜銘。未知酬塞。臣無任。

謝崇文總目加恩表

竊念臣早以片文。誤階榮牒。序服星垣之職。入陪鑾禁之游。凡在官司。多塵總領。爰屬仙瀛之藏。廣收蠶簡之遺。庀閣寢盈。籤題罔辨。特迂詔旨。就擇時英。俾分討于藝文。且精求于領目。遠襲九流之別。近尋四庫之規。通質舊草。日程新課。而臣首膺遷擢。最賀歲時。未終刊謬之功。已忝參機之舉。緹鉛清局。別委于俊僚。山藪寬恩。尋投于外服。逮諸儒之卒業。非孤臣之預知。比者伏蒙皇帝陛下。垂覽新書。嘉聞善職。追念摩編之久。靡遺尺寸之勤。爰俾罔功。亦膺蕃數。茂進文階之品。真疏幹食之封。媿集榮先。獎浮願表。上中經之簿。莫接于清班。出內史之方。何勝于渥訓。仰被燭幽之詔。未知論報之階。臨啓徘徊。言因謝盡。臣無任。

謝降詔答諭立御書梵字碑表

寶文就刻。譯侶叢歡。因善護之成功。虔率和而露奏。紆頒制墨。俯煥塵襟。中謝伏惟皇帝陛下。將聖自天。大猷覘古。丕承下武之緒。兼通西聖之言。闡其洪慈。衛我羣品。惟梵文之流布。乃佛說之信傳。雖曰旁行。

實存成法。比乘聽斷之裕。悉標聲畫之元。譬震旦之六文。謹舌人之異說。氣瞻雲漢。文含日星。奮天藻以題辭。勒媧珉而庇宇。古今參驗。非科律之難分。華竺雙提。若迦陵之親演。而臣幸陪法席。親覩帝華。不勝晁藻之情。用列縑囊之感。方塵清覽。還錫溫辭。覺苑同文。已預人天之會。尙方乙牘。更膺緝緯之褒。徒篆情涯。曷酬恩遇。臣無任戴天荷聖。激切屏營之至。

進觀御書梵字詩謝降詔答諭表

韓音頌聖。方慙于斐狂。綸檢垂慈。更加于褒獎。觀文眩目。拜賜兢心。竊念臣仕籍叨榮。儒林廢業。洊玷疑丞之地。皆陪潤譯之場。探內學以非優。撫鈍根而永慨。幸遇皇帝陛下。欽揚祖烈。丕護真乘。因竺館之先規。續貝書之妙蘊。盛延開士。深究旁行。對翻華裔之音。博采形聲之說。法宮多暇。書苑留神。爰御寶趺。親題梵畫。仍冠篇而善敍。且作刻以垂芳。紺殿雄成。祇園聳觀。實睿才之攸縱。顧佛劫以增遐。而臣例屬齋薰。獲窺摹矩。不勝私幸。竊綴短章。仰煩夜石之程。已積春冰之畏。敢謂伏蒙陛下。靡捐介善。申寵近司。枉深訓以發中。廓大猷而與進。戴恩嶽重。徒極于將顛。揣己毫輕。未知夫爲報。姑銘獎拂。用冀肝脾。臣無任。

謝詔赴闕表

使駟光華。甫臨州部。言綸溫密。申錫詔函。聞命震惶。撫躬跼躅。臣某誠榮誠懼。頓首頓首。竊念臣嚮辭宰政。出布藩條。專處外以首公。願還朝而絕望。周旋三任。首尾八年。終微樹化之方。可稱惟良之歎。比者伏蒙皇帝陛下。追憐舊物。均賦羣材。因內幄之缺員。降輜軒而垂召。仍緘帝札。曲暢天慈。諭發號之揚庭。俾

解藩而趨節。孤臣何幸。丕訓前頒。未知讓爵之端。先聳捐生之志。感深成泣。言拙無文。方促駕以就途。但望雲而翹首。永言歸報。倍萬常鈞。臣無任。

謝宣召入學士院表

祇聽褒音。仰承容選。恩浮材限。憂倍榮涯。俯僂以還。心顏罔措。臣某誠榮誠懼。頓首頓首。竊以漢門金馬。始基待詔之華。唐署鑿坡。緒創司言之祕。預規中之訪逮。極朝右之凝嚴。聖世尙文。豐規冠古。慎咨碩彥。增暢皇猷。願崇簡之有初。奚下流之可冀。如臣者。斗筭均量。舟劍懷慙。偶自諸生。幼親樸學。天聖初元。光華甫協。幽側竝揚。遭會時來。玷塵舉首。自褫巾而補吏。泊縹組以通閩。番直史庭。試煩財府。寸長靡効。曠度兼容。弗誅畫餅之名。更備星垣之乏。雖復奉行王訓。判攝事經。出入四基。綢繆千慮。終取伐檀之誥。方期汰礫之逃。敢謂伏蒙皇帝陛下。式序衆勤。俯收介善。記甲科之前幸。察孤進之無他。召自綸闈。齒于齋禁。矧典司至重。號令惟幾。慎方出之文。義無反汗。奉席前之對。威不違顏。自揣懦庸。將焉報稱。然當奉循丕式。載淪蒙襟。希皮弁之守官。免纆牽之貽累。微生易隕。洪覆難酬。臣無任。

河陽謝到任表

進聯省坐。易撫侯封。促駕啓行。適臨治所。選辰署事。初布藩條。祇荷獎甄。不勝榮懼。臣某誠感誠抃。頓首頓首。竊念臣一蒙策免。三寵州遷。祿有空餐。官無最狀。嚮屬盟津之缺守。猥煩漢札之疏恩。升秩夏卿。增華使棨。仍因便道。特許過都。朝推念舊之慈。禮借儀台之重。孤心易感。危涕難收。尋迫王程。遽開郡關。此

州據山河之會。擁周晉之交。列成分城。造舟濟險。隄防甚設。譏邏爲嚴。雖曰近藩。實名雄鎮。然而累年饑旱。比日沈災。東有漕渠開塞之煩。北有計檄誅求之苦。使多緣隙。民罕聊生。臣敢不略去煩苛。勤加綏輯。庶臻還定。少副憂勤。俯循備禦之餘。曷稱惟良之寄。此蓋伏遇皇帝陛下。俯矜忠樸。本乏同游。因宸服之奧區。進天臺之峻品。曲加存遇。終保衰遲。身遠天高。恩深語拙。惟有涕泗。尙冀感通。臣無任戴天荷聖。激切屏營之至。

揚州謝到任表

淮海奧區。圭符假守。揚舲戒道。止涉安流。引紱視章。卽頒聖詔。舟楫一都之會。夫家萬室之繁。去國匪遙。偃藩何幸。臣某誠榮誠懼。頓首頓首。伏念臣稟姿蒙拙。陶化亨嘉。始擢草茅。寢階纓綬。斗筲量淺。丞史願微。常蹈道以自安。敢越思而希進。猥由文館。入忝詞垣。俄自禁扃。召參台府。此際清衷。素定靡復。類能羣議。雖諠罔容。收渙因懷。自勵訖稱。大恩而淺。謀不足以計深。恐慮妄思。夫效智。叛羌負德。邊上宿兵。亟會宰司。參圖戎索。廟堂集論。或率己而妄言。帷幄定謀。卒因人而免悔。曾微寸效。可益萬分。至于進策治朝。敷言庶位。纖悉咸資。干睿斷。周旋莫企于清光。備位踰年。妨賢積日。雖官箴挈矩。僅守匹夫之廉。而公路須才。安稱明君之蓄。加以愆冥自稟。濩落少機。言或漏于屬垣。疑多成于納履。積有怨咎。仰玷和平。矧當責實之辰。宜被黜幽之典。伏遇皇帝陛下。兼容如地。載煦爲春。盡赦多尤。止停貳職。仍七人之舊列。總千騎于大邦。假以便安。紓其惴慄。願微生之再造。濱十死以何辭。謹當斂分思愆。首公營職。因楚人之旣教。

濟漢令之在寬。乘乃化孚。期于政辨。然念操心易感。實本于孤臣。求舊與歸。更依于仁后。視風波而累息。俵絲路以迷魂。臨啓怔忡。心隨涕隕。臣無任。

鄆州謝到任表

西清祕秩。式寵儒林。東夏奧區。更均邦翰。參爲異數。猥集孤臣。祇荷甄收。舉增惶震。中謝竊念臣斗筭近器。韋布諸生。興于羈旅之餘。玷厥殊科之選。嚮階華劇。進預疑丞。遭百度之交修。乏寸長而上報。久蒙君養。曷逃尸素之愆。終不汝疵。寢累含容之德。逮從外補。方涉再朞。前忝未酬。來譏已積。敢謂伏蒙皇帝陛下。曲全邦體。由獎官成。枉漢札之深辭。易汝田之巨鎮。冠升殿職。寵映藩條。仍加別使之名。兼撫連城之重。矧惟州部。匪遠寰畿。津陸交途。農商宿業。封巒在望。澤多膚寸之滋。鳴蹕如聞。野有儲胥之舊。茲焉委任。允屬循良。退念散材。曷勝優委。敢不率循丕憲。上體至慈。獨獄市之煩文。濟詩書之美俗。庶幾安輯。少副憂勤。自餘頂踵之微。或効涓埃之報。辭殫語拙。感激何云。

進國陽大報頌表

臣伏以日在太初之歷。是謂履長。天隨帝者之居。茲焉臨饗。挖三垓而昭事。坐兩觀以均禧。徧朝真馭之下都。翕受羣元之厚福。合生鼓舞。協氣陶蒸。忝蹈德以泳仁。宜交中而發外。中謝竊念臣單門下品。弱植淺中。被至化之純深。副大猷之餘緒。翹然在泚。廁君子之育材。間或登高。乏大夫之能賦。屬承平之嗣且。講容典以和神。南北異正而竝修。祖宗以侑而交獻。周游六氣。乘之而健行。盼蠻萬靈。屑然而著感。目美

光之若晝。欽衆瑞以如山。矧當清道之辰。已預皇軒之引。瞻威咫尺。稟訓螭螭。慶千載以親逢。暢四支而內抃。幸聯儒館。難默頌聲。愬積日以庀詞。逸談大而幾殆。僅成累句。式贊盛容。均子夏之一詞。曷〔案〕原一字。邦體本虞。初之小說。敢預家流。仰瀆程觀。彌增震媿。謹夙夜齋戒。撰成國陽大報頌一篇。隨表上進。以聞干浼。宸辰。臣無任。

傳法院乞降御集編入經藏表

臣聞帝藻垂鴻。本春山之祕蘊。金言輯教。極龍藏之寶嚴。迹夫翰墨之傳。均乎天壤之永。矧當盛際。抑有豐規。敢露虔衷。仰資外護。臣等誠惶誠懼。頓首頓首。恭惟皇帝陛下。道包睿哲。化格清寧。總民極以無頗。陶天倪而不宰。多能攸縱。衆善咸甄。眷佛譯之清場。本神宗之妙刹。香壇貝牒。慎宣使範之雄。綈帙牙籤。對比儒林之盛。克延慧命。參固不圖。然念永熙以上聖之姿。首敷神教。真妙以至仁之度。益闡慈源。竝因機務之閒。咨探空有之理。宸章睿采。法語仙音。率賜助于禪詮。已冠升于釋部。陛下紹隆先志。宏暢宗風。每緣聖作之華。備獎真乘之奧。人天抒歎。象緯交輝。絲涉歲時。寢盈策牘。未序寶題之次。曷聳沙界之間。臣等叨服宰司。兼榮法館。悵鈍根而惜學。依洪覆以知仁。願續前徽。俾資善述。欲望聖慈。許以自來御製。應干釋宗文字。降賜傳法院。令釋經三藏。試光祿卿沙門惟淨等。依例編綴。竝入經藏目錄。庶茲總括。庸盛發揮。茂彰奕世之能。高映羣篇之首。且孚大覺。永庇含生。饒益之多。名言曷喻。干冒宸辰。臣等無任。

謝加職移知鄆州表

輕輶將命。祕殿參華。易守東藩。治行使道。寵章繁集。媿汗交流。臣某誠榮誠懼。頓首頓首。竊念臣世系單平。天姿淺固。親遭尙文之會。首叨擢秀之科。因士易農。緣名責實。褫巾未久。通籍爲榮。乘善養于羣材。預徧階于顯列。曾微風績。遂亞疑丞。齷齪備員。兢兢履薄。物勝權而衡殆。形過鑑而照窮。理有固然。道無不躡。果煩賜罷。方厭騰譏。尙蒙藏疾之仁。尋假出麾之寵。奄綏淮服。坐服漢條。省咎窮年。酬恩靡日。比者伏蒙皇帝陛下。哀憐舊物。拔拭深疵。念器使之嘗加。忍生成而遂棄。曲回天造。申穆朝餼。序聯清禁之崇。再委名城之寄。仍銜使節。參重州符。悅祇命以驚魂。徒拜嘉而隕涕。桑榆收效。已屛于垂矜。頂踵捐生。未知夫上報。臣見依準勅命。取便路發赴本任。無任瞻仰。

代楊鄆州謝上表

臣某言。蒙恩授臣知鄆州軍州兼管內勸農事。卽于今日到任。上訖。謬分左契。臨長東人。提千騎之雍容。有六條之森備。出麾有幸。坐閣增榮。中謝竊念臣箕斗虛名。丘園微介。決科僅中。論績稍遷。遵明辟之纂圖。忝望郎而升秩。用惟枯木。不自先容。細及秋毫。罔非帝力。但罄如絲之亮。曷知媚竈之求。終賴洪慈。免其大戾。甫周一閏。更典三藩。銜竄數以見容。員支離而竊祿。昨緣便道。遂獲造朝。許留數刻之閒。俾典百斤之奏。俄煩節召。改賜袍紳。追露冕之爲榮。均解衣而拜賜。胡然頑陋。糜爾寵光。斯蓋伏遇皇帝陛下。通駿先猷。裔蒙庶品。謂夫俎豆之無越。矜其丹腹之可塗。曾不疵瑕。猥從器使。伏況汶陽疏壤。魯道遺黎。昏作屢豐。敦厯俾乂。雖屬河工之近決。不妨田畷之有秋。惟冀至仁。少寬中戾。臣敢不內循丕訓。上體寶

慈列三墳之埴壘。勤修稼政。愛三東之杼柚。底慎邦財。儻臻樂職之風。冀贖浮人之刺。臣無任云云。

謝轉給事中表

郵傳疾馳。贊書申錫。改東臺之祕秩。仍左竹之善藩。恩數竝隆。心顏罔措。臣某中謝。竊念臣本惟弱植。素
情遠猷。一玷文科。洊膺朝選。攝官承乏。率非才舉之宜。含垢匿瑕。陰荷天私之惠。獲徧階于華近。固無補
于涓毫。至乃超備諫員。參聞宰政。當求治責成之會。有先機斷論之煩。力勉徒勤。道悠自躡。辱收還于重
任。始厭伏于煩言。繼荷宸慈。曲存邦體。旋易麾于巨鎮。復帖職于清廂。速貸前尤。叢臻謬寵。謝生無所。履
薄增憂。不謂更枉公僉。平稽歲伐。例舉當遷之典。兼紆卽賞之褒。循踐殊資。俾光外寄。此蓋伏遇皇帝陛
下。深憐舊物。均飾庶工。因虞篇陟考之文。用漢守增畱之制。併推優渥。昭示保全。內省微軀。曷勝鴻施。謹
當勤思寡悔。益服攸箴。承化樹風。或萬分而有取。竭忠酬貺。期十死以知歸。感極于中。辭殫靡喻。

謝賜撫問表

使駟馳星。天辭出綽。辱宸心之念舊。因頒式以推慈。恩厚忘言。感深成泣。臣某誠榮誠感。頓首頓首。竊念
臣本由寒士。早玷榮班。出入近司。周旋二紀。石心許國。固無可轉之期。川謗盈朝。容致他來之客。逮遠樞
握。洊易侯藩。席槐府之崇聯。惕將壇之重寄。敢謂皇帝陛下。堯仁無外。漢度兼容。謂體貌之嘗加。眷忠愚
而可憫。爰馳華牡。俾道溫言。葬焙惟珍。特分于貢品。寶匱有爛。紛照于私閤。仰聆金玉之音。俾極君臣之
分。孤生內省。隆惠奚酬。但歸誓于糜捐。或謝生于覆育。

中書謝傳宣表

臣等伏奉入內都知張永和傳宣中書密院重修開先殿成迎奉太祖皇帝御容往彼供養所貴四時薦享得伸誠意與卿等中外同慶者寶宇雄成神儀載峙屬奉迎之伊始枉傳訓之發中睿德所覃羣心交抃恭惟皇帝陛下紹熙景命勤述先規曩緣作繪之容參對不祧之禮炳然威御臨厥孫謀因佛刹之增新命工師而度構再嚴祕殿將宅皇靈兼別廟之宏模超化城之絕境羽旄先導奚止漢冠之游都邑叢瞻實聳軒臺之畏孝誠克盡前烈彌昭臣等忝服近司首聆慈誨空極親逢之幸初無云補之方惟誓協恭或酬洪覆

賀册封兗國公主表

宮闈衍慶國邑疏封誕告有初均歡無外臣某誠欣誠抃頓首頓首伏以兗國公主天孫稟粹巽女流占在姆不勤承親允穆恭惟皇帝陛下至仁敷祐篤愛成雍誕生穠矣之姿前導百斯之福教宮有典擇配惟嘉爰選良辰茂宣華册肇禹州而啓國築魯館以由章典物備臻官師載躍矧于歸夫舅族諒深沐于皇慈臣早忝近班今司外服徒聆發號莫獲觀光瞻望宸廷臣無任

再入參乞罷免重任表

臣聞綆短而使汲澗非浸灌之巧馬窮而後易駕非馳馭之宜物理苟然人情可喻是以明主臨下孤臣事君弗強所能乃輯宿官之業自涯其分方逃不職之誅敢傍斯言用敷至懇臣某中謝竊念臣天畀疎

拙地出羈單。偶緣挾冊之勤。誤中掄材之首。束紳仕路。佔畢文林。遭山藪之兼容。備閨臺之旅進。自爾朝
多過聽。官匪序遷。驟塵星掖之華。架入鑿坡之祕。固無寸效。可稱明恩。更因承乏之辰。猥玷參機之重。前
叨未補。來忝益滋。過中之器。易盈責實之名。難副。果煩罷免。終賜保全。歷典州符。五新年籥。何意君環之
召。復聯公袞之榮。顛柝再條。朽肌還肉。雖聞弦戢。翼悸魄未安。而內手捫心。丹誠故在。輒復夜思。晝過。今
計昨非。期一得于陋愚。或少裨于顧訪。其如性資有限。機務至叢。卜式樸忠。初無趣和。倪寬懦武。〔案〕原
字明。而又容德日躋。聖猷天建。按循先烈。裁定懿綱。求百辟之讜言。責三公之吏事。諒非雋輔。疇克同寅。
竊顧妄庸。將焉報稱。宣從重劾。以警空餐。然念竭智以進思。介一心而自守。偶逃多悔。幸及三年。稽大比
之文。敢煩陟狀。撫不肖之質。尤合避賢。輒循考績之期。仰丐退身之幸。伏望體天法道。欽文聰武。聖神孝
德。皇帝陛下。廓包荒之度。推養士之慈。業已與成。則無令亟敗。事容善始。則當俾有終。許辭武政之繁。卻
服從臣之末。職勞有底。量力自安。亦冀穆穆公言。潛引曠官之誚。諄諄末路。免罹不衷之災。意迫言蕪。期
于得請。干冒宸扆。

乞致仕表

臣聞爵祿有次。王者所以馭臣。筋力或衰。聖人不與爲禮。何則。上隨材而賦任。則壯者樂盡其節。下度德
而展體。則老者止于不能。授受由是得宜。始終因而偕篤。斯爲達道。貫厥大倫。愚衷所稽。皇鑒攸賴。臣某
中謝。竊念臣本興孤族。素乏遠謀。天聖初。伏遇體天法道。欽文聰武。聖神孝德。皇帝陛下。始攬萬幾。親臨

多士軾怒蛙而待勇。撫駿骨以求駒。而臣適會時來。遽躋才等。猥緣士牒。仰沐朝猷。洊階華要之途。架入
凝嚴之禁。終因人乏。遂贊宰司。辱體貌之兼隆。竭涓埃而無取。自茲典領。益復崇高。再參政務之繁。正管
兵機之劇。一塵鼎鉉。兩幹星樞。形已過而照窮。力猶求而駕敗。屢招譏劾。深累包容。一昨罷帷幄之同寅。
丐州藩之出守。理當策免。恩乃庭揚。假使闡之旌旄。帶輔臣之印綬。質于公論。實玷天私。雖席寵之有因。
顧害盈而難道。重念臣久塵榮路。垂四十年。福過成災。氣衰得疾。去歲中禍。延同氣。痛徹五情。乘悲泣之
過多。駭營魂之不復。幽憂攻內。攝理乖方。接此頽齡。漸成宿疹。積寒棲于腠理。流毒匯于肺經。一喘之來。
百骸俱廢。步趨多梗。拜伏爲艱。若復貪極品之崇名。懷千鍾之厚廩。鬼誅將作。人言謂何。況臣今茲行年
六十有七。常恐一旦先犬馬填溝壑。終無以報恩塞責。臣不勝私願。願上還官職之事。乞骸骨。將孳息歸
田里。避賢者路。七十致政。抑惟常典。臣年雖未及。病則有餘。幸丐餘生。貪延聖日。儻孤誠之獲遂。畢九殞
以知歸。敢望聖慈。特除臣一致仕官。因便尋醫。以救殘喘。干冒宸扆。臣無任。

乞致仕表

言而無隱。情至者得以抒陳。瀆則有誅。德厚者爲之含覆。批章繼錫。俞訓未頒。輒復叩關。覬諧就第。臣某
誠惶誠懼。頓首頓首。竊念臣顛蒙自信。憂畏早衰。近司五玷于朝咨。巨屏七更于郡寄。空勤夙夜。蔑著毫
分。讒謗居多。寵光翻渥。雖虎符劇任。祿秩甚優。而鶴鬢暮齡。筋骸難勉。矧復因寒損肺。緣咳成魘。拜伏稍
頻。喘吟僅續。訪醫寡效。卻粒無方。操藥匕以自憐。擁食椀而太息。生涯若此。人事奚言。屢達封囊。願還駢

組辱中宸之念舊。未聽角巾。陪四輔以造朝。衆喙蹇步。如伏蒲之有劾。願握節以何顏。伏望皇帝陛下。昭示至公。曲推洪施。遂臣知止。式保于有終。揆臣所堪。無強其不逮。得從初志。實緩深尤。虔候俞音。始安累息。欲望聖慈。許依臣累上章表。特除致仕。臣無任祈天俟命。

再乞致仕表

筆端言拙。悃悃難敷。詔底恩隆。都俞尙闕。輒緣洪造。更露微衷。臣某誠惶誠恐。頓首頓首。伏念臣草茅地寒。樗櫟材散。曩因薄技。來會亨辰。列仕版者再閏八周。佐國論者五遷三已。每塵眷獎。遂極崇高。風績蔑升。年華滋晚。頃希止足。姑解組于鄴城。比恤蹒跚。復假麾于譙壤。覩顏冒祿。力疾長人。惟知謹守常規。郡閭靡頌條之最。不能導迎善氣。農疇罹洚水之災。加以淮北荒殘。渦陽沮洳。蕭然南畝。悉變于橫流。蕞爾孤城。不沈者數版。眷言守土。尤藉長才。而臣適在暮齡。猥當優寄。敢臥尸于重祿。空勉率于屏軀。因此震驚。轉成羸薻。而況任崇將鉞。秩視公槐。固當參寵勳賢。詎可久私癘瘵。伏望皇帝陛下。大明委照。廣覆推慈。矜齒髮之早衰。憫筋骸之難強。俾從閒佚。允謂生成。矧在先朝。已陳納祿。逮逢聖日。遽此延恩。出入三年。倦勤十上。昔祈退老。固瀝懇于朝端。今若因循。必取嗤于天下。非獨失臣子進退之節。抑亦玷衣冠廉讓之風。傾藎馳誠。叫關佇可。伏乞檢會前奏。特除臣一致仕官。放歸田里。

乞罷樞相表

臣聞器小易盈者難持。任重將顛者思止。儻奉承之有失。卽隕越之可虞。敢援至言。冒陳丹蘊。臣某中謝。

竊念臣早由謹樸參備丞疑出入踐揚二十餘載食浮日積官謗愈誼而自再冠洪樞漸逼衰景徒竭短慮終誤遠圖故經制邊陲或蠻蠻內侮按列軍伍或戍卒未充上資聖謨竝稟成算至于稍嚴賞格則羣煦漂山暫塞倖門則衆怨成府孤特少助怯懦自知敢竊天工久妨賢路伏望皇帝陛下許還重柄垂丐殘骸得寬典刑庶保要領儻未令便歸田里或且許近守藩州補報之心內外惟一投誠至切得請爲期

乞罷相表

臣聞名本戒乎多取過實則凶力所貴乎自量弗能當止矧萬幾密勿任切于論思一介婆娑力窮于報稱所宜自劾以警空餐仰賴至仁罄敷危訴臣某誠惶誠懼頓首頓首竊念臣學非全古才不逮人擢始布衣進陪書筓寶元中因緣人乏參預政機試可罔功踰年賜免已粟之駕奚望于復驂方汲之淵何圖于續綆自再塵于國論俄六改于歲陰齷齪備員容容取誚其門改使樞管序正宰司光華所叢位望彌峻然屬邊烽罷警調軒息勤列辟交修日新于所治當宁親務天健而愈強因容具臣久忝高位至夫講求墜典崇報上神因大寢之宏規復九筵之愆祝克成鉅禮莫匪聖謀旣絕望于清光亦奚資于彼相逮均慶寵首及庸虛讓爵無階履高增慄重以福基素狹年事日侵有負乘之近憂乏將明之遠業雖主恩含垢外引于人言而天道害盈難逃于鬼瞰一歲之內二息云忘昧聖哲忘情之高深朋友離羣之痛氣衰耳塞淚熱目昏寂聽則妖鼓亂聰審視則黑花盈睫居多忘誤動輒震驚悲憂一來志慮俱耗安可尙聯衰職之貴分掛槐庭之嚴身不自聊政于何有且三公之責吏事任靡容私聖主之督憇臣悔將累國

內循非據。實玷具瞻。伏望皇帝陛下。念稟數之早奇。憫匪才之難強。許還重柄。出補外藩。愛小器于未盈。免其必覆。貸槁骸于將隕。俾遂更生。進退之方。恩義偕允。投誠無隱。須可爲期。臣無任祈天俟命。

元憲集卷二十

外制

中書試御史大夫除右僕射制

敕古者因右武之官。尊主射之號。始寓天秩。以昭邦儀。惟左右于中臺。實師長于庶職。諒非肅哲之劭。曷允僉謀之同。疇庸匪私。惟德之舉。具官某。莊重不倚。寬博有謀。自覽德以逢辰。亟舒文而華國。寢懋忠力。協宣朝猷。訪之以善。而椒闈益熏。嬰之以煩。而銜刃不頓。實有明效。暴于羣倫。曷者付以憲綱。寄之邦直。而能山立盛氣。條舉舊章。褫權豪之匪彝。勗官師而交輔。宜示殊典。進服大僚。噫。總六官之卿。納百揆之路。治本之自出。官成之所得。爲時羽儀。任政梁棟。副我則哲之效。繫乃司寅之忠。往踐厥司。無忝休命。可。

降授太常博士知臨江軍龐籍可尙書祠部員外郎福建路轉運使制

敕具官龐籍。傳曰。舉直錯諸枉。又曰。觀過而知仁。蓋所以判忠邪而貸苛細也。以爾比用局力。參于風憲。露章抗論。多所澄糾。而能陰辨。屢匿斥言。壬人暴于公朝。卒得姦狀。乃以鉤撫之微累。訊證之弗讎。姑從常科。俾降元秩。今閩部遐曠。漕舟須才。宜復郎曹之華。兼還使節之重。體我甄敘。無忘夙宵。可。

皇弟鄭州防禦使允良因鄭州升爲泰寧軍可移別州防禦使制

敕具官允良。藉慶廟靈。參華宗邸。夙陶善教。寢服榮班。曷擇壤于陪京。俾建侯而禦侮。屬茲要郡。介我二

都特表中軍之雄。且壯近郊之守。高牙作鎮。旣易故名。列棨制藩。宜更新部。淮西與密。楚北柔疆。命秩均封。以屏王室可。

衛州團練使充邠寧環慶州路駐泊兵馬部署兼知邠州曹琮可防禦使充秦鳳路部署制

敕。唐制刺史兼使。以禦遏差重。國朝邊屯特將。以攝署爲雄。參付寵權。是屬公舉。以爾具官曹琮。性韻沈懋。風略雋明。地席忠勳之餘。才更煩瘁之使。向資親信。外職訓齊。仍總郡條。且濟戎索。而能威惠克舉。疆場以寧。眷乃岐山之區。奄于天水之會。兵籍尤衆。師律後嚴。宜疇已試之勞。往司善帥之任。當念恩寄。方越常均。無懈克誠。以累先服可。

故左龍武官大將軍昭州防禦使張昭遠可贈觀察使制

敕。夫勞臣竭節。雖歿而靡渝。王者念功。旣往而彌篤。所以合恩義之紀。貫衷榮之終。賁厥英魂。我有成命。具官張昭遠。才謀沈鷺。姿度方嚴。練韜略之大端。席公侯而茂閱。早由差擇。遂服驅馳。洊升諸使之聯。亟攝專城之守。通知疆事。兼濟吏文。展于體以實勤。勵乃猷而克壯。比階勇爵。用領禁屯。方出倚于幹名。遽歸移于末疾。頃亦換司環衛。仍護州兵。庶臻勿藥之和。奄軫聞鼙之痛。永言遺烈。深悼予懷。法賻如儀。廉車正秩。茲爲寵卹。尙克歆承可。

故耀州觀察使曹儀可贈節度使制

夫勤官盡瘁者忠之全。哀亡勸存者義之篤。矧爾帶礪之胄。方備封疆之臣。務罄一心。靡嗇他用。奄遘淪

謝宜錫寵褒。具官曹儀。性資端和。世載勳烈。在昔乃祖。以德冠羣。后從享于太宮。施及而考。以力宣王家。繼仗于齋鉞。負荷宏構。屬于幹材。自階仕于班聯。實積效于勞勩。遂繇別使。入掌禁屯。兼倚列城。出固西園。比嘉控遏之重。改升廉察之權。式佇後庸。克纂先服。美志未遂。修塗已窮。咸自訃聞。實累中惻。俾正登壇之秩。尙識傳弓之謀。歸賻納書。爾或無恨可。

東上閣門使梧州刺史魏昭昞東上閣門使運州刺史王克明並可四方館使制

敕具官王克明等。夫史局有聯。館賓爲重。列于禁籍。用寵邇臣。非勳緒之可圖。顧恩典之疇稱。以爾等並生冠族。均賦美材。早服在庭之班。多更守局之職。曩嘉勤效。洊職官榮。序位天閣。假節州部。然克明曩緣外補。頻復尙稽。而昭昞雖屬近遷。公言猶鬱。俾偕升于近綴。且無格于常科。勉勵恪恭。滋稱恩紀。可。

衣庫副使知廣信軍王果可尙食副使制

敕具官王果。頃自朝紳。改乘使轂。仍委備邊之寄。甫更成歲之勞。屬是軍牙。對遷符守。義當便道。恩有進階。俾升膳局之榮。且壯和門之氣。勉修疆事。毋忝寵章。可。

故內殿承制魏成德可追復供備庫副使制

敕故具官魏成德。早基華胄。亟列內朝。奉使指以實動。更歲期而亦久。向緣微坐。遂免所居。方踐復圭之辭。遽迫藏舟之變。奄然不淑。良用軫懷。宜追寵于故官。俾終榮于厚窆。甄勞念往。尙或嘉茲。可。

右贊善大夫丁禹可諸司副使制

敕具官丁禹。優學儒家。策名官簿。才莅煩而畢給。志越俗而不流。向積吏勤。遂膺州寄。而能樹風遐徼。歸課攸司。敝陟宮坊之聯。甫引朝闈之籍。而夙懷感慨。願奉驅馳。列牘自陳。徇忠彌切。嘉乃兼材之美。俾參貳使之華。勉樹壯猷。以基勇爵。可。

如京副使永定陵副使張懷則可莊宅副使制

敕具官張懷則。以肅給之姿。列禁嚴之侍。洊更歲次。階陟使名。比嘉軒闥之勞。出總山園之衛。恭懷先寢。近在神畿。雖百靈護野而有嚴。願七遷成邑而增重。疇其謹職。宜用推恩。進厥華聯。仍茲舊領。益圖祇恪。副我欽崇。可。

深州防禦使駙馬都尉錢景臻男忱可莊宅副使制

敕某。公爵吾所重。而內使之介。以爲初命。豈惟爾婉孌是厚。實我諸姑之慶也。制名賦祿。以進成人。勉就學能。以需官使。可。

新差知桂州東染院使榮州刺史馮仲巳可洛苑使制

敕桂林守印。必寄材良。洛城苑監。是光使號。以爾貝官。馮仲巳。相門餘慶。世祿舊勞。洊服榮班。果敷休譽。或承軺將命。或握節護邊。寢兼刺部之雄。且啓封侯之業。屬吾遐郡。咨擇幹臣。公論攸先。寵章宜渥。俾進內司之列。往撫南荒之會。靡忘臨遣。用對褻華。可。

故左班殿直楊成可贈崇儀副使制

敕具官楊成。夙以幹名。備于煩使。序服庭臣之列。洵書官簿之勞。美尚方申。修塗早已。克鍾懿烈。可慶高罔。矧盡瘁之未圖。願追榮而有典。內司置使。貳職參華。超爾寵名。以光幽夢。可。

資政殿大學士刑部尚書李迪降授太常卿知密州制

敕言之多誣。實惟殄行。過弗圖改。茲謂遂非。矧三事之舊臣。均一德于同體。表式攸寄。中外所瞻。苟自蹈十匪彝。因難枉于明罰。以爾具官李迪。曩繇才等。出應時須。遭會先朝。參管魁柄。逮余儲邸之日。亦預宮僚之榮。中罹間言。越在外服。朕矜其介節。申乃昔恩。擢自爲藩。付以當國。而忠款靡效。朋比屢彰。雖榮罷十宰司。猶階進于天秩。洵加清職。留冠邇聯。冀省疚以自新。乃構忿而深詆。洎從薄責。咸失事端。噫。進既負幹棟責成之求。退又乖宗工勵俗之德。謬戾若此。良用憮然。跡其矯妄之來。宜正典刑之黜。尙緣哀請。弗忍深懲。特降序于禮卿。且出備于藩守。爾其內訟厥咎。深體至慈。念屈法之惟艱。顧蒙宥而難再。虔佩成訓。以復令名。可。

龍圖閣學士給事中知兗州范諷可責授武昌軍節度行軍司馬不簽署本州公事制

敕名不假人。所以敦乎治體。法無阿近。所以去乎官邪。苟治行之有虧。非彛憲之攸貸。以爾具官范諷。出十世緒。涉乃藝文。洵紆朝紱之華。驟任諫言之責。比嘉抗論。亟用推恩。歲歷未深。寵靈彌渥。而不能罄輸晷節。祇報殊私。墮計簿之舊章。濫公朝之賞典。乃復咨于州部。冒市田廬。陰答利交。公形薦牘。方自陳于鑿鑿。曾不愧于心顏。逮窮置對之辭。盡露懷姦之態。未足決獄。仍擅之官。絜傲蔑之罔悛。願刑章而何道。

特從幽黜。以肅朋邪。俾典午于方州。且省愆于散地。爾惟取悔。余匪棄人。可。

京東路同提點刑獄內殿承制閣門祗候王繼祖可禮賓副使制

敕具官王繼祖。班籍幹材。宮藩遺緒。久備閤司之使。寢承殿制之嚴。赫被朝章。分廉郡獄。赤車所屆。幽狂無冤。曾是稽勞。當茲滿歲。宜遷使範之亞。尙虔刑典之中。益罄勵精。無忝褒擢。可。

西上閣門使梧州刺史魏昭晒可東上閣門使制

敕九閣之嚴。二閣爲重。實謹門籍。用冠使名。且寵東西之聯。俾詳功次之授。以爾具官魏昭晒。資性沈愿。風矩閒華。席慶公臺之餘。累勞軒陛之職。奉承官訓。階序禁朝。自酬績于事經。早兼榮于使部。曷資勤力。參典盛容。歲歷洊周。莊恭彌劭。宜進左扉之局。益重邇臣之班。當體茂恩。免服來譽。可。

左武衛大將軍遙郡刺史王堯明可東上閣門使制

敕滌瑕念勞。人材所以無棄。循階序位。官秩所以有班。矧于公朝。莫非明勸。以爾具官王堯明。地蔭華舊。風規韶遠。憑藉榮任。周歷禁聯。曩緣外家之親。超升諸使之重。入掌賓館。遙指郡麾。自矢遠嫌之防。遂從易地之譴。出監州旅。歸列衛屯。彌越歲時。屬沛恩號。念甄收之有典。因拂拭以爲宜。俾序要司。且繇上閣。勉懷退補。用對亨嘉。可。

戶部尙書夏竦除三司使制

敕周以冢宰制邦用。漢以列侯主計書。而皆內權重輕。外濟調度。衰征慎賦。(案) 衰音儘。齊語相地而衰。征則民不移。原本作寔。征今

改操本建中。合爲使名。我有才舉。以爾具官。夏疎文敏。莊重淹曠。清明自振。揭昌期。漸落臙仕。有精微之學。以導化源。有典誥之辭。以華王體。早符朝野之望。迭處鈞衡之司。清規所存。嗣政攸庇。曷雖倚垣翰之劇。寄居留之雄。歲紀洊更。朝猷增竚。天臺正秩。已穆于僉前。地卿領務。宜歸于職業。兼增食采。尙重官儀。罔憚使煩。體我圖舊。可。

戶部郎中直史館知滄州郭申錫可三司鹽鐵使制

賚海爲鹽。鑄山爲金。不賦于田。不征于關。市而國用饒。此山海所以爲天地之藏。而古者暴威武。擒兇醜。舉是而資之也。其職屬于司會府。必得其佐。謹其筭而收之。則無遺利矣。具官某資性純敏。不以私污義。居朝亡朋。騫然自立。已嘗試于司會府。而以累去職。今還汝以鹽鐵。厥惟舊哉。奏刀旣熟。奚煩朕之爲訓。可。

三司副使制

司計之廢置。歷世莫能定。至眞宗皇帝時。析而爲三。于是事有條。功有緒。交處而不可雜。並行而不可亂。問之百世。朕知其不可易也。然常得才用通敏之臣處之。則法行而政舉。副介缺。丞相以爾等明厲有守。嘗試外計。府帑充實。士馬宿飽。可以貳吾大司農之治。豈惟丞相之言哉。此正朕之所欲求也。置爾其孰爲過哉。可。

新除三司戶部副使尙書工部郎中陳琰可三司度支副使制

敕。夫金布刊令。地壤制征。雖輸入有常而均節爲重。故支度參號。總務在中。副介承業。擇人斯授。以爾具官陳琰。志用精一。材局敏通。筮仕本于學優。修方濟乎儒飾。曩采朝論。升補憲僚。旋試治財之煩。繼將護漕之劇。莫匪最狀。達于余聞。爰以圖旌使勞。貳領民版。成命甫出。聯有序遷。位無相踰。任必差進。改司移用之要。且究析毫之能。勉調盈虛。罔或掎克可。

三司度支副使尙書工部郎中陳琰可三司鹽鐵副使三司戶部副使尙書工部郎中司馬池可三司度支副使制

敕。故事邦計分部。設使介以經其業。雖職任均重。而班著有差。因勞序升。實本其次。以爾具官陳琰。性理純壹。靖而能幹。以爾具官司馬池。器識詳允。和而不流。並飾文來仕。展體首公。簪筆握蘭。分契將漕。休有嘉績。稔厥外朝。頃偕命于使煩。同胥協以陳力。屬乃比局疇以外遷。俾按循階之常。且資奏刀之熟。正郎舊秩。會府劇曹。各懋爾官。以稱恩典可。

尙書戶部員外郎兼侍御史知雜事姚仲孫可三司戶部副使制

敕。國版制征。民部置使。必擇才彥。參主計文。列爲副介之雄。實艱授受之選。以爾具官姚仲孫。踐修士檢。肅給吏資。早階王髦。遂置朝紱。曩疇邦直之譽。且責諫言之良。忠規可甄。輿論彌洽。移總臺屬。亦旣歲時。誠存不流。文克無害。而左戶缺職。通籍類能。差序宿官之勤。允膺遷秩之次。往莅財算。深究事經。勿弛勿苛。尙質最要可。

尙書工部郎中兼侍御史知雜事司馬池可三司戶部副使制

敕國家底慎邦財。建崇使範。以主計之重。訂于列侯。因制用之副。均于小宰。非有幹用。疇允恪居。以爾具官司馬池。行淳而方。識簡而固。絲鄉俊以來仕。積吏閱而登朝。荐剖州符。遠將歲漕。比嘉守土之最。茂贊操籌之煩。朕察其沖恬。考以名實。亟正郎位。俾亞憲綱。時序甫移。品式方屬。而戶版缺任。庭著擇材。雖糾劾未盡其能。且甄升適在其次。特回簪筆之選。用經籠貨之宜。往竭乃誠。無忝榮遇可。

除名人董仲言可團練副使制

敕具官董仲言。曩服朝紳。倬穎邊郡。罔敦飭篋之操。自罹除籍之辜。比荷貸恩。序升散秩。禋禋載洽。謫注尙存。宜卽輔寰之封。且升團結之筵。兼榮視品。仍俾定居。姑務省循。以報存錄可。

太常寺太祝王靖可大理評事制

敕具官王靖。世藉慶餘。仕階蔭格。參名邦祝。祇事卿曹。大比方周。稍遷有典。宜升理讞之局。兼寵臺華之緒可。

太常寺太祝監西京麴院魯有立可大理評事制

敕具官魯有立。爰以妙年。陶于善教。逮延世賞。克服官箴。比由祝策之資。往幹酒材之局。屬茲稽課。協乃懋恩。擢贊詳刑。尙領煩蒞可。

太常寺太祝監江州廣寧監馬璵可大理評事制

敕具官馬瑱。卿屬之華。邦祝爲最。曷試煩于外局。實通質于舊勞。齋狀以聞。滿歲當陟。改司刑讞。姑續事程。勗哉首公。往荷榮典。可。

太常寺奉禮郎梅輔臣可大理評事制

敕具官梅輔臣。陶訓清門。序階榮籍。頗從吏補。休有歲勞。覈狀甚詳。升秩惟允。宜繇抱藹之屬。往參聽棘之評。恪服攸箴。尙續來課。可。

胡仲衡呂友直並除大理評事制

敕具官某等。日者屢肆大眚。囹圄空虛。理官具員而已。然而擇人以詳刑。則不可不謹。若爾某者。皆由此選也。宜及閒暇。益務明習。以稱朕哀矜庶獄之意。可。

元憲集卷二十一

外制

保慶皇太后叔楊知信可贈兼中書令制

敕親親之恩。自家而刑國。善善之報。循本以飾終。矧我慈闈之尊。永懷仲父之懿。申賁策。茲協大倫。故贈具官楊知信。天資朴忠。氣挺才武。早踐勇爵。訓于軍和。宿衛軒營之嚴。該明圮石之略。世逢假革。未盡于壯圖。化但藏舟。奄先于徂運。力命雖屈。慶善並流。洪惟母儀。實係家緒。曩緣傍蔭之厚。洵舉追榮之恩。肆是休辰。彌顯徽範。宜特班于異數。俾增煥于乃宗。卽號將壇兼中書令。且光龍節之重。益顯鳳池之尊。綸檢密章。往付幽窆。可。

楊崇勳祖累贈太師加兼中書令制

敕朕昨以荷三神之釐。疇百執之力。第以封爵。徧于幽明。蓋潤葉者流其根。移忠者本于孝。褒先錫類。邦教繫焉。具官楊崇勳。祖累贈太師守斌。以莊毅之姿。濟和之略。義無苟進。時弗我永。長算屈于浮齡。積善蕃于重葉。慶靈叢啓。秀傑嗣生。感會風雲之期。烜赫旌常之典。內幹幾密。外扞蕃宣。本燕翼之有來。宜寵靈之上集。賚章洵舉。而殊數未昭。爰益鳳池之華。更光馬鬣之兆。永言幽漠。尙識褒崇。可。

縣尉李述可縣令制

敕具官李述。頃由銓掾。尉乃縣封。善率追胥。悉擒蒐慝。書勞有狀。援比載明。宜紆縣綬之華。且酬官簿之最。往祇休命。圖績乃庸。可。

前吉州龍泉縣令監蘄州蘄口權務吳處仕。可陸州建德縣令制。

敕具官吳處士。階蔭服官。積資參調。曷司權利。方責歲勞。屬郡將之專威。挾吏文而巧詆。俾從罷免。尋覽訴陳。別制下推。枉情咸露。適舉殘苛之罰。宜均凜雪之科。姑復舊階。往緩遐邑。勉恪而守。毋恤後艱。可。

駙馬都尉李遵勗。兄加贈太師制。

敕。朕昨以擁三神之休。均百順之錫。第以封爵。徧于臣工。然流光者慶蕃。位重者文縟。特因下嫁之感。申及孔懷之恩。弗檢常襲。是謂殊數。具官遵勗。亡兄具官累贈太傅某。寬明莊重。淳深幹敏。克纂堂構。自結本朝。以通侯之世家。備能臣之煩使。預平狂狡。陰濟惠和。或握節聘戎。譽高使表。或剖璋臨部。政推邊最。修塗未極。景算夙淪。天啓善祥。地華嫺睦。早慰在原之感。亟欽服袞之榮。及此均禱。詎忘旌德。宜極師璜之品。載煥京阡之榮。可。

皇兄故武定軍節度使檢校太保允寧。可贈太尉。追封信安郡王制。

敕。姬典之盟。異姓爲後。漢策之誓。非劉不王。矧我文明之友。方隆帝室之表。奄忽遘沴。追旌可懷。皇兄具官某。姿局端華。理識明劭。幼陶惇敎之訓。勤服糾綏之箴。輔成天資。穆我邦族。而復地在尊戚。位躋中權。奉齋鉞以彌恭。戒朝鑾而有恪。夙夜之志。造次弗渝。固將分寶展親。秉德陪朕。合是多福。登乎永年。時惟

不備壽則中奪永惟痛悼震于予衷今以三公之上司二等之高爵昭列殊典申賞令猷噫魂而有靈尙嘉我之徵命也可

屯田郎中王渙父礪可贈尙書左丞制

敕朕載耒勸耕舍爵行賞均厥慶賚塞乎天淵永惟通籍之列咸被流根之澤所以勸存而厚亡者也具官某亡父故具官某早以士彥登于朝次有文以飾吏有孝以顯親名附史籍行灼鄉品騁修途之未及屈浮齡而前謝善訓諸子不隕令名寘我周行莫匪嘉績宜徇褒先之請以顯教忠之族星闈都坐天轄上僚足資英魂用告幽窆可

司天監主簿馬日房可司天監丞制

敕具官馬日房執技占官勾稽監事比奉營宮之役頗資推策之勤奏牘自陳賞科惟允俾遷丞率勉荷旌酬可

司天監丞來慶祥可降授司天監主簿制

敕具官來慶祥隸業侯臺參榮官簿固當夙夜審察躔離輒輕肆以上書且稽測而違實迹其詭辯合正嚴科聊從降秩之文尙聯視夜之職勉思勤術以荷矜恩可

太子中舍通判鄭州李宋卿可殿中丞制

敕具官李宋卿祇服善猷克纂華緒任宿其業籍通于朝比輟宮坊之良近參輔郡之守具有新最能續

舊庸官簿當遷。盾省爲次。卽授之美。爾其勉哉。可。

太子中舍監在京廣濟倉沈維恭可殿中丞制

敕具官沈維恭。公臺舊門。軒冕重世。階蔭來仕。歸課屢周。比踐儲坊之僚。兼司國廩之契。歲攷通滿。勞簿上聞。當遷之榮。中御爲次。往服丞率。尙幹委儲。可。

太子中舍通判德州薛中孚可殿中丞制

敕具官薛中孚。積學而優。展體來仕。洵稽官闕。入籍治朝。曷因通守之行。已在當遷之目。欲觀從政。姑俟彌年。逮此有勞。詎宜留賞。卽升盾省之秩。猶贊州符之雄。勉結歲成。無忝恩擢。可。

奏舉人前寧海軍節度判官蓋平可殿中丞制

敕具官蓋平。嫻曉吏文。綢繆使職。游閱舉知之奏。已經覈課之詳。姑欲試煩。久茲倅事。選條再集。薦牘彌多。宜酬戎幕之勤。入通盾省之籍。可。

追官人前守殿中丞劉景可殿中丞制

敕具官劉景。早緣儒科。階置朝綬。比倅州事。自陷憲防。而具劾之初。如律爲重。尋用原情之典。裁報免官之論。恩霈維新。辜累宜釋。俾通閭牒。且復仕塗。勉爾矜修。體我甄序。可。

審刑院詳議官太子中舍李倩可殿中丞制

敕具官李倩。明習吏文。服勤官次。早補刑卿之屬。近更財權之煩。曷籍勵精。擢佐評讞。罪繇所麗。論報甚

詳歲在質成。恩有加秩。宜承鈞盾之府。尙服簡書之司。勉悉爾心。毋懈予命。可。

奏舉人前權平江軍節度推官張去惑。可將作監丞制。

敕具官張去惑。本偕士秀。參服銓條。比奉賓帷之籌。頻承漕府之檄。分捍水道。頗還居民。監司露章。衡審稽實。宜信朝賞。且旌吏勤。往陟匠卿之僚。無忘虞弁之守。可。

汝州長史王煥。移虢州長史制。

敕具官王煥。早以敗官。甫從善貸。列于州佐。近在寰畿。輒稽便道之行。陰狹千私之醜。蚤緣女謁。繕作奏函。訊逮甚明。憲章罔赦。屬經洪霈。聊徙外藩。無貳前非。終取砥悔。可。

著作佐郎監華州鹽酒稅務梁堅。可祕書丞制。

敕具官梁堅。故事。譔著之佐。雖出補他任。而滿歲正課。猶進丞本省。蓋以因官成而育材類也。爾早階科秀。深敏吏文。洊緣外舉之章。入參中祕之局。彙圖親祿。卽筭利司。煩使有能。陟狀咸最。宜席道山之序。且通閨籍之華。尙結後勤。毋忝榮次。可。

三班奉職高器之。可將仕郎守高郵縣尉制。

敕具官高器之。郎名之家。素業相紹。早緣世賞。遂列使班。比控于朝。願從補吏。嘉其清尙。無忝爾先。宜易命于銓流。且詰封于縣禁。勉修官最。以荷恩褒。可。

濟州鉅野縣尉孔宗願。可濰州北海縣尉制。

敕具官孔宗願。系出聖門。蔭緣宗眷。比除邑佐。且便鄉閭。而聯官之人。實乃媼近。避嫌自列。易地有常。灑澼控疆。邏盜分職。往服榮牒。無貳乃誠。可。

權寧國軍節度判官茹宗元可大理寺丞致仕制

敕具官茹宗元。早擅民貲。志希仕籍。嘗緣入粟之募。遂服解巾之榮。逮賓贊籌。已嗟耄缶。願還所任。宜允來陳。尙序寺僚。且光卿品。可。

寧化軍判官李祐可太子中舍致仕涇州司法參軍田鳴鶴可太子洗馬致仕磁州司戶參軍劉宗道可大理寺丞致仕制

敕具官李祐等。各繇官牒。籍我吏銓。從公實勤。歷歲茲久。並控誠于晚節。冀還職于有司。知止可嘉。增秩奚吝。儲坊置屬。卿棘有僚。寵爾歸休。且激頽競。可。

中嶽廟令劉碩可太子洗馬致仕制

敕具官劉碩。曩中學科。晚服銓調。比繇縣尹之秩。來奉嶽祠之嚴。迫于暮齡。祈致所事。東朝洗馬。外著垂紳。特示寵遷。且賞知止。可。

永興軍節度判官何操可太常博士致仕同州郃縣令寇寧可太子中舍致仕制

敕具官何操等。階于儒科。服在銓牒。或屢賓大府。或久宰善封。並陳遷事之年。且圖佚老之舉。禮臺通籍。儲禁其僚。各服朝紳。歸寵鄉閭。可。

前韶州仁化縣令公孫知止可太子中舍致仕制

敕具官公孫知止承乏吏資累勤縣譜間繇遐任歸質攸司自陳艾服之勞冀辭銓調之補嘉聞悃愬宜遂燕安引籍儲坊掛冠鄉閭庇私從欲尙荷朝榮可

密州莒縣令劉維清可太子中舍致仕制

敕具官劉維清策名官簿分政銅章課考寢深齒力滋晚騰章來上解組是祈憫薄景于桑榆遂掛冠于田里特遷宮采以寵鄉評可

解州團練使邠寧環慶路駐泊兵馬部署張敏可大將軍致仕制

敕具官張敏階附先恩踐揚禁職累升別使遂視通侯勲書邊瑣之勤久正軍團之重據聞謝病尋請致官憫握節之載勞且據鞍而難強不能者止良克有終宜進環衛之名往寵歸休之樂體余念舊勉爾頤生可

供備庫副使溫臺明越衢婺處州都巡檢毛昌達可左武衛將軍致仕制

敕具官毛昌達早繇強力祗服近班展體知方使煩無懈頗酬材裕升列使華勲總州部之兵遠嚴山越之選遠茲移疾姑念乞身省章卹然從欲斯在俾陟名于環尹仍歸事于禁聯勉訪全醫尙究遐福可

除名人楊安節可太子右清道率府副率致仕制

敕具官楊安節屢坐重科俾除初籍憫嘗聯于使範宜復列于儲官仍遂退休庶寬痕玷勉思前悔尙服

寵名可。

尙書禮部員外郎天章閣待制范仲淹可尙書吏部員外郎權知開封府制

敕內史列郡之首。邦風所繫。天官一臺之妙。郎選質先。歷求諸朝。我得良士。以爾具官。范仲淹。才給而肅。行介而通。早繇雋科。洵質勞閥。逮育書林之秀。兼責諫蒲之言。確然忠規。稔厥時論。再臨州甸。咸結民思。勳旌雅猷。進陟嚴署。甫從宣室之召。仍兼京劇之司。往攝煩政。永爾終譽。可。

奏舉人前桂州錄事參軍周堯卿可著作佐郎制

敕具官周堯卿。秀踐儒科。選條補吏。嚮督郡郵之罰。自甄官簿之勞。使穀露章。朝紳舉最。屬于銓審。參應寵褒。宜引籍于祕丘。且勸能于公路。

元憲集卷二十二

外制

開封府推官邊調可開封府判官太常丞韓琦可開封府推官制

敕具官邊調等內史之治官政所叢必擇乃僚往贊煩務以爾調久服吏事有資材之美而濟以勵精以爾琦早擢雋科有緣飾之文而輔以詳允並飭厥朝譽播于人間或京府奏刀試于已效或國帑操契用匪盡才宜遞補于缺員且參觀于婉畫我有榮序遲圖爾勞可

益州觀察推官楊沆可權蜀州軍事推官制

敕具官楊沆近繇銓啓遠佐使籌會新辟之有從顧舊員而爲闕宜因郡幕改珥賓簪効智則同書最爲勉可

節度推官郭昌可西京留守推官制

敕具官郭昌比調銓臺往參戎幕屬師臣之聘吏顧賓席之溢員惟是留都甫當闕屬宜從易地無廢修方可

節度推官蘇賁可某州推官制

敕具官蘇賁以戎帥就藩辟書補吏適茲俞請未及之官而使府改麾賓籌佇畫新選旣隨于將幕故

僚宜奉于廉車。是亦寵名。尙圖來效可。

尙書度支員外郎祕閣校理劉立禮可開封府推官制

敕具官劉立禮。神赤之區。海寓同會。贊是尹政。必咨才良。以爾業履。競修幹用。開濟早服。文館有刊。諺之勤。屢倅州符。多飾吏之術。迹乃試效。宜于使煩。且緊望郎之華。往參內史之劇。勉勵風力。以對寵褒。可。

史官楷書陳宗閔可蘇州常熟縣主簿制

敕史官楷書陳宗閔。史局編名。書觚奏技。久隨臺府。專給記曹。嘉時宰之序勤。宜選條之咸集。勾稽邑簿。正秩銓流。勉蹈廉隅。毋忝恩錄。可。

三班借職馮且可秀州華亭縣主簿制

詩禮清門。簪裳華緒。比因遺奏。遂置末班。亦旣從公。居能寡過。且自陳于世烈。冀入預于銓流。嘉乃素懷。易之榮牒。勾稽善邑。無忝先猷。可。

前真州六合縣主簿陳乙可潭州湘陰縣主簿制

久違銓集。自便家居。冒隱地征。占擾閭左。雖罪繇獄具。而罰以赦原。宜因佐邑之資。且爲去里之役。勉修來效。用贖往罪。可。

同知樞密院李諮除尙書戶部侍郎知樞密院制

敕國家總右武之柄。慎惟幾之原。號爲皇樞。以經天緯。非有明達之懿。疇幹宥密之繁。矧道推同寅。績昭

已試。宜階上著。庸鬯大猷。具官李諮。器采忠純。業履宏劭。亮節堅于石席。明慮協于蒼龜。仰惟先朝。擢在榮序。啓迪言選。藻潤帝謨。肆朕纂臨。益俾親近。遞宣方岳之政。再籠天下之財。爰圖累勞。參贊基命。百汰無耗。屢照不疲。休問日升。衆事寔允。是用進地官之亞列。付皇極之祕機。寔陟上司。以輔予治。方今四鄙弗警。五刃並發。復茲明哲之才。交修朝夕之務。何煩訓勅。往服寵光。可。

參知政事王隨除尙書吏部侍郎知樞密院制

敕。國家法象紫樞。總攬皇極。建爲使範。均厥宰司。必求經世之賢。參圖基命之要。我有公議。屬于名臣。具官王隨。器涵虛明。道與和正。感會先帝。摠發懿猷。擢高妙之哲科。賞文思之休運。洊階廕仕。入服大僚。自朕震坊之初。嘗膺望苑之選。逮于纂紹。固已延登。松寒後凋。井德無改。曷由近侍。升贊元鈞。名實具瞻。政亦惟允。眷乃本兵之地。宜咨同體之賢。是用陟天官之貳卿。幹籌幄之幾事。順攷古道。對揚王休。矧試政之已彰。詎錫命而多訓。往踐厥位。永保令名。可。

故翰林侍講學士尙書戶部侍郎馮元可贈本曹尙書制

敕。夫保德終譽。名臣高致。悼賢加楹。前王令典。具官馮元。性度沈簡。風猷淹素。識探聖繫之奧。文擅詞宗之華。曩踐俊科。亟膺眷顧。傳經釋義。排去異端。登庠攝職。照明羣志。寔階前席之間。入直層構之嚴。肆朕升儲。實參僚案。逮于纂歷。彌資講勸。綢繆露門之學。黽免禁林之游。或裁成信書。或總制經禮。有資必判。應鑒弗疲。頃雖常借郡章。而復進聯卿貳。貪寬中授道之益。除壺遂倚相之期。時胡不庸。殲我皇士。追惟

往範震于余懷。天臺設官。地板攸重。刻之密印。尙賁泉塗。魂而有知。歆此嘉寵。可。

尙書刑部郎中知制誥晁宗愨可起復制

敕。夫時之須才。則求忠于孝。仕而委質。則推義斷恩。眷乃司言之臣。嬰于去位之戚。敦還舊次。抑有彝章。以爾具官晁宗愨。業履清淳。猷爲肅給。早聞才劭。入掌贊書。敷大號以惟精。攝攸司而兼裕。殆茲罹閔。姑許解官。躬欒棘以盡哀。竭誠信于襄事。歸虞云已。卒哭奄周。當因時以殺情。念展體而宣力。矧家無辭事之職。禮有從宜之文。權廢至懷。紹修乃職。罔矜介節。往復褒章。可。

司天冬官正楚衍可秋官正制

敕具官楚衍。隸業疇人。窮精天部。嚮緊率職。俾奉營宮。爰逮落成。未之甄錄。宜改司于秋正。俾紹勸于官勤。勉服寵章。毋墜前緒。

尙書考功員外郎知均州張仁惠可尙書膳部郎中制

敕具官張仁惠。智諳而材。綢展國體。早承宰旅。能輯事經。旋寵爲郎之華。亟膺出守之寄。二邦通課。三載質成。宜寘司膳之選。且候及瓜之期。可。

尙書司勳員外郎判三司都磨勘司兼主轄支收拘收司文洎可尙書主客郎中制

敕具官文洎。昔尙書主賓客者。有南北之曹。官名相沿。郎選差重。矧參治財簿。通質歲成。循名第勞。遷秩茲允。以爾才敏而慎。節甘而清。曩繇朝僉。出主漕輓。歸有政最。復序計聯。惟金布覆稽之煩。兼文符檢結。

之會。濟以舊課。宜于寵章。俾正握蘭之資。且彰奏刃之熟可。

利州路轉運使尙書兵部員外郎王軫可尙書工部郎中梓州路轉運使尙書司勳員外郎張從革可尙書主客郎中制

敕具官王軫等。國家崇建外臺。總領諸郡。雖任專漕輓。而責在澄清。矧惟蜀疆。置使差重。績苟用乂。賞則有加。以爾軫。悃愾不流。文敏毋害。以爾從革。純素自檢。廉介旁通。並久服朝聯。懋揚政範。奏刃司會。無體之難。操籌外計。有毫釐之析。兼蘊善術。克綏遐氓。歲月當遷。閱閱來上。按有司之練實。嘉能吏之修方。儻工劇曹。典客華序。勿移擁傳之任。咸正爲郎之選。往欽並命。以續乃庸可。

尙書都官郎中監蘇州茶鹽務陳覃可尙書職方郎中制

敕具官陳覃。早飾吏文。久階郎選。委蛇朝檜。荏苒郡章。比徇奏封之祈。往臨筭利之局。華皓靡懈。閱閱當遷。省曹之名。方志爲重。進服厥位。尙酬爾勞可。

諸司使副陝西緣邊都監知州葛宗古王從政米吉張世昌並轉官制

敕具官葛宗古等。夫西部之防。與天水屬安化。亘平涼。奄涇部。皆宿兵處也。參護屯旅。抑惟幹臣。將責後庸。且寄蕃獎。以爾等咸用才力。奮于班聯。出有將命之勞。居多試效之益。質乃功簿。稔于予聞。因使煩之有初。固並命而惟允。或進貳別帑。或增數內朝。各踐寵階。往固邊略可。

三司鹽鐵副使尙書工部郎中郭勸可天章閣待制知延州制

敕待對延閣。本咨名儒。制威邊藩。是重良守。二選參妙。兼材實難。以爾具官。郭勸資性。端廉操度。詳允夙。以士秀。服于官常。自濯纓登朝。遊刃從政。有清譽以軌俗。有讜論而斥私。及序登諫。副總臺事。言益而彌。慎氣正而不流。旋嘉乃忠。姑試以劇。入充主計之貳。方究析毫之勤。眷惟誥勞。介在西鄙。而郡將須代。朝議咸推。宜陟秘嚴之華。往專綏控之任。若其訓定戎索。保障民生。寬猛有宜。威惠交養。茲所望于爾也。得無勉哉可。

三司鹽鐵副使尙書兵部員外郎陳貫可尙書刑部郎中直昭文館知相州制

敕夫應積星之躔。帖廣內之直。符守兼委。恩數實繁。時酬舊勞。乃允斯典。以爾具官。陳貫。性局彊濟。業履介廉。早擢俊科。稔聞吏閥。風迹聳于州部。幹固表于使臺。曷藉官成。入治財策。副幹大農之用。參主列侯之書。精心所經。白首彌厲。嘉聞久職。宜冀稍遷。用正郎闡之名。協修文館之職。往撫雄郡。併示寵章。循踐清階。毋替厥服可。

尙書兵部郎中知潭州劉賽可太常少卿直昭文館知廣州制

敕百粵之會。督府表于南溟。九卿之亞。奉常尊于右棘。惟是文館。寵昭儒服。我有命數。屬之材良。以爾具官。劉賽。性劭直清。業總和濟。始階鄉秀。寢講吏文。內則居評刑受計之煩。外則宜頒條將漕之職。躬實勞止。譽亦藹然。淹徊諸郎。華皓一節。嚮倚湘中之劇。未更歲次之遷。屬番禺守方符虎須代。適當使道。宜委于蕃。雖臨遣弗遑。而進升惟舊。俾改括河之貳。仍預登瀛之游。往撫裔邦。毋忝朝渥可。

尙書兵部郎中天章閣待制張逸可樞密直學士知益州制

敕斗樞之庭。分置秘職。所以待名學。井絡之次。下爲督府。所以難守臣。參付寵章。可謂高選。以爾具官張逸。志託夷遠。思懷沈濟。曩繇邦秀。寢服吏資。濯纓登朝。則見許于甘節。奏刀治劇。則毋害于峻文。洵假使軺之雄。咸奏方漕之最。曷咨公論。遂陟禁班。就委梓潼之區。歸承京兆之缺。惠稔西俗。政和中都。試才所更。二效尤著。必能將我明命。綏厥遠黎。矧蜀漢之繁。包邛犍之險。土沃風侈。民夥事叢。有旌纛以制師。有刀布以藝貢。總是煩使。姑寄爾能。爰卽中臺之華。進兼密署之直。往叱忠馭。無忝訓辭。可。

尙書刑部郎中天章閣待制李紘可龍圖閣直學士知秦州制

敕層禁藏書。以深嚴待儒選。邊瑣擇守。以循良制疆事。矧羲圖廣內之秘。天水諸戎之衝。是宜延登。且重臨遣。以爾具官李紘。局度詳正。風力敏彊。早飾吏文。見稔朝論。或執簡憲署。意無隱辭。或操籌計庭。使有餘範。曩旌幹固之效。入升侍從之聯。尋駕傳封。外主漕輓。兩河之績。再歲有聞。來復近班。益見純節。而价藩缺帥。官簿類能。得是幹良。愜乃褒陟。宜仍應宿之選。序直巢阿之華。欽佩寵名。往撫雄郡。勉布威惠。副余倚成。可。

金紫光祿大夫檢校司徒使持節順州諸軍事順州刺史兼御史大夫知順州兼充溪洞都巡檢上柱國京兆郡開國侯食邑一千五百戶田忠俊可加檢校太保食邑三百戶食實封二百戶銀青光祿大夫檢校禮部尙書忠順將軍知溪洞安福州軍州事充寧邊寨東路沿溪洞把截外夷都巡檢

副使兼監察御史上騎都尉田忠穩可加檢校戶部尚書上輕車都尉銀青光祿大夫檢校國子祭酒充溪洞懷遠將軍知歸順州軍州事充寧邊寨東路沿邊溪洞把截外夷巡檢使兼監察御史武騎尉田洪部可加檢校太子賓客制

敕具官某等統帥部族守圉邊陲忠順自效遠邇無敵緣大禮之中慶宜洪恩之博及俾增爵秩以示殊寵可

元憲集卷二十三

外制

尙書司封員外郎知明州張弇可尙書祠部郎中制

敕具官張弇。資性淳夷。操行廉素。勲咨郎選。參按縣畿。心焉首公。善弗求舉。嘉聞美課。尋寵巨藩。而前此攸司。大比來上。始延恩格。更竢歲成。亦旣一周。靡或他吝。宜真握蘭之秩。廉懋剖符之績。可。

尙書屯田郎中知衢州胡晏可尙書都官郎中尙書駕部員外郎知慈州涉積可尙書虞部郎中尙書比部員外郎知巴州陳甫可尙書駕部員外郎太常博士知蒙州田瑜可尙書屯田員外郎制

敕具官胡晏等。故事。南宮郎專治臺務。國朝均內外之任。率真拜而煩使之。亦旣有遷。尙本其次。以爾等咸服士操。胥濟吏文。游歲結勞。登朝有著。分掌州任。參穆化條。前勤著聞。今治通舉。合是課目。愜予褒章。都隸朕虞。僕駕田部。或正或貳。勉卽厥官。可。

尙書虞部員外郎馬尋可尙書比部員外郎太常博士張泌可尙書屯田員外郎制

敕具官馬尋等。夫臺郎始于墾田。省書總于鈎比。皆一時之俊選也。以爾尋効智肅給。持法敏詳。而嚮守軍牙。有緣飾之政。以爾泌屬辭辨麗。秉操廉約。而游腰縣組。有撫字之勤。並見考歲成。來結官最。宜階承務之劇。且勸敍才之規。往服寵嘉。毋怠祗飭。可。

太常博士通判州馬僑可尙書屯田員外郎國子博士知濱州盧南金可尙書虞部員外郎制
敕具官馬僑等或俊茂服官或淳固宿業各敏乃事序登于朝曷者輟貳邊麾假領州檠雖新莅未久而
前課已周宜酬三歲之積並允一臺之拜體余郎選勉爾吏勤可

國子博士郭長吉可尙書虞部員外郎通判西京制

敕具官郭長吉業治儒經仕優官簿早階郎署協布郡條失于保任遂罹降斥屬郊恩之蕩燬加京守之
薦能俾復典虞之曹往參主鑰之政悉心營職以稱所知可

尙書職方員外郎知衡州任且尙書職方員外郎監衢州清酒務郭昭著並可尙書屯田郎中尙書

虞部員外郎通判廬州陳執方可尙書比部員外郎制

敕具官任且等各以吏能參寘部選或州藩爲政頗迪惠和或權酷示譴已淹時序並通前績偕集攸司
正秩員外清曹劇選按名卽授尙勛官成可

尙書都官郎中知處州黃禹昌可尙書職方郎中淮南路提點刑獄尙書祠部員外郎

案此下原
本有闕文制

敕具官黃禹昌等朕以較吏之法責于攸司官無內外三歲一考循課卽授褒勸在焉以爾禹昌勤身蹈
和白首無懈以爾越小心絜矩清猷彌劬並累書閔簿參寘郎闈或華榮爲州藉教條之熟或赤車按部
副欽恤之懷率以年庸愜我朝獎陟司方志貳度國征往服寵階尙結來最可

應賢良方正科太常博士蘇紳可尙書祠部員外郎充通判應茂才異等科張方平可秘書省校書

郎充知縣制

敕具官蘇紳等。國家振復賢科。咨求邦彥。非以角空文于無用。蓋將佇遠猶之斯告。膺是選者。不其難哉。以爾等抗志經墳。沈精道索。或昌辰委質。已列于朝綏。或別都論秀。洊偕于計物。並能貫穿前載。發揮大猶。溢奏牘以獻文。藹薦章而署行。爰臨使坐。躬覽著篇。雖異等之未躋。亦洽聞而可錄。茲焉第賞。誠協育才。噫結華綬以陟郎曹。褫野巾而登秘省。贊條外闈。字俗邇封。併示寵章。勉永來譽。可。

十二考人前明州錄事參軍劉愿。可大理寺丞。奏舉人前渭州司理參軍張京。可著作佐郎制。敕具官劉愿等。各以勤廉。參于調補。或郡綱督罰。通續前勞。或州獄守公。見稱敏識。閱其吏啓。嘉乃官成。宜從振滯之條。兼懋舉知之格。省僚寺屬。勉服榮階。可。

十二考人前權楚州團練判官高中正。可大理寺丞。奏舉人前江陵府節度推官劉湜。可著作佐郎制。

敕具官劉湜等。咸絲吏資。早介戎幕。或風力清劭。見舉所知。或勞考優深。載符允令。得于銓啓。嘉乃官成。祕局刑司。各備其屬。可。

十二考人前鎮國軍節度推官知鄜城縣宋辰。可大理寺丞。奏舉人前權岳州軍事判官監納潭州茶米場陳選。可著作佐郎制。

敕具官宋辰等。比者作爲恩格。差次使勤。銓覈有條。升獎惟敘。以爾等屢由選集。出補賓從。或假以縣章。

積勞于功狀。或莅乎茗稅。見保于監司。宜懋乃勞。改躋優秩。佐郎丞率。分以命之。可。

十二考人前權保大軍節度推官張從宜可著作佐郎制

敕具官張從宜。久調中銓。屢賓外府。近援赦格。歸質歲勤。緊書考之。滋多。願振淹而有序。宜緣信賞。俾陟榮塗。勉佐蓬丘之華。更圖縣綬之舉。可。

殿中丞知單州碭山縣王文英可國子博士太子中舍知真定府馮日宣可殿中丞制

敕具官王文英等。國家多出中朝臣。以宰百里。蓋欲寵厥任而惠綏吾民。政苟有成。賞不淹晷。旣以勸善。亦俾久官。惟爾等榮名儒家。效智公局。日以謹飭。蹈于廉隅。修方累勞。遂列閨籍。比荷臺詔。出撫縣封。並能審諭教條。弭服愁艱。灼有善狀。列在攸司。因其大比之辰。且光卽授之寵。經庠盾省。分以命之。益勵乃誠。毋替來譽。可。

殿中丞新差知溫州平陽縣楊中和可太常博士太子中舍張子元可殿中丞制

勅具官楊中和等。夫考課之法。所以明淑慝而敘功次也。馭厥郡吏。存乎彝章。以爾等並服朝紳。洊更歲箭。或經明有法。克劭素猷。或門調累勞。頗書善狀。屬茲大較。咸用序遷。議禮曲臺。分曹盾省。各祇寵渙。無替令名。可。

河東路轉運使尙書兵部員外郎陳琰可尙書工部郎中殿中丞通判興元府李公謹可國子博士

太子中允直集賢院知鄭州呂公綽可太常丞太子中舍知明州奉化縣陳世長可殿中丞制

敕具官陳琰等。夫冬部郎曹。冑筵師職。容臺之卿屬。盾省之監聯。並爲華階。以敍能吏。惟爾等懿文典學。完行幹材。或將漕使軺。或剖符寰郡。或倅丞于州事。或撫輯于縣封。並質歲成。克厭朝賞。宜就增于榮秩。且究懋于乃勞。成命罔私。余訓無忽可。

尙書虞部員外郎通判益州楚經可尙書比部員外郎太常博士知越州蕭山縣王簡可尙書屯田員外郎殿中丞前知封州劉直溫可國子博士太子中舍知漢州綿竹縣趙壹可殿中丞制

敕具官楚經等。尙書曹有比勾掌屯之員。中朝臣有師庠盾省之屬。各著官簿。以陟吏資。惟爾等智效事經。籍引朝紱。或勤于外補。方贊郡條。或績乃舊勞。累光縣譜。並齋閔來上。質歲有周。宜序美資。交獎成績。毋或懈位。以忝懋功可。

尙書比部員外郎提舉兗州仙源縣景靈宮晁邁可尙書駕部員外郎國子博士通判南安軍徐紹齡可尙書虞部員外郎殿中丞集賢校理知復州王琪可太常博士太子中舍知鬱林州查冲之可殿中丞制

敕具官晁邁等。課功之黜陟。視勞之殿最。我有彝法。付之攸司。以爾等早服仕階。進班朝次。或華顛郎署。或類弁經庠。或文雅游書林。或廉端備儲案。並緣外補。參積歲勤。然方奉真祠。倅軍壘。守支郡。撫遐陬。宜卽官成。序進恩等。今以駕曹虞務。藹野盾省之屬。分以命之。其各無忽可。

十二考人前權建雄軍節度推官張行成可著作佐郎奏舉人前南安軍錄事參軍慎晃可大理寺

丞制

敕具官張行成等。國朝考吏。雖黃綬一命。皆責在銓審。而覆于殿庭。矧厥累勞。固用稽實。以爾亟參調補。咸寡悔尤。或年老應于赦條。或保任列于公牘。宜從信賞。予以懋官。秘省卿曹。各備其屬。可。

十二考人前權保康軍節度推官田穎可。著作佐郎奏舉人前陳州司理參軍孫淮可。大理寺丞制。敕具官田穎等。問者詔書以吏久不遷。始限考法。才而可任。參責舉知。蓋因方任人。非可以一故也。惟爾等或從事戎幕。或訊獄輔州。年勤應條。薦狀符格。覆自銓啓。愜于余求。省屬卿丞。各服榮序。可。

前權清海軍節度掌書記林杞可。著作佐郎前明州錄事參軍錢訪可。大理寺丞制。

敕具官林杞等。或士類美林。或王門遺緒。並沿官牒。久服銓流。杞以作記之工。載華戎府。訪以督郵之敏。流澤藩掾。薦能累牘。鈎課如書。蓬丘佐員。棘路分案。各踐榮次。無忝爾知。可。

大理寺丞通判邕州鄭史可。太子中舍衛尉寺丞知益州成都縣王景良可。大理寺丞制。

敕具官鄭史等。補吏有資。施政惟敏。比緣卿屬之選。分任邊州之選。或協贊守條。或懋成宰課。並緣歲滿。宜獎職勞。儲案通閨。法丞署局。各祇榮次。尙續來勤。可。

十二考人興元府觀察支使張肅可。著作佐郎奏舉人前真州錄事參軍張孝友可。大理寺丞制。

敕具官張肅等。載名銓符。展體官次。或序才累牘。委公車之封。或結課周星。無杜陵之殿。並列在奏籍。應于賞科。蘭臺佐郎。棘位丞屬。勉服並命。思稱懋官。可。

十二考人前益州節度判官尙頌可殿中丞奏舉人前權筠州軍事推官林高可著作佐郎前眞定府錄事參軍張立可大理寺丞制

敕具官尙頌等。夫中御之丞。列朝品。著書之佐。參仕彥。司刑之屬。選吏文。皆敍才之榮塗。勸勞之優秩。以爾等咸有成績。調于中銓。或年考寢深。或保任狎至。質諸功狀。符厥賞科。宜並命于華聯。俾陳力于來效。可。

大理寺丞知蘇州長洲縣薛糾監杭州糧料院杜直並可太子中舍光祿寺丞通判海州石延年可大理評事監徐州鹽稅務王諄可光祿寺丞監霸州鹽酒稅馬湜監潁州酒稅李熙政並可衛尉寺丞簽署鄭州節度判官廳公事王政路可將作監丞太常寺奉禮郎監開封府陳畱縣鹽稅務晁仲紘可大理評事制

敕具官薛糾等。胄緒之良材。敏從政。率階京署。參服吏文。或化協郡條。或最聞縣譜。或幕籌甚婉。或局利載登。並稽三歲之庸。宜升一等之秩。儲察卿案。各懋乃官。可。

將作監丞王拱辰可著作郎直集賢院制

敕具官王拱辰。夫東觀之論著。麗正之刊輯。皆漢唐樂育之地也。非曰時彥。疇允恪居。以爾業履端和。藻章韜映。蠶絲辭等。擢冠士科。尋補匠卿之僚。仍倅州麾之政。而洵銜家卹。頗隔歲成。比召復于故聯。且自陳于素蘊。乙籍可喜。給札有規。逮閱試言。茲顯能賦。宜通秘丘之籍。兼光書殿之舉。欽服朝範。循致寵階。

可。

太常博士直集賢院韓琦可右司諫供職制

敕具官韓琦。昔蕭望之有言。以諫官補郡。誠大惠也。然朝無諍臣。所謂憂末而棄本。朕甚寤之。今茲擢才。實曰稽舊。以爾器質純茂。識略淹該。名高俊科。職在文館。嘗倅事于京劇。旋贊畫于財煩。官成有聞。朝論惟穆。屢觀奏牘。求引邸章。雖徇使符之行。屬圖言責之補。且告猷近署。與頒條外藩。循名旣殊。所益良重。宜輟往授。以服寵班。兼去儀臺之名。尚仍仙殿之局。企佇忠鯁。副此獎甄。可。

授趙元昊開府儀同三司依前檢校太師兼中書令定難軍節度使西平王加食邑實封制

門下。朕三歲而郊。述修常祀。四海以職。同歲上儀。屬膺貺施之辰。普均慶賚之典。眷我良翰。撫于西人。聿圖成效。用蕃嘉獎。具官趙元昊。資植端厚。器局沈和。克負家聲。光啓王爵。緇衣以改造爲美。甲令以能世稱忠。邊最數聞。時事狎至。自禳燔前戒。妥侑僉升。輸珍寶來。固圉惟謹。罄露乃心之恪。益昭維屏之勳。宜錄久勤。川參信賞。夫均儀公府。酬勞采食。實租奉之數。叢典冊之華。茲爲寵章。並照方國。於戲祀惟大事。爾協其恭。邦介純禧。爾預其錫。當懷褻遇之渥。毋怠輯綏之經。往哉若時。欽對余命。可。

尙書司封員外郎直集賢院李溥可三司鹽鐵判官制

敕具官李溥。曩踐秀科。久勤吏事。濯纓通籍。漸翼爲郎。逮預書林之華。再輯守塵之政。積資逾久。應務爲宜。緊鹽策鐵官之煩。有歲成月要之劇。今茲缺屬。是以求才。往倅計文。尙遲來效。可。

刑部員外郎直集賢院柳植可三司鹽鐵判官制

敕具官柳植。國朝合三使之任。商萬方之利。置副率屬。用相維權。缺員之舉。繫才是擇。以爾志尚凝簡。謀略淹該。夙懷懿文。遂踐高第。尋被陵莪之育。久帖書林之直。況剖符名部。去輒見思。運籌會府。試于已效。比雖慎求。雋望對記。爾言而綽有兼資。可備煩使。宜伸體牌之器。分贊鹽鐵之務。遲乃成績。光余類能。可。

右正言直集賢院吳育可三司戶部判官制

敕具官吳育。左右之曹。諸案爲劇。分贊使範。允歸才舉。以爾言行偕敏。吏雅兼資。濯纓諫垣。抱槩書府。曷藉聲實。試予財煩。操籌所更。奏刃彌熟。宜居地版之佐。姑重計文之選。可。

侍御史馬絳可三司戶部判官制

敕具官馬絳。夫地官有聯。使介爲重。缺員之補。繫材是擇。以爾性理淳暢。行能廉簡。久試吏事。階服憲僚。雖夙夜以首公。實夷退而行已。宜攝兼局。俾效所長。惟登版上計之繁。有衰征慎賦之要。往蒞乃職。佇觀厥成。可。

郎中員外郎南郊加恩制

敕具官某等。朕親執玉幣。祇見郊丘。合祛神祇。嚴配祖考。肆我皇土。服勞于公。適圖福瑞之均。宜先慶賞之舉。爾等學優而仕。吏飾以文。早陟朝闈。進都郎位。外內迭治。材謂兼資。蔚如國華。光我俊選。旣欽柴之竣事。方舍爵以差勤。或進視卿曹。或遞加勳籍。往對嘉命。無替恪誠。可。

館職朝臣南郊加恩制

敕具官某等。朕昨以推策候長。練歲習吉。灌鬯清廟。燔燎泰壇。既尊親以侑神。乃禋福而灑澤。爾等學富而敏。行周而和。咸奮辭華。充我朝選。進預金闈之籍。分裁石室之書。官政協修。士譽彌藹。比緝儀之並講。遴信賞之遂行。或攷侍祠之勞。或旌宿業之效。遞舉勳策。且對榮階。繄乃洽聞。虔此嘉命。可。

楊崇勳父累贈太師中書令兼尙書令追封秦國公制

敕乃者。竭誠禪宗。肆類尊考。實受純嘏。洽暢茂恩。爰列褒親之條。參圖錫類之賞。首閱侯籍。宜煥世靈。具官楊崇勳。父累贈太師中書令兼尙書令。全美材資。忠淳並裕。介而難進。勇且知方。包義府以自高。撫生涯而永慨。任雖靡廡。慶則有餘。藹然身支。列在人傑。勤庸稔于帷幄。威望著于藩垣。光我臣鄰。本之義訓。曩旌遺烈。屢賁幽塗。雖服袞之載華。願苴茅之未啓。龍舒胙國。躬桓飾圭。並示滂泉之榮。益紓濡露之感。可。

元憲集卷二十四

外制

尙書禮部侍郎參知政事石中立除尙書戶部侍郎資政殿學士制

敕登賢于朝。所以贊機務。均逸于位。所以優考成。矧左戶亞卿之聯。西清別殿之職。合是寵數。且解近司。以爾具官石中立。文雅兼資。夷素無競。早階朝弁。遂服禁材。自書命于掖曹。旋升華于侍從。藹然休問。溢于公朝。曷藉珪璋之姿。入參槐鼎之重。左右大政。勤勞厥躬。年序甫周。道冲彌勝。宜適終謙之吉。憫嬰賦政之煩。特進寵名。仍光祕秩。往膺兼授。尙對徽恩。可。

著作佐郎監洪州酒稅鄭修可祕書丞監檀州稅務于可度可太子左贊善大夫制

敕具官鄭修等。籍佐京司。勤宣吏局。或樞財官釀。或收算門征。並循齋伐之規。來滿計年之格。宜酬善狀。擢寘外朝。書省卽遷。儲坊序拜。姑仍續課。尙謹終譽。可。

大理寺丞監南劍州商稅張鑑可殿中丞簽書西京留守判官廳公事王珣瑜可太子右贊善大夫制

敕具官張鑑等。或席蔭效官。或緣儒補吏。曷繇卿屬。參委事經。都幕借籌。郡征書最。率授考法。來諗歲成。殿監有僚。宮坊著籍。宜孚賞典。並服朝聯。可。

太子中舍劉德之可殿中丞大理寺丞溫嗣良可太子右贊善大夫制

敕具官劉德之等。咸以吏勤恪于官次。或縣章歷試。多列最凡。或訟牘見誣。近蒙澄雪。並越歲成之目。宜借朝渙之恩。盾省分聯。儲坊有籍。各祇榮序。尙服攸箴。可。

江南西路提點刑獄尙書都官員外郎晁宗簡可尙書司封員外郎尙書屯田員外郎通判鳳翔府
崔嶧可尙書都官員外郎太子中舍監兗州酒務王整大理寺丞知南雄州陳鑄並可殿中丞大理
寺丞知福州長溪縣鄭戡可太子中舍制

敕具官晁宗簡等。並稱吉士。參服具僚。或使轂糾循。近承朝委。或州符倅守。交輯政經。或卿屬佩縣章。或
宮官掌酤利。雜焉會課。咸克應條。郎省分曹。殿廡贊府。逮于儲案。莫匪朝榮。卽寵爾勞。用信吾賞。可。

尙書比部員外郎知房州徐弁可尙書駕部員外郎尙書屯田員外郎通判楚州沈周可尙書都官
員外郎國子博士陳宗續可尙書虞部員外郎殿中丞監台州商稅趙德亮可國子博士大理寺丞
知案原缺州滴河縣張利可太子中舍制

敕具官徐弁等。夫序官之方。責實爲效。功賞所值。奇于平衡。茲乃一邇遐而均勸沮也。爾等並緣仕牒。參
服王畿。或郡縣布條。或閨臺引籍。或武藩有最。或征旅載勤。咸以歲成。列在恩格。星闈郎選。米廩胄師。逮
于儲坊。亦寵朝紱。差次而授。各竭乃衷。可。

大理寺丞知威州趙祐可殿中丞知雲安軍李敏可太子中舍制

敕具官趙祐等。各服吏資。參補卿屬。勲分遐徼之守。通嗣前勞之庸。計最上聞。恩典無廢。陪官盾省。引籍震坊。有著于朝。且寵其任。尙結終課。思稱序遷。可。

殿中丞監在京豐濟粳米倉李宗傑。可國子博士。大理寺丞尙正德。可太子中舍制。

敕具官李宗傑等。或經生服官。或蔭格延賞。智效茲久。歲成屢更。而參掌倉儲之煩。外司酒利之筭。通質前課。抑惟舊章。國冑清階。震坊華籍。宜從並命。且寵稍遷。可。

大理寺丞知河南府登封縣李虞卿。可太子右贊善大夫。監河陽清酒務聶德一。可太子中舍制。

敕具官李虞卿等。並飭吏資。旅參卿屬。或邑圻敏政。或官釀庀司。齎伐于朝。甄勞滿歲。訖無殿狀。胥協寵階。宜對踐于儲坊。且通榮于閨籍。益虔官守。尙對恩褒。可。

太子中舍劉世寧。可殿中丞。大理寺丞劉文正。可太子中舍制。

敕具官劉世寧等。醇謹服官。綢繆累課。或序華儲禁。或列案刑卿。率職殊聯。稽勞比牒。宜錄歲成之效。迂遷朝著之榮。可。

尙書虞部員外郎侯渭。可尙書比部員外郎。殿中丞楊歸一。可國子博士制。

敕具官侯渭等。夫展體營職。臣所以事上。計課遷秩。朝所以懋官。績苟有成。恩必爲遴。以爾等階榮仕牒。陳力公家。籍預闡臺。政更郡邑。比獻累勞之狀。率符覈實之條。郎署有員。經庠列局。各欽明命。往服乃僚。可。

尙書都官員外郎前通判宣州江鎬可尙書職方員外郎殿中丞通判秦州董經可國子博士制
敕具官江鎬等。國家敘材之方。考績爲實。故吏無內外。三歲一比。以爾等或躬蹈儒訓。或善襲世謀。並飭
吏文。來引朝禮。曷參倅事之選。且寄類能之勤。涉此閨成。咸以課舉。覈狀有次。增秩爾宜。司域美曹。教胄
清品。各服明賞。用勸庶工。可。

太常博士通判滑州王述可尙書屯田員外郎殿中丞前知維州徐起殿中丞通判安肅軍祁可久
並可國子博士制

敕具官王述等。故事。考吏必計功。限歲而面陟之。若官參外聯。身隔歸課者。乃稽成卽授。急示明勸。以爾
等。或論秀筮仕。或承學中科。並濟吏資。稔服朝範。爾述適居輔郡。贊我帥臣。協用教條。能罄風力。起與可
久。皆任在邊壘。狀集攸同。勤庸相當。褒擢非吝。宜承郎宿之務。且進經庠之師。勉蹈攸箴。毋忝公賞。可。

太常博士通判福州謝微可尙書屯田員外郎殿中丞通判沂州張薦可國子博士制

敕具官謝微等。夫郎官博士。皆往代之高選也。因革雖異。名品尙優。制厥朝聯。往待功次。以爾等踐揚闈
籍。緣飾政經。或倅事闕區。甫從臨遣。或贊條沂水。未及代還。並當歲月之遷。難稽善最之賞。各循華級。益
蹈清規。可。

尙書駕部員外郎知龍州張舜元可尙書虞部郎中尙書屯田員外郎通判明州皇甫宗孟可尙書
都官員外郎殿中丞通判沂州周踐可國子博士制

敕具官張舜元等。昔虞書考績。周家大比。率用三歲。以覈衆功。國朝因之。所以質官成稽古道也。以爾等敦修士檢。勤曉政經。或承學中科。或富文飾吏。並參華朝紱。營職郡條。遐俗安安。善部澄一。雖守麾關。掌之名異。而類能稽伐之理均。功狀可嘉。恩典非吝。序升郎秩。改服師庠。勉膺卽授之寵。用穆有彛之制。可。尚書虞部員外郎知同州張師錫。可尚書比部員外郎。殿中丞知端州趙時殿中丞。通判秦州楊文舉。並可國子博士制。

敕具官張師錫等。夫臺郎有總勾簿領者。于諸曹爲劇。學官有訓課國子者。以博士爲優。分職雖殊。公選猶重。以爾等或食德之裔。或通經之良。並久服朝班。分攝州任。剖符倅事。限關踰嶺。附課來會。增秩有常。並懋所居之勤。且階卽授之寵。可。

西京作坊使知洛州張明。可左武衛將軍。權判左金吾街仗六軍儀仗公事。內殿承制蔡州兵馬都監裴化鱗。可左千牛衛將軍。權判右金吾衛仗公事制。

敕具官張明等。夫環衛建官。有經武執刀之率。徼循按隊。有慎街訓仗之禁。分職乃事。時惟寵名。以爾明早服使勞。攝藩符之重。以爾化鱗。繇由殿省。督州旅之屯。並黽勉公家。驅馳晚節。深念使藩之效。久嬰補外之勤。宜換峻班。特均優秩。且參華于引籍。實貴號于銜珠。勉蹈寅恭。以對褒擢。可。

前尚書金部員外郎王惟正。前太常博士李東之。並服闋。可舊官制。

敕具官王惟正等。向以罹閔家庭。解官朝紱。並遵經禮。克守通喪。燧穀載周。苴麻有訖。司珍外秩。抱蕝清

曹各膺還次之恩。用光移孝之美。可。

前尙書比部員外郎張師錫服闋可舊官制

敕具官張師錫。擢罹內艱。自解榮籍。華首而慕。素鞵有終。宜因禫祭之除。往復朝聯之舊。勉思移孝。且體斷恩。可。

前國子博士梁惟吉服闋可舊官制

敕具官梁惟吉。頃嬰家疚。言謝朝聯。燧穀再新。禫祥有訖。復從王事。茲實禮經。勉循移孝之方。姑踐服官之舊。可。

前祕書丞馮適前祕書丞集賢校理彭乘並服闋可舊官制

敕具官馮適等。嚮執親喪。自褫朝紱。並銜終歲。已及外除。嘉克蹈于禮經。難久辭于王事。宜還舊貫。勉服茂恩。可。

殿中丞致仕田儼服闋可舊官制

敕具官田儼。曩膺家戚。遂離官次。喪期有訖。朝恩惟序。宜還盾省之秩。尙遄鄉閭之歸。可。

前殿中丞魏莊等服闋可舊官制

敕具官魏莊等。曩者各執親喪。並去官次。苴麻如禮。燧穀再新。宜散祥琴之哀。復還朝弁之吉。斷恩移孝。欽我寵章。可。

前著作佐郎周沆前大理寺丞蘇安世並服闋可舊官制

敕具官周沆等。曩遭家艱。並去官籍。禫祥有數。燧穀載新。宜抑孝心之隆。復還王事之守。斷恩展體。用適禮經。可。

前光祿寺丞錢揆服闋可舊官制

敕具官錢揆。曩執親喪。自離官籍。奄終祥禫。已復故常。勉勵移忠之心。姑還主膳之次。可。

前大理評事丁瑒服闋可舊官制

敕具官丁瑒。曩服親艱。憫勞王事。憚然去職。訖此終喪。宜抑御琴之哀。復還聽棘之屬。可。

前太常寺太祝林克讓服闋可舊官制

敕具官林克讓。曩屬家艱。俾解王事。喪期有數。祥祭遂除。宜服故官。以嗣前績。可。

沿堂五院承引官將仕郎守京兆府別駕張昭吉可右千牛衛長史充沿堂五院副行首制

敕具官張昭吉。祇事宰庭。編名府屬。職于贊道。協乃幹恭。宜進敍于缺員。且副升于右列。兼榮衛佐。勉服朝恩。可。

起居舍人知諫院姚仲孫可尚書戶部員外郎兼侍御史知雜事制

敕漢家以文中御史參遷目。唐制以郎知雜事。雄官儀。明其緣飾。風采濟于幹用。然後能振綱紀。而澄姦伏也。我有公遷。屬之名材。以爾具官姚仲孫。肅給自將。和正無撓。早服賢舉。亟給吏勤。曩擢朝貴之華。入

光諫署之列。重以言責。涉于歲期。嘗疇厥勞。進序清秩。而造膝靡懈。視履有方。善非近名。直不爲訐。迹其雅尙。宜渥寵褒。俾階左戶之榮。改率南臺之屬。樹聲措枉。茲有望焉。可。

監察御史裏行高若訥。可尙書主客員外郎兼殿中侍御史裏行制。

敕具官高若訥。志操清淳。風宇韶令。早繇辭等。擢在雋科。自褫巾于仕塗。逮引籍于朝紱。曾靡他吝。休有厥聲。比緣慰薦之章。寓行察視之列。屬攸司大校。舊課有成。通覈歲期。當懋恩典。俾升郎位之寵。且參殿中之憲。往服兼命。無懈迺誠。可。

鎮安軍節度使同中書門下平章事呂夷簡。元隨袁宗可。銀青光祿大夫。檢校國子祭酒兼監察御史武騎尉充教練使制。

敕某下元隨袁宗。早率隸勤。載懷忠事。屬吾元弼。均逸近藩。嘉其執侍之良。協乃補除之次。綬紆庠秩。憲職武勳。併示寵私。勉懷祗恪。可。

贈太保中書令王曙。元隨高貴可。銀青光祿大夫。檢校國子祭酒兼監察御史武騎尉充教練使制。敕某下元隨高貴。早繇家隸。事予台臣。屬茲終位之哀。軫以服勞之舊。正名牙職。攝寵朝階。勉荷遺恩。以終初惠。可。

銀青光祿大夫。檢校國子監祭酒。知溪洞峽州軍州事。兼監察御史武騎尉舒通晏。可加雲騎尉制。敕具官舒通晏。邊種推豪。世官內屬。久祇疆事。能稟朝規。屢全出徼之俘。彌顯來王之節。騰章自達。疏賞

攸宜。俾進勳名。用光忠效。可。

熟戶俞龍潘可銀青光祿大夫檢校國子監祭酒兼監察御史武騎尉制

敕秦州永寧寨熟戶俞龍潘。乃父以祗服世勞。奉承邊略。奄遺緒業。屬爾後昆。繼軫淪亡。次須紹襲。宜擢升于軍簿。俾保訓于族人。仍視官榮。且謹吾圉。可。

元憲集卷二十五

外制

翰林學士承旨尙書禮部侍郎知制誥章得象加階食邑實封制

敕朕以天正上元昧爽冬至親旅備物拜貺于郊參賴左右之臣協敷陟降之禮亦既均福茲用懋官以爾具官章得象理識清明風姿高劭早服榮序濬發懿文入以代巽風之辭居常無溫樹之語游疇時望升冠禁庭會崇配于嚴陔咨領使于容蕝絜爾僉導成我肅恭固當進于榮階衍以多邑且旌親近之選兼茂講求之勞益綏善猷往敷徽數可

入內東頭供奉官于德源可內殿承制制

敕具官于德源恪職禁庭序勞使籍凡更指任咸著勤庸慎祕殿之參承訂外朝之拱集宜從超拜用示優褒益勵乃誠無忝官次可

入內西頭供奉官勾當御藥院周惟德可內殿承制制

敕具官周惟德以懿愿之資補禁殿之籍率力彌厲將指弗渝比兼藥劑之嘗亦更歲律之籍宜疇謹幹超序班聯惟承命于殿中實均儀于朝右往祗優渙無廢前庸可

內殿崇班焦宗約可內殿承制制

敕具官焦宗約。食德侯家。聯榮戚里。仍借累課。遂服華班。繫爾好遠之宗。乃余自出之懿。式嘉媿近。奄及淪亡。矧遺札之上聞。且令夫而爲請。宜緣永悼。特渥寵章。俾進殿塗之趁。無爲世閱之忝。可。

內殿崇班曹傳可內殿承制制

敕具官曹傳。重侯之門。藉蔭而仕。風華有裕。謹敏自將。服在榮班。無忝勳閥。矧中闈之昵屬。輔良冶之美才。宜進殿聯。且光親籍。往祇渥洽。罔懈踐修。可。

內殿崇班夏元規可內殿承制制

敕具官夏元規。地承勳胄。名列禁班。拳勇知方。敏勤無累。眷言乃父。方總衛師。授恩典之常科。庇身支而有請。所宜進秩。用獎教忠。勉服內聯。以光華閥。可。

太常少卿張宗誨可四方館使文州刺史知貝州制

敕賓館置使。方奏是司。州符長人。郡寄爲重。尤是蕃獎。屬于兼材。以爾具官張宗誨。風力精明。志用沈果。出于槐鼎之緒。濟夫几案之資。久服朝聯。遂階卿亞。中外所歷。閎閱已彰。然惇學有初。晚節彌厲。比閱論兵之奏。益嘉徇國之謀。將適所長。固當易授。宜均榮于外著。且增采于禁班。勉佩褒華。以伸忠蘊。可。

奏舉人前權祁州軍事判官胡思聰可著作佐郎制

敕具官胡思聰。鄉秀榮名。吏銓隨牒。曷參賓畫。介在邊藩。賞有將漕之臣。胥暨通閩之士。咸條善狀。分集攸司。覈實孔彰。懋勞惟允。陟于祕佐。勗乃官成。可。

前同州馮翊縣令張造可著作佐郎制

敕具官張造。吏銓結課。殿最有常。詔恩舉知。保任爲重。向非佳吏。曷光清選。以爾早服儒行。嘗擢俊科。廉以自將。文而毋害。頃字氓于大邑。能寡悔于厥躬。齋伐上聞。薦章可復。佐于秘局。旌乃官成。欽服寵章。以終素守。可。

奏舉人前揚州觀察支使黃昌齡可著作佐郎制

敕具官黃昌齡。久籍中銓。累賓大府。雖本階門蔭。而見許吏資。薦寵狎聞。滯淹可恤。宜參賞格。進序京曹。往佐著書之庭。尙酬入幕之畫。可。

開封府兵曹參軍王翼可著作佐郎制

敕具官王翼。文敏中科。身言補吏。掾于京劇。再結歲勞。府列薦辭。朝無吝賞。擢佐著書之選。尙領坐曹之務。可。

奏舉人前應天府推官謝鄂可著作佐郎制

敕具官謝鄂。材服俊良。行歸廉素。彘絲科選。見重賓籌。宗工外臺。連啓交薦。擢參書省之佐。姑信吏銓之賞。可。

奏舉人昭信軍節度推官前知興國軍大冶縣同監買茶場張經可著作佐郎制

敕具官張經。藝文而仕。廉智自將。再珥賓簪。參司利權。薦能累牘。稽實盈條。宜佐局于蓬丘。且漸榮于磐

羽可。

奏舉人前湖州烏程縣令王稷可著作佐郎制

敕具官王稷推秀士林階勞吏牒綰銅被選製錦無傷近署薦能外臺舉最章交軍府課協銓條宜升譔著之佐且寄品流之賞可

奏舉人前江寧府上元縣令兼管勾府學任凱可著作佐郎制

敕具官任凱丘園之良造秀階選雖褫巾補吏而挾策名家躋徇守臣之章俾興郡學之法兼宰劇邑姑慰後生風政並修慰薦尤數宜用銓部之啓擢佐史筵之郎勉服恩華尙寵儒業可

尙書比部員外郎通判舒州趙溫瑜可尙書駕部員外郎尙書虞部員外郎知道州譚嘉言可尙書

比部員外郎制

敕具官趙溫瑜等階蔭宿官第勞引籍或布宣郡詔或通刺守符歲課上聞郎選惟序宜均郎授之寵且懋稍遷之勤可

天平軍節度使檢校太師同中書門下平章事判河南府王曾男太常寺太祝紹可將作監丞禮部

尙書知亳州晏殊男明遠可祕書省校書郎資政殿學士尙書戶部侍郎薛奎親姪男房孺可將作

監主簿尙書戶部侍郎知廬州陳堯佐親孫男知愚可將作監主簿尙書戶部侍郎知永興軍范雍

親孫男子初可將作監主簿翰林侍讀學士兼龍圖閣學士尙書工部侍郎權知開封府程琳堂弟

溫瑜可試將作監主簿制

敕具官王曾男紹等稟和令胄服業素風率在妙齡未參初仕適因誕節旅集慶儀乘嘉會之均休復乃親之言念願延賞典以啓榮階循厥舊章俾覃渙渥卿曹書省正秩試官差序以陞勿忘祇勗可

樞密直學士知益州張逸外孫姚穀可試將作監主簿制

敕具官張逸外孫姚穀越在童牙甫親師塾惟乃外門之懿時余邇列之良方寵與藩翼惟麗澤宜試榮于匠屬尙慰心于母黨可

皇姪故如京使從善可贈刺史制

敕具官從善宗籍之英王藩衍祚早被恩于敦族亟階寵于陪官洊服使華克敦朝矩方竚麟趾之盛參固犬牙之封而遭疹弗瘳殲良遽及眷言短歷深軫余懷特升號于竹符且厥儀于密印魂而有識尙或嘉茲可

中書試西上閣門使除懷州刺史制

敕文武之効濟治式均出處之寄惟才是擇矧州部之雄重有民政之撫綏必煥茂庸乃付茲任具官某志懷沈果謀術淹該服煩使而有初露美材而滋久風華自飾忠謹內充自列職于禁闈實練儀于朝著訖無貳事休有厥勞酬其使範之誠易以价人之重矧茲近輔屏于中邦有旌纛以輔威有圭符而分契政之厯則興歎于閭里化之得則蒙潤于京師今茲作牧之榮可亮簡心之極宜思尤效以篤前庸無俾

刺舉三河之人。專美于漢牘也。可。

落軍權正授團練刺史制

敕。國家經武有常。懋功至慎。苟勞于久次。則寵以番休。亦將均燕瘁之宜。一中外之使。具官某。志懷臆果。姿局雄嚴。早奉戎昭。進司王衛。訓顏行而知勇。肅師律以無譁。忠效著聞。歲期屢易。特峻圭符之數。用酬夙夜之勤。往踐使聯。罔替嘉績。可。

管軍加團練刺史制

敕。王者崇衛帥兵。分建營府。必咨忠慎。以領訓齊。具官某。早志戎韜。游階勇爵。自撫循于爪士。克震疊于旌和。歲月屢周。勤勞匪懈。稽功有典。進秩爲宜。遙視圭符。敍升師領。益輸亮節。以服明恩。可。

京西路轉運使尙書度支郎中楊日華。京西路轉運副使尙書主客郎中林維三。門白波發運使尙書比部員外郎王隲。並可加勳制。

敕。具官楊日華等。朕以闕者先後陪陵。西畿歲役。眷言經用。參責攸司。訖事在辰。計功有典。以爾等各緣吏伐。分領使權。或調食于寢封。或董舟于河次。率勤供億。胥濟繕營。勳級之華。朝章惟重。俾書于策。用寵厥官。益勵風聲。且稱甄獎。可。

尙書主客郎中判大理寺司徒昌運。加柱國國子博士。權大理少卿公事。呂紹寧。加輕車都尉。國子博士通判齊州淳于佺。殿中丞周孝孫。審刑院詳議官太子中舍李倩。並加上騎都尉制。

敕具官司徒昌運等。朕以官司之繁。法禁惟錯。倚請託庇。日以益滋。頗末相違。遵用廢據。是命爾等設局而審議之。彌歷歲。躋協比曹屬。而能分條輕重之目。總括繁簡之中。成篇載勸。列牘來上。其有宣力參半。補吏外遷。逮此圖庸。固當均賞。宜並升于勳籍。且增勸于朝。飲踐寵階。毋替厥服。可。

太常博士集賢校理知亳州范說。可尚書祠部員外郎。國子博士通判成德軍陳及。可尚書虞部員外郎。右贊善大夫知汝州梁縣呂師簡。可殿中丞制。

敕具官范說等。尚書諸曹。參知承務。鈎盾華省。咸率屬僚。因其寵階。式敘功次。以爾等早勤智效。祇服朝規。或預校中經。正簡編之謬。或往釐外職。成郡縣之勞。並攷攸司。莫匪嘉績。疇其歲滿。易乃官聯。增秩以留。勉終來效。可。

尚書職方員外郎知歸州沈厚載。可尚書屯田郎中。殿中丞知平定軍樂平縣張傑。可國子博士。太子右贊善大夫通判吉州晏融。可殿中丞制。

敕具官沈厚載等。夫稽功緒。陟官成。頒之歲期。蓋有繫法。故虞考績而周大比也。以爾等或學古優仕。或籍蔭累勞。適于吏資。服我朝著。並緣郡縣之績。參有新故之勤。迪會課條。率應恩格。郎曹茂秩。庠局美聯。逮于盾省之華。咸稱闡籍之選。各懋終譽。無忝稍遷。可。

太常博士前知富順監戴翼。可尚書屯田員外郎。太子中舍通判蔡州王康。可殿中丞制。敕具官戴翼等。夫尚書以墾田爲郎。鈎盾以中御率屬。皆一時功次之選也。以爾等或鄉秀來任。或經術

自將咸服吏資。實我朝絨。惟翼遠勤。巴徼而成。課可甄。惟康近倅。汝南而前。勞未錄。閱于考簿。協乃歲成。宜懋當遷之資。益圖報稱之效。可。

十二考人前權資州軍事判官孟化成。可著作佐郎。奏舉人前彬州宜章縣尉。監温州大富南監。張上遜。可大理寺丞制。

敕具官孟化成等。各沿吏牒。亟調銓流。或從事戎旃。久而無過。或商功鹽策。訖于有勞。憫其歲日之淹。嘉乃監司之薦。宜從陟狀。進服榮章。祕局卿丞。毋忝分命。可。

十二考人鄆州觀察支使王爲。可著作佐郎。奏舉人權寧海軍節度推官吳感。可大理寺丞制。敕具官王爲等。國家旌宿官之勤。明舉善之法。合以求士。宜無棄才。以爾等早調銓符。並隨賓檄。或績勞書考。已及周星。或沈雋仲知。見稱累牘。嘉聞吏啓。俾陟京聯。郎佐卿丞。各服褒命。可。

尙書司封員外郎直集賢院判二司開折司兼提點催驅公事王儼。可尙書工部郎中制。

敕具官王儼。積星蔚然。著象郎位。若馴工官。贊事典者。又俊選之極。摯以爾家慶。憑厚材資。幹蠱曩。奮辭。蘊茂擢秀科。游服朝綏之聯。久更書殿之直。彘絲郡最。參理計文。當逆受鈞考之煩。罄推行靡密之效。質乃歲課。愜予褒章。宜正屬于列曹。尙宿業于司會。勉恪新命。滋樹令猷。可。

尙書屯田郎中知曹州陳師古。可尙書都官郎中尙書職方員外郎通判荆南府吳有鄰。可尙書屯

田郎中制。

敕具官陳師古等。臺郎有督中都之隸。覈墾田之實者。本朝遷補。率以茂材吏處之。惟爾等咸踐秀科。久通榮籍。官宿其業。吏飾以文。或剖符爲州。地切寰服。或倅條分政。事叢督府。且有舊課。列之攸司。三周質成。連最當陟。宜進星鳥之次。益蹈羔羊之規。仍懋來勤。俾久于職。可。

和州司馬范極可秦州司馬制

敕具官范極。早籍銓流。洊罹殿格。曷坐勢交之援。實從軍佐之遷。屬乃禋燔。大霈恩號。滌瑕有典。易地爲宜。勉新令圖。尙弭前悔。可。

林獻可移袁州司馬制

敕具官林獻可。曷者果于貢辭。寘在班籍。繼繇賄墨。謫佐軍司。而靡念省非。輒復干上。託緣夢寤。陰濟訟仇。迹其初心。弗忍嚴譴。俾移遐郡。且警狂夫。尙記昔言之忠。俾仍典午之籍。可。

三司戶部判官尙書刑部郎中劉養可尙書兵部郎中制

敕具官劉養。臺郎之選。雖有彝序。至于內外兵之劇。則高才異最者處之。以爾文行交修。風采兼劭。久紆朝紱。洊攝郡麾。治無苛聲。去有餘頌。早旌吏伐。參握計籌。曾未踰時。輟以居部。比緣財使之缺。復被召還之音。官雖屢移。課則通考。宜繇司寇之筮。升備夏卿之屬。且勤會要。用服寵甄。可。

尙書主客郎中知潭州夏侯彧可尙書金部郎中制

敕具官夏侯彧。昔漢二千石有治效者。輒纒書勉勵。增秩賜金。國朝稽勞懋功。卽賞于外。亦其義也。惟爾

踐儒科之目。通吏師之學。游懷章而出守。亦馳傳而糾刑。賞我周行。多歷年所。頃資劓刃。入贊計籌。而湘潭之邦。符竹須代。輟以居部。會其質成。按有司之類能。通三載而論績。且因善狀。爰俾敝遷。司珍劇曹。應宿華選。寵之新秩。時惟曷哉可。

熟戶訥略約蘇可本族軍主制

敕具官訥略約蘇。世豪西鄙。籍隸諸會。善稟朝規。協祗疆事。蠢茲寇盜。奸乃禁防。嘉戢捕之有勞。願賞勤而斯允。俾還族帥。用獎戎昭可。

環州蕃部沃協等可本族副軍主制

沃協等世保疆陲。地雄種落。眷言乃父。實主團兵。奄遘凋殂。固當嗣襲。矧見推于尺籍。宜並副于軍幢。勉服茂恩。用光先職可。

殿中丞馬坤崔中正薛貽應並可國子博士制

敕具官馬坤等。各服吏勤。序升朝品。勵廉隅而有素。守科指以無違。歲籥洊周。功簿來上。嘉其寡過。協乃推恩。宜並命于經庠。且勸能于官次。益敦素履。無廢前勞可。

登仕郎太常寺太樂正張用成可太樂署丞將仕郎守太常寺太樂署副樂正張惟慶可太樂正太

常寺攝樂正孟化琮可將仕郎守太常寺太樂署副樂正制

敕具官張用成等。參習樂華。奉承署表。率工師而宿業。彌歲歷以書勞。官缺備員。籍當次補。或進丞本局。

或聯正爾司各服寵階罔替成效可

王拱辰父可贈太子中允制

敕。乃者恭郊廟之享。報臣工之勞。均覃茂恩。并寵先烈。所以勸存追遠。納人于厚者矣。以爾具官王拱辰。亡父具官某。惠和膚敏。端平愨固。序調銓檄。參尹縣圻。晚賦歸來之篇。善訓過趨之嗣。冠升材等。優啓士途。逮垂紳之造朝。已瞻帖而銜感。永惟知子。光我得賢。宜獎教忠之風。且光通籍之贈。賁于幽漠。尙或歆榮可。

尙書吏部侍郎知樞密院王隨加功臣食邑實封制

敕。朕昨以母后上仙。山園復土。首咨樞輔之哲。專領使儀之雄。亦旣祔升。聿圖勞瘁。具官王隨。才範沖遠。賢業富優。令望稔于先朝。休績參于余治。逮司幾務。實冠近聯。善講本兵之謀。洽聞籌幄之論。屬茲闡襲。怕神域慎終。制定禮文。護典事典。實緊精力。副我沖懷。今坤廟格思。宸畿訖役。宜霈賞勤之令。且褒同體之賢。功號增華。幹封衍食。併爲異數。茲協至公。往服寵章。詎假多訓可。

贈太傅中書令寇準可諡忠愍制

敕。夫徇義保躬。賢哲罕兼其致。原心觀行。衰沮得伸其公。惟節惠之舊章。實經世之明勸。不有正義。孰旌遺烈。故贈具官寇準。器質莊重。風猷簡貴。感會先聖。綢繆上司。明心若丹。直道如矢。逮余主鬯之日。實乃秉均之秋。罔惟協恭。罔有二事。搆盜言之噂沓。挾危法以中傷。白璧易汙。貝錦難辨。再罹遐謫。遂歎云亡。

終非零雨之歸。徒軫幽泉之痛。間雖游仲澄雪。追賚寵嘉。而誅行易名。尙闕茲禮。沈謀碩畫。淪于疑論。逝者莫愬。朕甚憫之。諡法有危身奉上曰忠。佐國遭憂曰愍。合是休典。慰其塋魂。可賜諡曰忠愍。

尙書祠部員外郎集賢校理同知宗正寺趙槩可尙書刑部員外郎制

敕具官趙槩。尙書諸郎。雖功次遷授。至于首曹劇選。則以雅望處之。爾業履清淳。韻宇和秀。早階俊譽。升寘上科。尋服書林之游。嗣結軍牙之最。入承尹政。休有吏資。曷請豫章之行。方均渤海之寄。屬余宗籍。慎補乃僚。亟命召還。且俾參攝。眷惟舊課。通覈攸司。宜循載績之規。進聯寇部之屬。欽率優典。彌勸令猷。可。

元憲集卷二十六

外制

大理評事監在京廣衍倉李鄩可光祿寺丞制

敕具官李鄩。地襲華腴。世承燕翼。曷繇卿屬。參掌國儲。官勤有庸。歲滿無殿。嘉其最狀。稱厥懋恩。俾改膳卿之聯。尙修庾司之職可。

大理評事知建昌軍南城縣李虞卿可光祿寺丞制

敕具官李虞卿。緣文有資。階蔭而祿。比繇評讞之秩。外寄絃歌之才。三年質成。百里兼最。膳卿補屬。令組載華。勉績前勞。尙佇來賞可。

大理評事監海州酒稅王誨可光祿寺丞制

敕具官王誨。世祿妙年。相門餘慶。比從外掌。克服攸箴。滿歲敍勞。倍官有秩。宜參膳卿之屬。且嗣海邦之筭。勉履寶訓。無忝茂恩可。

十二考人前權福州支使張貴和可大理寺丞奏舉人前知陳州宛丘縣宋孝孫可衛尉寺丞制

敕具官張貴和等。序登仕籍。祇率官常。並敦勤吏之風。罕絀簡書之責。比因成課。來調中銓。或赦令之議。年或薦章之保。任質于彝典。符厥賞條。俾補屬于卿丞。且勸能于選部可。

奏舉人前撫州司理參軍孟造可衛尉寺丞制

敕具官孟造。本備鄉能。入服銓調。嚮司狂獄。介于江湖。而民挾詐輕吏。困叢密。惟爾善職。訖無煩辭。交章以聞。覈課尤審。宜酬歲考。升佐衛卿。益懋修方之勤。且光擢俊之舉。可。

奏舉人前鄧州司理參軍歐陽宗閔可衛尉寺丞制

敕具官歐陽宗閔。夫選條以累勞爲資格。詔書以陟狀舉滯淹。勤庸相當。乃議甄擢。以爾處躬無玷。效智有初。洵更州縣之勞。罔絀簡書之責。灼焉善最。副厥薦言。宜改佐于卿司。用勸能于公路。可。

太常博士集賢校理錢延年可尙書祠部員外郎制

敕具官錢延年。世德載靈。揣年筮仕。早嘉學治之劬。參服讎書之勤。亦旣登朝。洵俾從政。頃倅州事。自遭家艱。逮闕制而復官。屬稽勞之滿歲。司禮列局。承務有聯。且寵握蘭之資。更光抱槩之業。可。

太常丞直集賢院判三司都理呂公綽可太常博士制

敕具官呂公綽。唐典博士。隸奉常者。爲六品清官。曩制相沿。今選尤重。以爾氣調秀舉。才致敏通。雖籍公臺之華。躬修儒素之檢。以奏技帖仙職。以累伐佐計籌。參曾課條。甫越葑間。宜繇陪棘之屬。進繕置茅之儀。姑爲寵階。尙服煩使。可。

祕書丞知鬱林州黃中可太常博士殿中丞監真州榷貨務孫祖道可國子博士制

敕具官黃中等。夫考吏之法。覈實爲先。沿勞限年。按狀遷秩。則政不壅而才有敘矣。以爾等或懿文筮仕。

方爲政于海區。或精力首公。適幹利于江界。並列成課。集于攸司。宜從歲滿之遷。以勸官成之效。禮臺學省。博士有員。卽而授之。勉服華寵。可。

殿中丞陳希亮可太常博士制

敕具官陳希亮。屢繇辭等。服我仕途。官率攸箴。文能毋害。比成縣譜之治。入齒朝紳之華。自上歲勤。參符考目。俾繕儀于漢苑。且光績于虞篇。往踐榮階。益固清守。可。

前鄭州原武縣令游開可著作佐郎制

敕具官游開。業文登科。絜矩從政。比爲右輔之邑。見舉外臺之章。銓覈上聞。朝恩有典。宜參祕籍。用寵官成。可。

淮南轉運使李昭述男仙卿可試祕書省校書郎制

敕具官李昭述。男仙卿。乃父以望郎之華。膺別使之選。授節云始。任子有常。矧鱣序之令門。服鯉趨之清訓。膺茲延賞。必克嗣徽。往試讎書之榮。無忘食德之舊。可。

益州路轉運使楊日嚴男公度可試祕書省校書郎制

敕具官楊日嚴。男公度。任子之令。所以褒官勤而延世賞也。惟乃父察使于西州。方促萬里之行。曾無九折之憚。宜榮吏牒。以寵親庭。優學勵躬。無忝來遇。可。

廣南東路轉運使龐籍男元魯可試祕書省校書郎制

敕龐元魯。乃父以被詔天臺。揚旌嶺服。方罄首公之節。且授任子之恩。將責使勞。宜推世賞。免膺學筮。以寵私門。可。

駕部郎中致仕辛惟簡男炤可試祕書省校書郎制

敕具官辛惟簡男炤。迺者詔書吏有引年辭仕者。許上一子名以補吏。所以寵退身厚世祿也。乃父惟簡老子郎潛。願去朝班。且及恩典。庇嗣之請。今俾往試讎書。勉蹈清規。無忝余賞。可。

前鄉貢進士石洵直等三十三人並可守祕書省校書郎制

敕石洵直等。迺者深詔庶邦。並舉髦士。必加參練。乃允詳求。以爾等署行鄉書。露材貢部。紛懷鉛而就列。咸搗藻以奏篇。蔚有深辭。可躋異等。因其中選。榮以修方。祕局校文。京員錫綬。勉敦儒範。以對朝恩。可。

河北都轉運使楊偕姪孫景芬可試祕書省校書郎制

敕具官楊偕姪孫景芬。爾之從祖。久服計臣。比升榮聯。且委雄部。適駕言于使傳。遽餘陰于私庭。責效云初。延賞奚吝。俾試讎書之秩。用懋貽孫之謀。可。

廣南東路轉運使鄒覃男之才可試祕書省校書郎制

敕具官鄒覃男之才。乃父曷服詔恩。遠督方漕。頻海之部。踰嶺實勤。且援比以上書。願因勞而任子。眷言遐役。宜允所陳。俾試讎書之榮。無忘延世之獎。可。

廣南西路轉運使尙書都官員外郎韓琚男景修可試祕書省校書郎制

敕具官韓琚男景修。以乃父進服朝恩。遠將使漕。眷言踰嶺之部。方責乘輅之勤。受節云初。需頭有請。固宜延賞。參勵教忠。特試讎書之榮。且盡任子之典。可。

尙書比部員外郎知澤州孫昌。可尙書駕部員外郎國子博士通判鄧州呂務簡。可尙書水部員外郎制。

敕具官孫昌等。昔漢明帝有言。郎官應列宿。宰百里。非其人。則民受其害。況攝郡檠倅。藩條者乎。惟爾等或通經而才。或藉蔭而仕。並絜矩從致。濯纓登朝。而方出麾高平。關掌苑下。新績舊課。通質歲成。宜進諸曹之聯。且光所部之寄。欽服並命。毋替寵階。可。

尙書屯田員外郎黃汴河催綱劉立言。前通判台州閻鼎。可尙書都官員外郎制。
敕具官劉立言等。懷文飾吏。選俊爲郎。或護漕河渠。或贊條符竹。並階前績。通續今勞。宜循滿歲之格。進貳中都之秩。兼仍事守。以結最凡。可。

尙書比部員外郎通判嘉州郭宗禮。可尙書駕部員外郎尙書虞部員外郎通判邠州成壁。可尙書比部員外郎國子博士知貝州歷亭縣成道。升可尙書虞部員外郎制。

敕具官郭宗禮等。尙書郎有掌輿駕鈎簿。領典虞衡之職。皆曹劇任。要列于天臺。時惟寵名。以待功次。爾等通經筮仕。從政累勞。六計本乎至廉。一心蹈于無懈。或關決州務。或仍宰縣封。歲月有成。凡最來上。遞進某等。咸協乃庸。無渝素誠。忝我休命。可。

尙書虞部員外郎知金州師仲說可比部員外郎太常博士知貴州陳堅可尙書屯田員外郎制
敕具官師仲說等夫稽歲質成世有曩法故虞陟明宣責實皆是物也爾等或食德之裔或修辭之良頗
濟吏文實我朝紘並緣靡盬之效出副惟良之求雖姚墟舊藩駱越遐境成績未報前課可甄比勾劇曹
頓升華序各膺郎位之選尙結州麾之最可

尙書虞部員外郎張楷可尙書比部員外郎制

敕具官張楷久服師規序參郎選管奉行于寬詔俾攝守于名城屬此還臺適當會課酬其歲滿寵以階
升往踐勾書之曹彌遵絜矩之訓可

尙書虞部員外郎梁餘慶可尙書比部員外郎制

敕具官梁餘慶學古而官累勞以日洊階最日序充郎位比關隴倅事條教有倫逮茲還臺適遇稽伐宜
承比勾之務且寵年庸之勤勉服稍遷以格來舉可

太常博士施昌言可尙書屯田員外郎制

敕具官施昌言識理淹深風華秀舉曩由高第仍佐外藩政洊考于歲成學不忘于時敏迺者嘗俞奏牘
命試禁林逮給札以來目成篇而喜嘉其進業寵以爲郎勉蹈儒猷允光朝序可

太常博士劉適可尙書屯田員外郎制

敕具官劉適辭誠並修器幹兼裕早中科等遂服政經刃解煩而有餘文飾吏而毋害自引籍朝著結綬

縣章官靡曠雖歲亦淹久嘉其奏課寵以爲郎宜踐田曹之華且光磐羽之漸可

太常博士前知夔州巫山縣魏平仲可尙書屯田員外郎制

敕具官魏平仲器韻清舉才謀簡濟早有休問齒于英游自解巾昌辰束帶榮序文飾吏而毋害績當官而可底三歲會課我朝彝章矧更縣道之勤宜副田曹之務益服賢志用光郎選可

太常博士牛圭可尙書屯田員外郎制

敕具官牛圭曩修辭誠洵効官職比階司籙之籍出尹象雷之封間被臺符移贊州事緬是封略雜于民夷治無殿科歲有遷格宜因覈課之審卽寵爲郎之拜尙仍所莅勉集後勞可

尙書祠部員外郎崇文院檢討天章閣侍講王宗道可尙書度支員外郎制

敕具官王宗道被服儒猷祇勤官次早用士林之選首從王邸之招員在胄庠職兼書館多歷年籥進儔朝簪屬開講道之筵俾預敷經之列勳緣內閣參訂露門帖以寵名志在榮遇而宗英刻奏學肆敍勞且翼稍遷重遠所請宜改承于郎務益詳究于典言勗爾清修對我甄獎可

前權相州觀察支使郗慕清可檢校尙書水部員外郎制

敕具官郗慕清國家竣事東耕均禧庶品官無內外賞有彝常以爾從辟廉車累勞仕籍方茲展體慶乃丁辰宜視秩于郎曹用罔勤于幕畫可

授柴宗慶開府儀同三司依前檢校太師同中書門下平章事武成軍節度使駙馬都尉加食邑實

封制

門下。朕丕承先謨。恭恤明祀。獲執牲幣。祇見神祇。適當拜胙之成。思均與物之況。矧余右戚。參視貴臺。久擁旌旄之雄。時勤屏翰之績。不有異數。疇聳庶邦。具官柴宗慶。淳固蹈常。柔嘉廣業。地承代閔之舊。才對肅雍之華。能興乃宗。遂撫斯仕。以藩侯而奉朝請。多歷歲時。因元帥以敦詩書。自恬風素。逮兼槐席之重。出臨棠舍之封。允迪惠和。且宣條教。屬禮嚴之誕布。率貢品以惟寅。身雖守藩。志則存闕。忠劬並劬。職祿爾宜。是用冠文階之崇。優食采之典。茂厥真賦。濟于壯猷。於戲。天秩之隆。非式禮而奚敘。公餼之荷。惟持滿而克安。益服令圖。往卽榮次。授受之戒。可不勉歟。可。

授陳堯佐光祿大夫依前檢校太傅同中書門下平章事淮康軍節度使加食邑實封制

門下。薦誠類帝。所以格三靈之和。均禱拜胙。所以優四海之澤。倚吾舊老之雋。方制中權之雄。兼榮鉉臺。參殿寰服。禮成第賞。朝論攸歸。具官陳堯佐。志意冲夷。風槩高劭。抗心希古。學有本原。展體首公。政多緣飾。逮事列聖。目爲名臣。寢階謨猷。遂翊機柄。泊入正于槐路。實增煥于袞章。雖內解政樞。寵頒齋鉞。仍宰庭視品之峻。冠友邦維翰之良。賢勞並均。體貌無改。升禋已事。布號崇朝。宜增命數之繁。且昭賜施之普。崇階馭貴。多邑衍封。益以實租。會爲異渥。於戲。天錫之祉。余弗敢專。師僉之諧。疇可虛授。往虔誕告之寵。益契同寅之懷。矧在耆明。無假多諭。可。

授鄭守忠光祿大夫依前檢校戶部尙書寧遠軍節度使殿前副都指揮使加食邑實封制

門下王者受釐于天。理弗專饗。疏爵于位。勸必有功。粵惟將臣。翊我齋輅。勞施伊始。均福攸同。聿圖剛辰。參布明命。具官鄭守忠。性尚淵濟。才質鸞果。感會亨旦。策發壯猷。多通兵技之學。早著和門之業。游書勳籍。久服禁屯。或訓練徒兵。或董齊越騎。進階征鉞之重。遂司交戟之嚴。夙夜靡渝。親寄無貳。屬圖郊類。躬展國容。實提北落之師。來備甘泉之仗。導迎街蹕。循徼巖廬。大禮克成。寢威有助。宜酬從祀之恪。允昭進律之文。特峻貴階。載陪多邑。仍真幹食。僉允朝言。於戲善保者位高而安。能力者道遠而勵。曾是異數。孚于厥勞。往哉汝諧。毋替終譽。可。

授楊崇勳開府儀同三司依前檢校太尉河陽三城節度使加食邑實封制

門下朕奉事天明。肅祗郊配。內則公卿顯相。率禮不愆。外則岳牧協恭。以職來助。馨德昭鬯。鴻釐普臻。爰洽揚庭之恩。用褒維屏之寄。具官楊崇勳。精忠以力。沈毅而和。早會聖期。號爲慎將。休有成績。播于公言。寢酬武幹之庸。正司機務之柄。告猷克壯。廣業彌勤。逮倚陪京之藩。洵易均賢之地。而能恪守侯度。允藝貢常。交撫大邦之人。并蒙中甸之福。屬茲第賞。協乃懋功。是用訂公府之儀。增采地之數。仍因真食。俾衍故封。朝謀僉承。獎策參備。於戲。惟帝錫祉。有格來之藩。惟辟申恩。有厚往之報。宜循進等之授。益寵于宣之良。往對光亨。無煩訓諭。可。

授荆王依前守太師尚書令兼中書令行荊州揚州牧荆南淮南節度大使加食邑實封功臣制

門下協邦惇族。義炳唐篇。受脈展親。道光姬室。矧宗盟莫二之地。羣辟相維之尊。屬舉鴻儀。載均順福。襲

外事用剛之吉。稽異姓爲後之常。特推茂恩。告于有位。推誠保順。同德協恭。贊治崇仁。亮節守正。佐運翊戴功臣。荆南淮南節度大使。管內觀察處置等使。開府儀同三司。守太師。尙書令。兼中書令。行荊州揚州牧。上柱國。荆王。食邑二萬五千戶。食實封一萬一千二百戶。賜入朝不趨。劍履上殿。詔書不名。元儼。器範凝邈。志懷淳暢。連輝皇緒。有德懿藩。早膺無戲之封。日爲最樂之善。茂分寶王。參擁麾旄。官序百僚之師。爵窮五等之貴。雖洊加殊禮。獨冠寵名。而居盈益。冲秉節彌亮。率我宗裔。保于燕謀。陽郊受釐。端闕敷號。眷言信厚之長。宜廣陪敦之恩。是用卽褒功之華。增異數之稱。衍采地于多邑。優幹食于眞封。克綏壯猷。度越常檢。於戲立愛惟始。庸樹庇根之強。涵澤旣優。滋同拜胙之祝。國論惟允。家情亦隆。欽懷永圖。以屏王室。可授依前守太師。尙書令。兼中書令。行荊州揚州牧。充荆南淮南節度大使。管內觀察處置等使。荆王。賜入朝不趨。劍履上殿。詔書不名。加食邑一千戶。食實封六百戶。仍賜推誠保順同德協恭宣忠贊治崇仁亮節守正佐運翊戴功臣。散官勳如故。主者施行。

京東路轉運使尙書刑部員外郎直史館韓瀆可尙書兵部員外郎尙書屯田員外郎通判池州周咸可尙書都官員外郎國子博士知越州餘姚縣劉緯可尙書水部員外郎制

敕具官韓瀆等。或茂材爲郎。或華蔭通籍。瀆以帖職史館。咸以累課吏資。有倅州之敏。緯則積階胄席。假領縣章。以年以勞。並允遷秩。今按中兵都隸及司川之職。皆右劇也。宜卽授而寵之。勉圖後庸。無廢余典。可。

保慶皇太后叔母蓋氏追封榮國太夫人制

敕。朕稽若邦猷。輯和孝治。因先朝淑德之輔。正永樂徽名之尊。禮既具揚。恩亦惟厚。追賁外戚。率緣慈懷。保慶太后叔母。追封榮國太夫人。蓋氏世德蘊靈。女師蹈訓。協濟中範。作合令人。盡潔志于祭縶。流順教于家闈。雖景命近止。而慶祚有開。敍親中闈。實曰諸母。絜盛儀之允備。宜先澤以載霽。俾易舊封。且光大國。鈿釵增數。湯沐衍封。告于九京。尙或歆寵可。

皇叔荆王亡妻張氏可追封魏國夫人制

敕。夫德高內助。則維巢之詠興。命或弗永。則飾壤之恩篤。矧惟近屬。條構冥災。懿範未淪。徽章有典。具官荆王亡妻晉國夫人張氏。華基茂緒。淑操芳猷。動合珩璜之音。居遵圖史之誠。早膺盛禮。作配英藩。躬婦順而弗渝。佐宗事而尤恪。游疏大國。參縹寵儀。方憑無遂之賢。永贊維寧之盛。何圖奄忽。遽隔幽明。生而有涯。心焉增悼。宜正名于寶魏。且紓痛于幽泉。密印鈿函。尙茲歆服可。

齊國夫人許氏進封晉國夫人制

敕。竭誠均愛。久則彌彰。報德推恩。厚而無斁。齊國夫人許氏。性鍾淑詰。行服閒和。早祇事于掖庭。首效勤于甲觀。克圖善育。本出至慈。忠存撻褫之辰。譽訂山河之懿。曩雖游疏湯邑。增衍國田。酬推燥之夙功。美居謙之令蠲。質于舊典。猶缺美名。宜追保佑之力。更益褒華之稱。茲爲異數。無替沖猷可。

故宮正紀國夫人郭氏追封尙宮制

敕宮正紀國夫人郭氏。早鍾柔操。參備後庭。善服矩儀。多歷時序。寢服宮闈之秩。游疏湯沐之封。式寵懿猷。遽淪徂景。華聯有等。遺範可懷。特舉褒優。尙慰冥漠可。

典簿張氏進封宮正。勾當大內公事。掌絲李氏進封典言同知尙書省事。御侍永樂縣君武氏進封典寶。落御侍長安縣君王氏進封掌寶。落御侍制。

敕典簿張氏等。婉孌自修。禁嚴被選。早奉宮掖之列。屢更歲籥之華。宜緣久勞。稍遷祕掌。益圖恭靖。以對褒榮可。

掌醞許氏進封司記。聽宣許氏進封典言制。

敕掌醞許氏等。性服恭柔。地承嚴禁。克祇乃事。無懈攸箴。宜酬宮巷之勞。進掌掖庭之局。益思勤勉。用對寵嘉可。

帥臣鄭守忠高化石元孫追封母制。

敕乃者。祇祓陽郊。別獻坤廟。內循明發之感。均愴靡依之懷。矧余帥臣。追悼慈育。宜錫榮號。以寵孝思。具官姓某。亡母累贈某郡太君某氏。躬稟柔嫻。踐循法度。早奉金夫之懿。實生雲將之賢。志達五經。任隆三衛。慨鼎茵之弗逮。追湯沐以渚加。及是展儀。允當均福。進啓郡田之數。再紓子舍之哀。緝禮榘章。參詔冥漠可。

御史中丞杜衍亡母追封京兆郡太君制。

敕郊之報也。均福以惠下。推恩以篤親。本孝慈之所從。罄幽顯而率洽。曰予端士。參總憲綱。緬懷劬勞。增厚褒恤。以爾具官杜衍亡母。廣陵郡太君。盛氏。柔嫻其德。溫靚其容。毓慶清修之門。來嬪良奧之室。勤助省祭。輯和宗姻。婉訓有基。令子是似。漸徙宅之教。卒成善名。副專席之求。游咨直質。緜緣顧復之義。屢延封賞之科。及今相儀。當用申獎。繇淮海之奧。徙咸鎬之都。寶鈿芝函。往告幽窆。可。

入內侍省押班岑守素母進封郡太君制

敕具官岑守素母。河南縣太君。梁氏。肇毓慶宗。有行茂族。早助金夫之懿。入參貂省之華。載服閨風。遂流家檢。實鍾令嗣。列我信臣。能豐祿以逮親。屢賜田而啓邑。且陳奏牘。罄序孝心。願從禰室之榮。冀益封君之數。嘉其誠懇。進厥等威。疏郡寵名。循陔美志。勉膺優渥。永渙徽柔。可。

文思使知府州折繼宣母進封郡太君制

敕具官折繼宣母。信都縣君。劉氏。稟和慶族。作儷勳門。曩勸義于金夫。甫疏榮于石窀。實生令嗣。克襲先封。道茂壺儀。訓覃忠教。方劬綏邊之績。更張及養之勤。瑞福溥均。劬勞有請。宜因本郡。超正寵名。且慰高堂之歡。用光象服之等。可。

兩省妻封縣君制

敕朕乃者。升禋紫宮。麗澤南闕。因考庸懋賞之典。廣視品從夫之封。寵于朝倫。寔有恩限。以爾具官某妻某氏。慶靈辨族。閒婉飭躬。資于多儀。儷乃良士。蹈無攸之戒。既式爾宗。助有爲之賢。方幹余盥。均禱在旦。

疏邑開榮。姑命澤田之羞。且光象服之敷。可。

朝臣妻封縣君制

敕。國家禮成陽郊。賞均大令。蓋由通籍而上。更延及室之恩。所以獎首公褒內助也。以爾具官某妻某氏。高華辨族。幽閒賦質。允服盛禮。來嬪令人。序陟廣朝之聯。勤經啟政之業。迹其輔佐。宜乃寵嘉。俾開湯沐之封。且光簪鈿之等。可。

帥臣鄭守忠高化石元孫妻進封郡君制

敕。朕屬者謹郊報之常。稽禮文之變。茂對三后。平施萬邦。旣敍臣工之勞。復延伉儷之寵。所以貴從夫而恩及室也。具官某妻某郡君某氏。慶靈辨族。閒婉飭躬。資于多儀。式是良匹。蹈無攸之戒。旣克家肥。助有爲之賢。實參戎重。均禱在旦。增邑有常。宜易郡田之封。益光宗事之懿。可。

御侍苗氏進封郡君依前御侍制

敕。御侍苗氏。早以良家。入充近掖。能蹈邕柔之範。亟參進對之華。備位小星。方隆淑問。啓封大邑。宜寵徽恩。往膺湯沐之榮。益劭宮闈之訓。可。

入內都知王惟忠亡妻范氏追封郡君制

敕。具官某妻高平縣君范氏。憑後慶宗。蹈和柔訓。夙奉有行之禮。載稱無遂之賢。輔乃金夫。列我貂省。嚮酬勞于侍幄。亟延寵于封君。懿範式彰。冥災奄及。眷邇臣之悼往。宜卹禮之有加。郡壤升名。泉塗滲澤。厥

章渥數。尙慰幽魂可。

參政樞密母追封郡夫人制

敕。朕乃者祇祓陽郊。別獻坤廟。雖陟配有序。而明發載懷。內付孝心之虔。實均子道之感。爰因贊福。咸及顯親。以爾具官某母某郡夫人某氏。性本柔明。行兼法度。始循婦德。終繼壺慈。擁育邇臣。踐揚臚仕。寔逮累茵之貴。已隔安輿之歡。永慕所鍾。賁章前渥。訖茲大賚。允若重封。并賦賁于泉路。慰乃棘心可。

參知政事宋綬外祖母追封郡夫人制

敕。夫尊賢于朝。則儀品借重。延賞于室。則封號並隆。旣穆人倫之端。兼懷逝者之作。所以篤家情而渥王澤也。故具官王徽之妻。故太原郡君王氏。女德純茂。世靈華衍。早遭良匹。協樹善猷。繫天昌之能賢。遭皇揆而稱首。實荷先顧。光服近僚。惟時賜田。已被柔壺。永從如日之誓。終乏克家之孤。移祉外孫。參我良弼。具上前烈。深軫朕衷。方襄庸于舊臣。宜均寵于齊體。且因本郡。特正順名。厥章鈿函。往賁幽夢可。






3
4
1870

元
憲
集
四

卷之四



成集書叢


編初

者編主
五雲王

行發館書印務商



元 憲 集
(四)



宋 庠 撰

元憲集卷二十七

內制

中書試戒風俗奢靡詔

聞夫古先哲王之御俗也。皆上求天心。下建民極。天道貴質。故敦本以體元。民
後能趨富壽之域。開衣食之源。至飭來臻。大命無泛。國家荷三聖之業。保萬方之大容。典飭盡訓。戒諄勤
然而世道久夷。人心多靡。近聞中外。頗僭典常。自通邑名都。世家豪姓。競作浮侈。迭相矜尚。珠玉被于服
玩。緹繡宴於垣牆。雕幾歲更。規矩時易。簪蓋庖味。山藻室廬。靡嗟民力之勤。罔憚邦儀之禁。此而是縱。孰
不可容。況曩者神宗親駕農祠。示稼穡之重。真廟深惜上幣。嚴銷塗之律。朕皆祇紹祖武。奉行前猷。惟爾
庶邦。敢忘茂訓。自時以往。咸俾改爲儉。輕蹈於匪彝。當一施于重罰。布告遐邇。知朕意焉。

敕州郡勸農詔

昔者堯湯之災。而民不病。知備故也。禹稷之盛。而身服勞。知本故也。惟本與備。一出于農。哲王盡心。義在
于此。矧去聖愈邈。務本日衰。非告以話言。納之善道。則懼夫懈怠之俗。相靡而弗還。富壽之期。因循而莫
復。朕所以躬紹祖武。親禮農祠。御千畝之場。越三推之數。因以申勞狎野。優復力田。招來太和。茂育羣品。
則鏡公諫宣之旨。賈誼勸文之戒。朕雖不德。庶或無慙。而今春以來。善氣猶鬱。蝗羽爲孽。雨足屯膏。南自



083
112
21871

淮楚而接之江。東綿齊魯而著之海。野乏青草。家無見糧。丁壯輕去于里廬。細弱相捐于溝壑。曾未周歲。奄及大饑。至於邦縣之間。率寡京坻之蓄。教不先具。民亦何辜。庸非貪吏以掎克而奪其財。苛人以趨辦而窮其力。淫巧游惰者失其禁。逮訊證捕者妨其時。使吾赤子陷於饑寒。嘉歲變于穢眚。興言及此。朕甚痛之。況視民之勤。禮存彝訓。墾田罔實。漢有明誅。自今以還。其申勅詔條。切督州郡。凡令之出。以農爲先。謹視土膏之宜。明宣稼政之目。諭以國家寶穀重食尊本鎮浮。庶幾流亡有所底止。敢或弛厥稽事。重爲民殃。當一寘于重科。俾大變于衰俗。布告天下。知朕意焉。

舉遺逸詔

王者稽若大猷。總制羣品。曷常不求輔于有衆。收績于無爲。張軒冕之華。以來世彥。厚丘園之禮。以聘道真。然後教化尊于朝。風俗清于野。琮璜入于東序。鸞鷺集乎西靡。天無曠工。祿必配德。自淳政不競。茲舉寢衰。招延者罔汰于濫竽。苟冒者希聲于畫餅。使賢人志士。穢世嫉邪。蓄高韻于無聲。韜奇文而滅彩。築巖釣渭。無復嗣音。加璧裘輪。遂成絕典。寧所繇之殊路。將可復而在人。朕荷祖宗之靈。託元元之上。永惟大本。非賢罔濟。比詔執事。博訪異人。鴛精鳴鶴之臯。馳心白駒之谷。歷祀綿久。希風寂寥。將朝廷禮意之未臻。有司物色而乖當。何區域之大。而賢才之寡歟。抑又聞之。蘭菊高芬。多挺生于幽藪。隋和善價。不自納于賈區。緬惟高尚之蹤。固非科級之致。宣令郡邑。深體眷勤。其或求志于里閭。抗情于丘壑。樂篆素以希古。葆孝悌而道榮。有一于茲。且以名上。朕將敕公車之府。備鶴版之書。虛心望風。待以不次。庶幾皇士。

同獎大寧。傳不云乎。舉逸民天下之民歸心焉。咨爾羣倫。毋忽余意。

賜南京留司文武百官尙書吏部侍郎知應天府韓億等賀南郊禮畢及上尊號受冊詔
欽崇報本。禮重邦經。刻玉崇號。義緣人欲。內循寡德。忝舉鴻儀。膺福享名。心焉增愧。卿近由丞弼。方委保釐。率屬罄恭。露章馳賀。味其辭旨。忠恪兼勤。欣歎之懷。寤寐無舍。

賜西京留司文武百官資政殿學士尙書吏部侍郎知河南府范雍等賀南郊禮畢詔
長景涓辰。高禋措事。獲膺純嘏。還霈茂恩。三靈交歡。咸與欣會。卿屬司留鑰。虔戒乃僚。便道奉章。旅辭致慶。情文參允。將順並照。申閱于茲。歎喟何已。

寶元元年南郊御札勅內外文武臣僚等

夫一陽大報。方冊彝規。三歲親郊。祖宗盛則。朕猥以涼菲。獲承基緒。祇率丕訓。茂昭前人。兢兢業業。罔或寧暇。賴上穹鑒祐。列聖保綏。方隅晏然。氣物時若。民微艱食之阻。邦輯阜財之經。嗣洽太和。莫非靈貺。雖復犧幣有品。粢芼載蠲。申勅祠官。謹修歲事。然齋輅停軫。欽柴輟熏。弗躬于行。撫已成闕。祭疎則怠。心焉增惕。矧紫營在望。奚敢憚勤。黃流並禩。庶幾能饗。爰諏景至之吉。恭迓帝臨之休。慎舉鴻儀。式先誕告。朕以今年十一月十八日。有事于南郊。咨爾攸司。各揚乃職。凡所以供調。毋黷典常。應諸道州府。不得以進奉爲名。別行科斂。裕神約禮。稱朕意焉。故茲札示。想宜知悉。

賜參知政事程琳生日生餼詔

任參丞弼。業總謨明。出入再期。周旋一德。嘉聞誕日。宴啓世祥。毗倚甫隆。寵頒惟舊。餼醪具品。醴粢兼儲。往資合族之歡。姑慶生賢之會。所宜欽荷。以對同寅。

賜參知政事王鵬生日詔

志局堅明。材猷肅給。鼎筦斗樞之重。移參鼎餼之和。碩畫所經。大倫並輯。眷言異稟。實紀初辰。嘉賢連之有開。宜恩頒之載渥。樽醪且旨。庖犧具將。用昭禮食之華。姑集家庭之慶。體余注賴。往洽燕私。

賜知樞密院夏守贊生日生餼詔

盟府舊勳。樞庭新望。告猷伊始。備賜惟常。矧秋籥之孟辰。紀慶弧之善旦。特推蕃錫。且志同寅。往洽宴私。諒欽眷待。

賜知樞密院盛度生日生餼詔

寵分齋鉞。職筦朝樞。勳成密勿之猷。居然俊乂之老。生賢胥會。紀旦有初。方寄同寅。固存異數。牽醪腴旨。醴粢精良。併資宴豆之華。且慶門弧之吉。允宜欽荷。用對眷懷。

賜知樞密院王德用生日生餼詔

識洞武經。世資忠槩。能荷旗常之伐。進參帷幄之謀。造膝有猷。慎辭無玷。勳茂疇于久職。凡再易于中樞。命數益隆。志懷彌劬。眷言異稟。實紀初辰。朝有慶儀。禮兼餼賜。稻醴盤品。醪餼叢滋。俾均合族之歡。用志生賢之會。所宜欽受。且表眷勤。

賜同知樞密院陳執中生日生餼詔

茂承世範。參筦朝樞。年序未淹。風猷載洽。眷言異稟。式紀初辰。宜昭侍幄之華。追慶射蓬之會。芳楹和旨。庖具珍盈。姑示眷慈。往欽蕃錫。

負荷世猷。彌綸機政。迹乃生賢之運。協余同德之休。適及誕辰。乞昭慶物。樽華芳旨。庖齋珍腴。往申宴豆之歡。且志門弧之吉。體茲眷獎。用克欽承。

賜宰臣張士遜生日生餼詔

弼直宏才。謨明舊老。允服賚予之命。實基生甫之祥。曾是季秋。挺茲慶日。拜儀有典。賜品惟優。宜因宴具之豐。尙續壽祺之永。往欽異數。用表同寅。

賜武成軍節度使同中書門下平章事駙馬都尉柴宗慶進謝賜生日禮物馬詔

卿嫻近之華。藩宣有寄。勳屬始生之旦。用申蕃錫之恩。仍俾乃宗。具將予好。寵賢惟舊。疏懇載勤。仍效右牽之良。參抒中藏之感。虔劬適禮。愧尙交懷。

賜鎮海軍節度使新授知樞密院夏守贇赴闕沿路茶藥詔

卿甫膺節召。八總機繁。念稱媿以戒塗。屬炎歊而在候。方滋渴竚。宜謹綏調。特命輕軒。往頒茗劑。所宜欽受。姑表眷懷。

賜契丹賀正旦使蕭傅到貝州茶藥詔

卿奉將隣幣。來慶王正。肅邦禮以惟虔。驚使程而匪懈。眷言次舍。式戾方州。不無執掌之勤。宜有綏調之助。特推優錫。用集至和。諒卽欽承。且昭恩賚。

賜契丹賀正旦副使韓志德到貝州茶藥詔

卿遠服使聯。參修聘範。款邊關而邁往。冒歲律之淒凝。緬是勤斯。軫于勞止。雜頒靈品。助擁時休。宜體眷懷。卽當祇荷。

賜契丹國信使茶藥詔

肅持命節。祇達朝言。冒暑于行。念勞云久。夙宵良苦。調衛宜先。特申藥茗之頒。參資湯液之品。祛煩蠲疾。尙諒眷懷。

賜淮康軍節度使同中書門下平章事陳堯佐加恩誥敕詔

卿儒苑上才。槐階舊老。茂分旄節。陪我寢畿。屬郊事之方竣。冀靈休之普洽。持敷明命。參寵元侯。具刻贊章。往榮藩屏。仍俾家庭之嗣。奉將詔版之嚴。萃厥恩私。所宜祇荷。

賜尙書工部郎中天章閣待制知同州司馬池爲澄城縣百姓黨帥持刀刺殺親叔依條斬訖待罪

特放詔

漢輔要邦。秦餘舊俗。化條所被。恩種宜浚。何茲悖德之氓。靡率懷音之教。毒加親序。汙我人倫。卿適莅郡。封載欽官。獄恥聞凶。類尋正嚴。誅閉閣示愆。露章引劾。願任吏師之責。益彰臣禮之恭。觀過有來。省躬奚

各勉興善政。以牧吾民。

賜資政殿大學士尙書左僕射判鄆州王曾乞南郊陪位不允詔

卿儒苑上才。公槐雋老。冠名祕殿。均逸東藩。雖挹道均沖。而協恭無懈。屬升禋之誕告。遽刻牘以斯聞。願肅朝饗。旅陪祠鬯。然坐堂之政。甫慰氓謠。擁傳之勤。重煩耆德。宜輟甘泉之從。姑紹潁川之良。其在傾輸。徒增歎矚。

賜鎮海軍節度使知澶州夏守贇乞南郊陪位不允詔

卿以擁節之嚴。守夾河之重。茂宣民政。總訓師和。有鄰疆餒勞之煩。有隄事繕完之備。實惟勳舊。鎮乃要衝。會郊報之在辰。覽郵封而瀝懇。願陪盛薦。深體忠懷。然職在刺條。地陪寰服。宜切圭符之寄。用紓朝宿之勤。其在歎嘉。靡忘鑒寐。

賜武成軍節度使同中書門下平章事駙馬都尉柴宗慶乞朝覲上壽不允詔

卿皇室近嫺。重侯茂閥。早持帥節。兼視臺華。擇分陝之名區。寄屏周之良翰。會余慶節。遽刻奏封。願飭介圭之朝。因陪壽屏之獻。誠雖輸嚮。禮實重煩。況任貢已列于前。撫封方倚于外。宜綏閭政。昭副朕懷。眷是寅恭。靡忘嘉歎。

賜刑部尙書知徐州李迪乞赴闕上壽不允詔

勅李迪省所上表。乞暫赴闕。隨班上壽事。具悉。卿久服薰臣。游持魁柄。曷當周衰之重。移殿徐邦之雄。克

布惠和以式方面。雖甘棠流詠于陝服。靈河蒙福于漢京。樹善相均。配古無愧。屬余誕節。時閱奏封。願集奉觴之辰。且紆戀闕之志。然倚闕舊老。倡率守麾。風化所期。內外惟一。無煩趨覲。姑穆翰垣。恭愛之誠。歎賞徒切。所請宜不允。故茲詔示。想宜知悉。夏熱卿比安好。遣書指不多及。

賜護國軍節度使兼侍中張耆乞朝覲上壽不允詔

卿倡牧元侯。登樞舊德。繼開大府。實冠友邦。屬我誕辰。願陪慶會。雖奉觴攸好。而趨節爲勞。姑穆翰垣。式符眷賴。輸誠循禮。徒川歎嘉。

賜河陽三城節度使楊崇勳爲移知陳州乞朝覲不允詔

卿早秉戎旄。屢綏藩政。民謠載路。歲筦亟淹。曷因宛道之夷。後徙淮陽之守。隱然屏翰。陪余京師。遠閱囊封。願先載覲。眷心存之。雖切。願外倚之。有初。無煩造朝。且重分閫。

賜西平王趙元昊詔

朕奉承端命。撫有萬方。上席祖宗之謀。靡佳兵革之舉。專任德教。以統華夷。推心信人。自謂無負。卿世懷恭順。名冠翰垣。嗣享王封。守我西土。朕不矜官爵之貴。不吝祿秩之優。任倚中權。寵均同姓。關市交易。行李無猜。貢獻頒分。道路相屬。則朕之恩信。卿之款誠。稽于大倫。誰得爲間。今乃遽形表疏。輕述僭差。且將徇過分之謀。舉非常之號。冒陳世系。輒改歲元。省闕再三。嗟惋何已。寧朕之寡德。不足以懷來。將卿之失圖。自成于迷妄。事無萌隙。何及于茲。況自乃父以來。盟書可復。今略陳大要。以曉爾心。且卿父誓表其略。

云。臣立誓之後。若負恩背義。百神怒誅。上天震伐。使其殃禍。仍及子孫。此表見存藏之故。府卿之先父。卒保斯言。故能高朗令終。功業相襲。福之所庇。理則宜然。今卿忽此背馳。了無所據。壤爾考之約。孤本朝之恩。忠孝兩虧。今古爲恨。揆之王法。所不忍聞。自卿表之來。內外咸憤。然朕獨排羣議。深惜舊勳。恐卿惑左右一時之辭。非英傑本懷之欲。人誰無過。事猶可追。倘能去尉佗越帝之名。復吳芮漢庭之令。洗心嚮善。改往懷昔。則朕之待卿。曠然如舊。永紹世祿。長爲國藩。變通之機。不竣終日。去就大分。其審處之。所進鞍馬駱駝。並卻付來人牽回。爾其戒已往之愆。復將來之善。則永世無窮矣。故茲詔示。想宜知悉。

賜西平王趙元昊爲賜差來人見辭例物詔

卿志凝忠概。世績武勳。保障有勞。恭亮彌罄。比余誕日。首率貢儀。差駿產以斯材。旅慶琛而有煥。仍嘉親校。能恪朝規。旣閱右牽之良。特渥匪頒之數。且昭恩賚。并寵藩維。永念傾度。尤增歎尙。

賜振武軍節度使知延州范雍充鄜延環慶兩路沿邊經略安撫使詔

卿幹棟名材。籌帷舊望。自付擁旄之任。卽臨乘障之衝。叢爾狡羌。忘我前施。陰連種部。規擾塞垣。雖購募有科。而威防難廢。再念誥勞。控遏之會。安化經營之方。節度素分。綏懷莫一。斷于朕志。合乃使名。按瑣序勞。緊卿爲重。已申朝命。馳錫詔書。俾蚊蚋暴集之辰。有兔犬指縱之地。宜欽異數。益講武韜。內安屬國之民。外殄反常之犯。稱余遠略。遲乃茂勳。

賜奉寧軍節度使就差知涇州夏竦充涇原秦鳳兩路沿邊經略安撫使詔

卿望映民宗。謀參王體。頃從樞幄之舊。移陟師壇之崇。出鎮三秦。並護諸將。而叛羌各種。狡穴野心。竊號背恩。游魂伺隙。比雖申嚴邊鎖。換補將屯。然自平涼以東。隴道交屬。建防制要。當在臨涇。慮烽燧之警秋。或狂狡之送死。必先威禦。以便指縱。余心念焉。無易卿者。已頒成命。卽俾改轅。特新使號之華。再襲戎鈐之重。仍令兩道。同稟善經。綏御所資。等威皆絕。宜欽慎選。毋或憚行。勉壯厥猷。用恢西路。

賜置勒斯賚詔

近者夏州僭逆元昊。孤背朝恩。竊爲僭制。已詔有司。應元昊在身官爵。及所賜舊姓。並令除削。訖卿性資忠勇。世嫉仇讎。得此布聞。諒增同憤。然恐元昊恃其凶狡。妄肆侵凌。卿宜先事爲防。因機伺便。整揚勁騎。率勵衆心。或躡其空虛。出其不意。以時掩擊。殄滅醜徒。助天道之禍淫。成王威之禁暴。則崇名厚賞。非卿而誰。勉建殊勳。副余外禦。兼昨者里玻默里烏進奉到闕。言卿有男轄戩瑪克古覺二人。特以卿故。並授團練使。仍支請受。續據秦州奏。得卿文字。知轄戩等。各往宗噶爾城并蘭州住坐。兼言道不與元昊往來。如元昊入漢界。兄弟二人將兵殺截。此蓋卿從來一心向國。致轄戩等如此忠孝。況卿父子至親。義須和協。與卿同共。掩殺僭逆元昊。勿落元昊姦使。別致間諜誘引。

賜中書門下詔

昔苗民弗懷。首罹虞竄。邛支自立。終伏漢誅。蓋犯順者無赦于國章。除殘者罔限于夷服。炳焉通誼。疇或敢踰。趙元昊戎漠餘妖。邊關小種。性含虺毒。志負狼貪。昏頑表于稚年。傲悖成于壯齒。曩者德明卽世。西

控哀。悵朝廷錄守方之忠。憫稱嗣之禮。拔于童豎。付以節旄。名襲真王。寵視同姓。金絮有秩。絡繹以周。其窮關市弗譏。貿遷以通其貨。假我明命。取重諸羌。固宜竭犬馬之勤。効涓埃之報。克守先業。以稱大恩。而乃背惠反常。毀忠蔑孝。僭舉國號。扇惑蕃渠。跳梁井蛙之涯。旅拒秋螳之轍。公遣軍校。冒服使車。列牘自陳。歎天罔畏。旣彰逆節。合舉明刑。朕深憐舊勳。特加涵覆。橫遏羣議。密賜手書。貸其方命之愆。開以自新之路。護送來介。俾還穹居。庶遷善而革心。終恃遠而迷復。至敢驅率醜隸。攘竊塞民。騰布文符。誘誑區落。而朝廷列奏。邊吏抗辭。願舉偏軍。往平狡穴。促梟稱亂之首。以正不庭之辜。朕再念一夫肆狂。餘衆何罪。況元昊脅從。濟欲濫殺。逞威名。曾外奔。諸帳懷貳。苟戈鋌並縱。則玉石奚分。且俾列于購科。止用取其魁惡。其元昊在身官爵。並令削奪。仍令宗正寺除去屬籍。惟彼諸部。素奉本朝。迫此奸兇。遂成誑誤。倘能結黨歸義。執賊效功。必當昭洗前污。申明厚賞。國有信誓。煥如丹青。應賞募科格。並委中書門下詳爲條件。以時播告。俾體朕懷。

夫政平召祥。化缺生沴。推精盪禳。其猶影響。故王者遭異而思德。省己以及人。交修治綱。仰答靈譴。朕雖寡昧。敢忘斯舉。比者善氣弗效。陰沓屢臻。坤體震于冬藏。雷音發于春孟。邊關民舍。被害尤苦。是用臨朝。嗟傷。馳使撫綏。推咎以咨讜言。協恭而戒臺宰。冀獲愆謬。庸克振除。尙慮幅員之遐。不無官守之衆。其間或吏貪而弛。或教虐而苛。或狴牢有滋豐之煩。或賦徭有輸調之急。或受賕鬻直。使下情壅于上聞。或隱災逃負。使醜恩隔于周浹。或世償逋折。巧避赦原。或歲嬰呼擾。猥妨農作。一物失所。太和用虧。朕念其斯。

責者。外則有使轂按巡之司。次則有藩條守長之任。率荷優寄。當體至懷。苟前弊之尙存。宜悉心而司革。庶迎美應。用洽重熙。凡厥具僚。無忽余誠。

夫至公之行。則淑慝咸辨。私議弗禁。則風俗易偷。朕躬攬權綱。茂綏政治。每觀邪正之辨。思寄誅賞之中。庶臻大猷。以止多辟。而士類至廣。材品或殊。久服涵養之仁。寔成黨與之弊。至乃挾朋相援。奸利自營。驅扇颺塵。混淆朱紫。託狂辭而市直。結陰好以濟仇。章交公車。聲布行路。使濟濟羣讓。有愧堯人之封。翁翁煩言。更興周雅之刺。永惟澆競。良用懲嗟。若夫委質事君。協恭宣力。思無出位。是曰守官。和異于同。固當擇善。況朝經式序。仕次有階。因行察言。緣名責實。苟存忠潔。自致顯榮。何必舍爾夷途。蹈于險轍。釣名汗行。觸禁投愆。宜內訟于乃心。毋亟傷于至化。尙安所習。國有嚴科。凡在搢紳。明體予意。

王者稽若大猷。總制九服。曷嘗不寄治于守宰。責效于監司。職焉相維。命乃無泛。朕奉承景業。流觀往辟。知仁壽之本。以政教爲先。故咨求羣材。綱紀衆務。察州有等。字邑有員。建漕部以謹民財。馳使詔以糾邦獄。委屬偕重。休戚與均。保乂之方。數路而已。固當上體勞疚。允迪惠和。使鰥寡無恫。怨訟咸息。沐浴至道。臻乎太寧。今則不然。吏文多端。而貪殘日滋。民生孔勤。而奉養多乏。愁歎未能盡訴。囹圄不以時虛。感動陰陽。延致災眚。朕雖引慝自咎。申誠博謀。眷爾多方之臣。得無曠位之責。自時厥後。宜惕攸箴。班條者企。循良之風。擁節者勵澄清之志。刑罰則寧寬而無濫。徭役則量力而勿苛。任百里不可以自輕。效一官不可以懷苟。率我王度。以承天心。尙或勿度。罔有攸赦。布告中外。知朕意焉。

賜外任臣僚進乾元節銀絹詔

孟序乘離。誕辰著令。爰率邦儀之舊。載均朝享之歡。卿恪奉彝章。遠祗慶集。聿馳任土。來侑稱觴。眷旅實之珍盈。驗祝延之惻愍。永言歎尚。無捨于懷。

賜外任臣僚進乾元節功德疏詔

慶序祝延。邦儀著令。卿發于忠愛。申以齋明。集方外之勝緣。歸我辰之茂嘏。仍因淨範。虔疏寶題。駢軸相輝。通郵來上。具體贊揚之盛。益昭輸戴之勤。省閱于茲。眷稱無斁。

賜振武軍節度使知延州范雍進謝賜牌印月俸公使錢到任馬詔

卿近擁軍旄。往司戎索。爰錫印符之重。兼資泉廩之豐。人爵所班。邦恩惟舊。遽披謝牘。仍效名駒。敷感載勤。靈誠彌愍。永言率禮。茲用欽懷。

賜奉寧軍節度使知永興軍夏竦進謝賜牌印月俸公使錢到任馬詔

卿乃者繇天臺之聯膺。戎闡之重。特頒節傳。詔刻印章。惟鍾官月廩之豐。逮侯邑餐錢之舊。並循邦令。參寵使權。署政有初。需頭來上。曲條謝禮。併效駿驅。永念忠懷。實深嘉歎。

賜外任臣僚進端午馬詔

朱夏適中。端辰協午。肇于嘉節。實紀慶儀。遠形輸貢之華。遠集效牽之駿。勤誠有底。累歎無忘。

賜諫議大夫張意進謝恩馬詔

卿久服吏資。近充諫列。侃然華皓。允矣甄升。閱感敍之盈章。復效牽而致禮。恭勤所集。歎尙兼懷。

賜諫議大夫俞獻卿進謝恩馬詔

卿頃緣最狀。序陟禁曹。方寄守麾。已獨陞謝。飾驂來效。禁禮載虔。益驗傾輸。良增嘉尙。

賜諫議大夫盛京進謝恩馬詔

卿積著藩條。望華朝禮。彞絲卿列。進序諫曹。濡澤有初。露章申感。仍效斯材之乘。允將由禮之恭。載閱勤誠。但增嘉歎。

賜外任使相節度使進乾元節馬詔

震誕之辰。允刊彝令。官司罄祝。申佑至虔。卿位服宗工。勳宣名翰。樂聞慶會。祇率邦儀。遠效舞驂之良。入飲充庭之品。愛心所底。貢禮斯華。言念傾輸。彌增眷矚。

賜彰信軍節度使同中書門下平章事王隨進謝到任馬詔

卿頃罷政機。近綏侯服。星言之部。時克偃藩。屬宣布之涓辰。序恩勤而累感。效茲阜駿。絢乃庭儀。言念寅恭。益深嘉矚。

賜護國軍節度使兼侍中張耆進謝孫男恩澤馬詔

近以均錫鴻禧。就蕃榮數。仍眷抱孫之愛。復推延世之恩。率是寵章。抑推彝制。遠陳函奏。兼效虜驂。感敍過周。歎嘉無斁。

賜淮康軍節度使同中書門下平章事陳堯佐進謝差男押賜加恩告敕生日禮物及孫男恩澤馬詔

彝以茂加勳策。追慶門弧。並因子舍之歸。卽寄使輶之寵。屬推世賞。施及孫謀。雖命數載蕃。而等威斯協。需頭來上。駿足效牽。過敍感惊。有昭邦禮。貢輸爲費。歎想交懷。

賜龍圖閣學士尙書工部侍郎知并州杜衍進謝恩馬詔

朕彝者親選舊勞。就嘉祕職。仍屬綏邊之重。且資訓俗之方。眷此序升。詎煩過謝。駿良來效。悃悞具將。永念忠勤。靡忘嘉賜。

元憲集卷二十八

內制

賜置勒斯賚男轄戩勒書

勅轄戩省秦鳳路部署司。奏據汝將到蕃字。譯作漢字。稱汝告秦州部署諸官員。自家要抵敵草寇。便各往宗噶爾城並蘭州住。蕃漢兩家往來。道不與草寇往來。如有草寇兵士入漢界來時。自家兄弟二人。將兵士殺伊草寇事。汝款塞輸誠。舉宗效順。奉宣王略。式遏邊虞。憤狡寇之陸梁。謀成師之犄角。忠懷壯節。朕甚嘉之。然汝兄弟既奉朝廷。卽須父子和協。盡心孝順。和爲一家。使出兵之時。手足相應。同殺僭逆元昊。斯爲上計。勿聽姦人間牒。今賜某物。至可領也。故茲獎諭。想宜知悉。秋涼汝比好否。遣書指不多及。

賜彰信軍三軍將吏僧道百姓等爲授王隨本軍節度使示諭勅書

朕以王隨時棟名材。公槐舊望。比付宰司之重。頗成歲績之勤。而屢控讓情。懇辭大任。重違謙懇。特峻等威。俾改陟于齋壇。且兼榮于鉉席。眷惟戎節。近制寰畿。陪余京師。式是侯服。雖未臨所治。而遐率懿綱。絜乃軍和之嚴。暨于州里之衆。遣茲賢帥。良愜爾瞻。固當善稟教條。仰承威惠。增崇藩屏。稱朕意焉。

賜定國軍三軍將吏僧道百姓等爲授王德用本軍節度使示諭勅書

夫擁旄授律。以獎戎昭。疏藩疇祉。以屏王室。諒非舊德。疇負寵名。朕以王德用。忠族世勳。壯猷亮節。早階

勇爵幹我近司。綢繆萬樞。陟恪三接。嘉其匪懈之力。易以中權之雄。宅是左馮。屏厥西夏。雖肇頒于新節。且留掌于煩機。眷乃翰垣。底茲威惠。所宜率籲衆志。欽服化條。同底大和。以奉賢帥。

賜交趾郡王李德政甘州可汗王伊嚕格勒雅蘇歷日勅書

朕祇仰乾經。順修時訓。每緣命朔。必謹頒常。卿詔服世勳。協寧邊略。屬歲元之更序。資玉歷以布和。宜克欽承。用符恭授。

賜五臺山十寺僧正圓凝等新進功德疏勅書

靈山奠方。西聖儲瑞。聿爲寶所。以佑中區。眷爾苾芻之流。參軒迦藍之重。每緣新歷。茂集勝因。歷讚誦之寶題。形熾昌之善祝。傾虔有素。歎尙無忘。

賜元州舒延金進奉謝賜真命官誥及加妻母邑號勅書

汝祇稟朝威。保寧徽煥。彝寵州符之號。特頒臺詔之文。遽達貢儀。罄紓謝臆。永言恭順。良切嘉稱。

賜右屯衛大將軍昌州刺史承裕左屯衛大將軍封州刺史宗顏進和御製讀三朝寶訓詩獎諭勅書

洪惟列聖。參建大猷。至訓睿謀。充圖溢牒。曩緣約史。申命記言。屬茲講藝之餘。將虔布策之覽。永懷先烈。因杼短章。仍示宗支。用均燕翼。汝地連昵屬。天賦雅材。唱韻甫頒。奏篇俄上。匪徒挾藻之麗。實具其之能。秀劭若斯。歡慰何已。勉修素業。終稱茂親。褒善最成。吾意偕極。

賜知府州折繼宣放罪勅書

汝世荷朝恩。任優邊瑣。凡該郡政。合稟公規。覽使者之劾章。列部民之訴牘。悉條違冒。紛有端倪。雖涉交仇。而理須置對。審如訟狀。當正刑科。朕以汝忠順之門。勤勞固圉。方期來效。搆此煩言。良用軫嗟。特從矜貸。然國章不可屢屈。吏議難于再加。爾當念咎省躬。棄汙履潔。心無憚改。日以自新。上續弓裘之勳。勉訓山藪之施。保名全節。可不慎歟。

賜溪洞刺史等進乾元節水銀端午綿紬勅書

慶節稱觴。嘉辰角黍。汝保寧遐徼。欽率彝章。任土達誠。效珍有品。眷茲順恪。深用歎嘉。

賜乾寧軍兵馬監押右班殿直趙化明勅書

勅趙化明。省河北轉運司奏。准密院劄子。令乾寧軍勘會保明到。汝的于正月一日。親自部領軍員兵士。往軍北蔡家庄圍敵。殺倒賊頭共五人。全火。當同看詳。委是詣實事。汝禁庭隸職。軍壁董戍。能率蒸徒。往擒寇孽。厥官斯舉。編戶用安。言念忠勤。良深嘉尚。故茲獎諭。想宜知悉。

賜五臺山僧正法震等勅書

勅五臺山僧正法震等。省所差副僧正兼真容院供養主英惠大師。賜紫廣洎進新正功德疏到闕事。具悉。睽彼名山。素嚴真像。屬茲獻歲。廣集勝因。奏疏以聞。精誠可諒。宜加賜予。式獎恭勤。今賜廣洎紫僧衣一對。絹二十疋。故茲獎諭。想宜知悉。

賜知唐龍鎮殿直來守順勅書

勅來守順。省所差人管押進奉乾元節并告家闕及直進馬共四疋事。具悉。汝率職居邊。輸忠奉國。爰效右牽之貢。仍傾無隱之誠。言念恪恭。尤增嘉尚。特推頒賚。用示眷懷。其所進馬。今依估價。迴賜錢七十九貫文。所有告家闕別賜銀一百兩。並交付差來人。至可領也。兼賜差來教練使任璘王受郭海各紫絕衫子一領。錢三貫文。故茲示諭。想宜知悉。

賜祠部郎中知河南府陵臺令兼永安縣趙世長勅書

勅趙世長。近雨水衝注。奉先橋。汝部押兵士救得本橋事。在昔先皇恭朝陵寢。跨茲溫洛。肇建輿梁。比淫雨之載零。伊衆川之交注。汝克勤障捍。訖免墮摧。言念勤勞。豈忘嘉尚。故茲獎諭。想宜知悉。

賜尙書兵部員外郎知壽州梅詢勅書

勅具官梅詢。近草寇竊發。汝擘畫捉賊。人物安居事。壽陽劇地。東楚輿區。控引淮淝。表裏潛窟。逋逃所聚。剽竊寢多。疇汝幹材。付之郡職。果有方略。屏茲寇攘。枝黨悉擒。巢穴皆覆。省司官之奏列。知緝戶之乂安。載嘉乃勞。深副予意。

賜杭州天竺山傳法住持僧文勝勅書

勅杭州天竺山傳法住持僧文勝。汝早悟上機。素推重德。近茲京輦。肇建禪宮。已徇羣情。爰命促召。將廣安于法衆。式闡真乘。宜束戒于輕裝。副茲寵待。故茲示諭。想宜知悉。

賜馬亮進乾元節絹勅書

勅馬亮。省所進奉乾元節絹二千疋事。具悉。卿爰以能材。往分外寄。載登厥貢。克遵任士之規。來慶誕辰。深諒愛君之節。虔恭可尙。嘉嘆寧忘。故茲詔示。想宜知悉。

賜知舒州洪鼎勅書

勅洪鼎。省所進奉新茶一銀合事。具悉。汝輟于學館。往布郡條。懿彼名區。肯茲嘉苾。能採掇而來貢。應氣序以惟新。言念恭勤。良增歎尙。故茲示諭。想宜知悉。

唐龍鎮勾招鞍馬空名勅書

汝部族推雄。忠勞夙著。惟邊疆之頗邇。聞良馬之素多。能選權奇。入充貢獻。必頒善價。用獎純誠。

府州勾招鞍馬空名勅書

勅國家務推恩信。遠示招懷。聞彼邊陲。素多良駿。儻獻輸之來効。固誠禮之可嘉。其在賞酬。必令優厚。勅書到日。汝等可多將三歲以上十歲以下。堪勝帶衣甲壯嫩好馬。赴京進貢。候到日支賜茶酒錢。及厚給價直。已指揮經過州縣館驛。支給熟食草料。如法供待。務在豐盈。故茲示諭。想宜知悉。

賜知代州趙日新進黃金鍍銀礪石火匣勅書

完石含溫。良工賜巧。熾燃備用。鈞飾均華。會此淒凝之辰。修厥藝常之獻。勤恭所至。歎尙無忘。

賜知廣德軍龔會元進先春茶勅書二首

惟厥苦茶冠于常卉。薄言采擷。來效貢輸。矧屬誕辰。且先方物。服恭修職。併用稱嗟。江楚之區。茗芽攸產。陽膏其動。露蔭載萌。擷芳宮以先期。襲采緹而效貢。傾勤有恪。嘉尙無忘。

賜知光州郭昭昇進新茶勅書二首

土毛之繁。茗品尤上。先春效味。輸貢有經。眷乃摘山之勤。加茲于橐之密。罄恭謹職。併用稱嗟。茶品之英。淮區攸產。當新陽之盈。僨先百蔭以萌滋。著厥貢條。是惟方物。逮此甘芳之薦。弗違采擷之期。言念恭勤。良深歎闕。

賜知豐州新授侍禁王餘慶進謝恩馬勅書

曷寵邊勞。序遷庭侍。邊緣恩擢。來效貢輸。服阜惟良。賜金有品。逮于給使。咸俾霑齋。深諒爾忠。當體余眷。

賜冀州刺史趙翰階州刺史張重德進謝恩馬勅書

汝以職勞。茂膺恩數。眷獎功而甫爾。遽列感以勤斯。爰效駿牽。且將謝意。恭虔所底。歎愧良深。

賜石州安慶府都督康興進乾元節馬勅書

慶節在辰。庶邦效貢。汝世承邊扞。勤稟朝規。遠輸牽右之良。來集祝延之會。永惟忠恪。深用稱嗟。

賜新授崇儀使李士彬進謝恩并乾元節馬勅書

增秩懋勞。抑惟公賞。祝延上慶。茲乃忠懷。繫廐駿之竝將。願庭儀而有恪。恭誠順節。歎闕兼深。

賜殿前都虞候劉平進謝到任馬勅書

卿輟自衛廬。往來邊壘。訓齊甫爾。感敍勤斯。載閱右牽之良。彌昭中蘊之恪。眷言歎賜。無廢于懷。

賜潞州安慶府都督安美等進上尊號馬勅書

朕懋迫羣情。紹加徽冊。繄乃心之忠順。樂朝慶之光華。遠效名駒。來參貢物。然載驅多費。平估有貲。且錫貨緡。用酬駿產。仍推恩例。並獎使勤。其在歎嘉。弗忘于意。

元憲集卷二十九

內制

賜文武百僚上尊號不允第一批答

夫號惟表功。名不浮實。休有前誠。是謂至公。朕以眇眇之身。託元元之上。負荷淳烈。遙駿大猷。持盈載勤。燭理猶昧。日慎一日。弗遑底寧。幸屬中區之和。將躬吉士之報。揆乃冬序。布之先庚。恤祀有初。克己彌勵。而公袞四近。官師百工。絲朝逮鄉。自夏而裔。咸一厥慮。颺言于廷。願因拜祝之成。益余建顯之數。省閱于再。良用憮然。矧曩徇羣心。游膺丕稱。準文配義。已多慙德。今又徵祈福之會。崇溢美之聲。神聽惟聰。禮典將黷。齋明抑畏。其若是乎。徒嘉乃誠。毋重台責。

第二批答

朕曷以郊報之嚴。邦體攸重。親率厥典。誕告羣倫。方將勵抑損之誠。保齋飭之戒。嘉與三事庶尹。共遵斯路。率志盡物。以優裕于神祇。庶無怨恫。用迎祝施。則朕之精懇。宜諒于朝。乃今中外之情。愛戴弗已。因時熙事。增我號榮。連章叫關。至于再請。諭而未卻。茲愧于懷。且禮繁者易敝于文。名高者難副以實。矧斯薦信。安議重華。罔固溢言。往順前指。

第三批答

朕奉承先猷。日儆端命。獲事上帝。于茲五郊。特以方隅靖嘉。犧齋蠲碩。樂與羣執。同葳盛儀。不謂官師。率
和奏牘。連委冀緣。瑞福之集。增列號榮之崇。荐諭至懷。俾停過舉。而億兆歸美。右席均誠。叩關竚命。固期
開可。朕參慮夙夜。審處情文。不有所命。曷符愛戴之切。不有所避。奚表抑畏之恭。若乃寶用善元。易冠丕
稱。是惟勛德。匪曰名功。襲用舊章。差或無愧。至于英睿之烈。后辟罕兼。未寶而居。省已胡益。矧歲序之邇。
變眚屢臻。宵舍舛期。坤載愆靜。責躬念咎。已布于詔書。盡誠恤祀。方祇于天戒。遽加徽顯。是黷齋明。宜損
溢言之華。姑循備物之典。去彼取此。欣臆兼常。其所上新號內英睿二字。宜不允。餘如所請。候郊禮畢日
受册。

賜荆王賀加上尊號受册批答

朕屬者徇外朝之請。崇徽稱之華。甫畢禋燔。遂膺榮典。內循溢美。兼用建元。覲然祇受。良增夕惕。卿茂親
明德。聿隆褒愛。雅辭徹奏。首罄寅恭。表率友藩。尊奉王室。申味情旨。歡愧兼懷。

賜門下侍郎兼兵部尚書同中書門下平章事張士遜讓恩命不允批答

朕頃虔郊報。慎講禮文。實倚台司。總宣使範。肇于齋款。訖乃熙成。謀猷所咨。陟降咸若。褒功胙土。恩冠于
朝。誕告之辰。師僉允協。夫何冲避。猶爾控陳。且名器天下之公。股肱君體之一。卿而弗受。誰復宜居。宜略
常謙。往膺盛典。

賜荆王讓恩命不允批答

卿屬冠宗支。地尊藩輔。禮無與二。恩所當先。惟是嚴禋。介于繁祉。覃爲慶賞。實首親賢。明制誕敷。朝言允協。何圖謙慙。再列辭情。雖高讓可嘉。而至公難廢。宜循茂典。卽斷來章。

賜知樞密院盛度讓恩命不允批答

曷以獨吉元辰。紹修愆祀。絜卿舊老。相我盛儀。禮備福臻。此焉同慶。華階茂爵。允矣疇庸。而乃稽命至公。徇高一己。過敷讓懇。將廢彝章。收汗出綸。所繫尤重。宜遵往受。卽副虛懷。

賜參知政事王讓讓恩命不允批答

朕屬者躬祓嘉壇。獲成鉅典。歸臨端闕。大宥羣生。實賴左右之臣。罄宣協贊之力。無德不報。慶賜遂行。參質寵章。允穆朝論。讓封來上。謙槩頗勞。然信賞勸功之先。徇高行己之細。我方懋德。人孰顧私。當體虛懷。無淹往受。

賜參知政事李若谷讓恩命不允批答

卿早服忠謀。預聞幾政。屬余禋類。實相齋明。勤與禮俱。兆緣誠報。受釐之始。均賞攸宜。遽閱奏函。過形讓懇。夫疏封馭貴。褒勸大方。潔己辭豐。踐修末節。矧惟成命。已布公朝。當廢循牆之私。卽虔渙汗之拜。

賜寧江軍節度使允讓讓恩命不允批答

卿屬懿地尊。器韶韻遠。秉旄戎閫。司籍帝宗。曷展陽郊之儀。參奉上公之獻。助余介祉。時乃之勤。竣事布恩。寵章惟舊。猥形擢遜。未卽往俞。況定命已行。公言普協。宜回沖執。時對茂恩。

賜保寧軍節度使駙馬都尉王貽永讓恩命不允批答

卿早服近媚。見推賢帥。屬余禋類。專倚微循。亦既均禱。是焉進律。質于公賞。孰不謂宜。而過執沖懷。尙留成命。安得徇茲崇讓。虧乃懋功。盍廢謙私。往膺蕃渥。

賜殿前副都指揮使寧遠軍節度使鄭守忠讓恩命不允批答

卿彙執親喪。奄踰禫祭。雖義從權奪。早舉墨綬之文。而官有舊常。宜還艾綬之品。仍緣襃數。進行戶封。式示賞勞。詎爲躡等。遽茲沖避。深體謙勤。然命出成綸。恩無收汗。卽虔往受。毋復牢辭。

賜宰臣張士遜讓恩命不允批答

卿早服宗工。洊同宰政。式布揚庭之命。且光圖舊之恩。方佇延登。遽形謙避。體余慎簡。當廢沖懷。今差入內。內侍省內東頭供奉官梁懷志。賜卿讓恩命不允批答。想宜知悉。

賜宰臣章得象讓恩命不允批答

卿曩服僉命。贊圖宥密。嘉有勞于幾事。俾移燮于大鈞。方佇延登。遽形沖避。讓牘再開。寵章猶鬱。適圖亮采。無遂終謙。

賜知樞密院王德用讓恩命不允批答

卿總司樞務。綿涉歲勤。特遷內使之華。仍易中權之號。遽形讓奏。稽我寵章。宜副同寅。卽祇兼授。卿久勤樞務。兼擁戎麾。朝渥旌勞。寵章異數。疊形讓啓。深悉沖誠。宜回再僂之恭。往對已成之命。

賜知樞密院盛度讓恩命不允批答

卿茂宣忠力。對掌機衡。實嘉籌幄之勤。俾換建牙之秩。遽形讓奏。稽我寵章。宜副同寅。卽虔初授。

賜參知政事程琳讓轉官不允批答

卿夙蘊賢猷。參知宰政。尙講邦彝之要。俾增臺轄之崇。渙令已行。讓封來上。嘉其謙慤。方切倚毗。卽服寵階。無廢朝賞。

賜參知政王巖讓恩命不允批答

卿德映民宗。才經政體。蔽于朕志。擢佐台猷。願承命之允諧。何奏封而固避。雖嘉有讓。難廢同寅。宜略謙懷。用光賢舉。

賜同知樞密院張觀讓恩命不允批答

卿適膺成命。參掌繁機。朝論允孚。謙懷興讓。宜虔往授。以協至公。

賜淮康軍節度使同中書門下平章事陳堯佐讓恩命不允批答

卿近解政機。榮兼將鉞。游形讓奏。彌諒謙懷。矧誕告之徧聞。當往諧而卽受。無煩遜執。式副僉命。

賜新授武寧軍節度使赴本任王德用讓恩命不允批答

卿久服政樞。游彌歲筦。盡心匪懈。均逸有常。特移漢節之華。近奠徐方之重。詢于疇若。僉曰宜哉。疊覽讓封。過辭恩典。矧出綸之誕布。願收汗而罔繇。宜略終謙。時膺茂渥。

賜新授尙書侍郎同中書門下平章事章得象讓恩命不允批答

省表具知。衰職華重。槐階峻極。必咨民望。允蓋天工。卿頃幹鴻樞。實稔休聞。敷燮之任。授受惟宜。而謙情素懷。累控重啓。尋加敦諭。尙執遜沖。且策名者以奮庸爲先。體國者以獨善爲細。矧茲爰立。方切仰成。安得遂循牆之恭。稽側席之竚。時膺往命。勿復煩辭。所讓宜不允。仍斷來章。

賜參知政事程琳讓轉官不允批答

卿識貫民宗。望高時秀。比繇卿貳。擢贊宰司。參決大猷。總領衆職。動本直道。期于致君。年績甫成。朝寄滋重。式疇忠概。兼肅政機。德賞之行。公言無間。遠披沖述。深具至懷。宜略常謙。往服休命。

賜新授參知政事王巖讓恩命不允批答

參毗國均。僉屬邦望。卿忠力淵劭。思懷凝簡。曷考藩最。進貳政樞。式時猷爲。濟厥文敏。績用已試。朕甚嘉之。移贊宰庭。俾暢賢業。而介節難進。刻奏自陳。遜執雖勞。虛竚方切。當廢確然之請。庸副往哉之命。

賜新授參知政事李若谷讓恩命不允批答

卿局力開濟。思謀淹允。歷踐衆職。簡服近僚。以詳文飾吏師。以精器剗京劇。侃然奮德。華我治朝。宰路缺員。邦均疇佐。式咨民望。參筦政機。僉謀旣同。亮采惟竚。遠披讓奏。頗執沖規。儻矜節自高。則同體安寄。宜屈終謙之守。時副欽鄰之重。

賜新授宣徽南院使定國軍節度使知樞密院王德用讓恩命不允批答

卿茂負忠勞兼資才武曩藉世臣之重入司幾政之煩寵序節旄籌持帷幄左右無懈歷年于茲奚加使于徵猷乃改藩于維翰疇功斯允讓爵載勤閱乃奏封尙稽拜秩固當略循牆之小善體渙汗之明恩往踐崇階以穆公議

賜新授宣徽南院使定國軍節度使知樞密院王德用讓恩命不允批答

卿地服世忠勳在侯表久翊樞務遙制州師曷疇匪懈之勤卽寵兼榮之拜尋從誕告孰不謂宜夫何沖懷再爾牢讓矧宣猷使範持節戎麾蕃其典章蓋重帷幄朝僉德舉咸出至公無執終謙之勞尙遠信賞之實卽斷重請時對茂恩

賜新授寧武軍節度使知樞密院盛度讓恩命不允批答

對掌斗樞遙持將鉞隆名重器兼副實難卿望冠本朝謀經庶績曩咨雋乂參處弼諧穆然清規式我彝序因儒林元老之懿換籌幄皇僚之華亦旣歲成是光戎秩而洵形讓懇固避寵階謙槩雖勞至公難廢卽膺往授無復多陳

賜新授同知樞密院陳執中讓恩命不允批答

卿茂器清規沖懷勁節世詒忠教族擅邦華自結先朝歷試衆職侃然直道形于造次逮升禁從連撫外藩威惠並流聲實偕劭眷乃內樞之劇均于隆棟之求斷自朕懷召以軺傳諫垣籌幄相資爲重命成之日僉曰宜哉何乃奏封猥形讓懇雖嘉遜挹方竚謀謨卽服近司無淹盛典

賜新授同知樞密院張觀讓恩命不允批答

卿懿行雅材。素襟直質。曩繇士選。來冠賢科。椒蘭書殿之游。斧藻辭垣之訓。雖復間勤吏事。中借守塵政本。惠和道無緇磷。逮升禁署。復總憲綱。已試之能。朕所親悉。入司幾事。誠協僉謀。渙命甫頒。讓悖方確。矧萬樞叢劇。四近參裨。天戒曠工。邦思亮采。宜略循牆之細。用光側席之求。時幹繁機。卽斷來表。

賜新授同知樞密院王博文讓恩命不允批答

卿儒操吏資。邦華士望。服干公路。多歷歲期。出勤宣布之和。入備財煩之使。聿疇聲實。參估機衡。朝無間言。我得才舉。奏封來上。謙述有條。雖難進之風。可矜媮俗。而至公之授。當廢沖懷。往序近司。無淹盛典。

賜新授彰信軍節度使同中書門下平章事王隨讓恩命不允批答

卿躋自星樞。魁升鉉席。奮庸方劭。嬰疾有初。屢陳遜位之章。姑倚調元之寄。而太和未復。前請重違。爰解鈞衡。寵頒旄鉞。仍視台聯之秩。俾令邦體之榮。疊疏謙懷。尙稽成命。矧告庭之已洽。非收汗之可圖。宜副往諧。卽斷來請。

賜新授淮康軍節度使同中書門下平章事陳堯佐讓恩命不允批答

台槐之尊。以穆朝序。方嶽之重。以陪王室。不有舊德。疇可迭居。卿比遜煩機。是均斯寵。誕告于外。僉曰往諧。洵閱奏封。固形謙執。雖受爵而讓。禮則當然而慎。令以出。恩無中廢。宜屈辭豐之操。協伸懋賞之公。促拜徽章。仍斷來請。

賜鎮國軍節度使駙馬都尉李勗遵爲疾病乞致仕不允批答二首

卿勳伐之華材猷兼劭早膺尙禮實陸近嫻以駙馬之榮列通侯之籍望高貴里時陟將壇而能出擅藩
宣之勤居多位著之恪乃心道素探賸藝文余懷所嘉曷日而旣今乃因晦明之偶診援進退之大方確
布書辭願致官政矧告旬未幾年力甫強謝仕而歸在禮安據卿其止念慮寶精神招還天和頃遲藥喜
慰我虛疇勿復文陳

卿癯苦癘疴甫淹時晦特優賜告用適頤生屬療治之未瘳覽控陳之迭至願還有政追躡昔賢高風所
存媿俗知慕然卿地雖嫻密器實虛恬情棲道腴行富天爵偶嬰無妄之疢固匪不衷之災視履其旋何
恙弗已遽歸印綬殊惻朕心矧嚮福未涯與善無爽勉輔醫藥行復粹和姑廢沖懷卽斷來表

賜知樞密院王德用等賀壽星見批答

陽序布和瑞躔循軌爰覽日官之奏且符壽策之祥見象孔昭撫躬增愧卿等協司樞務欣覲乾華平徹
露辭熾昌歸美願因寶貺參紀信書矧在同寅協茲均慰勉從敷請良切歎嘉

元憲集卷三十

內制

賜步軍副都指揮使張潛已下啓聖院罷乾元節道場香合酒果
卿等集祓仁祠慶余誕節適當罷會深諒祝延宜渥寵頒用均熙事

賜宰臣已下上清宮罷散天祺節道場香合

朱律肇和璽符紀節敬瓊霄而申禱肅會弁以如儀式助薰燃宜加頒賚

賜宰臣已下大相國寺罷散乾元節道場香合

慶節在辰外朝祝社祓仁祠而有恤會鄰使以咸臻宜錫名薰用資華供

賜賀乾元節人使鈔羅唾盂被褥等

卿等肅奉聘儀甫安候館嘉乃虔恭之節倘多夙夕之勞宜有寵頒用昭眷待

賜賀乾元節人使內中酒果

卿等已陪壽筵留憇都郵克蹈寅恭允通信陸宜加霑賚用篤恩勤

撫問廊延路知州部署等

卿等出膺邊寄參總軍和候望雖寧撫循亦至眷惟勤職良用注懷

撫問環慶路知州部署等

卿等任參邊瑣職總戎昭疆事所經公心攸賴涉茲炎序諒協常休

撫問涇原路知州部署等

卿等夙官邊部總職軍鈐體余修偃之風謹乃綏和之略歎炎在候率履咸宜

撫問真定路知州部署等

卿等夙奉朝恩言綏邊略軍和謹職疆候沉氛屬此歎炎諒寧官守

撫問秦鳳路知州部署等

卿等分職邊關布和郡壘協寧疆事無爽朝餼言念祇勤弗忘存矚

賜宰臣已下上清宮罷散先天節道場香合

令節欽先瑰宮薦會儼朝倫而並集率道範以惟寅特示頒宣用資薰奉

撫問梓夔路知州鈐轄等

卿等恪稟朝威善分邊職州疆有謐戎律無譁適啓秋氛諒綏時祉

撫問并代路知州部署等

卿等寅奉朝經協司疆事政條參乂戎索無譁言念恪居可量遐矚

撫問高陽關路知州部署等

卿等分荷朝恩。參寧疆事。夙官有次。展體惟勤。涉此秋陽。勉綏時福。

賜宰臣章得象生日禮物

卿亮采光朝。生賢紀旦。邦儀有舊。恩數惟蕃。姑篤慶私。所宜祇荷。

賜荆王生日禮物

霜籥紀辰。門弧集慶。眷惟蕃錫。抑有彝儀。尙讀壽域。且符欣暉。

賜宰臣張士遜生日禮物

卿等業茂承明。望崇輔弼。爰屬生賢之旦。實昭命世之祥。宜渥寵頒。用將慶祝。

賜宰臣已下上清宮罷散降聖節道場香合

孟冬協序。靈節延禧。肅朝弁以相趨。會珠庭而有恪。宜頒薰炷。用獎圭誠。

閣門賜宰臣荆王使相節度使加恩告勅

熙事甫成。恩章有典。已誕宣于著位。宜申錫于贊書。當體眷懷。往欽褒渥。

賜宰臣荆王使相節度使讓恩命不允批答

甫畢嚴禋。載均順福。乃眷臣鄰之重。式推恩數之蕃。允協舊常。詎煩冲挹。

賜淮康軍節度使同中書門下平章事陳堯佐加恩告勅

卿台袞蓋。臣將旄近屏。適均鴻霈。載茂徽章。仍因子舍之賢。往授贊書之重。

賜刑部尙書知徐州李迪加恩告勅

郊類成儀。臣工底力。眷惟舊德。宜進寵章。往錫贊書。用光藩閫。

撫問真定路知州部署等

卿等分扞邊州。參持戎律。政條有穆。疆場無譁。方涉窮冬。諒綏吉履。

撫問麟府路知州部署等

卿等肅膺朝選。分扞邊虞。率職有經。治戎無懈。適茲凝冽。可諒勤劬。

雄州撫問賀正旦人使

卿等肅將歡幣。來慶端辰。擁行傳以勤斯。款邊關而戾止。眷言冒涉。深體寅恭。

賜賀正旦人使生餼

卿等恭持歡聘。來會元正。就館方初。犒賓有式。特申優渥。用體眷懷。

賜賀正旦人使鈔鑼唾盂被褥等

卿等來聘王春。甫休使眷。方眷睦鄰之厚。宜優適館之華。爰畀寵頒。所宜祇荷。

賜賀正旦人使內中酒果

卿等肅將信幣。已展朝容。適館載寧。加籩有品。宜賜禁筵之味。更資公讌之餘。

賜賀正旦人使春幡勝盤等

端方布和。上春啓祚。餌辛盤而惟舊。戴寶勝以增華。併示寵頒。且均嘉貺。

撫問環慶路知州部署等

卿等奉將朝寄。參幹邊符。率職有經。訓戎無懈。方臨韶節。勉蹈常休。

撫問益州路知州鈴轄等

卿等分輯郡條。參司戎籍。並勵首公之操。副余綏遠之懷。益蹈常休。以符遐颺。

撫問知永興軍夏竦

卿握節寰畿。布條關輔。忠誠卓亮。邊略攸綏。適履初炎。具蕃嘉祉。

賜賀乾元節人使到闕班荆館御筵

卿等肅奉聘儀。來祗慶節。駕言輶傳。次我都門。宜錫宴私。用紓勤勩。

賜賀乾元節人使到闕班荆館御筵酒果

卿等將命載虔。隨徒有次。方卽郵亭之使。式燕豐俎之華。宜賚芳馨。且資酣懌。

賜賀乾元節人使生餼

卿等展幣嘉辰。停輶外邸。犒勤有式。致饋惟豐。爰優卽賜之恩。更篤如歸之惠。

賜賀乾元節人使鈔鑿唾孟被褥等

卿等奉幣修歡。停輶就次。惟使勤之甫釋。給賓具以宜優。爰錫豐華。用昭眷遇。

賜賀乾元節人使內中酒果

卿等適展慶儀。載寧傳次。必厚甘馨之品。別將燕衍之華。故此恩頒。用昭勤矚。

賜宰臣已下上清宮罷散天祺節道場香合

離序孟辰。仙符舊節。肅靈場而旣就。昭寶貺以彌新。宜錫真香。誕迎茂祉。

賜知樞密院王德用已下大相國寺罷散乾元節道場香合

卿等以朕誕辰。歸虔梵果。爰屬散香之會。載延拂石之齡。宜有頒宣。用茲薰奉。

賜知樞密院王德用已下罷散乾元節道場錫慶院齋筵酒果教坊樂

卿等恭被梵場。慶余誕日。旣畢人天之供。宜頒藥餌之私。仍副甘珍。併昭慈惠。

賜防禦使劉從廣景德寺普門院罷散乾元節道場香合酒果

卿率職禁聯。慶余誕日。肅建梵場之果。載歸壽歷之祥。宜渥寵頒。用資薰祝。

雄州撫問賀乾元節人使

卿等奉幣有儀。及疆省會。矧韶和之在候。諒跋履以偕勤。言念寅恭。靡忘嘉矚。

賜鎮海軍節度使新授知樞密院夏守贇赴闕沿路茶藥

卿入掌繁機。已膺迅召。宜示頒宣之寵。體茲眷待之私。

賜鎮海軍節度使新授知樞密院夏守贇到闕生餼

卿適馳戎傳。甫戒都門。勤禮有初。犒儀惟舊。往膺蕃錫。深體眷懷。

賜鎮海軍節度使新授知樞密院夏守贊讓恩命不允批答

卿師帥舊臣。藩垣茂伐。曷酬踐歷。入總幾微。過列讓誠。難稽公舉。

賜鎮海軍節度使新授知樞密院夏守贊讓恩命不允批答

卿近允徽章。俾敷列位。再覲封疏。尙執遜沖。宜時攝于繁機。勿專懷于小讓。

賜護國軍節度使兼侍中張耆生日禮物

卿位冠列藩。慶周誕日。特俾過庭之嗣。往宣班物之恩。姑體眷懷。卽宜祇受。

賜武成軍節度使同中書門下平章事駙馬都尉柴宗慶生日禮物

卿戎節宣風。慶弧紀日。特命家庭之懿。往頒燕籩之華。式表恩私。所宜欽荷。

賜宰臣已下上清宮罷散先天節道場香合

寶誨舊聞。先秋令節。謹醮場而有式。會朝祓以如儀。爰錫名薰。用獨慶會。

撫問涇原秦鳳兩路沿邊經略安撫使夏竦鄜延環慶兩路沿邊經略安撫使范雍

卿出總藩條。載華使節。兼倚中權之重。且紓西略之虞。宜篤常休。用符榮寄。

撫問麟府路知州部署等

卿等恪分事任。祇奉朝規。永念忠勤。克壯邊略。屬季商之在候。諒夙夜以爲勞。用示撫存。幸綏吉履。體余

眷囑罔替終譽。

賜宰臣張士遜赴闕都城門外御筵

卿甫膺節召。再冠槐階。封傳疾驅。都門在望。宜溼勞旋之禮。俾均示惠之私。式佇同寅。且欽飫賜。

賜宰臣張士遜赴闕都城門外御筵酒果

卿甫修圭觀。入序台儀。延勞都門。均豐燕豆。宜加珍錫。以侑歡誠。

賜宰臣已下罷散乾元節道場錫慶院齋筵酒果教坊樂

卿等祝慶梵場。流恩宴館。列豆觴而有餞。肅簪檜以如儀。特示頒宣。且榮歡集。

賜宰臣已下罷散乾元節道場錫慶院齋筵酒果

卿等率和朝弁。祇祓齋場。歸祉誕辰。均恩燕俎。宜頒異品。以侑多歡。

賜知樞密院王德用已下大相國寺罷散乾元節道場香合

卿率屬內廷。祝延梵宇。壽祺來集。忠款可嘉。宜錫名薰。用資寶供。

賜知樞密院王德用已下罷散乾元節道場錫慶院齋筵酒果教坊樂

卿等祝慶仁祠。推恩宴館。特厚籩壺之賜。兼諧匏竹之和。姑寵肆筵。用昭示惠。

賜知樞密院王德用已下罷散乾元節道場錫慶院齋筵酒果

卿等修慶誕辰。祈禱梵果。散香在會。式燕攸均。宜錫甘滋。用昭獎眷。

賜賀乾元節人使到闕班荆館御筵

卿等恭持聘節。用戒都門。征馭載勤。候亭留憇。特伸燕勞。以洽寵私。

賜賀乾元節人使到闕班荆館御筵酒果

卿等肅將信幣。來慶誕辰。迎犒有初。燕私甫洽。宜加珍錫。參侑歡悰。

賜賀乾元節人使鈔鑼唾盂被褥等

卿等肅奉聘儀。甫安候館。嘉乃虔恭之節。尙多夙夕之勞。宜有寵頒。用昭眷待。

賜賀乾元節人使玉津園射弓例物並御筵

王籩均歡。使儀侑好。爰設射棚之算。參陳宴俎之華。特厚匪頒。用昭儀眷。

賜賀乾元節人使朝辭御筵

卿等將復使軒。甫達朝陛。率多儀而允恪。軫長邁以方初。宜寵燕慈。用蕃恩錫。

賜賀乾元節人使朝辭御筵酒果

卿等甫訖聘儀。將還使路。歸裝旣戒。候館少留。宜錫醇芳。用昭眷賚。

賜賀乾元節人使回班荆館御筵酒果

卿等聘禮甫成。歸塗云戒。式厚都亭之餞。將勤征軼之行。特賜甘馨。用滋酣悅。

賜賀乾元節人使回至天雄軍御筵

卿等復命使軺。次塗州館。冒初炎之燠。若想夙駕以勤斯。宜錫宴羞。用申犒禮。

賜宰臣已下南郊禮畢御筵

郊配成儀。臣工洽祉。當速燕私之惠。且紓陪贊之勞。宜抃慶辰。往均良集。

賜賀正旦人使赴闕至天雄軍御筵

卿等肅將鄰聘。甫次近藩。諒行李之爲勤。矧凝嚴之在候。宜申犒禮。式表恩華。

賜賀正旦人使到闕班荆館御筵

卿等遠將歲聘。近戒都圻。惟涉路以載勤。俾頌觴而申犒。並宜歡飲。昭體眷恩。

賜賀正旦人使就驛御筵

卿等奉將鄰好。來慶王正。當嘉節之肇新。固歡心之允協。宜因館穀。特展宴私。

賜賀正旦人使就驛御筵酒果

卿等肅奉鄰歡。參陪朝慶。蹈虔恭而有恪。均戩祿以咸宜。爰錫甘滋。用昭勤闕。

賜賀正旦人使玉津園射弓例物并御筵

卿等慶幣成儀。宴庖均渥。特啓禁園之勝。俾資射算之歡。仍示頒分。並宜欽荷。

賜賀正旦人使朝辭御筵

卿等肅導鄰歡。將還聘節。使無違禮。恩有示慈。宜渥燕私。用昭獎賚。

賜賀正旦人使朝辭御筵酒果

卿等既庶邦儀少留候館虔恭載恪眷尙無忘宜錫甘滋且昭優異

賜賀正旦人使回班荆館御筵

卿等奉聘成儀載馳復命適遵歸路特舉餞筵用示寵嘉體茲眷遇

賜賀乾元節人使玉津園射弓例物并御筵

卿等適達鄰歡甫均燕惠爰擇囿遊之勝且觀決拾之容仍渥寵頒以昭眷佇

賜賀乾元節人使回至天雄軍御筵

卿等奉成歲聘回飭使驂冒朱籥之初炎次星街之近鎮特頒宴犒用篤恩勤

元憲集卷三十一

劄子

賢良等科廷試設次劄子

竊見近者召試制策并武舉人于崇政殿。皇帝陛下親蹕。留神永晝。嚴門異席。程其才略。誠見聖心。覈真偽。進英豪之審也。然臣以謂有司祇事。失于奏請。苟從便易。乖戾舊章。措置之間。甚不稱陛下求賢之意。伏觀賢良方正蘇紳等就試之日。並與武舉人雜坐廡下。洎摛辭寫卷。皆俯伏氈上。自晨至晡。訖無飲食。飢虛勞瘁。形于嘆嗟。雖僅能成文。可謂薄其禮矣。又況武舉人等。才術膚淺。流品混淆。挽弩試射。與兵卒無異。使天子制策之士。並日較能。此又國體之深譏者也。臣竊爲朝廷惜之。臣不敢上引漢唐以煩省覽。仰惟先帝故事。布在耳目。縉紳列位。孰不知之。謹按真宗皇帝凡五策賢良。皆躬御便坐。其舉人就試。并于殿廊張幕爲次。垂簾設几。大官賜膳。酒醪茶菽。無不畢供。聖人之心。以爲張不次之科。待非常之士。所咨者。天人之際。所質者。古今之宜。言若可行。高者足以和陰陽。躋仁壽。下者足以明利害。觀學術。是則所責于人者。若是之重矣。所設之禮。又可以輕乎。勢自當然。非苟而已。臣恐有司自今以往。待士之禮。因循亡棄。則國家設此舉。必無異人。何者。夫士有高才。必有高節。節高禮薄。將恥而不就。其就者。皆輕躁微倖。先身後義之徒。適足啓儉競之風。玷詳延之詔。若執事者以爲人不逮古。文不中程。虛屈至尊。行不急之

務。則因而罷之可也。或惜其歷代盛王之所重。當世奇才之不乏。則先朝舊禮。庸可廢乎。伏願中詔近臣。檢詳舊史。作爲定式。付于攸司。今後每試此科。卽備陳條件。凡厥供擬。關報所由。仍乞或有武舉雜科。不令同日就試。庶擬人于類。有協禮經。仍貫而行。嗣恢世烈。狂言聖擇。或補大猷。如允所陳。乞降付中書詳議。干黷旒宸。臣無任省循狂瞽懼屏營之至。

封畿劄子

謹按周制王者都畿千里。千里之地謂之寰內。井田百萬。是之自出。兵強地廣。以制諸侯。漢都關中。亦分京兆馮翊扶風爲三輔。又取河南河內河東弘農四郡。合三輔之劇。遣司隸校尉以督之。雖地非幅員。侈于周制。若其包山河之固。冠郡國之首。置使持節。不與部刺史爲等。亦王畿之意也。魏晉而下。始以司隸之治爲司州。南北分爭。名實始替。然江左建國。常以宰相帶揚州刺史。朝廷根本。此焉是賴。至唐有天下。復都長安。乃因關河形。便分州郡爲十道。而關內一道。全是王畿。雖無司隸之名。猶以華同岐三州爲上輔。河南爲東都。而京畿都畿。並置觀察使。此皆強幹據極。統御庶邦。國家因循五代。卽都于汴。地非京邑之舊。州無輔畿之實。自祖宗以聖武神略。剗平僭僞。萬方臣妾。會于京師。雖城闕雄尊。閭里繁衍。而諸縣之外。便屬他州。州雖密邇。卽爲別路。畿內十六縣。纔置提點官二員。人瑣位卑。降于漕軍之局。寧所謂尊甸服重王官者哉。臣欲望略依周漢舊章。以三京所環之州。畫爲畿內。曹濮滕單陳蔡鄭滑等八州。輔開封爲中畿。以孟汝二州輔河南爲西畿。以宿亳二州輔應天爲東畿。併三畿之州。升口近輔。通置畿內觀

察使一人以統之。取臺省給舍爲出入之資。凡輔州並乞正除刺史。取待制官以下正郎以上爲出入之資。俸秩班品異于列郡。除去今日虛名之弊。且示聖朝正官之漸。然後舉畿內之籍。均其租稅。輕其徭役。踵漢故事。徙天下豪族內實三畿之州。四面設關梁。譏出入。以嚴王制。應禁兵營府。分據寰內。如此則海內震服。而王室安矣。

乞御前殿朔日立仗羣臣朝服劄子

臣聞告朔之義。周家尤重。在昔宣聖愛羊存禮。漢沿周制。合朔朝會。故惟優借大臣。許朝朔望。唐制立仗。羣臣皆禮服入會。藝祖受命。論次開寶通禮。亦著月朔入閣之儀。則朔日者爲政之端辰。講禮之盛節。國家因五代之亂。承千年之統。始勝殘去殺。務從簡易。雖制度既定。而謙讓未遑。五日一參。靡分朔望。禁衛單少。威儀粗率。禮典弗振。則朝廷不尊。國容寢廢。則臣下不肅。臣愚以爲羽衛之設。非矜華侈。所以重主威也。朝會之作。非專拜揖。所以飾治體也。臣願陛下上攷成周仲尼之法。下稽炎漢皇唐之盛。近守太祖開寶之禮。明詔執事。祇按成規。每遇朔日。坐前殿。朝羣臣。旂旄細仗。以次陳設。公卿朝服。如儀而罷。如此則臣道肅而主道尊。于以示四夷。風萬國。警民耳目。不可闕也。夫禮有以素爲貴。謂其誠慤。有以文爲貴。謂其采章。伏望陛下錄臣此言。使博士禮官得確論可否。講求故實。如曰便禮。卽奉而行之。使重熙顯猷。執競丕業。由陛下之馴致也。

乞于御苑空地內種植奉祠祭劄子

伏見國家每歲大小祠祭。黍稷取于太常。果蔬出于司農。茅茹責于光祿。然三寺皆牒取市物。入供祠饌。但具名品。無復馨嘉。雖明德上通。不貴多物。而工祝奉告。固有愧辭。夫孝子事親。必求仁粟。聖王饗帝。實立神倉。三代以來。茲禮惟重。取不告乏。用乃有虔。國朝因循。未遑斯議。故令官司怠沓。祭典廢墜。百靈薦管。一切須索。習慣成瀆。神無據焉。臣竊見玉津瑞聖諸園。舊有隙地。異時主者。懇爲公田。歲藉其收。以備常用。臣願卽于苑中。擇上腴之地。播五穀之種。謹耘耔之法。慎登穫之勤。每春種秋斂之。陛下順時乘輿。親省。彷彿畎畝。因行勞賜。一以奉國大事。一以勸民力農。穀成之後。擇其上者。奉大祠。次者。奉中小祠。各以御廩。付所由吏。鬯劑粢品。悉量而取之。至于果蔬之細。皆須苑圃之植。外盡庶物。內將至誠。達其令芳。以介福祿。茲亦三代爲籍千畝。以事天地社稷山川先古。以爲醴酪粢盛之比也。其與物物仰市。煩褻神祇者。寧並日而言哉。

乞差當直兵士劄子

伏觀唐制。凡在京文武職官。自一品至九品。皆給防閑庶僕。州縣官僚。皆有白直執衣。今來外任自知州以下。至簿尉。並給兵士散從。官承符手力之類。品位至卑。猶給七人。名雖不同。其于供身指使。猶用律文。白直執衣之法。國朝稽若古道。備衆官。惟在京臣僚僕從。無準。竊見翰林學士。及尙書丞郎。兩省給舍。并待制以上。皆天子從官。並有呵引條制。其從人則學士每員差開封府散從官各三人。待制以上二人。別差諸軍剩員各三人。每員共得六人至五人。其剩員又多。是年老疾病。加以本營迂遠。每分番上下。尙只

得一人指使。非獨不任驅走。亦且虧替官儀。非所謂尊朝廷重臺閣也。欲望聖慈下有司。將往代制度律令。比類今來官品。量添人數。又在京冗兵至衆。乞除元差散從官外。只于諸軍雜役兵士內。每員各給十人。以充當直。其剩員卻乞放還本營。若上件官內有差任三司羣牧使。御史中丞。知開封府。管勾三宮觀三班院。提舉在京諸司庫務。自有合給公人兵士者。更不兩給。庶其祇奉朝請。出入公門。辨堂陛之有差。免儀服之失體。定爲新制。庶協舊章。

乞毀棄元昊僭僞文移劄子

臣近者兩蒙中書奏傳聖旨。令與學士丁度等。同撰賜僭逆元昊答詔。及後來削奪。詔書聞各付外行下。臣竊惟元昊塞外小醜。世載兇狡。背恩忘義。屏棄人神。鴟張以來。雖懦夫女子。皆欲拆筮奮挺。縛致都下。數罪梟首。以戒四夷。況服官在公之臣。何堪容忍。陛下天資仁恕。不嬰細忿。且以蚤虱瘡痒。非四肢之患。戢兵謹備。未令誅討。但設購賞。俾殲渠魁。蓋不欲疲人命也。自德音布發。士無愚智。莫不感恩怵德。知聖人之度。然臣伏思所降詔書賞格。已遍諸路。元昊自知罪重。固無革面懷音之志。必將妄作符令。吠堯詬天。傳入邊疆。汚染民聽。又或許爲章表。緘置醜言。規避朝廷。冀傷威重。竊恐守塞將吏。不知忌諱。或得敵書。爭先啓聞。自謂有探伺之能。實非人臣所當言也。欲乞預勅邊吏。若得元昊章表。許先開視。凡僭僞文字。應有辭涉悖慢者。並須隨處焚毀。勿使騰布。除其間有入寇時月。及邀約部落之言。須合聞上者。止令抄錄大意。卽時馳奏。庶內外不瀆。以尊國防。臣忝備近班。理當申罄。涓埃之益。敢冀裁擇。

論蠲除雜稅劄子

臣草茅之姿。光華遭運。近承人乏。入倅計司。惟厥吏員。實掌民版。以一介駑緩之質。閱四海征賦之益。徒爾首公。無所紓責。輒懷管穴。思報毫分。罔避嚴誅。仰干睿聽。臣聞立簡易之法。則民不惑。去因緣之姦。則吏無害。省簿領。則要可舉。一賦稅。則取有名。此皆治道之所繇。而歷世之無改也。臣竊見當今正稅之外。雜賦至繁。詭制異科。醜名暴斂。原其所自。由來甚邇。蓋自唐室解紐。五朝挺災。孱王僭侯。盜據方國。壞合徵之典。取一切之宜。掊尅無厭。禁令自出。于是有身丁地頭之賦。農具牛皮之征。鬻酒則戶出麴錢。煮海則家增鹽價。雖與民更始。而弊制尙存。官司因循。憚于改作。故使堯舜之代。無桀貉之中。雖臣之愚。竊以爲過。今縱不能蕩滌橫賦。以寬民財。猶當釐易舊名。少近王道。臣愚以謂可取雜名稅錢。及派納之色。不移舊數。合爲一號。削去季世剝害之品。作爲我朝較畫之法。示之于民。則耳目易曉。委之于吏。則條貫難欺。錄于官曹。則文籍不煩。供乎財用。則稱謂差美。此舊入無秋毫之損。新規有指掌之易。丕變訛謬。垂于經常。實天下之幸。如允臣所見。乞下三司。令子細勘會。見今天下諸雜稅錢外。沿錢名目。貫百聞奏。然後取其實數。併爲一號。逐年折變。自從舊法。斯皆防患制法。遭時垂統者也。臣伏見國朝以來。詔數下而建條。比牒連名。充曹物府。煩科碎目。與日而滋。每罰一罪。斷一事。有司引用。皆連篇累牘。不能徧舉。率不數歲。則別加論次。謂之編勅。蓋欲條貫飭盡。綱目畢張。大可含元。細不容髮。而抵冒未絕。風流寢濫。一令之下。則姦生令表。一禁之設。則罪出禁先。示于人則若教猱。施于事則如索網。此皆不循其本而求之于末。

將欲措刑辟躋仁壽者。不亦難乎。夫恢恢有條。重而必罰者本也。事事曲制。輕而易犯者末也。本不舉則巨猾微倖。末專任則細民罹災。今之詔條。病在于此。陛下幸加大惠。惜皇猷之未暢。深詔執事。精覈舊文。欲因盛時。遂定丕律。臣以謂不一勞者不永逸。無遠慮者必近憂。今雖定之後。必復改。何則。制度不立。賢愚雜議。故也。爲之計者。莫若盡取見行詔勅。與律文相校。律有本條。而勅意小異者。則改而入律。律無本條。而名項別立者。則編而爲勅。況唐律之內。廢條已多。若擿去舊文。益作新例。亦前王損益之常也。人情不能無過。王道禁乎太察。其約束之煩語。官司之小禁。且一切蕩除。蓋去之不足害治體。存之徒以飾罪梯。法輕不能繩姦豪。文密足以汙良善。臣又聞王者之制。揭若日月。動如雷霆。其言易而文。其禁切而廣。伏見今之編勅者。繁長猥俗。與府縣文移無異。用字乖舛。遣辭重複。寧所謂明白溫醇之旨耶。實由不專任達識大儒。而多用執法之吏。夫法吏者。奉行其法可也。寧制法之人哉。古人有言。治國如治家。耕當問奴。織當問婢。今欲與法吏謀致治之本。是猶使奴織而婢耕。要其成功。不可得也。臣欲乞專委鴻博之老。及輔弼大臣。商較勅條。略依律文爲體。裁其辭句。第其輕重。約其義。明其文。布之四海。使識朝廷之尊。傳之萬世。俾知文雅之盛。自今以往。有臣庶上言。欲釐改舊法。建設條禁者。願陛下慎其兪旨。必先付之兩府。參之羣吏。若前條確見其短。今文率以爲便。可行于經久者。卽下兩制。令以所陳之狀。去其蕪雜。取其精意。倣古律令。著爲章程。若其事止苛文。不足發明利害者。皆寢而勿報。如此則法不數變。而民知所措矣。多言者必難。臣曰。今若依律令以爲勅。天下官吏。必不能曉。臣對曰。今天下所頒律令。曹局小吏。猶能

引用則似律之勅。獨不能曉耶。此膠柱之論也。又必難臣曰。夫詔勅者。多先帝所定。而不當改作。臣對曰。凡詔勅之設。本臣庶上陳之見耳。寧一出先帝之口哉。況聖人以便利萬物爲至仁。不因循陳迹爲至孝。且太宗皇帝改建隆之勅。真宗皇帝革興國之法。是皆可乎。此守株之談也。臣又聞事不師古。商典實譏。必也正名。魯堂攸訓。雖文質異尚。沿襲有宜。至于辨尊卑。分職業。其實一也。竊見國朝故事。自使相及左右僕射以上。出典州郡者。皆曰判。六尚書節度使以下者。皆曰知。蓋以謂僕射而上。品秩隆重。藩鎮之任。地望卑遠。故以尊臨卑者判其事。以小任大者知其職。及除佐官。則例曰同判之職。自京官以上。皆可任焉。今六尚書知州于上。京官判州于下。名旣不順。理亦無稽。而又朝廷之儀。臺省爲重。近緣苟且。寢失典刑。尚書都省尚書令之職也。今兩省五品以上。皆得權判。刑部流內銓。皆尚書侍郎之職。今或以知雜御史判銓事。或以升朝官判刑曹。其餘卿監之司。小官判者多矣。天下友邦大臣。不得判。天臺帝省小臣。得判之。是重諸侯之藩。而輕天子之吏。臣竊以爲過矣。又府史者。二人之名也。故自周禮至唐令。有其任者。皆曰府若干人。史若干人。今寺監見有其人。則併稱府史。此雖小吏。而名不師古。亦朝廷之所惜焉。幸陛下詔有司。按前典。繆者正之。顛者序之而已。雖未能復治古之法。亦一時之制也。右臣所懷狂瞽。悉已條述。惟陛下裁幸。

元憲集卷三十二

答內降手詔垂詢西陲方略

答內降手詔

伏奉二月二十七日手詔。以僭逆元昊。阻命西鄙。令臣等細畫方略。並其實封進入者。仰承天旨。伏用震汗。臣等愚駑無狀。待罪宰府。聖恩含養。弗暴所疵。夙宵惟念。未獲小補。乃今羌狄小種。違背恩盟。輕爲風塵。穿盜邊塞。而將吏未習。烽徼弗明。蕞然逆醜。遂稽天罰。此皆臣等謀猷疎暗。奉職不稱之咎也。陛下幸開大惠。不忍加誅。丁寧垂喻。俾悉其意。此誠謀及卿士。詢于芻蕘之成訓。然臣等旅服三事。義殊百辟。以謂中書門下政令之所出也。朝夕之所詢也。事無巨細。謀無遠邇。皆可罄率庸淺。日陳于前。隨宜置務。靡容有隱。不當更竄清問。始復條列。至于守禦方略之要。則與樞密院並可議定。餽運便宜之常。卽下三司轉運司。坐見虛實。凡所關啓。略可施行。此陛下之明悉也。雖使各述爾志。亦不出于茲矣。惟詔旨內深入討擊一事。臣等自來未敢輕議。非謂沮損威重。直以勢有輕重。時須進退。請試言之。夫中國之人。習見承平久矣。將不六十。不更金鼓戰陣之事。卒不五十。不經疆場馳鬪之役。齊民編戶。租稅之外。不知差調率斂之勞。猝然有警。孰不騷動。自劉平石元孫陷沒之後。邊防震擾。吏氣沮傷。奏報相銜。妄增敵數。或言四十萬。或稱三十萬。故敵未攻壘。先杜城門。寇已出界。尙求兵援。將帥庸懦。亦緣人情未嘗諳歷故也。今若

更責未習之將。驅管敗之兵。討已黠之敵。而希百勝之術。無功必矣。故臣等近者但乞本路修峻城堞。以遏奔衝。籍閱強壯。以擬緩急。速遣韓琦等馳至邊郡。采訪利病。補救頽敝。且爲今秋守禦之策。仍令紓放倚閣。緩責轉輸。綏撫西人。務令安堵。且亦申戒邊將。以時訓練。使寇去弗追。此上數事。雖皆老生常談。然當今守邊之策。未有易此者也。臣等又料狡寇情狀。必須再謀寇抄。欲乞諭緣邊守戍。因寇入境之際。或羸師以誘之。或伏險以邀之。或奇兵夜斫其營。或堅壁晝挫其銳。務據便地。勿與馳逐。俟其疲老。則倚角以斃之。如此一經創艾。則可以漸謀羈服矣。臣等熟計。莫便于此。至若臨機處置。應變弛張。一二之言。非可豫述。事至中覆。未爲後時。然敢不策發寤冥。以須期會。思有伐謀決勝。少報萬分。然後退就田里。誠無所恨。臣謹昧死。上愚對。惟陛下幸察。

資政殿答手詔

臣等十六日蒙恩召見資政殿。面賜手詔一通。且以財用不給之端。仕進多門之弊。牧守將帥之未稱。西北隣敵之難防。躬形德音。徧詢列位。臣等以忝任丞宰。首膺延訪。伏讀聖訓。愧汗交流。何則。執政之官。與國同體。陟降四近。政靡不聞。參決萬機。言無所隱。雖或論議之深淺。裁處之否臧。未格大猷。仰煩宸算。至于罄盡庸識。條列事經。均憂共責。固以日陳于左右矣。今方特被天旨。更咨急務。此乃臣等奉職不稱之明效。而陛下至慈藏疾之大恩。弗忍棄捐。尙令自效。夙夜慙震。弗遑寧處。然申命確切。靡容控讓。敢不略述綱要。以禱萬一。謹具條列于左方。

一聖詔曰。開者西陲禦備。天下釋騷。趣募冗兵。急調軍食。雖常賦有增。而用之不急。累歲于茲。公私匱乏者。臣等謂西事之役。首尾十年。毒始邊陲。事叢關陝。募兵加賦。救急一時。蓋中國太平之民。遭強敵倉卒之變。勇者未及練。而督之戰。智者未及慮。而使之謀。故聚軍則惟恐不多。而忘養之之費。斂財則惟恐不盡。而忽繼之以難。又嘗踰農以隸邊。鑄鐵而爲幣。事多棄本。策罕要終。逮此平時。方見其害。此公私所以匱乏矣。今幸凶醜自斃。封略少安。四路雖有帥臣。重兵漸移內郡。緩徭節費。多所改張。陛下復采衆謀。思加大惠。以陝西小歉。及錢法鹽禁之弊。特遣仲簡。馳往撫存。付此二條。就詢利病。方總內外之論。別謹財賦之規。俟見所長。敢不悉心商榷。其冗兵料檢。聞樞密院日亦講求。必有遠圖。以引來患。

一聖詔曰。承平寢久。仕進多門。人浮政濫。員多闕少。滋長奔競。糜費廩祿者。臣聞欲影之正者。必端其表。欲流之潔者。必澄其源。此雖老生之常談。然實治道之要術。朝廷設官取士。固有成規。三年一開舉場。九品盡由銓選。其餘資蔭入仕。流外出身。或托附權臣。謂之門客。或因緣酬獎。不累年勞。攀例承恩。詭名希寵。人浮政濫。抑有由來。臣等謂取士者。政之表也。補吏者。官之源也。近歲舉人殿試。有老榜之目。但論舉數。無取藝能。釋褐雖被朝參。恩選已登暮齒。縱分職任。盡昧廉隅。臣等欲乞將來科場。罷茲一事。又每歲百司人吏。出官甚衆。羣臣子弟。增年就祿。員多闕少。不得不然。今審官院流內銓例。許成資便令除替。雖守闕者。暫時爲利。罷任者。赴選益多。苟且因緣。不能盡舉。以上三事。欲乞各付所司。審加詳議。委中書門下裁酌以聞。如此施行。似堪經久。

一聖詔曰。牧守之職。以惠綏吾民。而罕聞奏最。將帥之任。以威服四夷。而艱于稱職。豈制度未立。不能變通于時。豈簡擢廢臻。不能勸勵于下耶。臣等竊觀舊史。欲治之主。未嘗不留意守令。以寧方內。慎求將帥。以清戎索。矧陛下乘至聖之德。御久安之世。靖民防患。孰先于此。謹按朝廷列郡四百。地踰前代。參建官吏。分督政條。其間知州。實匪輕選。大者則領以公相。次者則寄以從官。其餘遠邇。由卿郎官而下。莫不惟材是擇。考績序遷。一有踰遠。並從按劾。或降或罷。無所私焉。臣等謂選任之官。如此粗足。若欲人皆召杜。政必龔黃。質于前聞。恐難盡然。重內輕外。今古常情。臣等敢不更務采掄。審加勸沮。或申明約束。或廉察風謠。奏最之科。庶幾可復。然不得謂制度不立矣。若乃將帥之舉。宥密是司。國朝之規。名分難越。儻或奇材。拔于羣萃。勇略著于邊疆。任用之間。亦當公論。然不得謂簡擢不臻矣。

一聖詔曰。西北多故。敵情難常。獻奇譎空言者多。陳悠久實效者少。備豫不虞。理當先事者。臣竊以契丹結好四十餘年。厚幣至恩。淪于骨髓。邊民白首。不識干戈。此先帝所以遺于無窮。陛下所以守而不失。間者曩霄違負恩義。驚擾塞垣。虐用種人。旁結鄰敵。自知禍敗。還復首降。陛下愛惜生民。盡赦前罪。賜以府庫之餘幣。結以丹青之大信。懷音歸德。邊略乃安。雖王誅未加。而天罰適及。梟凶狼噬。父子相殘。此二敵者。皆被國至仁。宜不敢自違信順。設有狂悖。終是外虞。但可嚴戒邊臣。常修戎備。守金湯之固。積糧廩之豐。持重如太山。不測如滄海。常使直在我。而曲在彼。此聖人羈縻之術也。近聞議者多欲乘逆羌斃蹠之會。遺孽孤弱之時。分割土疆。誘來部落。此乃奇譎空言之類。非悠久實效之言。深願聖慈。抑而勿聽。伺幾

取斷。謀之未晚。臣等仰被清問。殊乏遠謀。粗略條陳。不敢文飾。陛下留神幸甚。

崇政殿與樞密院同答手詔

臣等今月十七日。伏蒙聖慈。召赴崇政殿。而賜手詔各一封。仍令中書樞密院一處商量對答。聞奏者。伏讀聖訓。震駭愚衷。退而詳研。稍分條目。乃知皇帝陛下。防危于慮表。求策于事先。鬱悼諄勤。徧咨良策。此誠聖人勞謙思治。博索廣詢。不以睿哲掩尋常之謀。不以高深辭淺近之益。雖舜好問。禹拜言。無以過此。奚獨臣等幸甚。抑亦天下幸甚。然臣等預聞幾事。皆忝近司。自去歲春陛下有祕殿疇咨之勞。迎陽敷納之廣。是時中書樞密院亦各條對急政。尋會面論。以謂兩府者。佐天子決大政。總四海謀議。評百官能否。或片言可以防患。或寸效可以佐時。凡有見聞。便當裁處。不須承命。然後告猷。而宸旨丁寧。辭不獲免。靦顏待罪。粗述大綱。雖荷天地包荒之仁。終慙股肱同體之美。今者再煩清問。是重前尤。既不敢固拒詔音。仍且許協陳公論。銜恩被貸。無可寘言。敢不悉心。同上愚對。謹按聖詔大略。以今契丹因我西征之役。遣使來告。深慮狡黠。別有邀求。詭譎多途。作何回答。臣等竊謂契丹之性。雖不可以禮法爲期待。文辭爲約束。見利則動。緣間則爭。固其常態。至于向背之勞逸。利害之重輕。雖曰匪人。亦將有擇。契丹自景德通好。垂五十年。冠蓋相望于歲時。金繒沓委于幽朔。戎馬不汗。而坐收厚利。邊烽不焰。而自稱鄰國。彼若常保此誓。可謂逸而不勞。常獲所資。可謂利而無害。今或自違信順。妄作端倪。心欲渝盟。以圖入寇。是則部落蒙調發之苦。蕃兵須賞餉之科。穿窬必有矢石勝負之憂。掠野不過牛羊廩窖之獲。我若堅壁以持重。蓄

力以待疲。去則勿追。來則固守。但恐彼之所獲。不復有五十萬之數矣。捨交聘。就戰鬥。則悖逸而向勞。絕歲輸。謀掠奪。則利輕而害重。果從此舉。是謂無謀。況今特聘之來。未失睦鄰之意。且西北構釁。邊境具知。既議出師。固當通問。昔歲高麗之役。近年河西之行。皆遣使人。實爲成例。未聞前來兩次。別有他求。兼契丹常作大言。欲平西夏。今若乞財助費。便爲示弱于人。遙揣敵情。恐無此理。萬一狂狡。實有過言。則對答之間。誓書可復。彼曲我直。何懼無辭。然必望朝廷且鎮之以靜。淺謀橫議。抑而未行。聖意又慮詐報西行。陰爲南顧。則山川地形。甚處可爲控扼。臣等竊以自來河北河東兩路。各有控制。走集之地。救應邊陲之所。只緣保守信誓。不敢明作改張。必使北人。便違舊約。則可勅此兩路。馳按邊屯。或展塘水。以扼兵衝。或築軍城。以遮敵路。塹山堙谷。何所不爲。樹帥分兵。惟變所適。事至而應。亦匪後時。聖意又念方面輔翊之材。帥領偏裨之舉。或難于自薦。或須藉衆推。威禦綏寧。堪爲鎮靜者。臣等以謂將帥之器。非獨今世所難得。威禦之略。願亦前代所希逢。然自古聖帝明王。選才擢士。未有借賢于既往。待俊于將來。必以一世之人。治一世之事。不可謂將無韓白。而廢軍帥。吏非龔黃。而去守宰。願其策勵獎育。任使之術。何如耳。苟得其道。胡恤乏才。若能賞不過功。罰必當罪。上無姑息之施。下無僥倖之求。則雖懦夫。可使握節以制軍。女子可使攘袂而赴敵。又況擇材武之長。用訓練之師哉。大法一行。則賢者不得藏其謀。何煩于自薦。智者有以申其用。何待于衆推。而綏寧鎮禦之方。惟所使矣。聖意又念河朔軫救之外。軍儲闕乏。及向去財用。如何省節。加以冗兵尙衆。戰馬未孳。發于焦勞。並令周悉。臣等伏以冀部不幸。決盜爲災。中路州軍。例遭

湮沒。此則非緣他故。專爲河防。民戶旣以流亡。田畝未能耕藝。且可恣其所往。以就廣饒。所在撫綏。庶幾存活。議者多欲使州縣出粟。以救其命。虛倉餽餒。誠是深仁。連營乏儲。更非小事。欲乞嚴勅三司。及安撫轉運等使。凡係本路浮費。且令一切罷之。專以調食爲先。次以安民爲急。若向去秋夏西路豐登。必有餘波。可蘇疲衆。至如冗兵一事。最是減費大端。近日雖累降指揮。並令揀退。天下剩員萬數。亦已別行催督。其餘條貫。敢不申明。此則較向所用省節之矣。若乃戰馬登耗。事存監牧。然自昔生馬之地。今皆不屬中州。惟藉四夷。與官互市。切聞邊關未嘗肯出名駒。徒費財珍。例多駑劣。其源若此。爲弊實深。自餘坊監官司。華戎貿易。更乞下羣牧制置使。多爲條約。以量價直。重明賞罰。以督蕃孳。常或舉修。亦恐可登舊數。然臣等今來所陳以上數事。卽是日夕奉行。行而復言。理不踰此。竊恐衆臣議論。別有所長。欲望聖慈。盡取將相學士以下對詔之文。降付中書樞密院。商量行遣。匪徒逃尸素之責。固亦合中外之謀。天下至公。于此爲美。惟陛下留神裁幸。

答手詔

伏奉手詔。以元昊未平。邊防用武。上煩聖慮。諮及具臣。竊以元昊旅拒偷生。巢穴深固。若或興師出境。必須命將得人。又緣承平以來。久無征伐。縱有驍勇之士。皆非縣歷之流。況復饋運之間。勞費斯甚。陝西民力配率已繁。更或隨軍。愈難應副。且當靜守。頗謂得宜。今來邊臣例循舊轍。靡營禦寇之策。但急濟師之言。須立定規。俾從經久。緣邊州郡。皆有熟戶蕃兵。不能訓齊。但務姑息。雖有弓箭手人數甚衆。其如部伍

未明。至于本城蕃落定功之類。亦未嚴整。凡所防托。悉藉正軍。是致調發之煩。不無科率之困。復有多立小寨。例蓄糧儲。無事則兵勢虛分。臨敵則不能自固。奔衝掩襲。職此之由。所宜委自轉運使與逐州長吏。量其戶口籍定土兵。每至農閒。輪番教閱。仍選勇敢有部轄之人。充等第將校。其熟戶蕃兵。亦須點集齊整。檢括人數。與本城及弓箭手。每臨陣敵。前後節次使用。所有敵兵出入道路。合行把截去處。並可展置大寨。令弓箭手與本城兵士守把。其諸小寨。不可廢去者。量留側近土兵看守探候。不得廣積糧草。所有朝廷差去禁軍。只委自部署鈐轄。路分臣僚。相度敵勢遠近策應。如此則固守有常。東兵可減。蓋資其土人服習道路。彼中每有點集。易爲探候。自免奔衝。而又兵籍素定。經費有涯。轉餉之勞。漸可撙節。自來每招役蕃戶。耗蠹頗多。主帥但納其虛言。臨陣恐成于悞事。今後不須枉用金帛。更有招收。其逐州長吏。能訓練兵師。修完戰備。膽勇材幹。爲人所稱。朝廷當與保全。不責小過。歲滿成績。增秩再畱。使之恩信及人。用明獎激。臣等素不知兵。叨居近列。欽承睿問。莫副天心。無任戰懼之至。

元憲集卷三十三

行狀

宋故推誠翊戴功臣彰武軍節度延州管內觀察處置等使金紫光祿大夫檢校太傅使持節都督延州諸軍事延州刺史兼御史大夫上柱國武威郡開國公食邑六千五百戶食實封一千六百戶贈侍中曹公行狀

曾祖業。累贈太師尚書令。兼中書令。追封榮國公。祖芸。累贈開府儀同三司。太師尚書令。諡武惠。追封越國公。

父彬。故樞密使。累贈開府儀同三司。太師尚書令。諡武惠。追封魯王。
真定府靈壽縣某鄉某里。曹瑋。字寶臣。年五十八。

公之先本出晉清河太守泓之後。泓卒。子孫貫其郡。後徙真定之靈壽。今又爲其邑人。高曾值唐室之騷。皆以才力事州爲列校。忠規雄算。屈于地勢。故二祖閱不章于王朝。逮魯武惠王之興。功蓋盟府。擁旆服衰。綱繆累聖。率義而上。追賁烜赫。王又重之以勞謙明德。保躬不伐。歿從太烝。爲宋宗臣。使今天下言諸侯王世家者。以曹爲首。公卽王之第四子。性英壯沈決。形于羈紲。武惠節制鄆徐也。竝奏署公爲天平武寧二軍牙內都虞候。以恩換西頭供奉官。閣門祇候。叛羌李繼遷擾靈夏。太宗畱意邊瑣將屯之臣。時

武惠冠領內樞。面奉詔舉材堪西事者。久之啓上曰。知人不易。朝廷雖多士。臣未見其能。臣有子某。好謀而斷。謂堪試用。太宗喜。王之內舉。卽日召見。欲命公以諸使。王固辭。召以本職同知渭州。時年十九。迎者驚其壯。真宗嗣極。就改內殿崇班。咸平二年。正領州事。俄丁先王憂。以守邊不得歸。及葬。自請還喪廬。畢劬勞之報。書數上。辭情哀切。朝廷念繼遷旅距。又公治最已顯。詔不聽。卽拜閣門通事舍人。頃之加本州屯田制置使。轉西上閣門副使。徙知鎮戎軍。繼遷虐用諸帳。人不堪命。朝恩購募安輯。所以慰納之良厚。吏多不能奉揚威德。公至部。則騰檄區落。告以丹青之信。戎人得詔書皆泣下。由是喀努羌舉族內附。繼遷兵討西涼諸姓。還次石門川。公率軍邀敗之。多所俘馘。威震夷鄙。自爾黠寇往來。不敢近當路塞。軍境平易無扼束。利于馳突。又邊民挾弓矢應募爲官軍。每有警則輒爲前鋒。而官無資糧器械之費。公因奏言。請竝隴山而東。循古長城。列大壕以隔敵騎。給境內閒田復賦役。夏秋出戍卒護民耕穫。以賞義兵。制皆曰可。迄今奉行爲故事。時繼遷死。餘燼衰破。子德明畏誅奉獻。計不堅定。公請出師討之。上以德明首鼠兩端。且諭公以待其變。俄而揚珠瑪哈等族萬餘落。款闕順化。竝乞師應接。將吏疑怖欲弗許。公獨決策。夜將兵逼天都山。信宿盡擁其衆歸。因是諸小種皆納質保塞。值德明亦輸貢受爵土。而公名寢重矣。驛書召還。錄前後功。正其使名。充邠寧環慶路駐泊兵馬都鈐轄。俄又命兼知邠州。封禪恩進使東閣。帝以公著效西土。更欲以名震北道。大中祥符三年。卽使號領高州刺史。徙爲真定府定州路兵馬都鈐轄。又出公所上涇原環慶兩路邊州圖以示轉臣。曰。山川華戎城郭儲峙之要。盡在是矣。可別繪爲二。一畱

樞密院。一付本路使。按圖以從事。因嘉歎久之。歲中復徙涇原路兵馬都鈐轄。兼知渭州。西祀恩。遷四方館使。札瑪克部大入。數爲寇害。四年夏。公勒兵與大將支軍出武延。鹹泊川。合擊破之。捕斬首虜數百。奪甲鎧駝馬牛羊居多。上書讓州事。願專督兵要。密詔不許。五原外界有巴勒臧族。屢違王命。公因按塞夜襲之。殲其衆。厥後屬國羌無敢叛者。乃謂補百帳以上酋長號本族軍主。次曰指揮使。以擬王臣部曲之官。七年冬。西南諸戎解仇伺便。欲穿塞爲盜。特遷公引進使。再留州任。以防邊之。先是隴外有棄地號籠竿川。恒爲兵衝。州無外蔽。公按形勝築城以鎮之。自是寇無踰心。而我有重關矣。明年春。復與大將陳興等討札瑪克餘黨。滅之。未幾。改領英州刺史。充本州團練使。秦州宗噶爾人李遵。挾置勒斯賚爲之謀主。裁制種落。號爲文法。衆十餘萬。雄長塞外。遵因獻方物。求贊普之號。用詔拜爲保順軍節度使。以羈縻之。然凶狡恣睢。專趨邊隙。乃使其舅賞雲丹。說義從羌郭蘇達勒。謀爲鄉導。公知之。許蘇達勒以重賞。使圖雲丹。後十餘日。斬其首。旣而前預謀者皆逃怖伏匿。公誘召之。許輸物贖罪。是歲入塞者數千人。因其效。量賜繒綵。或以少爲訴者。公怒曰。此紆死物。猶希利耶。叱左右逐出之。諸部震恐。郭蘇達勒割南市城以獻。公請因其入地。竝酬殺雲丹之功。乃拜爲順州刺史。是時斥地寢遠。因增築弓門至威遠。凡十寨。浚隍三百八十里。列亭障。繕橋梁。屬于州門。皆戍兵餘功。民不知役。輒詔襲寵焉。俄丁內艱。上以雲麾將軍奪服。初。戎人有殺王民者。率以戎法入羊馬償其家。邊人愁苦。公下令曰。戎人自相犯從其俗。犯華人論如律。于是蕃渠斂手。而民有更生之賴。置勒斯賚乘諸豪未安。因率衆號十萬。脅餘黨寇三都谷。公率兵

迎擊破之。斬首千餘級。獲馬牛雜畜器仗三萬。計逐北至沙州。乃還。改客省使領康州刺史。充本州防禦使。及加秦州部署。充涇原路安撫使。天禧元年春。宗噶爾人復使其將馬布札爾屯野吳谷。公夜遣壯士襲其營。獲人馬甚衆。戎師潰。是歲州民狀保鄯鎮靖之迹聞于朝。願刊石頌功。以信不朽。天子手筆褒諭。古哩羌特衆逼塞。歷年招撫。無內屬意。公濟師襲其廬。滅之。渭川河州諸羌皆惶恐請降。置勒斯賚知外。援衰落。于是竄還故地。俄被召歸。燕見勞問。恩禮蕃渥。三年復拜華州刺史。充本州觀察使。鄜延路駐泊馬步軍副都部署。環慶路緣邊巡檢安撫使。慶州羌烏爾勤郭勒敏特你等族千餘落。詣吏歸款。因撫之。使爲外禦。邊略益安。四年春正月。崇拜宣徽北院使。鎮國軍節度觀察留後。簽署樞密院事。是秋。忠愍寇公譎道州。嫉正者指公爲黨。改使南院。以留後機務出爲環慶路駐泊馬步軍都部署。兼安撫使。乾興元年春。落南院使。降爲容州觀察使。知萊州。冬。改授華州觀察使。知青州。天聖三年春。進領彰化軍節度觀察留後。徙知天雄軍。戎聘歲道北門。素稔公威望。至飲餞郊勞。皆曲拳畏慄。不敢仰視。俄奉詔修觀。徙知永興軍。未上道。拜昭武軍節度使。加賜褒功之號。復鎮全魏。踰其感癘羸之疾。輒抗表願治河陽三城。以便頤養。兩宮優答。俞請疾少間。議者以威名大臣。不宜處閒外。裁數月。徙充真定府定州路駐泊馬步軍都部署。七年。改彰武軍節度使。部署如故。明年正月丁卯薨于位。訃聞。帝震悼。不視朝兩日。綏以侍中印綬。延賞歸賻。躡常等由。公始終踐歷。一出于功名者歟。夫人潘氏。追號馮掖郡夫人。後夫人沈氏。號吳興郡夫人。諸昆曰璨。殿前都指揮使。忠武軍節度使。累贈太師。曰璉。終義成軍衙內都指揮使。曰珣。至昭宣。

使恩州團練使諸弟曰玆至西京左藏庫副使曰玘尙書虞部員外郎以椒房之親累贈太師中書令曰珣至東上閣門使宜州刺史曰琮今爲同州觀察使三子長曰僖禮賓副使曰倚內殿崇班早卒曰僕供備庫副使一女適今西上閣門副使王德基公端誠壯猷不勉而立知兵好古虛己下士周旋抑畏皆得先王之風結髮乘障至剖符握節出入二紀至于威信所治郡兵不敢愆民不知有兵功纖芥必賞罪秋毫不貸故士皆勸能盡力而爲之用乘機討貳數與敵角隨衆寡必以捷聞自國初以來扞西夏者皆無公比智數纖敏應機輒會嘗奕碁便坐外有白羣兵叛入戎者左右貽愕公據枰算勝徐曰是吾使之爲謀勿復白不數日亡卒俱爲敵所殺其奪謀制變類此在秦州民多田訟窮治之皆不能舉其契公知其罔冒因訴亡官記而自前者除其罪得脫戶千六百賦錢四百萬亟以疏聞朝議頒下州縣遂爲常制持重示信不以小仁妨大慈營兵當誅值公疾之革親近者乞少寬假以資休祚公曰刑所以一衆弭亂安可以吾區區之病欲替王法耶使法替病紓吾罪大矣遽索筆署以殊死議者比古孫吳而達生死過之惜其中登皇樞未易歲次遭罹巧中政輟善還使文武之憲弗及究于天下晚鎮常趙痾瘵寢劇每嗟燕薊之地淪胥敵境願得一銘燕然值時戢兵卒與志謬齋恨沒地可勝愴耶然而纂服濟美都高牙齋鉞之重威稜被于殊俗功業見于本朝易師之丈人詩王之爪牙公兼得焉亦足以暴于夷夏矣初公之捐館也卜葬不吉歲在己卯諸孤屬圖襄事天子聞之特詔鴻臚持節有司具本品鹵簿以須其引今日月有期矣飾終二品具于官闕易名節惠請循令典謹狀

故樞密副使朝奉大夫給事中柱國天水郡開國侯食邑一千三百戶食實封二百戶賜紫金魚袋

贈尙書吏部侍郎天水姜公行狀

曾祖道黃。不仕。贈太子少保。

祖頻。不仕。贈太子少保。

父詔。仕太子少保。右贊善大夫。累贈太子少師。

淄川長山縣開善鄉青丘里姜遵。字從式。年六十八。

公之先本齊姓。漢以豪傑徙天水。後復貫淄右。今爲郡人焉。公幼岐嶷。長而沈毅。初肆業治百家之言。深博自將。文藻足用。旣與鄉物。有聲于齊魯間。屢挾策于宗司。以經濟自任。咸平三年。眞宗始御軒陛。延髦秀。公以進士擢第。明年調登州蓬萊尉。治有風力。郡將貪其幹用。奏請就補本州理曹掾。朝廷報可。未幾。丁內艱。免。憂闋。都銓舉充開封府右軍巡院判官。京穀浩穰。獄市居天下劇。爲吏者罕能以課自脫。公至。則勵直氣。探情僞。厥職修舉。廷無留事。二囚自誣棄市罪。獄將具矣。公微得寃狀。翻其文致。先是雪寃有賞。公慮傷前主者。寢不自列。祥符初。秩滿。遷大理寺丞。建封恩例。改殿中丞。出知吉州廬陵縣。氓籍數萬。氣俗荒獷。左言閔貌。以久訟爲健。公威克明斷。摧破姦黨。據案一決。吏民厭伏。汾陰禮畢。就改太常博士。得代歸闕。時故相天官王公在西掖。熟公治行。卽薦公宜幹抨彈察視之任。有詔換監察御史。八年。以勞遷殿中充開封府判官。賜五品服。吉守高惠連誣構公廬陵舊事。奏請逮訊。公聞命不疚。馳往對辨。左驗。

明白訖無污鱗。還臺以本官同判延安郡。天禧三年召還遷侍御史判三司戶部勾院。俄出爲陝梓利夔等路體量安撫。先時公舉奏山東大姓奸利事。至是皆伏法。天子以公建白有狀。未復命卽拜尙書工部郎中。非常例也。還節出知邢州。今上卽位就轉刑部。移守于滑。俄充京東路轉運使。天聖元年換京西路。不旬日召以本官兼侍御史知雜事。加賜金紫。受詔詳錄計省逋負之籍。科別蠲貸。明年遂以本官充三司戶部副使。三年改兵部。遂歷副度支鹽鐵二使務。俄攝太僕卿充北朝正旦國信使。四年冬拜右諫議大夫知永興軍。六年春驛召以本官充樞密副使。七年遷給事中。八年秋感疾請告。兩宮馳親使挾太醫相望于路。存神省慮。形于慰勉。九月乙丑車駕親視臥內。賜白金三千兩。丙寅薨于坊第之正寢。上聞震悼。復趣駕臨弔。制贈尙書吏部侍郎。法賻所須。率在優等。夫人路氏。國子博士從古之女。封平陽郡夫人。公三子長曰居正。舉進士。早夭。次曰延齡。太常寺太祝。次曰餘慶。未仕。孫三人曰承顏。試將作監主簿。曰正顏。齊顏。及遺奏之上。延齡改大理評事。餘慶授太常寺奉禮郎。正顏齊顏竝秘書省校書郎。外孫宿拱之。補三班奉職。哀榮之數。存歿之恩。篤矣。公天資方重。內孝而外嚴。家庭之內。有若官府。性長于吏事。濟之以忠力。未嘗阿意當世。故所莅必震肅。所言多指切。前後進用。皆上所自知。又感昔人削藁納誨之箴。問樹漏言之誠。故閨臺奏議。樞機密勿。言天下事甚衆。世莫得而知云。惜乎。參基命之司。歲律未幾。遠猷熙綽。弗克究公之素。寒暑興沴。棟梁其萎。然可謂雄駿之寶臣。黃中之元吉者已。謹狀。

元憲集卷三十四

墓誌銘

宋故推誠翊戴功臣彰武軍節度延州管內觀察處置等使金紫光祿大夫檢校太傅使持節都督延州諸軍事延州刺史兼御史大夫上柱國武威郡開國公食邑六千五百戶食實封一千六百戶贈侍中曹公墓誌銘

宋有忠勳之臣曰武威曹公。在天聖中。以宿將持節分督河北軍事。屯中山。庚午春正月丁卯。寢疾薨于位。壽五十八。訃聞。天子震悼。不視崇德朝兩日。以黃門監璽書告第。走命中謁者護其柩還京師。後九年。寶元之己卯。其孤等始以龜筮之吉。歸窆封樹。有詔鴻臚亞卿典喪事。奉常易其名曰武穆。冬十月乙酉。具鹵簿鼓吹。葬公及其嫡馮掖夫人潘氏于南洛陽之金谷鄉尹村原。從大墓且言順也。先是其家合官牒世譜以狀咨史氏。請辭刻石。讓不遂。乃紉而敘焉。公諱瑋。字寶臣。其先晉有清河太守泓。去官寄孥。始爲郡姓。後裔再徙。占數真定之靈壽。曾祖諱業。祖諱芸。竝遭時俶擾。仕本州爲牙門大校職。以世及功緣地徧陰邁德美。儲爲慶靈。以至烈考樞密使累贈太師尙書令諡武惠諱彬。以明允篤誠。道參運始。禽吳越蜀。助平天下。翊亮三聖。卒爲元老。諗謀帷幄。溢勳旂常。生極師臣之尊。沒從大享之配。顯揚追賁。爲時第一。逮公之克濟世美。及昆弟宗門之貴。交荷恤典。叢于先報。故今繇祖而上。皆贈太師尙書令。又封曾

祖于榮。大父于越。俱爲國公。曾祖妣張氏。祖妣李氏。皆累封齊韓二國太夫人。禰廟。自始薨。飾以濟陽郡。再易冀魯。竝爲眞王。妣高氏及二劉氏。又別以秦齊陳三國爲湯沐。公卽武惠王之第四子也。承是休烈。生而岐嶷。童齒英發。雅爲先王所器。至道初。以任爲西頭供奉官。閣門祗候。黨項餘種。李繼遷盜弄朔方。兵穿塞首鼠。強吏不能制。時武惠握機政。太宗面訪雄俊。以置邊瑣。久之。輒以公應詔。帝喜曰。卿有祁午。安遑遑更索耶。卽日召見。命有司加顯秩。以俟遣。武惠固辭。及以本職試守隴西郡。年甫十九。公自以見知于父子之際。又爲明主所適拔。感激忠孝。遂摠才蘊。由廷臣凡八遷。至客省使。其間帶高英康三州刺。史團練防禦使各一。洎領華州。一降容州。皆爲觀察使。進主鎮國彰化二軍節度。觀察留後。昭武彰武兩軍節度使。其化條所莅。則戍鎮戎軍。守渭邠秦萊青天雄孟堯七藩。而渭天雄皆再。其瑞璋之總。則環慶眞定涇原三路。皆爲兵馬都鈐轄。鄜延路爲副都部署。環慶眞定兩路。竝爲都部署。國論所咨。則領宣徽南北院使。署樞密院事。命秩之備。則階三品。勳二品。視官帝傅。兼亞丞相。書社六千三百。實幹一千六百。以四字爲功號。烜赫光耀。冠映侯籍。迹公之策名展體。服勞中外。爲國方召。多本西略。初繼遷逋誅。寔久劫羣羌爲支輔。苛征暴斂。人思自拔。公之扞蕭關也。盡條恩詔。綏懷之意。以檄諸部。部人得書。皆東向感泣。或率衆內屬。姦黨始離。寇略河湟。諸戎歸重。弗戒。公短兵鏖石門川上。狡衆殆殲。趙德明初喪。凶。有首罪稱藩之請。公以天厭餘孽。宜時平蕩。願帥一隊。縛豎子以毀鼓。驛書言狀。慮密計周。時朝議前已許降。謀弗果用。揚珠瑪哈之族。合萬餘落。乞援內徙。諸將惶惑。未知所受。公獨撫其使。自將勁騎薄天都山。

凡三日。盡擁其衆。按道徐還。中外服其勇。再守渭也。古哩羌寇掠不已。公率所部合支軍。趣武延。鹹泊川。鼓行夾擊。諸帳皆潰。係牛熟馬以萬計。遂破滅之。又襲叛姓巴勒臧于平涼。剪其巢窟。自是屬國者倚漢與天等矣。鎮天水也。值置勒斯賚初盛。挾李遵妖妄。自謂吐蕃貴重。當雄西域。稍并他部。恣睢塞外。遵乃傍緣故事。上書求贊普之號。公密疏以春秋許外夷者不一而足。今二羌烏合。而所希無法。宜黜桀黠。以尊國防。真宗納焉。但授遵保順節度制。後果窺伺邊隙。包藏禍心。迫脅小種。扇動豪帥。連營方陣。號稱十萬。乘虛內襲。浸淫于三都之谷。公率軍整旅。背城逆戰。斬首千級。獲利器雜畜三萬計。追北至敦煌。驍將馬布札爾恥敗。負力復屯野吳。公遣死士數百。夜擣其壘。自相蹂躪。羣醜遂奔。古哩羌陰謀累年。規敗疆事。先其未發。掃平廬柵。因是西南諸姓。皆納款轅門。遵賚震怖。遁還故磧。不敢彎弓而取當。此式遏制勝之大較。故事邊民挾弓矢。皆應募爲奔命。鬪勞賞薄。人情弗愜。公建言。能墾境上曠土者。蠲其租。春秋耕斂。出州兵以護作。而戰者忘死矣。渠率內屬。恩隆無等。公請百帳以上。比古帕主。次比營司馬。贊書。拜授列爲王官而來者。知勸矣。黠羌殺人。輒以羊馬自贖。公按律。令除其弊。犯華人者。論殺之。餘從其俗。而刑無頗矣。秦人田訟。彌歲不解。曹吏投隙竄易版書。公審其宿奸。一取質劑爲驗。亡契者貸其負。使得自占。收脫戶千六百。租錢四百萬。臺符宣告州郡。以爲後式。而文無害矣。此威懷安利之凡最。若其按秦漢舊迹。因長城之塹。稍築塢堠。以殊內外。斥境千里。建籠竿之壁。列弓門十寨。迭爲藩蔽。班賞格。飾鬪具。繕梁表道。屯田足食。迄今爲保障之利者。不可悉紀。公之在關隴。以威名莊重。淵回山立。累功懋賞。皆卽拜稍。

遷倚而不召者。歲踰二紀。至于丁外內艱。泣血委印綬。率以墨纓奪服。天禧中始有下邳觀風之拜。猶副戎柄。時三陲寧晏。外虞訖息。僉以公壯猷盛烈。當敷及天下。于是有留使宣猷之授。入筦樞極。公既踐修世範。知無不爲。秉義據正。勤勞夙夜。海內抗頌。歸縑衣之美。終以助高地偪。更由總管之任。出臨西夏。讒黨乘勝。又以容山之拜。徙守東藩。聖上始初清明。誅放儉狷。不俟辯謗。寢還舊物。奠營丘。藩全魏。養疾明律。興護北方。再陟齋壇。終屏王室。洪稜勁節。久而彌厲。方且桓圭卓馬。疇來朝之儀。彤弓彤戈。將蕃錫之典。昊天不弔。殲良奄及。此哲侯所以深聞。羣之悼。邦人所以寄成。蹊之泣者已。嗚呼。公之材之劭。本沈雄而施事幹。然承藉先訓。濟之謙慤。保功約已。未嘗有過。臨政精悍。不獨以軍旅從事。故數佩州組。皆以最聞。大指道威。信必賞罰。以軍之嚴。移于郡。則肅然畏。以郡之愛。移于軍。則薰然和。伍符吏牘。參行不愆。古名將之憚。公優爲之。前後褒勤。賞捷受方。底書以數十。若其詢逮兵策。則寶附細劄。委曲纖悉。甚者手詔往反。如宣帝問後將軍故事。決而後已。在常趙感疹。方革營卒。以常過干軍禁。左右勸寬其罰。公曰。以病易守。非吾節也。卒置殊死。故公之約。所守如介石。公之重。所至爲長城。言料敵則焯龜。語應變則奏刀。用能英聲茂績。超蓋前代。行均椒蘭之芬。威無藜藿之采。有由然也。論者猶以羌渾右鄙。事微敵脆。不足暢桓桓之舉。晚睨幽朔。悲歌慷慨。常謂禪姑衍銘燕然者。復何人哉。時方弭兵。公亦齋志。此又謀夫壯士。擊劍長懷而不能已也。繼室曰沈氏。今號吳興郡夫人。故相僕射倫之孫。光祿少卿繼宗之女。三子長曰僖。任禮賓副使。次曰倚。終內殿崇班。曰僕。爲供備庫副使。噫。門閥隆貴。蟬聯魚貫。以功名世家者。今無偶矣。

游談故老。尙將傳而不泯。又況圖金刻。期陵岸。則公之終譽。其有既乎。銘曰。巖巖常山。靈氣磅礴。值爲豪英。拔秀遼廓。洗洗侍中。實本渾熊。纂服宵善。自箕而弓。武惠知子。獻之天辰。弗嗇家寶。用參國器。黨項猖狂。擾宋西疆。公冠未升。戍于秦涼。治兵刺部。或征或撫。游魂殘孽。莫敢余侮。婪婪大酋。交兵結仇。率爾蕃部。搏我邊州。公計先定。聊秉武節。螳臂蛙跗。卒染車轍。蕃族震攜。款塞就羈。滅烽臥龍。帝曰來歸。計功酬績。大使方伯。乃幹鴻樞。柔惠正直。閒因讒人。旋陟舊勳。三偃大藩。再帥中軍。屏于北道。威聲偃草。公侯干城。宜壽宜考。耳順未踰。與世長違。徹我金湯。帝曰予思。貂厥袞襜。哀榮竝至。寵葬周原。陪先洛浹。儼畫柳兮。彷彿。公將僚兮。幽堂。惟松楸兮。嗣世。尙橋梓于家王。

故朝奉郎守尙書駕部員外郎上輕車都尉賜緋魚袋濟陽江府君墓誌銘

昔班固稱西都英雋之域。黻冕所興。議者以爲一時之夸辭。過矣。蓋京師樹首善以倡天下。擁太和以陶民性。若堯土之俗。多愛思。舜野之器。無苦窳。遷善成教。不知其然。則中州人物之華。常卓犖于諸夏。固其宜矣。雍丘爲左畿大邑。氣俗尤厚。士之挾經術由鄉校。脫野巾而襲朝組者。視寰內不若也。其間尙書郎濟陽江君諱日新。字仲元。又章章者。與君端拱初。以明經登科。調補陵州。始建尉由外臺陟狀。就除成都司法參軍。入爲大理寺法直。滿歲改評事。出知曹州。濟陰縣轉運使。河東薛公曠上其課最。就徙同判撫州。摘姦卹隱。示歸厚之法。其後吏民多奉行。江君故事。就轉國子監丞。眞宗嚮明。改丞大理。秩滿除太子洗馬。同判鄜州。咸平初。匈奴未賓。侵敗邊略。天子念兩河之棘。特詔有司。選中朝臣有風績明劭。知下疾

苦者不問其位。付使節以安輯之。時君適自鄜歸。繇是以春官五品領河北安撫探訪之任。疆場方駭。政靡事易。豈不狎野。吏或失官。輶車所經。輒振其弊。使還論奏。上皆愈可。俄除同判并州。會平原守王用和治迹無狀。爲使司所劾。奉辭之曰。面改知德州。遷殿中丞。賜緋魚。至州。建言城小不足以扞寇。願率衆力而修大之。朝嘉厥謀。民亦肯勸。樓堞未備。戎入其郊。時趙魏諸強藩。皆堅壁自完。不內細弱。惟平原虛城。納衆料丁壯以操戰具。開東西門。使士易服出入。晝夜不絕。敵衆憚之。被圍三旬。守有餘力。凡獲馬口甲胄以千數。獻于行在。民賴保障者數十萬人。上錄其勳。改國子博士。俄丁父憂。有詔奪情。復攝郡事。秩滿吏民守闕。願復借君一年。故歷四朞而得代。還朝。除濮汝壽三州。不拜。上書願治邊郡。會邊瑣無缺。守遂同判真定府。改尙書虞部員外郎。府帥滕文襲木強少文。條教自任。君數援吏法以裁正之。乃挾刑獄。使陳綱翟繼恩奏君以當官失和。傳致疑狀。朝廷下其章于本路計使以辨之。君具陳所誣。皆公言。他毋纖芥。由是陳翟俱得罪。移君同判大名府。又移邠州。序遷比部員外郎。太夫人在堂。表乞就養。俄除知扶溝縣。數月復移同判齊州。轉駕部員外郎。自陳翟之誣。爲居中者所惡。數易官守。將違憾于君。君自以婞直多忤。不容于世。乃以未疾自劾免。時長子爲尉氏主簿。遂往就焉。痾瘵寢加。以大中祥符六年四月二十八日啓手足于牖下。春秋五十七。曾王父瓊。烈考延濬。潛德不仕。教忠詒法。逮君之顯。贈其禰爲水部員外郎。母李氏。敍封隆平縣太君。初娶富春孫氏。繼室以汝南周氏。封內鄉縣君。後君三歲而卒。五子曰。中立。古。進士擢第爲綿州從事。曰中和。守家學爲鄉老所薦。曰中庸。有高才而天。曰中應。富辭業未第。曰中立。

登俊科。掌宣州記室。初君之終。諸孤等以筮之未從。而歲之不易。故藁葬君于南部。今龍集癸酉孟冬之已酉吉與姓會。始號奉靈。轉及二夫人之喪。克葬于雍丘縣陽夏長白岡之原。禮也。惟君感慨強濟。由徒步而取時譽。其術長于機變。而兼敦義烈。今天下積年逋田許賦。他戶著于命。乃君所建。又邊民蔡靜恭者。父爲賊劉廷晏所殺。後廷晏仕契丹爲涿州別校。靜恭既壯。出塞斬之。以首祭父墓。君表其孝勇。章數上。靜恭卒。授三班奉職。其樹風竦善。他多此類。固當鶯擊橫騰。夷夏而蕩霄漢。終乃婆娑郎署。沈浮郡竹。外失貴臣之意。奄同萬物之盡。道遐運促。可勝嘆哉。然松心不彫。井德無改。剛腸勁節。終始彌厲。亦足以矯抗羣枉。詒燕後昆者焉。其孫休復。童牙有文。弱冠而仕。與余聯第榮牒。敦契鄉粉。具狀先猷。巧識圓石。罔獲辭拒。姑實其狀云。銘曰。日畿之藪。風夷土厚。秀龍乘乾。回岡包酉。龜食告祥。牛眠啓後。葬君子兮。佐城備大夫之廣柳。物共盡兮。奈何。德有基兮。可久。岸爲谷兮。谷爲陵。期信辭兮。垂不朽。

宋故朝請大夫尚書工部郎中充天章閣待制上輕車都尉賜紫金魚裴彭城劉府君墓誌銘

景祐乙亥秋八月。天子制詔丞相曰。朕思得忠廉老成之人。參備顧問。其疇宜哉。僉曰。尚書工部郎中劉隨。有史魚之風。於陵之清。直方秉彝。節貫華皓。帝曰。愈。翼日以冬官待制。天章閣。褒言渥禮。形于書贊。摺紳動色。有得賢之賀。未涉旬。恙生心腹。日臻無損。越九月。旣望。家老奉祭衣。以號。東榮時髦端士。相與流涕。朝廷恤憐。厚賻終錄。孤之典。仲豫庚申歸葬。于開考城之黃城原。禮也。君字仲豫。其先漢楚元王之後。十三代祖諱思立。仕唐爲右武侯大將軍襄武郡公。衣冠慶靈。宗牒詳具。大王父利賓。王父運。皆占籍睢

水烈考濟以石晉之擾始居神甸。逮君通貴累贈尚書刑部郎封妣侯氏爲永安縣太君。其高曾以還。元宗避地之節。悉見于君自撰先人之誌。此皆不書。真宗景德初。君始以鄉秀詣春官覆試。使殿擢進士第。解巾連主安豐仁和二縣簿。又調倅永康之壁。屬邑令有受賕易死生之獄者。君正其誣枉。將抵令罪。漕使李士衡陰爲之請。君終不答。士衡怒密奏君苛嬖非綏邊術。坐是代歸。仍闕冬集。久之補南劍州從事。丁內艱。服除。改大理丞。參主詳斷。時宮保文元晁公以重德處辭禁。朝夕獻納。雅知君風力強毅。手疏稱薦。因是出通判益州。益號會藩。故事非外朝臣不俾爲貳。洎貪君才劭。故以京司命之。延登臨遣恩禮。無殺就殿中丞。移原州。今上繼明。轉太常博士。關掌河中府。未幾驛召。換左正言。囊封盡規。爲相國文穆王公不悅。會京府秋薦。命君遷察試席。入榮進士。有一辭異卷者。亦旣構訟。挾以爲疵。左遷掌濟州商筭。明年移監平陽郡。秩滿序涉左司諫。入計省。爲戶部判官。賜緋魚。以疾上書得濟陽符竹政成。稍遷起居郎。判戶部勾院。未踰月。改尚書刑部員外郎。兼御史知雜事。仍副都銓。九流之炳。加服金艾。涉基以兼官介銅監使務。明道建元。遷秩七兵。是冬持節使龍庭。出塞冒霜露。足力孳痺。至其廬。單于命無重拜。還臺有司以爲不敏。降秋曹承務。典信州。尋復舊官。徙宣城郡。數月拜今秩。知應天府。兼付宮鑰。被召赴闕。再居地官之筵。裁半歲。乃貼禁嚴之職。凡歷官十三。受任十五。雖命有仲屈。而道無磷緇。精心強力。果于樹善。其佐幕于道江也。異政犖犖。最爲可述。軍有宣父祠。富人穿廟墻爲賈區。以出公算。君下車卽移書譙主者奪其地。春秋率博士弟子釋奠如常禮。山是裔民識師儒之教。壘中有李冰遺像。名載祀典。而遠方右

鬼因爲煩費。歲歛閭左。出私錢以給賽。且至數千。皆先神精而後國賦。財用既積。官爲薄受。而吏得傍緣。乾沒君尤之。曰。神賢者也。生以扞患利茲土。而沒以血食害斯民耶。非聰直之意。悉罷之。俗不爲井。食于江。涘霜嚴波涸。則水去軍署亘二十里。綆缶係道。官民愁苦。君乃洞竹萬箇。引近山之泉。因地湧伏。徧注官寺。鑿空甃數十。儲華清以汲。鄜里舊城有疆域無雉堞。歲課民斫木爲虎落。地又多火。連蔓恐懼。君乃環植官柳數十萬。櫛比交錯。旣已限鬱攸之烈。又相壘以成。援人到于今賴之。岷源與沱川竝流。勢欲橫潰。君規治長堰二百丈。障狂波趨故道。自成都十三縣。竝免其危。西南夷以馬市邊關爲。黽僧所欺。君繩其宿姦。夷人悅服。及後以中傷罷去。蠻髦千餘人。遮使者車呼曰。我劉父何在。本部以聞。君始得再調。丞于鄉棘也。值李溥之劾。辭多詆譭。溥始以商利得幸。黨連貴要。至是牘背諭指。惡不悉暴。君上書卻其獄。究其姦態。有詔再訊。卒至重科。明邪翕翕。無少畏憚。居諫署也。志拾遺漏。以箴朝禁。教坊舉伶籍之缺。有命蜀部輸送善優。君建言。聖主方追三代之隆。斂才聘士。孜孜如不及。奚復遷明詔求賤工。非所以廣德聲于天下。疏奏。帝悅。遣中黃門申諭。且勗以無後言之隱。莊獻太后敦外家之愛。幸小侯之第。上封援古。兩宮咸動。自是終其世不復再駕。他或譏其恩倖。修其善否。削藁奏御。尙數十百函。沃心中理。多蒙褒答。今參預貳卿。宋公之去內署也。以建白逆旨。換職守南都。君時副總憲綱。亟上言。善人邦國之基。禮樂之宗。不宜外斥。以孤人望。事雖中寢。朝議躋之。四爲州藩。皆宣威導慈。推行靡密。大指破狡蠹。綏瘠瘼。防檢力筆。下無能欺。使俗垂制。必圖終永。外臺倚重。常爲二千石表。出內風績。始終無懈。然剛腸寡偶。矢言好

盡根于忠義。折而不撓。凡所建明。必欲蹈遠猷而遺近利。是則希遷難進。其樹立使然耶。惜乎見識于後凋之餘。開榮于晚節之會。道悠命局。終淪舛躓。不弔昊天。齋志沒地。嗚呼。春秋六十有五。先是君聘敵之復也。有馬十五乘。悉上送官。主者因其外遷。不時還賜。及葬。輜庀具家資。窘絕。上聞之。特出庫錢一百二十萬。追酌其直。服勞處約。歿身彌顯。夫人張氏。以柔嘉輔作。啓壽昌爲湯沐邑。三兄曰洽。平巽。巽以君故仕爲大邑佐。洽隱居。平早夭。一子孝忠。任大理評事。一孫慶。試祕書正字。僕與君篤鄉枌之契。接朝紳之舊。危言雅行。稔于心耳。又以嗣哀狀。遺烈見託斯文。輟慟含毫。辭實無愧。銘曰。噫嘻。仲豫志靡回。昂昂邦直。卿之材。飲冰樹政。惠可懷。握瑜屢黜。心無猜。生涯將究。時甫來。天意難忱。賢者衰。寧神降體。掩夜臺。瑒辭沈碧。揚清埃。

宋故右班殿直郢州兵馬監押贈太子右清道率府平昌孟府君墓誌銘

府君諱仲宣。字坦之。其先出魯卿之宗。爲平昌望族。世系寔遠。不常厥居。土斷于梁。多歷年所。今爲開封人也。曾王父迪。王父守中。皆蹈道不仕。以貲徙于京邑。考處讓幼號文。敏喜刀筆。初襁巾入公府。極右署。太宗皇帝毓德朱邸。尹正神縣。遴揀左右。宣贊音旨。繇是以閒練儀矩。改補王屬。出則先馬。入則侍帷。倚賴親信。宮臣欽矚。雍熙踐阼。以舊恩連宰劇邑。終洛州浞鄉令。君則其冢子。愿慤華穎。發于羈貫。及長治書術。好文藻。嘗一貢春官氏。浞鄉之捐館也。占遺牘以聞上。天子憫焉。卽以君爲三班奉職官。未及蔭而賞延于世。非常例也。君以父任。尤感慨。首公盡節。奉承王事。其間馳軔將命者十數。反無懈色。商功守局。

者凡再任多尤課。以勞補右班殿直。監兵于郢川。咸平四年十二月二十三日。不幸感疾。啓手足于廨舍。享年若干歲。娶王氏晏氏皆早卒。又繼室張氏。二子曰陶曰某。晏出也。某未冠。天闕。陶天禧中擢進士乙科。歷郡掾。邑丞。爲公卿慰薦。遷祕書省著作郎。今爲本省丞。知扶溝縣。初府君以廉儉宿業。屈浮齡而無貴仕。貽燕訓道。造次必于儒者。宜有慶善。叢于後昆。故祕丞襲是素基。摠厥休閒。載質未幾。通籍于朝。今上東耕禮成。以辛未詔書贈府君爲太子右清道率府率。封張夫人爲永安縣太君。綵衣承顏。士林聳慕。噫。垂裕顯親之致。其相爲美乎。先是東部枌榆。卜窳者重世矣。祕丞君永懷先正。藁葬之久。又感故塋。昭位之卑。卽于所治。改占塋域。上書言狀。有詔可焉。參問著龜。得景祐甲戌十月癸酉。惟卜吉。于是奉府君及二夫人之柩。合葬于扶溝縣之白馬原。竭誠慎終。禮無違者。夫江源濫觴。而派爲南紀。臺與累土。而高極九層。前蔽世烈。鬱抑憑厚。發于來裔。庸可度思。嗚呼。孟氏之子。將光顯于時矣。僕也不佞。辱祕丞之知。勤請斯文。以誌幽隧。銘曰。君子含章。蘊隆善祥。安節効用。其功弗揚。志則藏兮。令嗣追遠。褒榮恤典。肯構充閭。其言克踐。世將顯兮。神革之畿。連岡蔽虧。寧神卜兆。紀寶刊辭。魂有知兮。

墓記

宗室內園使忠州刺史殤子故右班殿直墓記

殿直諱克威。無字。始賜名。且未冠也。內園使忠州刺史承鑒之次子。母曰臨淮君劉氏。初宣祖之昭曰秦。悼王之子曰保平。軍節度使鄖國公德鈞。鄖公卽忠州之烈考。今上之諸從父也。惟國積累憑厚。固槃石。

之宗。仙源慶厖。派分枝附。天子以爲三后之屬籍。九廟之孫謀。凡親親之恩。率過乎厚。于是殿直生三歲矣。未能勝衣。趨拜而服。庭臣之命。景祐甲戌五月癸酉。不幸天闕。卽權殯于佛祠。今官占告。僦得乙亥孟春丁酉吉。因其庀尊屬之葬具。詔以殯禮祔焉。實汝州梁縣之先域也。噫。託封樹。寧體魄。庶幾從乃祖于下乎。謹記。

宗室內園使貴州刺史殤子墓記

殤子者。宗室內園使貴州刺史承裔高密郡君韓氏之第五子。保平軍節度使鄖國公諱德鈞之諸孫。秦悼王之曾孫。天聖辛未生于宮邸。以景祐甲戌七月丁未卒。年四歲。初以貴州之愛。免懷辟。就嬉于姆保。故未及賜名。以皇支之蕃。辯族疏寵。次上于官簿。故未之逮祿。歲在乙亥正月丁酉。舉其襁。祔窆于汝州梁縣之封兆。從大墓且吉卜也。夫承九廟之覆露。宜參麟趾犬牙之雜襲。苗而不秀。其命矣夫。表于幽阡。用篤終禮云爾。謹記。

宗室懷州刺史殤女墓記

故秦悼王之子曰高密郡王諱德恭。高密之子曰懷州刺史名承慶。懷州于今上有再從昆弟之倫。天祚所開國姓蕃衍。殤女者卽懷州之配涇陽郡君和氏之所生。第在十一。景祐元年夏仲甲申。天子宮邸。距始生凡三歲。卽以其月寓骨于延祥佛廟。天子至仁睦族。湛恩漏壤。每宗支遭戚。丘封歲事。必卹然加厚。辨圖按域。厭祭畢舉。窀穸就安。斯所以厚邦風篤天屬也。故因其諸母之葬。祔窆于汝州梁縣之先域。得

從祖歸全之義。嗚呼順哉。時二年正月丁酉。謹記。

祭文

祭孫僕射文

唐季倣擾。皇綱弗競。俗頹厥風。人菲其行。於皇時宋。天集大命。下武繼文。如周之盛。嚮學首善。稽古作聖。必有儒宗。緝隆醇政。公稟英粹。挺然天資。靈饜威鳳。瑞我昌時。含章履素。居中稟彝。仲尼既沒。文不在茲。有德可樂。爲邦家基。有道可尊。爲王者師。有行可法。爲生民規。有容可觀。爲朝廷儀。昔公始仕。墳籍是司。濟濟學徒。發篋握衣。誦誦天族。學易受詩。乃升內閣。前席詢咨。直言正色。介然不移。德玉自潔。讒蠅莫緇。列藩偃息。風教下施。甘棠勿拜。去爲民思。聖皇纂御。累洽重熙。入居講勸。十稔于斯。義重師傅。多所發揮。典章禮樂。時庸稽疑。士任國用。授薦罔遺。君從人服。以其不私。日昃歲晏。眷然懷歸。引年還政。安居委蛇。進退合度。始終有宜。嗟嗟耆德。天不憖遺。邦殄瘁兮。人亡吾安。放兮哲萎。納書褒述。揆于禮闈。易名取善。與聖克齊。陽穀之野。汶水之涯。令嗣卜窳。神降來依。昌朝早以。謝材爲僚。東序。鷲蹇之價。重于一顧。曷堪厚知。猥煩清舉。暨玷經筵。公指館宇。嗣講舊編。叨榮懷慕。某本諸生。得游材館。示以渠模。假之羽翰。比名言路。抗章敷薦。陟被上庠。遂階清貫。撫躬悼恩。心誓旦旦。希言早歲。進擢左雍。授經王府。引籍殿中。中和晚進。被遇攸同。昔登學省。今傅皇宗。豈不懷德。銘此微躬。方阻門闌。各服官次。靡皇執紼。遐仰奠饋。靈兮如在。俯昭誠志。尙饗。

元憲集卷三十五

祝文

上辛祈穀祀昊天上帝文

斯民之生。實賴嘉穀。亦有高廩。國乃乂安。敢伸虔誠。仰祈昭貺。

冬至祀昊天太祖皇帝配位文

受命造邦。奄有區夏。配天立極。功冠百王。昭報之誠。敢忘祀事。

太宗皇帝配位文

繼昭聖德。載稽武功。聲教誕敷。丕冒土宇。奉茲常祀。以昭獻誠。

南郊昊天上帝祝文

維景祐五年。歲次戊寅十一月癸巳朔十八日庚戌。嗣天子臣敢昭告于昊天上帝。伏以巖育羣生。總握元命。降衷孚佑。明威有赫。司牧之重。實繫乃眷。升中備物。疇敢弗祇。臣猥承基圖。仰荷臨鑒。宇內方外。咸循厥理。天正二元。躬率郊報。序神綴食。用蠲大事。精誠所嚮。居歆靡忒。開錫純嘏。永綏兆居。謹以玉帛犧牲。粢盛庶品。備茲禋燎。祇薦虔心。皇伯祖考太祖。啓運立極。英武睿文。神德聖功。至明大孝。皇帝。皇祖考太宗。至仁應道。神功聖德。文武睿烈。大明廣孝。皇帝。配神作主。尙饗。

南郊皇地祇祝文

伏以博靜之宗。持載攸主。順配乾理。參儲靈命。廣生含厚。理絕名言。臣獲以冲眇。嗣膺宗緒。蕃釐所祐。日以靖嘉。歸報明察。不敢有貳。長景協序。庶物畢登。親陟泰時。肅將祀事。率典盡志。欽惟格思。無疆之休。申錫攸冀。

南郊配帝太祖皇帝祝文

恭以天有景祚。集于元聖。聖有成訓。垂厥後昆。於昭武功。建我炎統。勝殘去殺。輯寧戎夏。宏模顯道。燕詒罔極。施于寡昧。仰席慶靈。守成任重。日以增惕。敢緣類饗。陟配郊丘。親執豆籩。對越穹厚。孚佑敷錫。祈庇本支。

南郊配帝太宗皇帝祝文

伏以執競建猷。經世垂統。思文顯祖。丕烈是承。威戡桀鰲。恩涵動植。爲綱爲紀。遂安萬葉。曾是涼末。庇于孫謀。循規蹈常。罔敢寧逸。慶祚所衍。歲物載豐。虔修盛禮。禋宗類帝。迭配之重。抑惟茂典。庶無罪悔。以對神休。

后廟修築垣壇祭告土地文

伏以別廟闕清。外壩崇奧。蟻墉漏壤。雲錘戒徒。方亟繕完。慮奸禁忌。恭陳信祝。尙介神休。

繼照堂上梁祭告土地文

伏以京室寶區。聖真舊邸。夙標宏構。用志初潛。歲歷寢深。堂皇滋漏。俾從必葺。將慶惟新。適涓上棟之辰。敢肅柔祇之薦。庶資冥祐。永保靈基。

開汴口祭告文

繫厥輔渠。首茲經瀆。控引淮楚。饒漕京師。汴涸以時。開塞惟謹。方春之仲。疏派有常。圖興庶工。參倚靈眷。薦嘉遠懇。用埒安流。

東太一宮立夏祝文四首

伏以天序乘離。風薰中律。瞻言靖館。夙駐奔精。祇率舊章。虔修孟祀。仰宮元之循度。鑒祝嘏以儲休。神道孔昭。民生永庇。

伏以天序布和。炎靈啓律。參幹大化。實惟尊神。至迎氣有常。備物茲恪。迪是繁祉。庇于羣生。精輝孔昭。鑒祐無忒。

惟神上棲太穹。參握靈紀。飛象所舍。純福是膺。歲時順祀。邦有常典。屬戒東序。虔率禮章。備物薦誠。允格聰鑒。伏以茂循星元。參宰乾幹。嘉氣儲福。是惟貴神。薦馨備物。厥有常事。茲屆邦典。紹修恭達。潔誠仰對。真御奔精。胙吉靈其格思。

狀

乞許汝州狀

臣聞事君之方。止于無隱。遂物之施。終于曲成。故下情靡不達之衷。人欲有必從之感。冒緣明訓。控述私
悰。中謝伏念。臣志局狷愚。藝文涼淺。偶偕鄉物。遂玷辭場。屬元聖之協華。預羣材之始隗。與于孤土。實在
甲科。首塵卿屬之榮。旋濫朝闈之籍。書林抱槧。久宿官成。財簿操籌。再承人乏。間亦質歲期而上課。循吏
格以懋勤。優踐諫曹。參司史注。繼獎雕蟲之技。入陪演綵之嚴。眷會光亨。品儀峻切。凡此冒居之地。率非
平進之階。每一內思。罔知攸處。將策名之始。已濫于衆先。而待賢之規。忍由于愚廢。固當瘁盡。少贖僥踰。
會未效于寸長。輒更希于自便。蓋念臣幼鍾薄祐。長去先疇。僅存喬木之區。列占東畿之版。高曾以降。丘
壘未夷。惟臣二親。尙從藁葬。不孝之罪。陰罰寧逃。然撲築焯荆。歲時或爽。按圖辨位。昭穆寢疎。泯失祔于
故林。實介違于本兆。今者訪于輔郡。偶獲新阡。惟涓遠日之良。乃在此冬之首。必祈恩惠。親奉襄成。奈何
職局有羈。營綜多緒。俸泉仰給。月罕貲贏。僮指招呼。門無幹力。至乃厭衣靈輅之具。祭牢謳紉之儀。雖儉
則易周。而禮難或闕。並資豫辦。方克如期。事旣痛于弗躬。室復嗟于終窆。併茲危迫。敢避干聞。臣欲乞于
許汝二州之中。知州一次。且謀道出。兼使家爲。上則指賜田之豐。易成假貸。下亦賴執衣之助。差減僦備。
情報獲伸。幽明胥濟。伏望景祐體天法道。欽文聰武聖神孝德。皇帝陛下。容光燭隱。善貸垂慈。徇其出守
之行。訖乃事亡之舉。況臣叨塵近掖。已越再期。參攝事經。奉行辭訓。荷包荒于聖度。偶逃責于刑書。均是
微勞。理當外補。攷其劭農求瘼。察獄衰征。具有綱條。布于郡國。蓋治規之已定。雖愚者而可爲。內省闇蒙。
尙知遵守。儻遂一麾之請。誓堅九殞之酬。意窮言煩。醜悻極交。干犯宸扆。臣無任祈天俟命之至。

序

送河南法掾張子野序

彙余以不肖。冒冠羣材之籍。同升之士。數盈二百。其知之深者。則清河張子野在焉。子野本公族世家。席旂常鐘鼎之餘烈。卓然異操。發于童牙。自弁髦爲諸生。棄錦紈而襲草布。逾文雅韻。根于粹質。一上高第。無矜色。初命徒勞。無愠容。士友以是服其清和。而期之久大。是行也。以闕愛家府。再奉銓檄。補河南法掾。且參軍事。涓日首路。款余告別。議者多惜其美才。冲守冉冉于諸曹之次。然余有以陰拊于子者。可略言之。今相國彭城公。躬寅亮之姿。保釐西郊。翹材開館。延天下士。又余友人集仙陳畱。謝希深。負淵雲之藻。田曹外郎樂安孫君。貫流略之學。竝肅給溫裕。爲時吏師。方左右台儀。協贊畱務。愛賢樂善。求之如不及。則子就署之日。雖欲埋照自晦。羣公其舍。諸惟逖聽薦章。揚茂實于朝耳。子姑嗇神以慰離緒而已。

諸公畱題王氏中隱堂詩序

夫射者工乎中微。拙于使人無己譽。君子易于遜俗。難乎必時無我用。此故尙書度支員外郎王君。所以深厭物累。而見靡人爵。高風勝韻。歿而可懷者已。初君以蜀漢之秀。聲馳士林。含章緣儒。爲世能吏。且悼其去里之遠。始移籍于關中。英躔上腴。歷選其奧。結宇植援。疏流藝竹。踞窻篠岑。蔚之勝。別爲堂皇。求志命名。實曰中隱。每車騎休沐。牛酒過家。則必釋朝綏而襲野巾。卻赤舄以御山履。眄柯蔭樾。舉觴嘯詠。躊躇四顧。爲之滿志。回睨印綬。若桁楊韞鎖之遺。而朝貪其能。願卒弗果。于時鉅公名卿及士之賢者。聞其

風而悅之。有若內樞丞相文康王公。親式段廬。刻逾文以榮屋壁。有若左馮貳卿潁川陳公。篤愛羊豎。灑妙墨以題齋榜。雍土傳誦。號爲二絕。自是今參預小司徒太原王公。譙守大宗伯北海晏公而下。竝賦清什。以旌高致。星稠霞駁。異采同煥。絲廉磐辨。殊音竝雅。不遠千里。寄聲代貺。此其素〔案〕此下原本缺

送成上人序

天聖戊辰歲。余嘗過候。故內閣中山公。始與公門友成上人者。交臂于席間。微言軟音。時落耳界。自是數與之會。而亟飲其和。且慕其畸于人而不與人異也。旣而中山出守澠上。師振錫而從之。藹然風期。深入法樂。一室金粟。有施飯之緣。四海彥威。領彌天之對。勝集未幾。宗工云亡。孤雲匪心。飛鳥隨翼。背淮千里。聿來上都。庚午冬。余茹憂去官。屏處寰內。思文惠然策足。顧我于幽憂之中。悲心所熏。病膜如刮。老龍死矣。空成麥戶之驚。泰山頽乎。彌感負牆之舊。斂容中悼。徘徊久之。示視世緣。益足多者。一日踵門告別。且求贈言。余曰。儒家者流。道詩書服人倫足矣。安識夫方之外耶。而又京師苾芻。方以俗諦罪我。將焉用之。師曰。不也。塵勞之與道愛。其縛均焉。今夫誦貫花之書。服界稻之衣。崇布金之刹。是種種者于我法。乃捕魚取兔具耳。苟泥于此。雖吾師猶阿焉。彼求封之仁者何害。今將相造乎忘言之地。乃以言爲病耶。余感其勤。因敘其所以而爲之贈。

談苑序

故翰林楊文公大年。在真宗朝。掌內外制。有重名。爲一下學者所服。文辭之外。其博物殫見。又絕人遠甚。

故當時與其遊者，輒獲異聞奇說，門生故人往往削牘藏弄，以爲談助。江夏黃鑑，唐卿者，文公之里人，有俊才，爲公獎重。幼在外舍，逮于成立，故唐卿所纂，比諸公爲多。余雖耳剽有年，而求本未獲。前年春始得其橐于宗人祕書郎敏求，祕書郎宣獻公之令嗣，宣獻與楊爲中表昆弟，文采風尚，皆一代之宗師。緒立所傳，可謂審而無媿。然按本錄，但雜抄旁記，交錯無次序。好事者相與名曰談藪，余因爲掇去重複，分爲二十目，勒成一十二卷。昔隋有楊松玠，紀南北朝事，已著此號行于世。今襲之，將爲後生所惑，輒改題曰楊公談苑。其間有云：公言某事云云者，皆黃志也。楊于國史自有傳。唐卿天聖中預修正史，位太常博士，直集賢院，年未四十卒。搢紳痛悼，余昔與之善，因詳錄之。慶歷丁亥，孟春，中書後閣宋庠書。

右談苑計二十類：曰聖範、曰德量、曰風節、曰才品、曰武幹、曰奇逸、曰舊聞、曰記異、曰雜評、曰事志、曰正誤、曰名式、曰書藝、曰方技、曰敘釋、曰僭亂、曰豪侈、曰惡戒、曰戲謔、曰夷紀，共十二卷。

王侍郎集序

夫古君子之治性情，保純白，必有凝神寄適之地，以完天守。雖見異物，莫得而遷焉。故詹何老于餌魚，佞巧于承蜩，承福以坊間造父，以御達。彼皆自得于內，而不知老之將至。尙書兵部侍郎太原王君之于詩也，亦猶是焉。惟君樂易清和，膺敏肅給，由咸平中名在秀牒，聲馳士林。脫巾逢辰，累課通籍，推行緣飾，皆本儒雅，標尙所寄于詩尤邃。臺閣髦彥，居多蘄嚮。君亦操清機，襲妙境，求仁斯得，不撓世務。其間雖登高感別，臨年悼往，或鞅掌官下，或淒涼酒所，春庚秋蟀之候，芳茗宿莽之變，莫不造興端緒，揣倅聲色，悲

欣萬態。一納于風什。警音秀句。隨意所指。其雋如破的。其熟如奏刀。當茲之時。誠有三旌之招。萬鍾之豐。不吾易也。故君興逢掖。至鳴佩。補吏三紀。默焉難逮。隱侯握臂。南宮白首。區區榮悴。攻中焚和。卒莫能緣。憂端犯六腑者。信其詩爲蔽矣。若夫指事之的切。庶歌之婉媚。衆體參具。餘絢相鮮。皆可以粉澤中情。衣被來者。至于玩而無斃。味之逾旨。則啓卷者可知。不待贊而顯。僕曩自童齒。事君于無容之黨。優評定價。均于著蔡。及此承命。且俾冠簪。銜知感舊。欣榮參半。因輒推君之所以好逮名之所以立。皆詳言之。亦康成譜詩之義也。凡古律若干首。離爲若干卷。列于左方云。

元憲集卷三十六

記

台州嘉祐院記

建塔廟。散香華。奉經典。攝受妄迷。而爲功德。有爲者爲之。雖然。佛滅度二千年。世與法交相喪。濁劫下根。誠爲愚冥。非廣示像法。無以震動而傾駭之。使趨善良。神道化時。叵得而已。沙門長吉。當茲世爲功德者也。初師以釋子之秀。來上都。會譯場。高選義學僧。敷演祖教。名在籍右。始與龍象爲徒。而覺華餘光。注射物境。頗作歌詩雜擬。輒自翼其宗。由是益爲人聞。俄詔賜紫方袍。號梵才大師。勝流欽風。多所延供。久之。厭著謝去。復山林之遊。歲在降婁。始還台州。州守悅其風。虛淨名菴。以舍之。惟師行嚴。而身修。寓曠而氣安。能示方便。悅可大衆。居三年。道益光明。台人異焉。捐金抵璧。踵往瞻事。四方來者。與麻革俱。乃闢精廬。而肆之。刊林衡。鏤巖椒。棘如而堂。蝟如而庭者。且數百筵。朝薰夜祓。供擬尤具。九年。復作一成臺。置大般若經三百篇。及刻千劫佛像。彼貨與力。不募自至。弗可貲紀。師復砭膚取血。書維摩經。實神爲要。又欲推慧命而廣之。乃謀于公卿大人。于是龍圖閣直學士南陽葉君。倡始籲謀。分繕寶典。凡臺閣方面知名士數十族。叢喜造捨。滲然寫庸。閱三年。臺成。約金奉像。皮而安之。黑白相趨。距躍圍繞。以爲去聖滋遠。有能駕其說。植德于人。令夫威神巍巍。現前如親。炙面命不在是經乎。因是經讀誦悟入。培五緇。泯空色。攪萬

異爲一真。其爲福又可稱量耶。僕頃與師遊。樂其誓願之就。且枉錫顧我。丐辭以永傳。因宣是義而偈之。曰。臺屹而崇。摧我慢而恭兮。經華而精。竦我怠而誠兮。像嚴而顯。破吾魔而善兮。報我四恩。常不滅而存兮。師聞之。謂余言爲信。若其營綜之烈。投施之衆。日月之謹。大槩具之。至夫筆不可文。言不能宣者。僕與師均寄一歎而已。

緹巾集記

余幼學爲文。尤嗜篇什。而不能工也。然性習所牽。爲之不已。往往應和出諸公間。輒爲名公訓獎。余與子京初試吏罷歸。中山劉子儀見索近詩。因各獻一編。他日劉公取當世文士古律詩作句。置齋中。人不過一兩聯。惟余兄弟所作。獨占三十餘聯。自是劉公深加訓獎。雖叨課雜發。亘以歲月。然每自陋其辭。未嘗綴緝。叢章墮棄。亡逸頗多。一日忽得新舊詩十餘卷于几案間。乃小兒充國等所次。覽之不覺掩口胡盧而笑。謂之曰。此燕石也。與瓦甃無異。雖緹巾什襲。庸足寶乎。命亟去之。兒曹懇祈留于舍中。弗廣布也。因取持藁近侍。出入藩輔。至守鄭日所賦。姑爲限斷。兼以志擁施之歲云。凡五百餘首。勒成十二卷。命曰緹巾集。莒國公記。

碑銘

成都府新建漢文翁祠堂碑銘

蜀之廟食千五百年不絕者。秦李公冰。漢文公翁。兩祠而已。冰爲蜀鑿離堆。逐悍水以溉。所及常無旱年。西人德之。因言冰身與水怪鬪。怪不勝死。自是江無暴流。蛟蜃怖藏。人恬以生。故侈大房殿。歲繫羊豕雉。

魚伐鼓嘯籥。傾數十州之人。人得侍祠奔走。鼓舞以娛悅。神祝已傳。嘏而後敢安。翁之治蜀。開學校。以詩書教人。澡熨故俗。長長少少。親親尊尊。百姓順賴。其後司馬相如。王褒揚雄。以文章倡。張寬以博聞顯。嚴遵李仲元。以有道稱。何武入爲三公。漢家號令典章。赫然與三代等。蜀有儒自公始。班固言之既詳。初公爲禮殿。以舍孔子及七十二子之像。殿右廡作石室。舍公像于中。晚漢學焚。有守曰高。朕能興完之。後人又作朕像。進偶公室。歲時長吏率掾屬諸生。奉籩豆饗。薦于前。虔踴謹潔。一再奠而退。辭無敢不信焉。冰以功。公以德。功易見。德難知。故祀雖僭而優狹異焉。嘉祐二年。余知益州。往款公祠。至則區位湫偃。埃蝕垢蒙。不稱所聞。大懼禮益懈忽。神弗臨享。其明年乃占學宮之西。正位鳩工。弗亟弗遲。作堂三楹。張左右序。及獻廡。大抵若干間。布尋以度堂。累常以度庭。疏牕以快顯。壯闔以嚴閉。采有青丹。陛有級夷。瓦密棟彊。若棘若飛。乃肖公像于廳間。繪相如等于東西壁。本古學之復。莫若朕。本今學之盛。莫若樞密直學士蔣公堂。故繪二公于其間。皆配祠焉。于是擇日告成于神。揖而升。簠罍果湑。脯脩紛糴。而有容。可以告虔。趨而降。疊尊巾洗。席燎竝施。而不息。可以盡儀。相者循循。任者舒舒。禮生于嚴。廣靈安于閒寂。故也。噫。自公之來。蜀之人自視若鄒魯。宋興名臣鉅公。踵相逮于朝。先帝時。巨盜再作。亂弄庫兵。爭劍閣。是時蜀豪英無一汙賊者。羣頑愁窘。不容喘而滅。非人好忠家知孝。使然耶。所使然者。不自公歟。傳曰。非此族也。不在祀典。公在之矣。則是祠之作。願自余而古。無俾壞息云。祠之興。同尙之賢。則轉運使趙抃。及提點刑獄使者凡三人。贊輔之勤。自通判軍州事祝詒以降。六人。營董之勞。自兵馬都監毛永保而下。二人。咸盡

像于西廡。列官里于石陰。云銘曰。公二千石。兮守大邦。冠峩峩兮紱斯皇。出有瑞節兮車騎羅。石室孔卑兮人謂何。新堂翼兮耽耽。庭廣直兮序巖巖。吏奉承兮不譁。神來格兮此其家。儼羣賢兮竝陳。公所教兮如其仁。庖魚脰兮俎肉鮮。神來享兮憺蜿蜒。公教在人兮無有頗。蜀賢不乏兮才日多。俗祥順兮孝慈公。祀百世兮庸可知。

連珠

連珠一首

山有梗梓之材。居山者芟草而舍。田有禾稷之實。力田者半菽而飽。廐有驥騄之乘。掌廐者羸股而步。此所謂役于物者。智不逮乎物也。無木者有華榱之蔭。無田者有嘉穀之享。無廐者有上駟之御。此所謂役物者。智包乎物也。故君子逸于用德。小人勞于用力。

論

丙吉論

昔丙吉之相漢也。出見死傷而不問。見牛喘而問之。人或譏焉。吉曰。人鬪相殺。長安令京兆尹之職。歲盡丞相課其殿最。奏行賞罰而已。丞相不親小事。非所以道路問也。方春少陽用事。未可暑。恐牛近行用暑而喘。此時氣失節。三公典調陰陽。職當所憂。是以問爾。播厥前史。著爲話言。流風未渝。來者肯效。余恐慕其名而失其實。誑于前而惑于後也。可無辯哉。請舉其略。萬物紛錯。最靈者人。二氣休咎。所感者政。人和

于下。則天從于上。政敗于國。則氣沴于時。孝婦就刑。三歲爲之不雨。冤囚呼獄。九夏以之降霜。且匹庶存誠。猶足感天地之怒。而普率在御。能無損陰陽之和。由斯而談。則羣鬪死傷。非小事也。牛近而喘。非精察也。漢家之制。丞相無所不統。上則建道德。明禮樂。以輔天子。次則秉法令。申詔條。以率百官。下則省征徭。恤鰥寡。以綏萬姓。傳曰。天子之宰。通于四海。其是之謂乎。非若占筮卜祝之流。區區以陰陽爲職也。夫死傷橫路。是生殺之不禁。生殺不禁。是教化之不立。教化不立。然後陰陽失其序。陰陽失其序。然後寒暑乖其方。寒暑既乖。則萬物皆失其性矣。寧惟牛喘乎。吉徒知暑近而失時。不知政敗而傷氣。徒知小事之不知。不知庶職之已墮。昔一人向隅。堂上爲之不樂。一物失所。隍中爲之軫慮。況殍尸蔽道。生民絕命。內無惻隱之志。外無賞罰之令。乃曰待歲盡。以舉殿最。則冤濫之積。所傷多矣。愆伏之患。其防後矣。武王扇暍。事非大惠。而天下歸其仁。成湯祝網。理非宏業。而海內從其命。若吉之意。則二聖者。不當于道路問也。必謂一畜之喘。可辨乎寒暑。則良民之死。反不害于陰陽。斯益見慕變理之虛名。失彌綸之大要。言無所據。事無所稽。玷經邦論道之猷。取貴畜賤人之責。詩曰。白圭之玷。尚可磨也。斯言之玷。不可爲也。其丙吉之謂乎。後之者。或以不撓物務爲高。不治政事爲達。生靈殄瘁。移過于有司。巖廊拱默。自安于高位。晉魏而下。清談喪國者。未必不源于是也。可譏也哉。故牛喘之祥。由人事而來也。爲國者。未有先寒暑而後敷政教。余又不知問喘之後。欲何術以調之。必若推精禋之源。攷幽顯之效。解二氣之相沴。通四時之大順。非求之于政。視之于民。則無以動天地而感陰陽。平邦國躋仁壽。今吉舍敗政而不問。而欲氣之順。若雖使

臯弗能也。見死命而不恤。而望時之和。若雖稷契弗能也。舍本徇末。何其悖哉。

說

蠶說

里有織婦。著簪葛屨。顏色憔悴。喟然而讓于蠶曰。余工女也。惟化治絲枲是司。惟服勤組紉是力。世受蠶事。以蕃天財。爾之未生。余則浴而種以俟。爾之既育。余則飭其器以祇事。爾食有節。余則采柔桑以薦焉。爾處不恩。余則引溫室以養焉。爾惟有神。余則蠲其祀而未嘗黷也。爾惟欲繭。余則趣其時而不敢慢也。爾欲顯素絲之潔。余則具練盆澤器以奉之。爾欲利布幅之德。余則操鳴機密杼以成之。春夏之勤。髮蓬不及膏。秋冬之織。手胝無所代。余之于子。可謂殫其力矣。今天下文繡被牆屋。余卒歲無褐。緹帛嬰犬馬。余終身恤緯。寧我未究其術。將爾忘力于我耶。蠶應之曰。嘻。余雖微生。亦稟元氣。上符龍精。下同馬類。嘗在上世。寢皮食肉。未知爲冠冕衣裳之等也。未知禦雪霜風雨之具也。當斯之時。余得與蠕動之儔。相忘于生生之域。蠢然無見。象之樂。熙然無就。烹之苦。自大道既隱。聖人成能。先蠶氏利我之生。蕃我以術。因絲以代。繭因帛以易。章幼者不寒。老者不病。自是民患引而余生殘矣。然自五帝以降。雖天子之后。不敢加尊于我。每歲命元日。親率嬪御。祀于北郊。築宮臨川。獻繭成服。非天子宗廟黼黻無所備。非禮樂車服。旂常無所設。非供祀無制幣。非聘賢無束帛。至織至悉。衣被萬物。女子無貴賤。皆盡心于蠶。是以四海之犬。億民之衆。無游手而有餘帛矣。秦漢而下。本搖末蕩。樹奢靡以廣君欲。開利塗以窮民力。雲錦霧縠之

巧歲變霜紈冰綃之名日出。親桑之禮頹于上。災身之服流于下。倡人孽妾。被后飾而內閨中者。以千計。桀民大賈。僭君服以游天下者。非百數。一室御績。而千屋垂繒。十人漂絮。而萬夫挾纊。雖使蠶被于野。繭盈于車。朝收暮成。猶不能給。況役少以奉衆。破實而爲華哉。方且規規然重商人衣絲之條。罷齊官貢服之職。衣弋綈以示儉。襲大練而去華。是猶捧由堦尾閭之深。覆杯救崑岡之烈。波驚風動。誰能禦之。由斯而談。則余之功。非欲厚嗇身以侈物化。勢使然也。二者交墜于道。奚獨怒我哉。且古姜嫄太姒。皆執子之勤。今欲以一己之勞而讓。我過矣。于是織婦不能詰。而終身寒云。



王雲五主編

叢書集成初編

元 憲 集

四 冊

中華民國二十四年十二月初版

撰 者 宋 庠

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

*O六二六一

第

號



1871

3

4

1871